



12


BIBLIOTHECA CIVIT. EMANUELE

11 B

4

M





14-27.e.17

NATVRALIS PHILOSOPHIÆ

TOMVS SECVNDVS.

Quæ de Motu, Infinito, Loco Vacuo,
Tempore, alijsque ad Motum
pertinentibus differit.

AVCTORE

P.M.F. IOANNE

DE S. THOMA

LISBONIENSI

Ordinis Prædicatorum.

Complutensis Academiæ publico

Theol. Profefs. in Cathedra

Vespertina,

*Collegij S. Thomæ Regente, & Sacræ
Inquisitionis Censore.*



BONONIÆ, M.DC.LXXXIV.

Typis Iosephi Longi, Super. permissa.



INDEX

QVÆSTIONVM, & Articulorum.

Summa Textus Libri Tertij Physicorum. Pag. i

De Motu , & Infinito.

QVÆSTIO QVARTADECIMA :

De Motu , & Actione .

- A**rticulus I. Explicatur definitio Motus , & eius essentialia constitutiva. pag. 14
- Articul. II. Vtrum Motus distinguatur ab actione , & passione , à termino à quo , & ad quem. 23
- Articulus III. Quid sit actio , & quotuplex , & quis sit formalis Terminus eius. 37
- Articulus IV. Vtrum actio transiens subiecti uè sit in agente. 47

QVÆSTIO QVINTADECIMA.

De Infinito .

- A**rticulus I. Quid sit Infinitum , & in quo sit punctus difficultatis. 59
- † 2
- Arti-

Index Quaest. & Art.

Articulus II. Vtrum implicet dari infinitum
actu secundum quantitatem, vel intensio-
nem. 65

Articulus III. Expediuntur difficultates & ar-
gumenta contra nostram sententiam. 75

Summa Textus Libri Quarti Phy-
sicorum. pag. 83

De Loco Vacuo, & Tempore.

QVÆSTIO SEXTADECIMA.

De Loco, & Vbi.

Articulus I. Quid sit locus extrinsecus, &
immobilitas eius. 103

Articulus II. Quid sit Vbi, seu locus intrinse-
cus. 117

Articulus III. Vtrum omnibus corporibus con-
ueniat esse in loco, & habere Vbi. 125

Articulus IV. Vtrum duo corpora possint pene-
trari in eodem loco diuina virtute. 133

Articulus V. Vtrum implicet vnum corpus esse
in pluribus locis circumscriptiue. 141

QVÆSTIO DECIMASEPTIMA.

De Vacuo.

Articulus I. Vtrum vacuum sit naturaliter
dabile. 154

Articulus II. Vtrum corpus in vacuo possit mo-
ueri. 163

QVÆ.

Index Quest. & Art.

QVÆSTIO DECIMAOCTAVA.

De Tempore.

- A**rticulus **I.** Vtrum Tempus sit aliquid reale in genere mensuræ durationis. 173
- A**rticulus **II.** Vtrum realis existentia temporis solum inueniatur in instanti, vel etiam in alijs partibus. 186
- A**rticulus **III.** Quod sit subiectum intrinsecum, & extrinsecum temporis. 194

Summa Textus Libri Quinti Physicorum. pag. 204

De Distinctione, Vnitate, & Contrarietate Motus.

QVÆSTIO DECIMANONA.

De Vnitate, & Contrarietate Motus.

- A**rticulus **I.** Vtrum genera motus sumantur penes diuersa Prædicamenta ad quæ est motus. 216
- A**rticulus **II.** Ad quæ Prædicamenta non detur motus per se. 225
- A**rticulus **III.** Ad quæ Prædicamenta detur per se motus. 233
- A**rticulus **IV.** Vnde sumatur vnitas numerica motus. 245
- A**rticulus **V.** Quæ sit contrarietas in motibus, & vnde sumatur. 250
- Sum.

Index Quest. & Art.

Summa Textus Libri Sexti Physicorum.
pag. 255

De Divisione Motus, & Consinni per partes.

QVÆSTIO VIGESIMA.

De partibus, & indiuisibilibus Consinni.

Articulus I. Quid sint partes proportionales, & indiuisibilia. 273

Articulus II. Vtrum indiuisibilia, & partes proportionales sint actu infinitæ in Continuo. 282

Articulus III. Vtrum Continuum componatur ex solis Indiuisibilibus. 292

QVÆSTIO VIGESIMA PRIMA.

De Inceptione, & Desitione rerum.

Articulus I. Explicantur regulæ inceptionis, & desitionis in permanentibus. 305

Articulus II. Regulæ inceptionis, & desitionis in successiuis, & instantaneis, & quiete. pag. 314

Summa Text. Libri Septimi Physicorum.
pag. 325

De Comparatione mouentium, & mobilium.

QVÆ.

Index Tract. & Cap.

QVÆSTIO VIGESIMASECVNDA.

De Conditionibus requisitis ad mouendum.

Articulus I. Vtrum omne quod mouetur ab alio moueatur. 331

Articulus II. Vtrum requiratur approximatō mouentis ad mobile vt operetur. 342

Summa Textus Libri Octauī Physicorum. pag. 351

De Motus æternitate, & reductione in primum motorem.

QVÆSTIO VIGESIMATERTIA.

De Motu verum naturalium, & proiectorum.

Articulus I. Vtrum Grauiā & Leuiā moueantur à se, vel à principio extrinseco. 363

Articulus II. Qua vi moueantur proiecta. 383

QVÆSTIO VIGESIMAQVARTA.

De Æternitate Motus, & primo eius motore.

Articulus I. Vtrum res permanentes poterunt esse ab æterno. 394

Articulus II. Vtrum repugnet res successiuas fuisse ab æterno. 401

Articulus III. Quid Philosophus demonstrat de Deo ex vi motus. 409

QVÆ.

QVÆSTIO VIGESIMAQVINTA.

De Subordinatione causæ secundæ ad primam.

Articulus I. Quid sit concursus simultaneus,
& quomodo distinguatur à concursu cau-
sæ primæ. 417

Articulus II. Vtrum detur realis & physicus
conkursus præuius in causa determinans il-
lam ad causandum. 427

Articulus III. Expediuntur difficultates circa
præmissa. 447

Articulus IV. Vtrum causa per accidens ut
Casus & fortuna inueniatur in subordinatione
causarum. 460

QVÆSTIO VIGESIMASEXTA.

De Instrumentis.

Articulus I. Quæ sit propria differentia Causæ
instrumentalis à principali. 469

Articulus II. Vtrum in omni instrumento re-
quiratur aliqua propria operatio ad effectum
principalis agentis. 489

CIRCA LIBRVM

Tertium Physicorum.



IN hoc libro de duobus agit Aristot. scilicet, de motu & infinito, & complectitur totus liber octo capita. De motu agit tribus primis capitibus, de infinito in reliquis. Cur autem de his duobus agat in hoc Tertio Libro, diximus in principio agendo de ordine istorum librorum.

SVMMA TEXTVS

Libri Tertij Physicorum.

Capite primo duo facit Philosophus. Primo praeimit tres diuisiones tanquam quid praesuppositum ad inueniendam definitionem motus, quam traditurus est cap. secundo. Secundo, ostendit motum cadere in praedictas diuisiones. Circa primum, diuisio est triplex; prima est. Ens, aliud est in actu, aliud in potentia. Quae diuisio non distinguit ens per genera, quia in omni genere inuenitur actus & potentia. Secunda diuisio. Ens diuiditur per decem praedicamenta, scilicet substantia, quantitas, qualitas, &c. Tertia diuisio specialiter est in his quae se habent ad aliquid, motus enim definitur per ordinem ad mobile; nam relati-

ūm aliud est , quod fundatur super abundantiam & defectum , idest super quantitatem penes maius & minus, aliud quod fundatur super mouens & mobile , actiuum , & passiuum , de qua diuisione plura agit Philosophus 5. Metaphys. tractans de fundamentis, & diuisione relationum.

Circa secundum ostendit ad quam diuisionem ex istis pertinet motus , & dicit duo. Primò , quòd motus reducitur seu pertinet ad res, ad quas est motus. Secundum , quòd motus diuiditur per genera rerum . Ratio primi est, quia motus est quid imperfectum in his generibus, & omne imperfectum reducitur ad suum perfectum . Ratio secundi est , quia in omnibus generibus inuenitur priuatio & forma, imperfectum & perfectum ; vna enim differentia est perfectior, alia imperfectior. Igitur secundum trāsitum de imperfecto ad perfectū, quod est motus, tot sunt diuisiones motus, quot entis.

In capite secundo tria præstat Philosophus. Primò definit motum , & particulas definitionis eius explicat . Secundò, ostendit definitionem benè esse assignatam . Tertiò , tractat illam quæstionem , an motus conueniat mobili, vel mouenti .

Quoad primum definit motum hoc modo : *Motus est actus existentis in potentia ut tale est, siue prout in potentia est* : dicitur actus; quia per motum deducitur aliquid de potentia in actū, ergo ipse motus est actus , sicut ædificabile dicitur esse in potentia ; cū autem ædificatur, reducitur in actum . Secundò, dicitur existentis in potentia , eò quòd omnis actus propriè est illius in quo inuenitur, motus autem semper

per inuenitur in aliqua potentia, agit enim aliquid vt est in actu, & mouetur prout est in potentia, sicut si aliquid est actu calidum, & potentia frigidum, non mouetur in quantum calidum, sed mouetur vt sit frigidum. Tertiò dicitur, in quantum huiusmodi, quia contingit aliquid esse in actu & potentia: nihil autem mouetur vt est in actu, sed vt est in potentia, sicut ex ære fit statua, non in quantum est æs in actu, sic enim non fit, nec mouetur, sed iam est, sed vt est statua in potentia.

Quoad secundum ostendit hanc definitionem benè esse assignatam; tum directè, tum indirectè. Directè quidem, quia eius quod est in potentia, datur aliquis actus, sed ædificabile, v.g. vel alterabile est in potentia; ergo oportet illi assignare actum, vel ergo iste actus est ipse terminus, v. g. domus ædificata, vel ipsa actio, id est ædificatio; domus ædificata esse non potest, quia hæc non actuat ædificabile, sed ædificatione reducitur in actum, ergo ædificatio est actus eius, & hæc est motus, ergo motus est actus existentis in potentia. Indirectè verò id probat, quia definitiones Antiquorum videntur incongruæ, qui dicebant motum esse quandam alteritatem, alij quòd esset quxdam inæqualitas, alij quòd non ens, quia semper in motu aliquid diuersitatis, vel inæqualitatis, vel non entis inuenitur, cum non semper eodem modo se habeat: sed ex hoc solum sequitur, quòd motus debeat habere aliquid de potentia, & aliquid de actu, cum sit actus imperfectus, non autem purè collocari in genere non entis, vel inæqualitatis, vel potentialitatis, sed vtrumque debet dici, scilicet

quòd sit actus cum aliqua potentia:

Quoad tertium ostendit, quòd motus conuenit non potentiae mouenti, sed potentiae mobili, & sic potest alia definitione definiri motus, scilicet, *quod sit actus mobilis*, quia & si mouens aliquando moueatur, tamen id non est in quantum mouens, sed in quantum mobile, id est in quantum patitur tangendo.

In capite tertio tria facit Philosophus. Primò soluit quandam dubitationem ex precedenti capite relictam; an motus subiecteretur in mobili, vel in mouente, & sit actus vtriusque. Secundò proponit aliam dubitationem in vtrâque partem, & resoluit, scilicet; an actio & passio sint in eodem subiecto. Tertiò colligit ex dictis, quomodo possit quilibet motus in particulari definiri ex applicatione definitionis motus in communi.

Circa primum ex dictis in cap. præcedenti soluit id, quod aliqui quaerunt, an motus sit in mobili an in mouente; & dicit subiectari in mobili vt tamē causatur à mouente, quia actus est in eo, cuius est actus, & quod reducit de potentia ad actum, tale autem est mobile respectu motus.

Circa secundum disputat ad vtramque partem difficultatem propositam, an actio & passio sint in eodem subiecto, supponendo prius quòd actus actiui vocatur actio, & actus passiuus; passio; quia illud quod est finis & opus vniuscuiusque est actus eius. Vnde arguit, quia si actio est in agente tanquam motus distinctus, sequeretur agens in quantum agens moueri, quia illud mouetur vbi est motus. Si verò est in passio, sequitur quòd proprius actus non sit
in

in eo, cuius est actus, nec enim actio est in agente, cuius est proprius actus. Quod si dicatur, quod actio & passio sunt idem motus, sequuntur quatuor inconuenientia. Primum, quod idem secundum speciem erit actus diuersorum, scilicet agentis & passi. Secundum, quod idem erit actio & passio. Tertiò, quod idem erit agere & pati, addiscere & docere. Quartò, quod omne agens patietur, & patiens aget, formaliter loquendo.

Hanc autem dubitationem soluit Philos. dicendo, quod actio & passio sunt vnus motus, qui secundum quod est ab agente dicitur actio, & secundum quod in patiente dicitur passio. Et sic secundum diuersam rationem est actus duorum, agentis vt à quo, patientis vt in quo. Ad inconuenientia respondet. Primò ad id, quod inferebatur, quod docens addisceret, & agens pateretur, negat id sequi, quia cum agere & pati sint diuersa secundum rationem seu respectum, licet idem secundum rem, non sequitur quod cuiusque conuenit vnum conueniat & aliud secundum eandem denominationem. Ad tertium & ad secundum inconueniens dicit, non sequi quod agere sit pati, & actio sit passio, sed solum quod sint idem cum motu, seu eadem res quæ est motus, sed diuersa secundum formalitatem, sicut licet sit idem spatium inter duos terminos, est tamen alia distantia vnius termini, & alterius.

Denique quoad tertium ostendit, quomodo possit ex definitione motus sic vniuersali definiri in particulari quilibet motus, v. g. alteratio vel motus localis dicendo, quod est actus alterabilis in potentia, prout in potentia, vel

mobilis secundum locum, &c.

A capite quarto incipit disputare de infinito. Et procedit Phil. hoc modo, quod in hoc capite quarto disputatiue tractat materiam pro vtraque parte. In quinto capite reprobatur opinionem de infinito, quæ erat apud antiquos. In capite sexto incipit determinare veritatē quod ad tria. Primò, quoad an est ipsius infiniti. Secundò, quoad quid est in capite septimo. Tertiò, respondendo ad rationes oppositas in capite octauo.

Igitur in hoc capite quarto, tria facit Philosophus. Primò, proponit seu supponit pertinere ad Philosophum naturalem agere de infinito. Secundò, ponit quasdam opiniones antiquorum circa infinitum. Tertiò, incipit disputatiue inquirere veritatem.

Quoad primum ostendit, quod pertinet ad naturalem tractare de infinito, quia pertinet agere de motu & magnitudine, & continuo, quæ habent rationem finiti vel infiniti, quia habent diuisibilitatem, quæ vel finitè, vel infinitè diuisibilis est.

Quoad secundum proponit opiniones antiquorum de infinito, & quantum ad id in quo differebant, & quantum ad id in quo conueniebant. Et quoad differentiam fuerunt duo ordines Philosophorum. Primi, qui posuerunt infinitum in substantia, vt Pythagoras & Plato, quia Pythagoras reducebat omnia in numeros, quos putabat esse substantias rerum. Plato verò in ideas separatas, quæ erant substantiæ. Et numeri dicebantur extra eorum infiniti; idæ verò carent loco. Alij posuerunt infinitum in aliquo accidentali, vt naturales

Rales Philosophi, præsertim Anaxāgoras, & Democritus, qui ponebant aliquam substantiam pro primo principio; dicebant autem accidere illi infinitum, sicut Anaxāgoras ponebat infinitas partes similes, v. g. carnis vel ossis, & quòd quælibet pars erat commixta alteri & confusa, disgregabatur autem per intellectum, qui est principium rerum. Democritus autem posuit non partes infinitas, sed indiuisibilia finita. Conveniebant autem isti Philosophi in hoc, quòd attribuebant infinito quatuor proprietates. Prima, quòd infinitum esset principium in entibus, quia infinitum non est ex alio principio. Secunda, quòd sit ingenerabile & incorruptibile, quia ipsum non est ex alio. Tertia, quòd contineat & gubernet omnia; id enim videtur pertinere ad principium. Quartò, dicebant infinitum esse aliquid diuinum & immortale, quia est incorruptibile.

Quoad tertium ponit rationes disputatim. Primò ad ostendendum, quòd detur infinitum. Secundò ad ostendendum, quòd hoc sit valdè dubium, & difficile. Et primum ostendit quinque rationibus; tùm ex ipso tempore, quod caret principio & fine, vt erat tunc communis opinio; tùm ex diuisione magnitudinis, qua vtuntur mathematici in infinitum; tùm ex perpetuitate generationis & corruptionis, quæ finem non habet; tùm ex eo, quòd omne corpus finitum ab alio superiore continetur; aut ergo erit processus in infinitum, aut deueniemus ad aliquod, quod in altero non continetur; & si detur primum, erit numerus infinitus, & si secundum, erit magnitudo infinita

illius ultimi corporis; tùm deniquē ex imāginatione & intellectu, qui in infinitum potest imaginari & apprehendere, quidquid autem apprehendit intellectus, dicebant antiqui, quòd correspondet illi aliquid ad extra.

Ex altera autem parte ostendit non esse certum dari infinitum, propter multa inconuenientia quæ inde sequuntur, vt in sequentibus ostenderetur, & propter multa difficilia quæ in illo inuoluuntur, præsertim vtrum infinitum sit substantia vel accidens, & an sit magnitudo aliqua sensibilis, de quibus postea tractabitur. Inter multas autem acceptiones infiniti docet propriè infinitum accipi pro eo, cuius transitus est simpliciter sine fine, vt linea quæ non habet terminum.

In quinto capite impugnatur Philosophus infinitum. Et diuiditur in duas principales partes. In prima impugnatur opinio Platonis & Pythagoræ de infinito separato. In secunda impugnatur opinio de infinito sensibili, seu in corpore naturali.

Quoad primum ostendit, quòd substantia non potest esse infinita, quia substantia sine quantitate non est diuisibilis; ergo non est infinita, quia infinitum est diuisibile in partes infinitas; nisi sit infinitum negatiuè sicut punctum, de quo non agimus in præsentī. Si autem substantia est infinita ratione quantitatis, iam non erit infinita in quantum substantia, neque infinitum sub ratione infiniti erit principium & elementum rerum naturalium, vt Platonici dicebant, quia principium debet esse substantia, non accidens.

Quoad secundum impugnatur opinio dicent-

Centum inueniri infinitum in corpore sensibili. Primò, per rationes probabiles. Secundò, per rationes physicas supposito hoc vniuerso. Tertiò, nulla suppositione facta, sed absolutè.

Relictis autem rationibus probabilibus, probatur supposito vniuerso non dari infinitum, quia omne corpus naturale, aut est compositum, aut simplex. Si est compositum, non potest esse infinitum, quia elementa, ex quibus componitur, vel sunt finita, & sic non possunt constituere infinitum; vel alterum illorum est infinitum, & non alia, & sic illud infinitum consumeret omnia, quia infinitum omnia occupat, & sic non relinqueret alijs locum; vel omnia sunt infinita, & sic non poterunt coniungi ad componendum mixtum, quia vnumquodque occupabit omnia, & sic non poterunt coniungi, nisi penetrentur, quod repugnat. Si autem sit corpus simplex infinitum, illud conuerteret in se alia corpora simplicia, quæ sunt elementa, siquidem elementa ad inuicem contrariantur, & vnum agit in aliud, & sic infinitum, consumeret omnia alia, nec relinqueret in vniuerso alia elementa, cum tamen videamus plura elementa requiri ad vniuersum.

Et ex hoc probatur absolutè non dari infinitum, quia eius partes vel erunt finitæ vel infinitæ. Si finitæ, non possunt componere infinitum, nisi altera ex eis infinita sit, & illa consumeret reliquas, vt supra dictum est. Si verò omnes sunt infinitæ, sequitur quòd loca sint infinita & elementa sint infinita, si corpus illud constet partibus dissimilibus, & reddit argumentum supra factum. Si autem omnes partes sint similes, sequitur quòd tale corpus moueri

non poterit, neque secundum se totum, quia occupat omnia, neque secundum partem, quia non habebit determinatum centrum in illo corpore infinito ad quod moueatur, & sic determinato motu & ad certum terminum non mouebitur.

Alijs tribus rationibus probat non dari corpus sensibile infinitum, quæ procedunt ex parte loci, quia neque potest moueri sursum neque deorsum, neque habet aliquam determinatam positionem, ut ante & retro, sursum & deorsum, & denique nullum habet locum, neque est alicubi, quia caret omni termino, & circumscriptione, sine qua alia loca & positiones non dantur.

In sexto capite determinat Philosophus ex propria sententia de infinito, an sit; & in sequenti cap. quid sit. Et in hoc capite duo facit. Primò, ostendit quomodo infinitum sit & quomodo non sit. Secundò, comparat diuersa infinita ad inuicem. Quoad primum dicit infinitum non esse in actu, esse tamen in potentia. Nam quòd infinitum non sit simpliciter in actu, in capite præcedenti probatum est, quòd verò non sit negandum dari in potentia probat; tùm quia aliàs non daretur tempus infinitum, quod apud ipsum & antiquos Philosophos magnum erat inconueniens, ut dicitur in lib. 8. tùm etiam, quia aliàs numerus non esset in infinitum augmentabilis, quantitas non esset in infinitum diuisibilis, sed deueniretur ad aliquam, quæ vltèrius diuisibilis non esset; dandum est ergo infinitum potestate.

Huius autè occasione declarat Philosophus, quomodo intelligatur dari infinitum in potentia,

tia, intelligitur enim infinitum in potentia, non quia sit possibile poni, sicut æs dicitur statua in potentia, quia ex illo fieri potest: sed dicitur infinitum in potentia vel ratione additionis, vel ratione detractionis; quod præsertim apparet in successivis, in quibus unum fit post aliud, ut unus dies post alium, qui si sine termino succedant, dicitur infinitum in potentia, cuius una pars est actu, & reliquæ in potentia.

Quoad secundum comparat duo genera infinitorum. Primò, comparat infinitum temporis & generationis, quod est infinitum successivum cum infinito magnitudinis; in utroque enim una pars post aliam sumi potest, & semper id quod sumitur finitum est, sed in magnitudine partes permanent, in tempore autem & generationibus transcunt. Secundò, comparat infinitum additione & divisione cum eodem infinito magnitudinis; sicut enim magnitudo potest diuidi per partes in infinitum ita additione potest crescere per easdem, & utrumque est in potentia infinitum, & assimilatur materię, quæ potest recipere infinitas formas; actu autem non habet nisi unam; differunt autem, quia per diuisionem potest aliquid diuidi in infinitum, si autem per illas partes, quæ diuiduntur, fiat additio, non potest crescere in infinitum.

In capite septimo ostenso an sit infinitum, procedit in præsentī capite ad explicandum quid sit. Circa quod duo facit. Primò excludit aliquorum antiquorum definitionem de infinito, & quid sit declarat. Secundò assignat ex sua definitione rationem eorum, quæ de infinito dicuntur,

Quoad primum duo improbat in sententiâ antiquorum. Primum, quia definiebant infinitum id cuius nihil est extra, seu extra quod est nihil. Secundò, quia supponebant tanquam per se notum infinitum esse aliquid perfectum continens omnia. Et primum impugnat dicens, quòd potius infinitum debet definiri, *id cuius aliquid semper est extra, id est accipientibus unam partē semper alia restat accipienda*, quod ostendit quia illud cuius nihil est extra, etiam conuenit definitioni totius, & perfecti, tunc enim aliquid est perfectum & totum, seu integrum, quando nihil deest eorum, quæ debet habere, ergo confunditur definitio infiniti cum definitione totius seu perfecti.

Secundum improbat Philos. quia infinitum non est idem quod totum, seu perfectum, licet habeat quandam similitudinem cum illo, quatenus potestate est totum, non actu; est enim infinitum quod in infinitum potest diuidi vel augeri; vnde secundum se est in potentia; siue ad diuisionem siue ad additionem sine termino, non tamen actu est sine termino, quare tali infinito magis competit contineri, quod est materiæ & potentiæ, quam continere, quod totius & perfecti est.

Quantum ad secundum ex definitione infiniti à se tradita, reddit rationem duorum. Primum, quare infinitum per additionem non superat omnem magnitudinem: infinitum autem per diuisionem superat omnem paruitatem; nā quod crescit per additionem, semper tendit ad perfectum, & ad totum, quod utique finitatem & determinationem habet respectu partium, quas continet. Per diuisionem verò proceditur
à toto

à toto ad partes, & consequenter ad imperfectum, & ad materiam, quod infinitatem quandam & indeterminationem dicit. Secundum est, quare in numeris inuenitur aliquis terminus ex parte paruitatis, scilicet vnitas, non tamen ex parte magnitudinis, seu pluralitatis; cuius ratio est, quia numerus coalescit ex vnitatibus; vnitas autem indiuisibilis est in numerando, quia vltra vnitatem non numeratur. At verò numerus crescit per ipsam diuisionem continui, quæ in infinitum fieri potest, & sic numerus potest crescere in infinitum.

In capite octauo respondet Philosophus rationibus & inconuenientibus contra suam positionem de infinito, & facit duo. Primò ostendit, se non tollere infinitum, vt ponitur à Mathematicis, neque omnino tollere, vt ponitur à veteribus Philosophis. Nam pro Mathematicis non requiritur quòd detur aliquod infinitum sensibile, sed sufficit quòd sit aliquod infinitum imaginabile; puta linea aliqua imaginata sine termino: pro veteribus autem dicit posse admitti infinitum pro principio rerum, quatenus materia est vnum ex principijs, & materia est infinita in potentia ratione priuationis termini, & sic se habet admodum continui infiniti, quod est infinitum in potentia, & se habet vt materia; sed in hoc deficiebant veteres, quia ponebant infinitum continere alia, cum potius materiæ sit contineri & determinari.

Secundo accedit Philosophus ad soluendas rationes supra adductas pro infinito, quæ solutiones in textu sunt satis claræ.

DE MOTV ET INFINITO.

QVÆSTIO XIV.

De motu, & actione.

ARTICVLVS I.

Explicatur definitio motus, & eius essentialia constitutina.

Motus etsi pluribus modis ab Aristotele declaratus, vnica tamen definitione definitur, scilicet: *Actus entis in potentia prout in potentia*; licet enim dixerit Philosophus, quod motus est actus mobilis vt mobile, & iterum quod est actus actiui & passiui prout talia sunt, tamen per hæc non introducit nouam definitionem, sed explicat difficultates ex illa definitione ortas; scilicet quomodo motus pertineat ad mobile, & ad mouentem. Tota autem definitio ab Aristotele tradita ad hoc tendit, vt ostendat motum esse actum imperfectum, idest cui aliquid restat acquirendum, ad differentiam earum diffinitionum, quas tradiderunt antiqui, & Philosophus reprobat, qui collocabant motum sub non ente, vel sub inæqualitate, aut similibus, prout ex tex. cap. 1. colligitur.

Pro explicatione autem definitionis traditæ notanda sunt verba D. Tho. 3. Phys. lect. 1. vbi de natura motus loquens inquit: Quod antequam

quam aliquid moueatur, est in potentia ad actum perfectum, qui est terminus motus, & ad imperfectum, qui est motus, sicut aqua antequam incipiat calefieri, est in potentia ad calefieri, & ad calidum esse; cum autem calefit, reducitur in actum imperfectum, qui est motus, sed respectu sui, adhuc remanet in potentia. Quam doctrinam etiam tradit S. Doctor 11. Metaph. lect. 9. Ex quo colligitur, quod res potest considerari in triplici statu. Primò, in potentia tantum sine aliqua reductione ad actum. Secundò, in actu ultimo. Tertiò, medio modo, quando est partim in actu, partim in potentia. Et quando est in potentia tantum nondum mouetur, quando est in actu perfecto, seu ultimo cessat motus: quando medio modo se habet tunc est in moueri, & in transitu de vno ad aliud.

Ex his ergo explicatur definitio motus per suas partes. Primò enim dicitur *actus*, quasi loco generis, & sumitur actus pro eo, quod distinguitur à potentia abstrahendo ab actu perfecto, vel imperfecto. Et licet includat motus aliquid potentie, ponitur tamen in genere actus, & non potentie, quia præcipuum officium motus est reducere mobile in actum, licet quia id facit tanquam actus imperfectus aliquid potentialitatis includat. Inuenitur autem in motu duplex habitudo potentialitatis, altera respectu mobilis; seu subiecti recipientis motum, in quo conuenit motus cum alijs formis, quæ etiam reducunt subiectum de potentia ad actum informando illud. Et ad hoc explicandum ponitur sequens particula *entis in potentia*, idest subiecti existentis in potentia.

Non

Non autem dicitur corporis in potentia, ne supponatur id, quod probandum erit de subiecto motus, scilicet, quod sit corpus, qui est diuisibile. Altera autem habitudo potentialitatis in motu est ad vltiorem terminum, in quo distinguitur à reliquis formis, quæ scilicet actuant subiectum in quantum est in potentia ad se, motus autem actuat subiectum, non solum ut est in potentia ad se, sed ut est in potentia ad vltiorem terminum, & propterea dicitur, quod est entis in potentia, prout in potentia, sicut æs quando mouetur ad formam statux non actuatur à motu in quantum æs, sed in quantum in potentia ad statuum, ita D. Thom. 3. Physic. lect. 2. §. *Manifestat*, &c.

Ex qua explicatione soluuntur plures instantiæ, quæ contra istam definitionem obijci possunt. Nam potest argui, quod est redundans, quia conuenit alijs, & quod est diminuta, quia non explicat omnia, quæ sunt de essentia motus. Et quod conueniat alijs probatur, nam conuenit omnibus formis imperfectis, quæ relinquunt subiectum in potentia ad alias formas, ad quas ordinantur, & tamen non sunt motus, sicut forma embrionis relinquit materiam in potentia ad formam perfectam equi, & similiter calor ut quatuor ad calorem perfectum, ut octo, & tamen neque forma embrionis, neque calor ut quatuor sunt motus; ergo, &c. Quod verò sit diminuta, probatur, quia non explicat aliqua, quæ sunt de conceptu motus, v. g. quod sit ab agente, & in passio, & ad terminum ad quem, quæ habitudines sunt essentielles motui, cum motus essentialiter sit via & tendentia ab vno ad aliud, ergo definitio data yndique deficit.

Ad primum respondetur. Formam imperfectam dupliciter sumi posse. Vno modo, quia est imperfecta in ratione formæ comparatiuè ad aliam perfectiorem. Alio modo, quia non solum est imperfecta comparatiuè ad aliam formam, sed etiam habet statum potentiæ & imperfectionis, qui est tendere ad formam, tamquam ad terminum: hoc enim requiritur vt actus ille ita sit imperfectus, quòd non sit terminus motus; quantumcumque enim forma sit imperfecta in ratione informandi, si tamen non habet illum statum imperfectionis, qui est tendere, non est motus, sed terminus motus, nam hoc ipso quòd forma aliqua informat, & cessat tendere ad vltiorem terminum, cessat motus. Vnde calor vt quatuor licèt sit imperfectus in informando respectu caloris vt octo, tamen si cessat tendere ad calorem vt octo, non informat vt motus, sed vt forma imperfecta, & sic intelligitur definitio motus, quòd sit actus entis in potentia, prout in potentia, idest prout habens statum potentiæ, qui est tendere ad actum.

Ad secundum respondetur, quòd illæ habitudines etsi non ponantur expressè, ponuntur tamen virtualiter. Per hoc enim quòd dicitur *entis in potentia, prout est in potentia*, denotatur subiectum, quod patitur, seu transmutatur; sic enim est in potentia dum mutatur de vno ad aliud. Vbi autem est passio, virtualiter insinuatur actio, quia passio non est nisi transmutatio ab aliquo agente. Similiter habitudo termini à quo ad terminum ad quem, insinuatur in eadem particula, *prout in potentia*, intelligitur enim quòd sit in habitudine, & potentia
ad

ad ulteriorem terminum, qui est terminus ad quem, ubi consequenter insinuat terminus a quo, quia non est transitus ad terminum ad quem, nisi ex aliquo termino a quo.

Explicata definitione motus restat explicare, an conueniat omni motui, tam successiuo, quam instantaneo, tam continuo quam discreto, quod est inquirere, an successio, & continuitas sint de essentia motus hic definiti. Aliquorum enim sententia est solum motum successiuum in hac definitione includi, non mutationem instantaneam, ut generatio substantialis. Quam sententiam videntur tenuisse aliqui Antiqui, qui ut refert D. Thom. 11. Met. lect. 9. dicebant, quod motus est exitus de potentia in actum non subito: ex recentioribus tenent illam M. Soto 3. Physic. q. 1. conclus. 3. quem sequuntur Conimb. 3. Phys. q. 1. art. 2. ad 3. licet fateantur esse contra D. Tho. fundamentum est, quia tales actiones instantaneae non sunt actus entis in potentia, siquidem in vno, & eodem instanti completur tota mutatio, & sic tota est simul in actu, non partim in actu, partim in potentia, sicut requiritur ad rationem motus. Item quia aliàs creatio esset mutatio, quod negat D. Tho. 1. p. q. 45, art. 2. ad 2. & 4. nam est productio instantanea faciens transire de non esse ad esse, & non minus habet de potentia & actu secundum diuersas prioritates naturae, quam generatio, vel illuminatio. Denique, quia aliàs actus immanentes intellectus, & voluntatis essent motus hic definiti, siquidem sufficit quod sint mutationes instantaneae, & habeant actum, & potentiam secundum diuersa instantia naturae, non temporis.

Nihilominus difficultatem hanc ita resoluit
D. Tho. 5. Phys. lect. 2. in principio, ubi inquit:
Aristot. supra in 3. ubi motum definiuit, accepit
nomen motus secundum quod est commune omni-
bus speciebus mutationis, & hoc modo accipit
hic nomen mutationis; motus autem accipitur
magis strictè pro quadam mutationis specie. Ita
D. Tho. Ex qua doctrina colligitur in hac de-
 finitione definiri mutationem generaliter sum-
 ptam, prout comprehendit instantaneam, &
 successiuam, & hac ipsa est sententia M. Soto
 ubi supra. Ratio autem est, quia etiam muta-
 tio instantanea est actus entis in potentia, pro-
 ut in potentia, quia in generatione substan-
 tiali materia, quæ habet rationem subiecti, est
 in potentia mutationis, & transitus de vna for-
 ma ad aliam, ergo ipsa mutatio habet quidquid
 requiritur ad rationem motus sic definiti, si-
 quidem est actus existentis in potentia, sup-
 ponens ipsum subiectum, ut in potentia exis-
 tens, scilicet materiam primam: & de poten-
 tia transire ad actum, quatenus in eodem in-
 stanti datur fieri, & factum esse, & relinquen-
 do vnum terminum à quo, & transeundo ad
 terminum ad quem; ergo mutatio instantanea
 etiam in hac definitione motus comprehendit-
 tur. Quare Phil. in hac definitione motus po-
 suit exempla in omnibus mutationibus, altera-
 tione, augmento, motu locali, & generatione,
 ut patet in hoc tertio lib. lect. 2. apud **D. Tho.**
 Vnde non accepit generationē lato modo pro-
 ut etiam alterationem antecedentem compre-
 hendit; nam cum posuisset exemplum in alte-
 ratione, & augmento, non poterat iterum no-
 mine generationis intelligere alterationem.

Ceterum loquendo de mutatione instantanei actus immanentis intentionalis, illa excluditur à motu physico hic definito, ut patet per Aristot. 3. de Anima, tex. 28. ubi loquens de sentire, & intelligere, inquit; *Quòd alia est species motus; motus enim imperfecti actus, simpliciter autem actus alter est qui perfecti, ubi S. Tho. explicat hunc tex. inquit. Quòd motus physicus est actus existentis in potentia, quia videlicet recedens ab uno contrario, quandiu mouetur non attingit alterum contrarium, quod est terminus motus, sed est in potentia ad ipsum, & quia omne quod est in potentia, in quantum huiusmodi est imperfectum, idèd ille motus est actus imperfecti. Sed iste alius motus est actus perfecti, est enim operatio sensus iam facti in actu per speciem. Ita D. Thom. & similiter videri potest 1. part. q. 18. art. 1. Vbi satis profundè naturam motus explicat, quia in tantum dicitur esse in potentia, in quantum subiectum motus ita recedit ab uno contrario, quod nondum attingit aliud, sed aliquo modo est in potentia ad illud, & hoc est esse actum imperfecti, idèd, esse actum subiecti in tali dispositione positi, quod nondum habet formam, nec attingit illam, quod est imperfectè se habere ad illam; quando verò aliquid operatur attingendo actu ipsam formam quam habet, illa operatio non est motus de potentia ad actum, sed habens actum attingit actum, & idèd non continetur in illa definitione motus, qui est actus existentis in potentia, prout in potentia. Actus autem immanentes versantur circa obiectum, etiam quando actu habent illud, imò tunc perfectè operantur circa obiectum, quando magis actuant.*

actuantur ab illo, & possident illud, ergo talis operatio non consistit in motu physico hic definito procedente de potentia ad actum, & ideo dicitur motus perfecti, idest, non existentis in potentia. Unde patet operationem de se non requirere potentialitatem in eo, à quo procedit, sed saluari posse cum summa actualitate, inuenitur enim operatio remoto motu, quando operans non respicit obiectum ut non habitum, sed etiam habendo illud operatur circa illud cognoscendo, vel amando.

Ad argumenta supra posita respondetur. Ad primum, quod licet in eodem instanti generationis simul sit fieri, & factum esse, tamen verè inuenitur transitus, & mutatio de potentia in actum, secundum diuersa instantia, & prioritates naturæ, mutatur enim aliquid de non esse ad esse. In acta autem immanente, ex eo præcisè quod immanens est, non fit transitus de potentia ad actum circa obiectum cognitum, nisi per accidens, si obiectum non sit sufficienter unitum, aut habitum in ipsa potentia, per se enim loquendo quanto magis in actu habetur ipsum obiectum, tanto perfectior est operatio circa ipsum. Et licet producaturspecies expressa, ad quam est in potentia per speciem impressam, tamen non consistit ratio actus immanentis in huiusmodi productione; nam etiam si non producaturspecies expressa, sicut non produciturspecies in sensu externo, vel etiam postquam producta est in intellectu, datur vera operatio cognitionis circa obiectum; de quo amplius dicetur in tertio de anima.

Ad 2. de creatione respondetur. Non esse

III.



mutationem, quia deest illi subiectum, sine quo non datur actus existentis in potentia, atque adeo deficit illi una pars definitionis motus; dicitur tamen mutatio non ex parte subiecti, sed ex parte termini transeuntis de non esse ad esse, quod est significari per modum motus, ut dicit S. Thom. 1. p. q. 45. art. 2. ad 3. & constat ex dictis.

Quod vero attinet ad continuitatem motus, an sit de essentia motus, quod sit continuus, vel includatur etiam in hac definitione motus discretus? Respondetur, motum discretum alium inueniri in naturalibus, alium in spiritualibus. In spiritualibus non est aliud, quam pluralitas operationum indiuisibilium, & sic est extra latitudinem motus physici, qui diuisibilis esse debet. In naturalibus autem motus discretus non est aliud, quam plures motus continui interrupti, sicut quantitas continua diuisione facta redditur discreta. Est tamen differentia in hoc; quod quantitas discreta licet ex vi diuisionis, & multitudinis tantum non constituat particularem speciem quantitatis, quia tamen induit diuersam ordinationem partium diuisarum, & mensurationem, ideo numerus constituit diuersam speciem quantitatis. At vero motus discretus non induit diuersam rationem exeuntis de potentia ad actum, nisi tantum eam, quam habet continuus, per cuius interruptionem redditur discretus, & sic non constituit distinctam speciem, sed reducitur ad speciem continui.

Quod si ultimo inquiras; an motus localis Angeli includatur in motu physico hic definito? Respondetur in sententia D. Tho, motum

An-

Angeli fieri per ipsam actionem intellectus secundum quod habet efficaciam aliquid transmutandi, & sic ipsa actio mouendi Angeli est conceptio intellectus, vt expressè affirmat S. Doctor opusc. 11. artic. 3. Vndè consequenter remoueri debet motus localis Angeli à ratione motus physici, sicut ipse actus intellectus. Adhuc tamen abstrahendo ab hoc, etiam si motus localis sit aliquid præter conceptionem intellectus, excluditur tamen à motu physico, etiam quando est motus continuus in Angelo, quia non est simpliciter diuisibilis, sed solum ex parte effectus, non ex parte subiecti, in quo est motus, quia vt dicit D. Thom. 1. p. qu. 53. artic. 1. Angelus dum mouetur partim est in termino à quo, & partim in termino ad quem, vt tamen partialitas non referatur ad substantiam Angeli, sed ad locum, quia in principio motus continui Angelus est in toto loco diuisibili, à quo incipit moueri, sed dum est in ipso moueri, est in parte primi loci, quem deserit, & in parte secundi loci, quem occupat. Itaque motus Angeli est indiuisibilis subiectiue, diuisibilis autem terminatiue. Sed de hoc latius pertinet ad Theologos.

ARTICVLVS II.

Virum motus distinguatur ab actione & passione, à termino à quo & ad quem?

OMnes habitudines, quæ in motu reperiuntur, reducuntur ad ista quatuor, eò quod in omni motu seu mutatione, vt inquit D. Tho. q. 3. de potentia art. 3. est duplex processus, scilicet

licet inter terminos à quo & ad quem, & inter mouens & mobile. Inquirimus ergo, quomodo distinguatur motus ab actione, & quomodo etiam distinguatur à termino.

Et quantum ad primum ad triplicem sententiam reducuntur varia placita Authorum. Prima affirmat actionem & passionem inter se & à motu distingui realiter. Ita sentiunt, qui existimant actionem esse in agente, & passionem in passio, de quo sequenti articulo agemus, Eandem sententiam communiter sequitur schola Scoti, in qua distinguitur actio prædicamentalis, & actio physica, & actionem prædicamentalem constituunt in respectu agentis ad passum, quia per talem actionem formaliter constituitur agens in ordine ad passum, & sic apud ipsos actio prædicamentalis non est productio termini, sed formalis relatio agentis ad passum, vnde distinguunt realiter actionem, & passionem inter se, & à motu. Actio autem physica sumitur ab ipsis pro ipsa forma fluente, quæ ut respicit passum, dicitur passio physice, & ut est ab agente actio, & sic tales respectus non constituunt ipsum agens ad passum, sed ipsum motum, seu formam fluentem, cum qua aliqui putant identificari istos respectus alij verò etiam differre putant, solumque identificari cum motu tanquam cum subiecto. De qua sententia Scotistarum videri potest Fuentis lib. 3. Physic. q. 2. ferè per totam.

Secunda sententia non agnoscit, nisi distinctionem rationis inter actionem, & passionem, & motum: sed adhuc diuiduntur. Nam quidam existimant non distingui nisi ratione, quia motus se habet ut gradus superior respectu actio-

actionis, & passionis. Quod attribuitur M. Soto 3. Phys. q. 2. concl. 3. §. *Quaritur*, & tenet Cabelero 3. Physic. disp. 1. dub. 2. Alij verò existimant motum se habere ad actionem, & passionem non vt genus, cum sint prædicamenta primo diuersa, & motus est post prædicamentum, sed tanquam quid præsuppositum ad actionem, & passionem, cum quo tamen identificantur. taliter quòd sola ratione ratiocinata ab eo distinguuntur. Ita Rub. 3. Phys. tract. 1. q. 7. & P. Suarez disp. 49. Metaph. sect. 2. qui etiam addit num. 13. quòd licet actio, & passio differant ratione ratiocinata, motus tamen, & passio, nec ratione ratiocinata differunt, sed sola nominis appellatione, eò quòd eandem definitionem habet apud Phil. motus, & passio. & D. Tho. 1. 2. q. 1. art. 3. dicit: *Quòd calefactio passio nihil aliud est, quàm motus ad calorem.*

Tertia sententia est, quòd actio, passio, & motus distinguuntur à parte rei, non tamen distinctione reali, vt res à re, sed distinctione modali. Est communis Thomist. vt videri potest apud Nazar. 1. p. q. 25. artic. 1. Araujo 5. Metaph. q. 1. art. 4. Collegium Carm. 3. Phys. disp. 17. q. 2. vbi plures citantur.

Circa secundum respectum, idest, habitudinem inter terminum à quo, & ad quem in motu, etiam variant Authores. Nam quidam distinguunt motum à termino ad quem sola ratione ratiocinata, sumunt enim motum pro ipsa entitate, seu forma fluente, quæ solum differt à termino ratione status, quia scilicet vel est in via, vel est in termino, in mutatione, vel mutato esse. Alij ex opposito distinguunt motum à termino realiter, quia re vera motus

non est forma fluens, nam forma non fluit, sed fit totaliter de nouo, motus autem se habet vt via, seu tendentia ad istam formam, unde videmus separari motum à termino, & è contra, nam incipiente motu est motus sine termino, & cessante motu est terminus sine motu, ergo distinguuntur, quia separantur. Alij denique existimant distingui motum à termino modaliter, seu formaliter, realiter verò motum non esse aliquid præter res, ad quas est motus.

Dico primò. Actio, & passio non respiciunt motum tanquam genus, & gradum sibi essentialem, sed sunt conditiones intrinsecæ ipsius motus eique quasi subiecto conuenientes. Sumitur ex Arist. 3. Phys. tex. 21. vbi inquit: *Quòd omninò neque doctio est idem cum disciplina, neque actio idem quod passio; sed motus cui hæc insunt.* Et D. Tho. 3. Phys. lect. 4. dicit: *Quòd cum motus abstrahat à ratione actionis & passionis, non continetur in predicamento actionis, neque passionis, vt aliqui dixerunt.*

Et præter rationem insinuatam, quòd actio, & passio sunt prædicamenta primò diuerla, & sic non habent genus supra se, deducitur fundamentum conclusionis ex eo, quia actio & passio identificantur cum motu à parte rei; ergo non possunt respicere illum pro genere, nisi multiplicetur in eis motus; quod est falsum, vt probat Philosoph. ibi, quia aliàs si essent duo motus, actio redderet motum subiectum in quo est, & sic si subiectum est agens, moueretur in quantum agens, quod est falsum, quia agens vt agens solum mouet; si autem est in passio, moueretur passum duplici motu respectu

Est vnus, & eiusdem termini, quod est falsum; non ergo multiplicatur motus in actione, & passione, & consequenter motus non est genus ad illa; repugnat enim quod aliquid sit genus ad duas species, & non multiplicetur in illis, siquidem contrahitur & diuiditur per differentias talium specierum, vnde si non diuiditur, sed identificatur cum vtraque specie, non est genus illarum, sed aliquid præsuppositum. Et hoc est quod dixit Philos. quod actio & passio sunt idem cum motu, cui hæc insunt; in esse autem illi denotat, quod habet rationem subiecti, seu præsuppositi, non subiecti *vt quod*, sed *vt quo*, tanquam condiciones necessariz motus, siquidem motus essentialiter est fluxus, & tendentia quædam, quæ necessario requirit fluere ab aliquo, & tendere ad aliquid in aliquo subiecto, quod est includere actionem, & passionem. Et sicut in ipso termino in facto esse, actio quæ identificatur cum termino, habet ipsam entitatem termini ad modum subiecti, & rei, cum qua identificatur, ita & ipse motus, qui est terminus in fieri habet actionem quasi formalitatem sibi identificatam.

Quod si dicas, non repugnare, quod gradus genericus corrupta specie maneat in alia specie, quæ est sub eodem genere: vt cum circulus transit in semicirculum non corrupta ratione figuræ, quæ est gradus genericus, ergo non repugnabit etiam eundem motum identificari cum actione & passione saltem entitativè, licet multiplicetur formaliter motus actionis, & passionis. Sed contra est, quia implicat, quod corrupto gradu specifico remaneat

idem gradus genericus, quia ab eadem formâ
prouenit gradus genericus & specificus; cor-
rupta ergo forma, neque specificus gradus ma-
net, neque genericus, licet posset manere si-
milis gradus, quia vtraque species est sub eo-
dem genere, sed non idem. Si verò dicitur
multiplicari motum formaliter, sed non enti-
tatiue, ergo multiplicabitur effectus eius for-
malis, & sic duplici motu mouebitur etiam re-
spectu eiusdem termini, quod tanquam in-
conueniens infert Aristotel. in hoc lib. tex. 19.

Dico secundò. Actio & passio non distin-
guntur sola distinctione rationis, sed distin-
ctione modali, seu formali reali, tam inter se,
quàm à motu. Quæ distinctio formalis non est
illa, quam ponit Scotus, qua dixit distingui ea
à parte rei, quorum vnum non est de conce-
ptu alterius, sed distinctio formalis, de qua
loquimur est idem quod distinctio modalis,
quæ ab omnibus admittitur. Conclusio ergo
posita est D. Thom. qui affirmat actionem &
passionem importare diuersas habitudines mo-
tus, & remoto motu nihil remanere, nisi ha-
bitudinem originis, & receptionis, vt patet 1.
p. q. 28. art. 3. ad 1. & q. 41. art. 1. ad 2. & q.
45. art. 2. ad 1. vbi inquit: *Quòd actio, & pas-
sio conueniunt in substantia motus, & differunt
solum secundum diuersas habitudines, vt dici-
tur 3. Physic. & ita oportet, quòd subtratto mo-
tu, non remaneant nisi diuersæ habitudines, &
idem repetit art. 3. sequenti.*

*Ex quo sumitur fundamentum huius senten-
tiæ, quia in actione, & passione importantur
diuersæ habitudines ad mouens, & ad mobile
secundum rationem originis, & receptionis,*
vel

Vel ergo istæ habitudines sunt relationes prædicamentales, & secundum esse, vel secundum dici. Si primum, manifestum est aliquid addere ad motum, quia relatio aliquid est præter suum fundamentum. Si secundum, ergo sunt aliquid absolutum fundans illam relationem, & sic cum fundent relationes diuersas utpote ad diuersos terminos se habentes, non poterunt omnino esse idem fundamentum, sed oportet quod distinguantur non minus, quam ipsæ relationes fundatæ. Item potest dari actio sine motu, ut patet in creatione, ut S. Tho. affirmat 1. p. q. 45. art. 2. & 3. Ergo actio ex suo conceptu differt à motu tanquam aliquid à parte rei distinctum; motus enim non se habet ut genus, sed ad modum subiecti respectu actionis, ut dictum est, si ergo ex natura sua aliquando separari potest à motu, signum est à parte rei distingui. Ut omittam, quod actio, & passio sunt distincta prædicamenta, ergo postulant distinctionem plusquam rationis, quia cum prædicamenta sint coordinationes entium realium, ubi sunt distincta prædicamenta, debent esse distinctæ series realitatum & consequenter diuersa realitas saltem modalis.

Ex eodem principio constat debere distinguere passionem & motum, quia importat in illis diuersa habitudo, nam passio respicit subiectum, ut recipiens ab agente, & sic habitudo eius est inter subiectum, & agens; dicitur enim aliquid pati ex eo quod trahitur ad agentem, ut dicit S. Tho. 1. 2. q. 22. art. 1. At verò motus respicit terminum per modum transitus & tendentiæ ad illum de imperfecto ad perfectum;

& sic respicit terminum per modum transitus inter terminum à quo & ad quem, non formam per modum receptionis ab agente, ergo diuersas important habitudines.

Quod verò distinctio istorum trium non sit nisi modalis, ex eo probatur, quia vt realitas illa motus dicatur actio, non requiritur realitas superaddita, sed quòd eadem se habeat ad agens secundum rationem originis ab eo, solum ergo est modus aliquis non realitas distinctus, sed eiusdem realitatis noua respicientia, & modificatio. Et constat etiam ex eo, quia eodem actu, quo impello, vel percutio alterum, ille dicitur percussus, vel impulsus, non ergo requiritur distinctus actus, seu realitas, vt motus sit actus actiui, & actus passiui, sed sufficit distincta modalitas.

Dico tertio. Considerando motum respectu termini ad quem, motus entitatiuè non distinguitur ab eo realiter, sed modaliter ratione diuersi status imperfecti, & perfecti fieri & in facto esse, potest tamen secundum aliam considerationem reduci ad prædicamentum actionis, & passionis, & similiter est post prædicamentum. Sumitur hæc conclusio ex D. Thom. 3. Phys. lect. 4. §. Respondet ad tertium inconueniens in fine, vbi inquit: *Quantum ad id, quod est in rerum natura de motu* (idest quantum ad entitatem) *motus ponitur per reductionem in illo genere, quod terminat motum, sicut imperfectum reducitur ad perfectum, sed quantum ad id, quod ratio comprehendit circa motum, scilicet esse medium quoddam inter duos terminos, sic iam implicatur ratio causæ, & effectus, nam reduci aliquid de potentia in actum non est nisi*
ab

ab aliqua causa agente. Et secundum hoc motus pertinet ad predicamentum actionis, & passionis. Idem repetit in 5. Physic. lect. 3. §. 1.

Itaque quod motus reducatur ad predicamentum sui termini, & non distinguatur realiter ab illo, ex eo constat, quia motus, & terminus eius solum differunt sicut fieri, & factum esse, sicut res in tendentia, & in termino, in potentia, & in actu, si autem esset diversa res in fieri, & in facto esse, nunquam verificaretur quod ista res, quæ modò est consummata, aliquando fuit inchoata, & in fieri, unde si illa res, quæ est in facto esse, distinguitur ab ea, quæ est in fieri, illa, quæ est in facto esse, solo illo instanti fieret, non verò motu, quia quidquid motu, & fieri antecederet se haberet, pertineret ad aliam realitatem. Et non sufficit sola distinctio rationis, sicut est inter genus, & differentiam; quia ibi solum interuenit potentia logica, & secundum compositionem intellectus, quia uterque gradus radicatur in eadem forma, motus autem dicit potentiam physicam ad terminum secundum realem transitum, & successionem de vno in aliud, quod sine aliqua distinctione saltem diversi status nequit intelligi; quia verò iste transitus & mutatio non stat sine origine ab aliquo & receptione in aliquo, in quo fit mutatio, necessario reducitur ad actionem & passionem, ut identificatur cum illis.

Quod denique motus etiam sit post predicamentum, ex eo constat, quia motus potest sumi dupliciter. Vno modo pro eo cum quo identificatur, siue sit forma ipsa, ad quam tendit, siue actio, & passio sine quibus non tendit. Se-

Secundò pro ipso statu, seu conditione, in qua constituit formam, vel actionem, est enim motus status quidam oppositus quieti; terminus enim motus non solum est ipsa res, ad quam tenditur, sed etiam quies in illa, ut notat S. Thom. 1. p. q. 5. art. 6. Sic ergo motus ut nominat statum quendam oppositum quieti, cum sit status, seu conditio consequens ad plura genera, dicitur post prædicamentum, quia post prædicamentum est conditio aliqua, seu ratio consecuta ad plura prædicamenta, ut in Logica diximus. Motus autem pro re, cum qua identificatur ut imperfectum cum perfecto, vel ut medium inter agens, & patiens, reducitur ad ea prædicamenta, cum quibus identificatur.

*Dico ultimò, Motus strictè sumptus ut constitinctus à mutatione generaliter dicta addit supra mutationem hæc tria. Primò, quòd sit inter terminos positivè contrarios, & non solum inter priuationem & formam. Secundò, quòd habeat pro subiecto aliquod ens in actu completum, licet mutatio saluetur in sola materia prima. Tertiò, quòd se habeat ut fluxus inter duos terminos, seu mutationes, in vno enim motu includuntur duæ mutationes, scilicet ex parte termini à quo corruptio, & ex parte termini ad quem generatio. De hac conclusione agemus infra lib. 5. q. 19. interim videri potest S. Thom. 28. de verit. art. 1. ubi sic inquit: *Differentia est inter motum & mutationem, nam motus vnus est, quo aliquid affirmatiuè significatum abijcitur, & aliud affirmatiuè significatum acquiritur: est enim motus de subiecto in subiectum; ut dicitur in 5. Physic. Vnde**

de vnus motus alterationis est, quæ album abij-
citur, & nigrum acquiritur: sed in mutationi-
bus, quæ sunt generatio & corruptio, aliter se
habet, nam generatio est mutatio de non subiecto
in subiectum, vt de non albo in album: corrup-
tio verò est mutatio de subiecto in non subie-
ctum, vt de albo in non album. Et ideo in abie-
ctione vnus, & ademptione alterius oportet duas
mutationes intelligi, quarum vna sit generatio,
alia corruptio, vel simpliciter, vel secundum
quid. Sic ergo idem motus figuratur per abla-
tionem vnus, & inductionem alterius, non an-
tem significatur eadem mutatio, sed diuersa. Si-
militer habet 5. Physic. lect. 2. Et bene nota, quod
vt detur duplex mutatio, scilicet corruptio, &
generatio, oportet quod terminus à quo sit ali-
quid positium, quod corruptione tollatur. Si
autem terminus à quo sit priuatio, eius corrup-
tio non est distincta mutatio à generatione
formæ, quia priuatio non corrumpitur tran-
seundo de esse ad non esse, cum non habeat esse,
sed ipsa productione formæ introductæ in su-
biecto priuatio soluitur. Tunc ergo intercedit
corruptio vt realis mutatio, quando ex parte
termini à quo est aliquid positium incompati-
bile cum termino ad quem, quod debet mutari
de esse ad non esse; & ideo quia motus est in-
ter duos terminos positivos, includit duplicem
illam mutationem corruptionis vnus & gene-
rationis alterius. Et quia est inter terminos
contrariè siue positivè oppositos, quæ sunt ac-
cidentia, ideo requiritur, quod subiectum mo-
tus sit ens in actu, seu substantia completa, &
non solum materia prima, sicut sufficit pro ge-
neratione substantiali.

Soluntur argumenta.

Pro prima sententia arguitur. Quia actio & passio sunt distincta prædicamenta, ergo debent realiter distingui, siquidem solum entitates reales constituunt prædicamenta. *Confirmat.* quia forma fluens, & manans ab aliquo agente posset ab alio emanare, & in alio subiecto recipi, ergo illæ dependentiæ actionis, & passionis variari possent in ipsa entitate formæ, ergo non identificantur cum illa, sed realiter distinguuntur.

Respondetur. Quòd ad distinctionem prædicamentorum sufficit distinctio modalis, sicut ubi, & situs respectu substantiæ, aut quantitatis, & in multorum sententia relatio respectu fundamenti. *Ad confirmationem respond.* Quòd dato quòd eadem numero forma posset procedere ab alio agente, solum sequitur quòd ille modus actionis, & passionis posset esse alius, non tamen quòd sit realitas, & non modus; hæc enim est natura modorum, ut licet identificentur cum re, tamen possint amitti, vel desinere esse ipsa re permanente, licet non possint separatim existere sine re, ut patet in ubi, & situ, & relationibus, quæ amittuntur, vel ponuntur, subiecto non pereunte, & tamen identificantur ut modi.

Pro secunda sententiâ arguitur ad probandum quòd motus sit genus ad actionem, & passionem. *Primò*, quia non possunt aliter connecti actio, & passio cum motu nisi secundum prædicationem essentialem, aliàs accidentaliter motui conuenirent. *Secundò*, quia ipsa
actio

actio essentialiter est quædam mutatio, quia per illam agens mutatur de nō agente in agens, & similiter per passionem mutatur patiens, & habent se per modum viæ, & fluxus, quia non durant nisi quandiu effectus producitur, & est in fieri, ergo habent totam rationem motus. Deniquè motus non potest esse subiectum actionis, vel passionis, quia non denominatur ab illis, neque enim motus dicitur agens, vel patiens, ergo non tribuunt ei effectum formalem, & sic non habent illum pro subiecto, sed pro genere.

Respondetur, connexionem inter actionem, & passionem cum motu non esse connexionem generis cum differentia, vel specie, sed modicum re modificata, ad quam requiritur intrinsecè, sicut figura requirit quantitatem, substantia substantiam, tempus requirit motum tanquam aliquid præsuppositum essentialiter, & fides requirit obscuritatem extrinsecè, non ut constitutum, sed ut modificatum sui.

Ad secundam probationem dicitur, quòd actio etiam si subiectivè sit in agente, non mutat ipsum agens tanquam motus, sed tanquam actualitas, seu forma, quæ constituit agens non motum, sed mouentem sicut etiam forma substantialis, vel accidentalis constituit aliquid tanquam forma, non tanquam motus. Si tamen causa creata mouetur ad hoc ut agat, illa motio non est formaliter per actionem illius, sed per concursum, seu auxilium causæ superioris mouentis.

Ad tertiam probationem dicitur, quòd motus non est subiectum actionis denominativè,

& ut quod, sed identificatiue, & ut subiectum quo, sicut etiam relatio identificatur cum fundamento, & habet illud ut subiectum identificationis, subiectum autem inhaesionis est ipsum suppositum, in quo est tale fundamentum, & similiter figura identificatur cum quantitate, sed denominat tanquam subiectum substantiam.

Tertio arguitur ad probandum, quod motus, & actio solum distinguantur ratione: quia motus est actus actiui ut ab hoc, & passiuè ut in hoc; ergo ut sit actio non indiget noua entitate, vel modo, sed tantum seipso ut dependente, vel respiciente id à quo est, sicut etiam existentia non distinguitur ab essentia, nisi ratione, quia est entitas essentiae, ut producta, & dependens ab agente. Deinde, quia si essent tres formalitates actio, passio, & motus, moueretur mobile tribus mutationibus, quotiescumque moueretur ad vnum terminum, quia reciperet omnes illas. Denique ad hoc faciunt auctoritates supra allatae, ex Philos. & D. Thom. referendo hanc sententiam ex P. Suar.

Respondetur. Non indigere motum noua realitate, ut dicatur actio, sed distincta formalitate, quia in actione importatur origo ipsius motus, & causalitas agentis, quae aliquid superaddit effectui, existentia autem si non distinguitur ab essentia in sententia illorum Authorum, non est, quia importat respectum ad producem, sed quia sine existentia entitas essentiae manet in statu possibilitatis, & non ut ens reale. In quo tamen consequenter deberent dicere hi Auctores, quod actio si identificatur cum re producta, non distinguitur ab ipsa

ipsa nisi ratione, quia sine actione res prodita est nihil si tamen intelligitur causalitas, seu actio distingui à re quam producit, cur non etiam existentia, quæ est terminus actionis?

Ad secundam probationem dicitur. Non moueri mobile tribus motibus, quia actio, & passio non sunt motus distincti, sed conditiones, seu modi vnici motus, quo mouetur mobile ad vnum terminum.

Ad auctoritates Philos. & D. Tho. Respondetur quòd definitio motus, quando definitur quòd est actus entis in potentia, &c. non est eadem cum definitione passionis: quando verò dicitur, quòd motus est actus mobilis, non definitur ibi motus, sed explicatur ordo eius ad subiectum, in quo conuenit cum passione. Et quando dicit D. Thom. quòd passio non est aliud quàm motus, intelligitur entitatiuè, & secundum comparisonem ad subiectum, non secundum omnem formalitatem.

ARTICVLVS III.

Quid sit actio, & quonplex, & quid sit formalis terminus eius.

Cum notissimum sit apud omnes, actionem esse agentis, vt docet Philos. in hoc tertio lib. text. 19. actus autem duo habet officia, scilicet informare respectu subiecti, & originare, seu emittere ex se effectum, quod pertinet ad terminum, vtrumque in actione explicandum est; in hoc quidem articulo id, quod proprium est actionis, scilicet respectu terminis,

ai, seu effectus, quem ex se emittit. In sequenti verò id, quod est commune actioni in quantum accidens est, scilicet in quo subiecto fit, an in principio à quo emittitur, quod est agens, an in subiecto, in quo terminus eius recipitur, quod est passum.

In præfenti ergo propriam rationem actionis per aliquot dubiola explicabimus. Primò, quæ sit definitio actionis. Secundò, an sit de ratione eius, quòd producat terminum, vel solum quòd uniat, aut aliquo modo attingat. Tertiò, quid sit terminus formalis, à quo specificatur. Quartò, de diuisione eius in creatiuam, & eductiuam. Quintò, de diuisione eius in transeuntem, & immanentem.

*Primò ergo inquires, quæ sit definitio actionis tam Physicè, quàm Logicè, seu Metaphysicè? Respondetur, quòd actio potest definiri, vel quantum ad ipsam formam, quæ est actio quasi in actu signato, vel quantum ad exercitium ipsius formæ, quod est agere. Et quidem agere ut dicit S. Tho. q. 2. de potent. art. 1. nihil est aliud, quàm *communicare illud, per quod agens est in actu secundum quod possibile est.* Qua definitione complectitur omne agere tam creatum, quàm increatum, tam intra Deum, quàm ad extra, licèt diuersimodè, nàm res creatæ; & actio Dei ad creaturam communicat id, quòd est in agente cum aliqua multiplicatione, & diuisione, nec potest communicare totum quod est in agente, & totaliter, quia fit cum aliqua limitatione saltem ex parte rei communicatæ hoc ipso quòd creata est. Communicatio verò Dei ad intra, quia perfectissima est, & sine vlla limitatione ex parte communi-*

can.

cantis, & rei communicatæ, ideò agens communicat se totum.

Actio autem sumpta pro forma variè defini-
ri solet. Primò, quòd *Actio est actus actiui*,
ut actiuum est, ut dicitur tertio *Physic.* tex. 9.
Secundò, quòd *Actio est id*, quo denominamur
agere, vel ut dicit Author sex principiorum, &
D. Thom. opusc. 48. tract. de act. *Actio est for-*
ma, qua in id, quod subijcitur, denominamur
agere; ubi definitur actio relatiuè ad passum,
quod subijcitur, quæ est definitio actionis præ-
dicamentaliter, seu Logicè consideratæ. Ter-
tiò dici potest actio *causalitas agentis*, seu id,
quo effectum causat, vel ut definit S. Thom. 3.
Physic. lect. 5. *est actus ab agente in aliud*, &
1. p. q. 54. art. 2. *Actio est effluxus in actum*
ab agente. Denique defini potest actio, quòd
est actualitas virtutis, ut dicit D. Thom. ead-
em q. art. 1.

Secundò dubitabis. In quo consistat forma-
litas actionis, an in ratione productionis eff-
ectus, vel unionis eius ad passum, seu educationis,
aut in quo tandem consistat. Respondetur,
quod ut suprà diximus, quæst. 12. art. 4. & do-
cet D. Thom. opusc. 48. cap. de actione, de
conceptu actionis est actualis emanatio, seu
emissio alicuius ab agente; distinguit autem
D. Thom. duplex genus actionis, alterum
quod est cum inuolutione & motu, alterum
sine illo per simplicem effluxum alicuius à suo
principio, ut patet in quodlib. 4. artic. 9. &
opusc. 15. cap. 9. In causis autem creatis actio,
seu effluxus est medium inter agens, & effe-
ctum quasi accidentaliter, & non substantia-
liter illi conueniens, non tanquam res produ-
cta,

Acta, sed tanquam modus, seu ratio ipsa producti-
cendi, de quo videri potest D. Tho. 2. contra
Gent. cap. 35. & in 2. dist. 1. q. 1. art. 5. ad 11.
& 1. p. quæst. 25. art. 1. ad 3.

Et quo constat, quid sit de conceptu formali
actionis præcisè, ut actio est, quid verò perti-
neat ad specialem modum; vel connotationem
eius, in quantum talis actio est. De ratione
enim actionis ut causalitas est agentis, præci-
sè est, quòd sit actualitas per modum emana-
tionis, seu originis ipsius effectus ab agente
cum dependentia effectus ab ipso, & ista habi-
tudo agentis ad effectum mediante qua effectus
dependet ab ipso, est de intrinseca ratione
actionis, quæ est causalitas, & ita semper re-
quirit aliquam nouitatem saltem quo ad mo-
dum, & dependentiam in ipso termino, respec-
tu agentis. Superadduntur autem actioni alij
respectus, siuè connotationes, vel respectu pas-
si, vel respectu termini à quo, in quibus for-
maliter non consistit actio, licet illos admit-
tat, & per illos diuidi possit, v. g. quòd actio
sit productio, vel reproductio,eductio, vel in-
ductio, siuè unio, siuè immutatio; omnia ista
important diuersas connotationes actionis &
diuersos respectus, v. g. quòd sit productio im-
portat actionem cum nouitate ipsius esse in ter-
mino, ita quòd in rebus creatis transeat de
non esse ad esse quando producitur. Reproduc-
tio dicit actionem connotando rem fuisse. Et
saluatur actio sine productione nouæ entitatis
in termino, ut patet in transubstantiatione, quæ
conuertit aliquid in præexistens; & intensio
saluatur sine productione nouæ qualitatis, so-
lum per nouam yunionem ipsius ad subiectum in
opi-

opinionem Thomistarum, de qua in libris de generatione. Item quod actio siteductio formæ, vel inductio, siue unio ipsius, vel etiam mutatio, vel motus conuenit actioni secundum respectum ad passum, siue subiectum, de quo forma educitur, vel cui unitur: unde sine tali connotatione saluatur ratio actionis solum per ordinem agentis ad effectum: unde solum conueniunt ista actioni, ut talis est, nempe, ut dependenter operans à materia.

Tertio dubitabis, quis dicendus sit terminus formalis, à quo sumitur specificatio, vel diuersitas actionis? *Resp.* in sententia D. Thom. certum esse actionem specificari tum à principio, tum à termino, ut patet in 1. p. q. 77. art. 3. & licet frequenter etiam dicat D. Thom. specificationem actionis, ut actio est sumi à principio, ut autem passio, seu motus est sumi à termino, ut in 1. 2. q. 1. art. 3. tamen per hoc non negat specificari etiam actionem à termino, cum ipsa natura actionis instituta sit & ordinata essentialiter ad terminum, cum sit causalitas, quæ causatum essentialiter respicit, sed explicare vult D. Thom. specialem rationem actionis, ut actio est, quia respicere terminum commune est actioni & passioni, sed respicere illum sub ratione originis ab aliquo principio, hoc est proprium actionis; & ideo etiam quando actio specificatur à termino, specificatur etiam ab illo ut aliquo modo habet rationem principij, quatenus terminus præcedit in ipso principio operandi ut in intentione, seu proportionem ut principietur actio, quia non potest principiari ab aliqua forma, nisi ut proportionata & ordinata ad talem terminum, quod explicauit S. Thom.

Thom. I. p. q. 105. art. 3. ubi inquit: *Quòd finis agens, & forma se habent ut actionis principium, sed ordine quodam; nam primum principium actionis est finis, qui mouet agentem; & secundo verò agens; tertio verò forma eius, quod ab agente applicatur ad agendum.* Quare cum D. Tho. dicit specificari actionem à principio, ibi includit etiam quòd specificetur à termino, scilicet ut continetur in principio.

Inquirimus ergo, quæ sit formalitas termini seu principij, à qua specificetur actio, nam circa eundem terminum materialiter posse versari diuersas actiones certum est, sicut ad eundem locum materiale potest terminari motus ascensus, vel descensus, &c. Circa hoc ergo solum dicit D. Tho. q. 77. citata, quòd non quæcunq; diuersitas obiectiorum diuersificat potentias, sed differentia eius ad quod per se potentia respicit. Et idem proportionaliter dicendum est de actionibus, nam potentia non nisi medijs actibus specificantur. Id ergo formalem terminum vocamus, quòd per se ab actione vel potentia respicitur. Nam formalis terminus dicitur non secundum entitatem suam tantum, sed sub ea formalitate & ratione qua conducit ad specificandum istam actionem, & ut attingitur ab ista potius quàm ab alia, sicut dicimus obiectum formale visus esse corpus quatenus coloratum, aut lucidum, tactus autem quatenus calidum vel frigidum. An verò semper requiratur in termino, ut sit terminus formaliter distinctus ab alio aliqua ratio, quæ, tanquam noua entitas vel modus qui producat, an verò sufficiat distincta ratio sub qua, vel nouus respectus ad terminum à quo,

d quo, vel noua dependentia ad agens? Ad hoc respondebimus infra q. 19. art. 1.

Quarto dubitabis, quæ sit diuisio actionis in creatiuam, & eductiuam, & quomodo differant? *Respond.* Differentiam istarum actionum ex earum definitionibus cognosci, est enim actio creatiua, quæ operatur effectum nullo subiecto præsupposito, sed ex nihilo. Actio verò eductiua est, quæ producit effectum ex aliquo subiecto præsupposito, immutando, & deducendo potentialitatem eius in actum: ex quo colligitur non posse aliquid eadem actione simul educi, & creari, esset enim procedere ex nihilo, & ex aliquo: quòd verò aliqui dicunt, - quòd licet quælibet actio non possit simul procedere ex nihilo, & ex aliquo: tamen quia in productione alicuius substantiæ multæ actiones concurrunt, v.g. creatio materiæ,eductio formæ, vnio illius, &c. tota collectio actionum, dicitur ex nullo alio præsupposito, licet quælibet actio diuisim non possit simul esse eductiua, & creatiua: hoc nihil est, tùm, quia hoc idem inuenietur in quolibet effectui accidentali, nam etiam quando album producit, tota collectio actionum, quæ ad illud prærequiruntur, vt productio subiecti, formæ albedinis, & vnio eius, non præsupponit aliud subiectum, ex quo tota illa collectio fiat: tùm etiam, quia productio substantiæ non consistit in collectione plurium actionum, sed in illa quæ vltimo attingitur, sicut actio producens equum, non consistit in actione qua ab initio producta fuit materia, sed qua modo generatur equus; illa enim præsupposita fuit non solum ad equum, sed ad omnia quæ ex illa materia

teria possent generari. Certum tamē est, quod in collectione omnium actionum, quæ ad aliquid requiruntur etiam materiæ primæ, aliquid creationis inuoluitur.

An verò actio creandi sit prædicamentalis, licet non dicat ordinem ad passum, sed ad effectum, dependet ex his quæ articulo sequenti tractanda sunt, an ista actio sit in agente, vel in effectu, quatenus creata est, & an prædicamentum actionis solo ordine ad effectum constituatur, an etiam requirat ordinem ad passum, & ad passionem, de quo ibi dicemus.

Ultimò dubitabis, quæ sit diuisio actionis in immanentem, & transeuntem, & an immanens vera actio sit? *Respond.* quod si loquamur de actione physica, quæ cum motu & passione coniuncta est, certum est non conuenire actioni immanenti, quia de se non requirit motum in ipso agente, sed tanto perfectior est, quanto magis supponit ipsum agens in actu; unde inuenitur operatio immanens vt cognitio sine aliqua transmutatione passiva subiecti, sed præcisè per ordinem ad obiectum, quia passio non ponitur in aliquo subiecto, nisi quando producit aliquis terminus seu forma, quæ in eo recipiatur; cognitio autem immanens, vt immanens est, per se non requirit productionem termini, vt patet in sensu externo, qui non producit in se aliquem terminum seu imaginem, in qua perficiat sensationem, sed immediatè sentit terminum externum, vt in libris de anima dicitur. Quod si aliquando actio immanens producit terminum, non est præcisè, quia immanens, sed quia virtualiter transiens, vel quia est dicens, seu expressiua.

*Ex quo ulterius fit discursus ad negandum, quod actio immanens formaliter & pure sit actio de predicamento actionis, licet virtualiter actio esse possit. Ratio est, quia actio quæ est de predicamento actionis tantum debet esse causalitas agentis, & connotare ordinem ad passum; causalitas autem gentis nunquam est ultimum, quod intendit agens, & ubi cessat eius finis, sed est medium quo tendit ad terminum productum, aut de nouo positum, propter quem est ipsa actio; at verò operatio immanens est ultimus actus, qui intenditur ab operante, tunc enim est in actu simpliciter cognoscens, quando actu operatur, & intelligit, unde foelicitas seu beatitudo, quæ est ultima hominis perfectio, in ipso actu intelligendi consistit, & perfectio viuentis in operatione vitæ est, non in aliqua quiete, sed ipsa operatio propter se ipsam quæritur, non propter aliquem terminum, nam etiam si producat aliquis terminus, v. g. verbum, adhuc perfectio intelligendi non est in productione talis termini, sed in contemplatione in verbo iam producto, ergo operatio immanens non se habet per modum medij & viæ, quæ aliquis terminus acquiritur, sed potius ipsa est ultima actualitas, quam intendit operans, & sic non est de genere actionis predicamentalis, siue quæ infert passionem, siue quæ se habet per modum causalitatis tantum, quia non quæritur propter terminum causandum, sed propter suam actualitatem. Et hæc doctrina est D. Thom. vt videri potest primo contra Gentil. cap. 100. vbi inquit: *Dico autem operationem in ipso manentem, per quam non fit aliud præter ip-**

ipsam operationem, sicut videre, & audire, huiusmodi enim perfectiones sunt eorum, quorum sunt operationes, & possunt esse ultimi, quia non ordinantur ad aliquod factum, quod sit finis, operatio verò, vel actio, ex qua sequitur aliquid præter ipsam, est perfectio operati, non operantis, & comparatur ad ipsum sicut ad finem. Vbi aperte tradit nostram doctrinam, quare actio ista non sit de prædicamento actionis, quia non est purè causalitas agentis, eò quòd non se habet ut medium & via, sed ut ultimum & finis. Actio autem prædicamentum, ut dicit S. Tho. in 1. dist. 8. q. 4. art. 3. ad 3. dicit aliquid fluens ab agente cum motu: quòd ergo non se habet ut fluens & via, cum imperfectione & motu, seu ut præcisè fluens & ad ulteriorem perfectionem tendens, sed potius ipsa est ultimum, talis non est actio prædicamentum. Unde expressè eam rejicit à prædicamento actionis D. Tho. opusc. 48. tract. de actione.

*Quòd si inquiras. Quomodo ergo produci-
tur ista entitas, quam dicimus immanentem
actionem? Si enim est effectus, ergo supponit
causalitatem, qua procedat ab efficiente. Si
verò non est effectus, ergo vel est causalitas
ipsa & actio, vel entitas increata, vel nihil. Re-
sponderetur, tales actus immanentes esse virtua-
liter actiones, licèt formaliter sint qualitates.
Et pro ea parte qua actiones sunt, se ipsis ema-
nant sicut actiones; & sicut passionès propriæ
à substantia emanant, & relationes à funda-
mento, eomodo se habent illæ qualitates, quæ
sunt actus immanentes respectu potentiae, quia
etiam habent munus & vim actionis, licèt emi-
nenter seu virtualiter. Et huius signum est,
quia*

quia intellectio se ipsa est etiam dictio & productio verbi, ut tractari solet 1. p. q. 27. & dicemus in lib. de anima, ita quod dicere non distinguitur realiter ab intelligere; dictio autem & productio verbi causalitas eius est, quia habet ipsam imaginem verbi pro termino & similitudine expressa. Ergo se ipsa potest emanare sine alia distincta actione, sed ipsa privilegium habet actionis. Similiter conceptio practica intellectus, habet vim mouendi etiam extra se, quod non fit nisi actione transeunte, sicut dicit D. Thom. quod Angeli suo imperio quod est conceptio intellectus, mouent celos; opusc. 11. artic. 3. non ergo extraneum est ab actione immanente, quod habeat vim transeuntis, & pro illa parte emanat se ipsa a potentia.

ARTICVLVS IV.

Utrum actio transiens subiectiuè sit in agente

Procedit quaestio de actione transeunte; quia de immanente non est dubium subiectari in agente, ex eo enim immanens est, quia non perficit nisi ipsum agens. At verò transiens perficit non solum agens emanando ab ipso, sed etiam perficit effectum causando ipsum, & si effectus recipiatur in passio, etiam perficit passum mediante effectui recepto. Unde quia denominat & perficit agens, & similiter effectum & passum, quaerimus in quo ex illis sit inhaesiuè, licet constet, quod ab agente sit emanatiuè. Quod si actio non habeat passum sicut creatio, quia ipsa passum seu materiam efficit,
non

non supponit, inquirimus, an identificetur talis actio cum effectu, vel sit in ipso agente, non verò an sit in passio, quia caret illo.

In hac ergo difficultate concertatio est inter scholam Scoti, & D. Tho. & inter ipsos Thomistas inter se licet ex diuersis fundamentis. Censet enim Scotus actionem transeuntem subiectari in agente, vt patet in 4. dist. 13. q. 1. §. Ex dictis, & dist. 43. q. 5. §. De tertio, & alijs locis, quem sequitur eius Schola. Et fundantur in eo, quia existimant actionem prædicamentalem esse respectum agentis ad passum, & relationem extrinsecus aduenientem, & cum passio, & actio sint respectus mutuò oppositi, non possunt esse in eodem extremo, ita quòd vterque sit in passio, vel in agente, sed alter in agente, alter in passio. Et potest hoc amplius vrgeri, nam quidquid sit de actione identificata cum motu, tamen certum est relationem agentis esse in agente, & relationem effectus, vel passi in passio, cum constet, quòd agens realiter respicit terminum, & passum, & è contra, ergo non minus, quàm in alijs relatiuis relatio debet esse in ipsis extremis relatis: ergo etiam fundamentum talium relationum, quod est ipsa actio & passio, debet distinctè poni in ipso agente, & passio, eò quòd fundamentum identificatur cum relatione.

Inter Thomistas autem sequitur eandem sententiam Caietanus 1. p. q. 25. art. 1. & Nazarius ibi, controuersi vnica, & alij; sed fundamentum ex eo sumunt, quia actio transiens est actus secundus perficiens, & mutans intrinsecè ipsum agens, ergo debet esse subiectiue in illo. Consequentia patet, quia perfectio in-
trin-

Intrínseca debet subiectari in eo, quod denominat, hoc enim est esse intrínsecam. Anteced. verò probatur; tùm quia actiò est actus, & complementum potentix agentis, vt dicit D. Thom. 2. contra Gentil. cap. 9. quia comparatur ad potentiam sicut actus secundus ad primum: vndè concludit ibi, quòd actiò, quæ non est substantia agentis, inest ei, sicut accidens subiecto: tùm, quia maior & proprior perfectiò agentis est actus secundus, quàm primus, cùm actus primus sit in potentia ad secundum, & per ipsum reducatur de potentia ad actum sublata eius intrínseca potentialitate, & consequenter apposita intrínseca actualitate: sicut ergo actus primus est subiectiue in agente. ita & actus secundus, qui est ipsa actiò. Plures authoritates S. Thom. statim referemus.

Secunda sententia, quæ frequens etiam est inter Thomistas, docet actionem subiectiue esse in passo, siue in effectù. Quam tenet Ferr. Capreol. Heruæus, Soto, Soncin. & alij, quos citat, & sequitur Cursus Carmelit. hic disput. 17. q. 4. & 5. Idem tenet P. Suarez disp. 48. Metaphys. sect. 4. Qui addit, actioni transeunti sub conceptu actionis, quo distinguitur à passione, non conuenire subiectum inhæSIONIS, sed solum denominationis, & emanationis ab agente. Si tamen aliquod subiectum inhæSIONIS habet, illud est ratione sui termini seu effectus, cum quo actiò identificatur tanquam modus eius, & emanatio seu processio ipsius.

Ethinc sumitur fundamentum huius sententix; Nam actiò identificatur cum motu, & cū termino motus, & non datur alia actiò, nec est necessaria, quàm illa, quæ cum motu

identificatur, motus autem & terminus productus non sunt in agente, sed extra illud, ergo neque actio est in agente: actio enim est ubi est illud, cum quo identificatur. Discursus totus constat ex supra dictis, ubi probatum manet, quod actio identificatur cum motu, & quod motus sit in mobili seu passo tanquam in subiecto, quod etiam affirmat Philos. hoc lib. cap. 4. Quod verò non sit alia actio, quam illa quæ identificatur cum motu, constat, tum quia Philos. non meminit alterius actionis, si autem alia actio daretur ex parte agentis, & alia ex parte motus seu passi, quomodo diceret Aristot. quod actio etiam si sit actus agentis, & denominet ipsum, tamen est in passo, quia actus unus potest esse in alio secundum diuersam rationem? Tum etiam idem constat, quoniam ponere duas actiones, alteram in passo, alteram in agente omnino superfluum videtur; si enim actio quæ est in effectu vel in passo, egreditur ab actione quæ est in agente, cur non poterit immediatè egredi ab ipso actu primo, siquidem immediatè ab ipso egreditur actio illa, quæ est in agente? Et tamen illa actio, quæ est in agente, non est vltima ratio, qua egreditur effectus; hæc enim est ipsa met processio, & egressio effectus, quæ non est in agente, sed in effectu procedente, ergo sine fundamento ponitur actio in agente, siquidem non est ipsa vltima ratio causandi, & procedendi in ipso effectu, & sic non est actio, de qua loquimur in præsentī. Denique illa actio, quæ est in agente, emanare debet ab ipso, ergo idem agit in se ipsum, & sic simul est in actu, & in potentia respectu eiusdem, in actu
ad

ad agendum, & in potentia ad recipiendum.

Denique vrgent pro hac parte aliqua loca Arist. & D. Tho. nam Aristoteles in hoc tertio libro text. 20. docet, non esse inconueniens, quòd actus vnus sit in altero, vt doctio in ad discende. Et 9. Metaph. tex. 16. dicit: quòd ædificatio est in ædificato. Et tertio de anima, tex. 138. *Agentis, inquit, mouentisque operatio in ipso patiente suscipitur, atque inest, atque adeo actio, & passio non in agente est, sed in ea quod patitur, &c.* Super quæ loca idem affirmat expressè D. Tho. & in q. 14. de verit. art. 3. & 10. de pot. art. 1. & 2. contra Gentil. cap. 1. Denique hanc differentiam ponit D. Thomas inter actionem immanentem, & transeuntem, quòd actio immanens primò, & per se perficit ipsum agens, transiens autem primò, & per se perficit ipsum passum, nec est perfectio agentis, sed moti, vt expressè docet 1. p. qu. 18. art. 3. ad 1. & q. 54. art. 2. & 1. 2. q. 3. ar. 2. ad 3. & primò contra Gentiles, cap. 100. Ergo repugnat, quòd actio transiens sit in agente, alioquin ex se esset perfectio agentis, quia id primo, & per se perficit, in quo primo & per se est, quod est tollere differentiam inter actionem immanentem, & transeuntem, quæ adæquatè diuidunt actionem, vt sic.

Nihilominus resolutio nostra sit. Secundùm mentem D. Tho. actio secundum propriam rationem actionis non petit subiectum inhæisionis, sed emanationis, ita quòd ad denominandum aliquid agens per accidens se habet, quòd inhæreat: verè tamen, & in re actio emanans duplicem formalitatem debet importare, quarum vna actuet, & inhæreat in agente, altera

in termino, & mediante termino in passio, si terminus sit aliquid dependens à subiecto. Itaque actio in agentibus creatis, in quibus per modum emanationis se habet, & accidentaliter conuenit agenti, inchoatiuè est in agente & consummatiue in termino, seu effectui, non secundum eandem entitatem modalem, seu formalitatem; hoc enim est impossibile, cum sit diuersum subiectum, sed secundum diuersam quæ ordine quodam vnum sunt: ad eum modum quo D. Tho. & Theologi 1.2 q. 56. art. 2. dicunt, quòd virtus moralis, quæ moderatur passiones est in duplici potentia, scilicet in voluntate imperante inchoatiuè, & in appetitu eliciente passiones moderatas consummatiue; & quia denominatio virtutis fit simpliciter ab eo, vbi consummatiue est virtus, ideò simpliciter dicitur esse virtus in appetitu sensitivo. Eodem modo actio, quæ est causalitas emanans ab agente, quatenus reddit agens actuum in actu secundo, & transmutatum de otio in actum relinquit formalitatem actionis in agente inchoantem ipsum effectum: vt autem reddit effectum in actu secundo causatum & procedentem à causa, ponit formalitatem in effectui, quæ redditur actio consummata, & inde si denominatio agendi, neque enim aliquid dicitur agere ante effectum, & ratione huius simpliciter actio est in termino.

Et quòd ista sit mens D. Tho. constat ex collatione locorum ipsius, in quibus agit de hac re. Nam in primis, quòd actio ex proprio conceptu actionis non postulet subiectum inhesionis, sed emanationis, constat ex 1. Sen. d. 32. q. 1. art. 1. vbi inquit; Quòd si per impossibile pone-

*poneretur esse aliquam actionem, quæ non esset
accidens, non esset inherens, & tamen denomi-
naret agentem, & tunc agens denominaretur
per id, quod ab eo est, & in eo non est, vt inha-
rens. Ergo ex proprio conceptu actionis, vt
præcisè denominat agens, non dicit subiectum
inhesionis, sed emanationis, licet quia acci-
dens est in rei veritate inherere, quod etiam
apertè dicit in q. 7. de potent. art. 9. ad 7. &
q. 8. art. 2. Item etiam, quod debeat poni actio
in agente in quantum importat actum secun-
dum immutantem ipsum actum primum con-
stat, quia 1. p. q. 54. art. 1. dicit; *Quod actio
est actualitas virentis*. Et 2. contra Gent. cap.
9. *quod actio est complementum potentie*: Et ta-
men, quia non est actualitas completa, &
consummata in ipso agente, sed in effectu, ad
quem derivatur, dicit in dicta q. 54. artic. 3.
quod actio transiens non potest esse ipsum esse
agentis, quia esse significatur intra rem; actio
verò est effluxus in actum ab agente. Deinde
in 2. contra Gent. cap. 35. & in 2. dist. 1. q. 1.
art. 5. ad 11. dicit: *Quod agens agit actione
media, quæ non est essentia ipsius operantis, &
in talibus non potest sequi effectus novus sine no-
ua actione, & novitas actionis facit aliquam
mutationem in agente prout est extens de otio in
actum*. Ergo sentit D. Tho. quod actio aliquid
ponit intrinsecum in agente, & non solum ex-
trinsecè denominat ipsum, alioquin non dice-
ret, quod ponit mutationem in illo. Et con-
formiter ad hoc distinguit S. Thom. creatio-
nem, vt est actio, & vt est passio, seu actio, vt
effecta, & vt efficiens in 1. dist. 47. q. 1. art. 1.
vt intelligamus actionem ad utrumque perti-
nere,*

nere, & importare non vnam, sed duplicem formalitatem, vnam in agente, vt est actio agens: & aliam in effectu, seu passo, vt est actio effecta. Quod tandem expressis verbis affirmat in 2. dist. 40. q. 1. art. 4. ad 1. vbi dicit: *Actionem & passionem non posse esse idem numero accidens, quia actio est in agente, & passio in patiente.* Et cum aliàs ponat cum Philosoph. 3. Physic. lect. 5. & alijs locis supra citatis, quòd actio & passio identificantur cum motu, & quòd actio transiens est propria perfectio operati, consequenter oportet fateri, actionem apud D. Thom. importare duplicem formalitatem, alteram in agente, alteram in passo, seu termino, vbi consummatur actio, & ratione cuius dicitur agens denominari ab aliquo extrinseco, scilicet ab effectu, vt dicit in opusc. 58. tract. de actione, & in tertio Physicorum lect. 5.

Nec potest responderi, quòd quando dicit D. Thom. quòd actio, & passio non sunt idem numero accidens, loquatur de actione vt morali, & libera, & sic est actio immanens. Quando verò dicit actionem esse in agente intelligitur ratione alicuius còmodi extrinseci, quod agenti prouenit ex actione, quia saltem propagatur eius species. Sed contra primam solutionem est, quia D. Thom. prius loquitur in communi de actione, & passione, & motu. Deinde ad litteram loquitur de actione inferente passionem, scilicet crucifigentium Christum, & quæ est accidens numero distinctum à passione: actio autem immanens neque infert passionem, neque ponit in alio subiecto distinctum accidens numero. Si autem loqueretur

retur de actione in esse morali, & non in esse physico, potius dicerentur vnum numero accidens in esse morali actio, & passio, quam plura. Contra secundam autem solutionem instatur, quia actio in quantum accidens inhaeret in agente, vt dicit S. Thom. ergo frustra explicatur id de emolumento extrinseco, hoc enim non inhaeret in agente, & sic ratione talis emolumenti non assignaret S. Thom. subiectum quod actioni conuenit in quantum accidens.

Ex quo manet explicatum fundamentum huius sententiae, sumitur enim ex fundamentis vtriusque sententiae allatae, quae probant requiri actionem, & dari tam in agente quam in passio, nec enim saluatur actio, quin sit actualitas secunda agentis, & actum primum reducat de potentia ad actum, & de orio ad operationem, hoc autem perfectio aliqua est ipsius agentis, & mutatio, & non sola denominatio extrinseca, sicut enim intrinsecè agens est in potentia, & in actu primo ad operandum, ita oportet quod reducatur intrinsecè ad actum secundum, & mutetur in actum, dum in actu operatur; debet ergo ista actualitas actionis in agente esse. Ceterum ibi non consummatur actio & causalitas agentis, nisi effectus ipse procedat & emanet actu ab ipso, & sic origo ipsa motus & termini producti, cum ipso motu & termino identificari debet, illa autem origo ab alio, actio effecta est, & causalitas, & sic formalitas actionis, vt processio & origo motus, cum termino & motu debet identificari, ibique consummatur actio, quia ibi terminatur.

Solum restat respondere ad argumenta secundæ sententiæ pro ea parte, quæ intendunt ostendere, quòd superfluit ista duplex actio. Nam argumenta pro prima sententia solum ostendunt oportere aliquam actualitatem, & formalitatem actionis esse in agente, non tamen omnem, nec ibi consummari, ut dictum est.

Ad primum ergo secundæ sententiæ respond. actionem effectam identificari cum motu & termino producto, sed non actionem efficientem, quæ est actus secundus agentis. Et ad instantias, quæ afferuntur ad probandum non esse duplicem actionem. Respond. ad primam, quòd Aristot. non fuit sollicitus explicare, quomodo actio sit in agente, sed in passio, eò quòd in passio actio est consummative, & inde accipitur denominatio agendi completa, & perfecta, & ideò solum explicavit, quomodo actio sit in passio; hoc enim solum difficultatem habebat, & eius instituto deserviebat, cum principaliter ageret de motu, & de actione, ut est condicio identificata cum motu; & sic solum est in passio.

Ad secundam instantiam dicitur, non superfluere istas duas actiones, quia quælibet earum non est completa, & perfecta, sed utraque requiritur ad consummatam rationem agendi, ob rationem dictam. Et tam ipsa actio effecta, quàm ipsa actio agentis, seu utraque formalitas egreditur ab agente, non per aliam actionem, quia utraque complet eandem actionem, & utraque pertinet ad rationem causalitatis, sed una per modum actualitatis agentis, altera per modum actualitatis passivi; non verò una ut effe-

effectus, altera ut tota causalitas, sed utraque ut conditio, & ratio pertinens ad eandem causalitatem, non tamen utraque immediatè egreditur, sed ordine quodam, quia inchoatur in actione agentis ratio, & causalitas agendi, consummatur tamen in actione ex parte effectus. Et sic non probatur, quòd actio agentis non pertineat ad rationem causalitatis, & sit ratio operandi, sed quòd non pertineat tanquam ultima, & consummatio ratio ipsius. Et sic actio ex parte agentis est formalis egressio, & formalis causalitas inchoatiue, & actiue, non consummatioe, & formaliter.

Ad tertiam instantiam respondetur, per ipsam egressionem effectus sufficienter constitui agens in ratione agendi consummatioe, & denominatioe, non autem inchoatiue, & actiue, seu per modum actus secundi agentis; hoc enim necessario supponitur ad actionem effectam, sicut fides necessario supponit piam affectionem, & virtus in appetitu sensitivo, dispositionem imperandi in voluntate; ideoque actio transiens non dicitur perficere ipsum agens, sed passum, seu effectum, quia ibi consummatur actio, licet in agente inchoetur, & ad terminum ordinetur.

Ad quartam instantiam respondetur, quòd illa actualitas in agente emanat ab ipso, non ut terminus, seu effectus, sed ut modus, seu causalitas inchoata. Et talis modus non emanat ab ipso agente, ut est in potentia purè; sed ut est in potentia mota à Deo, & alijs causis superioribus, quibus inferiores determinantur, & actuantur, ut emanet ab illis actualitas actionis, quæ rursus in ipsa potentialitate actus

primi recipitur actuando illam per modum actus secundi: & sic non est in potentia, & actu secundum idem.

Ad loca D. Thom. respondetur, loqui ipsum sicut & Aristotel. de actione effecta, prout est consummata, & completa ratio agendi, à qua sit denominatio. Et quando ponit differentiam inter actionem immanentem, & transeuntem, quòd illa est perfectio agentis, non ista, loquitur de perfectione consummata, & completa agendi: hæc enim consummatur in agente quando est immanens, in effectu verò, & passo, quando est transiens, inchoatiue autem est in ipso agente, ut dictum est, & quia utraque hæc actio pertinet ad constituendum ipsam causalitatem agentis, una inchoatiue, altera consummatiue, ad idem prædicamentum actionis reducitur etiam illa actio, quæ est in agente, sicut pia affectio ad fidem, & dispositio voluntatis ad virtutem, quæ est in appetitu.



QVÆSTIO XV.

De Infinito.

ARTICVLVS I.

*Quid sit infinitum, & in quo sit punitus
difficultatis*



T sine æquiuocatione in hac parte procedatur, oportet præmittere definitionem, & varias diuisiones, seu acceptiones infiniti. Licet autem plures acceptiones eius Arist. insinuauerit in hoc lib. cap. 4. tamen in præsentibus possumus distinguere infinitum, quod aliud accipitur positiuè, aliud priuatiuè, aliud negatiuè. Cum enim infinitum communissimè acceptum nihil aliud sit quàm illud, quod caret termino, & fine, potest accipi ista carentia priuatiuè, quando est in aliquo subiecto, quod natum est habere terminum, sed tamen caret illo, sicut quantitas est capax, vt finiatur, si tamen non habeat terminum, dicitur infinita priuatiuè, quod etiam dici potest positiuè respectu quantitatis. Et hoc modo definit Phil. cap. 7. infinitum. *Id cuius partem accipientibus, semper aliquid manet extra.* Negatiuè verò infinitum dicitur illud, cuius subiectum non est capax alicuius termini. Hoc autem dupliciter potest contingere, vno modo propter perfectionem posituam subiecti, quando talis

est, quòd nullo termino affici potest. Et hoc modo Deus est positivè infinitus, idest actualitate, & perfectione, non quantitate. Alio modo potest hoc contingere ex imperfectione subiecti, quando tanta est, vt nihil habeat in se, quod terminari possit, sicut punctum, & unitas, quæ propter indiuisibilitatem non habent terminum, sed ipsa sunt terminus.

In presenti non agimus de infinito negativè, nec de infinito positivè, quod est Deus; sed de infinito priuativè, quod definiuit Arist. in presenti definitione tradita. Licet autem hoc infinitum manifestus inueniatur in quantitate, tamen reperiri etiam potest in alijs prædicamentis, vt in substantia, qualitate, & relatione. Infinitum substantiæ est, quod caret terminis essendi, seu existendi, quibus substantia ipsa in ratione substantiæ constituitur. Et hoc infinitum, vt postea videbimus, est idem ac infinitum in genere entis. Infinitum in qualitate est, quod caret termino intensiõis secundum gradus qualitatis. Infinitum in relatione est, quod dicit respectum ad aliquid infinitum, vnde sumit connotationem, seu denominationem aliquam extrinsecam infinitatis; sicut actiones Christi dicuntur infiniti valoris per respectum ad personam dignificantem. Denique infinitum in quantitate iuxta duplex genus quantitatis, discretæ, & continuæ, aliud est infinitum magnitudinis, aliud multitudinis. Illud est, quod caret termino partium in continuo: istud est, quod caret termino multitudinis, & diuisionis. Quare infinitum, de quo in presenti tractari solet, est triplex, secundum magnitudinem, secundum multitudinem, & secundum

secundum intensionem.

Potest autem hoc infinitum sumi vel in actu, vel in potentia. Infinitum in actu, quod etiam infinitum positione, seu positive appellari potest, & communiter dicitur infinitum categorematicè, idest affirmatiuè aut prædicatiuè, est illud cui non solum non potest signari terminus, ultra quem non transeat, sed etiam de facto omnes terminos transit, & ideo requiritur ad tale infinitum, quod habeat partes infinitas æquales vni certæ, non communicantes inter se, & simul existentes. Quod est dicere, quod infinitum actu requirit partes determinatas, seu aliquotas, quarum vna superaddat alteri nouam partem, quæ non communicet, nec reassumatur cum altera, sicut Philosoph. dicit in 7. huius libri, quod circuli dicuntur infiniti reassumendo easdem partes: sed tunc dicitur infinitum ait Philos. quando quacumque parte accepta, noua alia sumi potest. Infinitum autem in potentia dicitur illud, quod secundum id, quod actu habet, est finitum, sed secundum id, quod est in potentia, non habet terminum, idest non potest illi signari certus, aut determinatus terminus, ultra quem transire non possit, siue per additionem, siue per subtractionem, siue per successionem. Quomodo autem distinguantur partes aliquotæ, seu designatæ à partibus indeterminatis, & proportionalibus dicemus commodius art. 3. solut. ad 1. & latius lib. 6. q. 20.

Ex his autem colligitur duplex principium, quæ in hac qu. de infinito regulari debemus. *Primum* est, quod omne illud, quod terminis clauditur non interminabiliter distantibus, in-

fini-

finitum esse non potest in actu, sed si aliqua infinitas ibi datur, solum est in potentia, & finitatem categoricè, quia scilicet non potest aliquis terminus signari, ultraquem diuisio, vel additio eius non possit transire. Actu verò quidquid inter terminos comprehendi potest, terminatum est ac finitum. *Secundum* est, quòd infinitum actu non potest fieri per additionem partium, & omne illud, quod est capax augmenti, finitum est. Ratio est quia additio vel fit per aliquid finitum, vel infinitum; si per infinitum, iam supponitur ipsa infinitas in eo, quòd additur, & ita non fit infinitum per ipsam additionem: si per aliquid finitum, vel tale finitum superadditur alteri finito, & sic totum remanet finitum, quia utrumque terminum habet: vel superadditur alteri infinito, & sic iam supponitur infinitum, non per additionem fit. Quidquid ergo per additionem fit maius, vel per subtractionem minus, actu infinitum non est.

His suppositis, tria sunt certa in hac quaestione. *Primum* est infinitum relatiuè actu non repugnare. Ratio est, quia ista infinitas consistit solum in relatione quadam ad Deum, qui est infinitus. Tripliciter autem aliquid respicit Deum. Vno modo generali ratione, sicut effectus causam efficientem, non quidem participando ab ipso aliquod donum infinitum, sed præcisè, quia causa eius efficiens in se infinita est. Secundò speciali modo, quatenus ab ipso Deo participatur aliquod donum eleuans creaturam ad bonum infinitum, sicut gratia eleuat hominem ad consortium, & fruitionem diuinæ naturæ. Tertiò modo specialissimè, ut quan-

quando ipse Deus vnitur in persona naturæ creatæ. Tunc enim accipit valorem, & dignitatem ex persona cui coniungitur, qui valor consistit in relatione ad ipsam personam, vt ad principium operationum proximum, & vt quod.

Secundò, certum est non posse dari aliquam creaturam, quæ sit infinita in omni genere entis, creatura enim est ens limitatum. Et similiter repugnat, dari aliquam creaturam, quæ sit infinita in genere substantiæ infinitate in actu, benè tamen in potentia, & secundum quid, sicut materia prima habet infinitatem in potentia respectu formarum, quarum est capax. Ratio sumitur ex D. Thom. primò contra Gentil. cap. 43. & 1. p. q. 7. art. 2. Quia infinitas in genere substantiæ non est infinitas extensionis, vel intensionis: id enim pertinet ad genus qualitatis, vel quantitatis: solum ergo restat infinitas per carentiam terminorum substantiæ. Termini autem substantiæ, vel sunt physici, vel metaphysici: metaphysici sunt genus, & differentia, quibus contrahitur, & limitatur essentia rei: physici sunt materia, & forma in compositis, vel potentialitas, & actualitas, etiam in simplicibus; substantia ergo creata non potest carere genere, & differentia, cum sit in prædicamento, quod est coordinatio generum, & specterum. Similiter non potest carere aliquo termino physico, quia non potest esse purus actus, sed debet habere admixtam aliquam potentialitatem, atque adeò solum potest esse infinitum in actu per carentiam omnis termini limitantis actualitatem, quæ est potentialitas. Si autem esset pura potentia, licet esset

set infinita, non tamen esset infinitum in actu, sed in potentia.

Nec valet dicere cum P. Vazquez 1. p. disp. 22. & disp. 25. cap. 3. quod non obstat infinitas ad hoc, quod aliquid habeat genus, & differentiam, & ponatur in prædicamento. Deus enim componitur ex genere, & differentia, quia est compositio rationis, quæ illi non repugnat, & tamen est infinitus. Sed contra est; tum quia oppositum ostendimus in Logica, qu. 14. tum quia in præsentī illa doctrina non est ad rem: quidquid enim sit an repugnet Deo compositio ex genere & differentia, quæ est compositio rationis, tamen in substantia creata talis compositio rectè tollit infinitatem; quia vel illud genus, & differentia quibus componitur substantia creata, aliquid potentialitatis important, vel sunt actus purus. Si hoc secundum non remanet creatura, sed Deus. Si primum ergo includunt genus, & differentiam per modum termini, & limitationis. Includunt enim actum, & potentiam; quæ sunt termini limitantes in genere substantiæ. Quomodo autem cum hoc stet, quod Deus possit facere infinitas species substantiales, & tamen non possit peruenire ad aliquam, quæ sit infinitæ perfectionis, dicemus art. 3.

Ultimo, certum est infinitum in actu, siue in extensione, siue in intensione, vel multitudine naturaliter, & secundum legem ordinariam fieri non posse. In hoc convenit communis consensus Philos. cum Arist. hic. cap. 5. & 6. & Theologor. cum D. Tho. 1. p. q. 7. Constat enim, quod de facto, *Omnia facta sunt in numero, pondere, & mensura*, ut dicitur Sap. 12, Si

Si autem daretur infinitum in actu, vel caret numero si esset infinitum multitudine, vel mensura si esset infinitum magnitudine, vel pondere si esset infinitum qualitate.

Ratio autem cur naturaliter dari non possit, intra vniuersum quidem constat ex ipsa vniuersi vnitatem & limitatione, in quo infinita quantitas esse non potest, quia occuparet omnia. Absolutè autem & independenter ab vniuerso, constabit ex finita virtute & receptione cuiuslibet creaturæ, vnde effectus infiniti prodire non possunt, vt sequent. artic. latius ostendetur.

ARTICVLVS II.

Verum implicet dari infinitum actu secundum quantitatem vel intensiōem?

DVæ sunt principales in hac sententia. Prima tenet, non implicare, quòd datur actu infinitum absolutè loquendo, vt ex antiquis tenet Greg. in 1. dist. 43. q. 4. Ocham. Gabriel. & alij, quos citat & sequitur Vazq. 1. p. disp. 26. c. 1. & probabile reputant Conimb. hic q. 2. art. 1. qui loquuntur de infinito magnitudinis, vel multitudinis. Expresse etiam docetur in schola Scoti, quòd infinitum in magnitudine & multitudine non repugnat, bene tamen infinitum in intensiōe, eò quòd apud ipsum gradus intensiōis sunt inæquales, ita quòd vnus continet alium, & sic si daretur infinita qualitas, conineret infinitam perfectiōem, quod non currit in partibus quantitatis continuæ, vel discretæ, quarum vna non continet

net aliam in p̄fectione. Aliqui tamen simpliciter fatentur, infinitum esse possibile in actu, siue in quantitate, siue in qualitate, vt Cabero hic disp. 2.

Secunda sententia negat esse possibile aliquod infinitum, tam in magnitudine, quàm multitudine; & eadem ratio est de intensione, Ita D. Tho. 1. p. q. 7. art. 3. & 4. & quodl. 9. art. 1. & quodl. 12. art. 2. & communiter Thomistæ ad prædictum locum, 1. p. Et tamen ipse Diu. Tho. in fine opusc. 27. fatetur adhuc non esse demonstratum, non posse dari infinita in actu. Ista sententia principaliter nititur in explicando implicationes, prima verò in soluendo. Et ideò in hoc artic. conabimur explicare rationes D. Thom. & contra aduersariorum responsiones roborare. In sequenti verò quasdam difficultates & rationes, quæ contra nostram sententiam militant, dissoluere.

Sit ergo unica conclusio, Repugnat etiam de potentia absoluta dari infinitum in actu siue in magnitudine, siue in multitudine, siue in intensione. Pro hac conclusione plures solent afferri implicationes. Et quidem Martinez in præsentī, cui non placent rationes D. Thom. illam affert, quia si daretur corpus infinitum, ex quocumque puncto tanquàm ex centro produci possent duæ lineæ versus circumferentiam, & istæ quanto magis protrahuntur, magis distant inter se; vnde cùm longitudo earum sit infinita, etiam distantia earum infinita erit, & ex alia parte distantia infinita esse non posset, quia est clausa inter duas lineas seu terminos; ergo, &c. Hac ratione etiam plures alij vtuntur.

Videtur tamen ratio ista non convincere ; quia dato corpore infinito , lineæ illæ essent quidem lineæ , sed non essent termini ex parte circumferentiæ illius corporis , quia lineæ illæ interminabiles sunt , nec habent circumferentiam ubi terminentur , si ergo interminabiles sunt & infinitæ , desinunt esse termini , & consequenter inter illas lineas potest esse aliquid infinitum , quia ipsæ etiam infinitæ sunt. Illud autem axioma *inter duos terminos non potest claudi infinitum* , intelligitur inter duos terminos finitè distantes , alias non sunt termini .

Quare defendendo rationes D. Tho. ex duplici principio desumitur implicatio. *Primum* est considerando quantitatem uti accidens naturale consecutum ad corpus naturale . *Secundum* est considerando ipsam mathematicè , & secundum se , ut abstrahit à corpore naturali. Et prima ratio formata est à nobis supra q. 8. artic. 2. Quia quantitas est accidens consecutum ad substantiam , quæ est radix continens quidquid in tali quantitate inuenitur , sed substantia est finita & limitata , non solum in esse absoluto , sed etiam ut radix est accidentium , quia ratio radices non habet maiorem amplitudinem , quàm ipsa ratio essentia substantialis , quæ radix est , & principium accidentalis , ergo si radix est limitata , etiam & quantitas limitata est & finita , & præcipuè hoc habet vim in quantitate , quia non potest crescere quantitas , nisi etiam addatur nova entitas substantiæ , nec enim in eadem parte substantiæ potest esse duplex quantitas penetrata ; ergo si quantitas est infinita , etiam supponitur substantia infinita , quia ad quantita-

tis

tis additionem, substantia etiam additur, & sic prius debet substantia esse infinita, quàm quantitas. Repugnat autem dari substantiam infinitam, vt artic. præced. ostensum est, ergo & quantitatem.

Respondet Martinez, non probare S. Tho. ex eo, quòd substantia sit finita in esse, quantitatem debere esse finitam in extensione, quia hæc sunt diuersa genera, sed solum finitam in esse, quod verum est, quia infinita quantitas, finitam essentiam habet. *Sed contra*, quia substantia non solum est finita secundum esse in ordine ad se, sed etiam vt est radix quantitatis in extensione, quia etiam ipsa extensio quantitatis, vt extensio radicem habet, & consequitur formam substantialem, sed substantia, vt radix talis accidentis, finita est, nec enim stat quòd in esse substantiali sit finita, & in ratione radice accidentium finita non sit: ergo non potest radix finita deriuare ex se quantitatem infinitam; sicut benè valet, virtus aliqua est finita; ergo & operatio & effectus, licet effectus & operatio non sint eiusdem speciei, vel generis cum virtute.

Aliter conatur P. Vazquez vbi supra infringere consequentiam S. Tho. quia si determinata substantia determinatam postulat quantitatem, sequeretur quòd omne corpus naturale determinatam haberet quantitatem, quod patet esse falsum in igne, qui sine termino potest crescere, vt dicitur 2. de anima, tex. 41. *Ceterum* hæc instantia non loquitur de quantitate, vt consecuta ad formam substantialem, de qua solum procedit ratio S. Tho. sed de quantitate vt superaddita, quæ scilicet, in infinitum super-

peraddi potest. Hoc autem non pertinet ad rationem D. Tho. quia D. Tho. intendit probare, non dari infinitum actu & categorematicè, non autem intendit probare, non posse aliquid superaddi ad alterum in infinitum, quia additio in infinitum nunquam facit infinitum in actu, ut supra diximus, sed solum sincategorematicè, & in potentia, quia solum consistit infinitum additione in hoc, quòd non sit assignabilis terminus ultra quem non transeat, non verò quòd ita sit infinitum, quòd omni termino actu careat, & omnes terminos transferit; per additionem enim finitarum partium infinitum non est pertransibile; non ergo D. Thom. excludit infinitum additionis, & sincategorematicum, sed infinitum actu, quod solum potest prima productione consequi, non additione fieri.

Quod verò addit S. Thom. repugnare infinitam magnitudinem in corpore naturali, quia non posset moveri, non est ratio probans implicationem absolutè, non enim repugnat dari corpus immobile, sicut plerique existimant de cælo Empireo, vel si esset mobile, ratione tamen infinitatis esset impeditum moveri, sed tamen Div. Thom. attulit hanc rationem, ex Philosopho in ordine ad ea corpora, quæ sensibus experimur esse mobilia, tale enim corpus infinitum esse non potest.

Secundum principium, seu rationem sumit S. Thom. loquendo de quantitate mathematicè, & sine ordine ad corpus naturale, quia omnis quantitas debet esse sub aliqua forma, forma autem quanti est aliqua figura; ergo oportebit quòd habeat aliquam figuram, & consequen-

quenter aliquem terminum, quia figura resultat ex termino quantitatis. *Respondens* aliqui figuram non esse formam essentialem quantitatis, sed quantitatem se ipsa esse formam. *Secundò*, figuram solum conuenire quantitati finitæ non infinitæ. *Tertiò*, quòd absolutè inuenitur quantitas sine figura, vt quantitas Corporis Christi in Sacramento.

Ceterum istæ instantiæ vnico verbo soluuntur; quòd D. Tho. loquitur de figura radicali, non formali: est enim figura modus ex terminatione quantitatis resultans; & ita figura formaliter est id quod resultat, & radicaliter id ex quo resultat. Est ergo sensus D. Tho. quòd quantitas non potest carere eo, quo specificatur, vel indiuiduatur, quia nihil potest esse in rerum natura, quod non sit specificatum, vel indiuiduatum: quantitas autem specificatur vel indiuiduatur per variam terminationem sui, sicut species multitudinis sunt duo, vel tria, &c. & magnitudinis bicubitum, vel tricubitum, aut secundum aliam mensuram mensurabile; neque enim alias differentias diuisivas quantitatis nouimus, quàm quæ fiunt penes diuersas mensurabilitates, quia quantitas talis est, naturæ, quòd quolibet addito, vel subtracto fit maior, vel minor, & sic variatur eius species, vel saltem indiuiduatio, secundum additionem, vel subtractionem; vnde nata est sequi aliqua figura. Quantitas autem infinita caret omni tali distinctiuo quantitatis, & si ei aliquid addatur, vel subtrahatur, non fit maior, vel minor, ergo omnino repugnat in singulari, sicut si diceretur dari animal infinitum, quod nulla specie animalis determinaretur,

etur, vel hominem infinitum, qui nulla indiuiduatione contraheretur. Ita sumitur explicatio huius rationis ex D. Thom. quodlib. 9. art. 1. deduciturq; ex Aristotele in hoc libro cap. 6. & in 1. de celo, text. 2. ubi ostendit, quod impossibile est plura corpora esse infinita, quia corpus est dimensionatum ad omnem partem; & ideò implicatio ista directè procedit de corpore quanto, cui propriè conuenit figura, non tamen de linea, aut superficie, quæ non sunt diuisibiles ex omni parte, & ideò si illæ essent infinitæ, non repugnaret vnum infinitum esse maius altero, & sic possent dari plures lineæ infinitæ: corpus autem quia trina dimensione gaudet, si esset infinitum non posset esse nisi vnum, nec per plures species, vel indiuidua esset variabile, nec vnum maius altero, vt etiam aduertit S. Tho. 3. p. q. 10. art. 3. ad 3. Aliundè tamen repugnaret dari infinitam lineam, vel superficiem, quia in re dari non potest, nisi in aliquo corpore, & consequenter debet infinitas partes ambire, atque adeò supponere infinitum corpus cui insit.

Ex eodem principio proportionaliter applicato ostenditur repugnare infinitam intensiōnem in qualitate, sicut enim quantitas sequitur determinatam formam, ita & qualitas, ergo sicut non potest dari infinita quantitas, ita nec qualitas, sed neque potest superaddi ab extrinseco infinitas intensiōnis in qualitate, quia vel ista infinitas adueniret per additionem gradus ad gradum, vel per vnicam productionem totius infinitatis: per additionem fieri non potest, quia infinitum per additionem finitarum partium est impertransibile. Si verò id quod
addi.

additur est infinitum, iam non per additionem fiet infinitum, sed supponitur esse. Si verò unica productione fiat infinita qualitas illa, consequitur aut recipitur in aliqua forma, quæ cum finita & determinata sit, non potest esse capax infinitæ qualitatis præsertim quia qualitas actualitatem sequitur formæ, & hæc limitata est per potentialitatem admixtam.

Implicationes circa infinitum multitudinis.

Prima implicatio D.Tho. q.7. 1.p. art.4. est circa multitudinem quantitativam, quia si daretur infinita multitudo, non esset in aliqua specie determinata numeri, quia omnis species numeri determinatur per aliquam ultimam unitatem, cum sit multitudo mensurata per unum, infinita autem multitudo nullam speciem haberet mensuratam per unum, ergo talis numerus non est dabilis.

Respondet P. Vazquez disput. illa 26. cap. 3. quòd non constat omnem multitudinem esse in specie numeri. Deinde quòd multitudo à parte rei non habet formalem rationem numeri, id enim ab intellectu numerante habetur, ante intellectum enim nō est cur ista unitas pertineat ad hunc numerum potius quam ad illum, sed una tantum est omnium rerum multitudo.

Cæterum ad primam instantiam respondetur, constare quòd omnis multitudo si est quantitativa, est in aliqua specie numeri, quia omnis multitudo quantitativa est quantitas discreta, ergo pertinet ad genus numeri, ergo ad aliquam speciem, quia nihil est in genere, quod non sit in aliqua specie talis generis,

Ad

Ad secundam instantiam respondetur, quòd
Nō ostendimus in Logica q. 16. numerus est ve-
ra, & realis species quantitatis, licet designatio
actualis huius ultimæ unitatis, vel illius depen-
deat ab intellectu, sed hoc non est de essentia
numeri: tota autem coordinatio, & mensura-
bilitas unitatum in re datur secundum quòd
numerus fit maior aut minor quantitativè in
re, & sic est mensurabilis per vnum, & hoc
pertinet ad formalem rationem quantitatis di-
cretæ. Et quando dicitur omnem rerum mul-
titudinem esse vnam. Respondetur, multitu-
dines rerum dupliciter distingui, vel penes su-
biecta vt multitudo lapidum, lignorum, equo-
rum, &c. Et hoc modo constat non omnem
multitudinem esse vnam. Secundò distingui-
tur penes diuersam mensurabilitatem diuersa-
rum unitatum, coordinationem ad vnum, fi-
cut aliter mensuratur numerus mille, vel cen-
tum, vel viginti, & hoc etiam modo non est
vna multitudo omnium quantitatum, sed alia
multitudo millium vel centum, &c. Et hoc
in re, quia in re dantur mille lapides, vel cen-
tum lapides, & à parte rei prius fuerunt octo
homines quàm viginti, vel centum homines.

Et roboratur ista ratio, quia numerus, vel fit
infinite per additionem unitatum vel per vni-
cam productionem infiniti numeri. Primum
esse non potest, quia infinitum additione fini-
ti est impertransibile. Secundum tollit omnem
speciem numeri, qui per determinatas unita-
tes variatur, & fit maior vel minor. Infinita
autem multitudo neque additione unitatis tie-
ret maior, nec subtractione minor, quia infi-
nitum subtracto, vel addito aliquo finito æquè

Manet infinitum, aliàs illo finito terminaretur: infinitum ergo non est species determinata numeri.

Ex quo intelliguntur implicationes, quæ ex inconuenientibus adduci solent, quia si daretur infinita multitudo in actu, tot erunt binarij in illa multitudine, quot quaternarij, vel denarij, & si producerentur infiniti homines, tot essent homines quot capilli eorum; quod implicat, quia binarius est pars quaternarij, & omne totum est maius sua parte, cum pars componat totum cum additione alterius. Sequela verò probatur, quia posito infinito si segregentur binarij alternatim relinquendo vnum binarium, & segregando alium, tunc vel omnes binarij segregati constituent infinitam multitudinem, vel non; si non, ergo etiam alij binarij erunt finiti & sic omnes simul non facient infinitum, quia vtrumque finitum est: si primum, ergò dabitur duplex infinitum in utroque cumulo, & sic sine aliqua diuisione, vel additione ex vno infinito consurget aliud, & consequenter tot sunt binarij quot quaternarij, quia si sunt infiniti binarij, etiam possum numerare illos per quaternarios, vel denarios, & tunc, vel exhauriretur illa multitudo numerando per quaternarios, & sic redderetur finita, vel non exhauriretur, & sic erunt infiniti quaternarij in binarijs etiam materialiter.

Omitto, quòd infinitum non est quid certum, & determinatum in eo genere quo infinitum est, quia caret terminis, ergo prout tale non clauditur sub determinata, & certa intentione, & actione creantis. Nec soluit P. Vazq. dicendo, quòd in multitudine infinita quælibet
fin.

singularis cādit sub certa intentione , licet non tota multitudo . Contra enim est , quòd infinita multitudo non potest fieri per additionem & multiplicationem singularium , quia quodlibet finitum est , & additio finitorum non pertransit in infinitum . Si autem vnica productione totum infinitum fit , ergo & vnica intentione , & hæc certa , & determinata esse non potest ex parte effectus , qui indeterminatus est .

ARTICVLVS III.

Expediuntur difficultates , & argumenta contra nostram sententiam .

Primò arguit ad probandum non repugnare dari infinitum in actu . Quia in quolibet continuo omnes partes proportionales vniuntur indiuisibilibus , alioquin penetrarentur si se totis , & non per extremitates seu indiuisibilia vnirentur , ergo cum partes istæ infinitæ sunt , & actu copulentur per indiuisibilia , sunt actu infinita indiuisibilia , quia partes sic copulatæ , & non penetratæ sunt in infinitum diuisibiles . *Secundò* , Deus potest facere species in infinitum perfectiores , & de facto cognoscit omnes illas , ergo cognoscit aliquam infinitè reliquas excedentem , nam si omnes cognoscit , & illæ sunt infinitæ , & vna excedit in perfectione aliam , inter illas oportet quòd aliqua infinitè excedat alias . Idem argumentum fit de infinita magnitudine , aut multitudine , aut intensione ; cognoscit enim Deus omnem quantitatem , vel multitudinem possibilem , & illa

est infinita, & sine termino, ergo aliquam magnitudinem, vel multitudinem infinitam cognoscit esse possibilem, & sic si fiat nullum est inconueniens. *Tertio*. In quolibet instanti vnus horæ potest Deus creare vnum Angelum, vel vnum lapidem & conseruare illum, ergo in fine horæ erunt infiniti Angeli, quia instantia infinita sunt, cum infinitas partes proportionales vniant: quod si dicatur non posse fieri Angelum, nisi in instanti designato, non in proportionali, & indeterminato. Contra est, quia posset Deus ab æterno creare mundum, & in quolibet die designato vnum Angelum, & sic essent creati infiniti Angeli, quia sunt transacti infiniti dies. *Quarto*, Deus cognoscit infinitas cogitationes, hominum & Angelorum per totam æternitatem futuras, ergo videt infinitam multitudinem possibilem, imò & coexistentem simul in æternitate, ergo non est inconueniens, quod simul ponantur in tempore, nam si ideò non possunt poni in tempore, quia debent cadere sub certa intentione creantis; similiter ob eandem rationem non possent simul esse in æternitate, quidquid enim in æternitate est, iam subest actioni diuinæ, & intentioni eius.

Vltimo non repugnat Deum facere infinitum neque ex parte potentie, quia infinita est, neque ex parte facti; tum, quia infinita magnitudo non est infinitas simpliciter, sed in genere determinato, & essentiam habet finitam, & positam in prædicamento quantitatis; tum quia vna linea, etiam si sit infinita non exhaurit omnes lineas; possunt enim esse plures lineæ infinitæ, quarum vna sit maior altera, ergo
tale

tale infinitum non tollit distinctionem ab alijs; tñm denique, quia omne creabile collectivè est infinitum, & omne illud est possibile siquidem est creabile, ergo possibile est infinitum in actu. Neque hoc est exhaustire potentiam diuinam, sed habere actum adæquatum circa omnia possibilis. Et confirm. quia si Deus ageret ex necessitate naturæ, operaretur infinita, quia ageret secundum vltimum potentia, quæ infinita est; ergo etiam modo potest id facere, siquidem ex parte omnipotentia eadem est virtus, iudicium autem & libertas id non tollit, imò de facto Deus habet scientiam practicam, & ideam de omni illo quod ageret si ex necessitate naturæ operaretur; ergo sicut cognoscit infinitum in actu, ita potest facere illud, quia cognoscendo, & dicendo facit.

Ad primum respond. negando quòd dentur infinita diuisibilia in actu continuo, licet entitatem suam habeant in actu, sed non infinitatem, sunt enim partes proportionales communicantes partibus aliquotis. Vndè dicit D. Tho. in 4. dist. 10. q. 1. art. 3. quæst. 3. ad 1. *Quòd actu non est accipere numerum partium in continuo ante diuisionem, sed potentia tantum;* quare partes proportionales non sunt distinctæ, vel superadditæ ipsis aliquotis & distinctis indiuisibilibus vnitæ, sic enim quantumcumque essent minimæ quantitatis, si in infinitum multiplicantur, facerent magnitudinem infinitam actu. Sunt ergo partes proportionales in re idem quod partes aliquotæ secundum aliam considerationem: eadem enim quantitas vt componitur ex partibus, quæ sunt plures per additionem vnius ad aliam, dicitur

habere partes aliquotas, idest, quæ ratione additionis, vel subtractionis faciunt maius, vel minus in quantitate, atque adeò talis pars non debet quantitatem suam habere solum ratione partium adiunctarum cum quibus communicat, sed debet habere partes quas superaddat partibus adiunctis. Partes autem proportionales sunt partes contentæ in aliquotis, & communicantes non quia penetrentur, sed quia una pars quæ seruit vni quantitati, seu parti diuisibili, potest etiam seruire alteri sibi immediatæ, iuxta diuersam comparisonem aut designationem partium in quibus fiat diuisio. Et ita vocantur proportionales, quia in eadem finita quantitate quæcumque designatio partis fiat, secundum quamcumque combinationem & proportionem, diuisibilis est; fieri autem possunt infinitæ designationes per repetitionem, & communicationem partium, quod est esse in infinitum diuisibile, non collectiuè, & secundum additionem nouæ quantitatis, sed diuisiuè, & secundum diuersam designationem quæ in qualibet parte continui fieri potest in sibi immediatas, & rursus si designetur pars immediata, potest diuidi in partem sibi etiam immediatam, quæ antea diuidebatur in illam, & hoc est esse se communicantes, quod in infinitum fieri potest, sed non infinitas addere partes, aut indiuisibilia, de quo vide infra q. 22. latius.

Ad secundum respondetur, quòd in infinitis creaturis, quas Deus cognoscit, non datur aliqua infinite perfecta, qualibet enim signata, semper restat alia maior & perfectior, & sic ex parte rei cognitæ solum sunt infinita sincate-
gore-

gorematicè, licèt ex parte cognoscentis simul, & categorematicè omnia illa cognoscantur. Et argumenta ista plerumque peccant à modo cognoscentis ad modum ex parte rei cognitæ. Vndè Deus non videt infinita simul illa in actu, idest ex parte rei visæ, licèt simul illa videat ex parte cognoscentis; sed videt quòd ex parte rei cognitæ quolibet dato, aliud melius fieri potest in infinitum. Secundò dicitur, quòd quolibet productò, potest Deus facere perfectiùs perfectione contenta intra limites alicuius generis, non excedentè illos: perfectio autem intra terminos clausa, solum est maior in infinitum sine categorematicè, & modo proportionali, non in actu, & categorematicè, hoc enim extra omnes terminos est: omnes autem res possibiles intra terminos alicuius generis sunt, & omnis magnitudo aut numerus, species quædam est.

Quod si petas, quæ est causa, cur dicatur Deus videre multitudinem infinitam, hoc ipso quòd videt omnia possibilia, vel aliquam multitudinem sine terminò, quia videt omnia illa simul, ex eo autem quòd videat magnitudinem omnem, vel species quas potest facere in infinitum, non dicitur videri aliquam speciem, vel magnitudinem actu infinitam. *Respond.* Quòd ad multitudinem sine categorematicè infinitam, & in potentia nihil deest, nisi quòd simul in actu ponatur, vt reddatur infinitum actu; hoc autem consequitur beneficio intellectus simul in actu videntis ea quæ non sunt simul, sed sine categorematicè, & in potentia infinita. Vt autem detur magnitudo infinita, non sufficit simul apprehendere plures, vel omnes magni-

itudines, quæ cognoscuntur fieri posse, sed requiritur quòd cognoscat vna magnitudo extra omnem terminum extensa & actu infinita, hæc autem non est possibilis ex parte rei cognitæ.

Ad tertium benè ibi responsum est, nec enim potest produci Angelus nisi in aliquo determinato instanti, & cum post illud instans non sequatur aliud immediatè, sed aliqua pars in qua inuoluuntur infinita instantia indeterminata, quando in alio instanti produciatur alius Angelus iam sunt transacta infinita instantia in illa parte immediata, in qua non fuit productus Angelus. *Ad replicam* respondebitur in lib. 8. q. 24. art. 2. vbi ostendemus non potuisse dari motum ab æterno. Vndè si producerentur ab æterno Angeli non per dies successiuos, sed extra omne tempus deberent creari, & sic perinde est atque creare infinitos vnica productione, quod repugnat.

Ad quartum respondetur, non repugnare, quòd Deus cognoscat infinita simul in actu ex parte cognoscentis, imò & Christus cognitione creata. Ratio est, quia infinitum non repugnat si sit contentum in alio antecedenter existente, siuè finito, siuè infinito. Et sic Christus cognitione creata cognoscit infinita, vt contenta in aliquo finito, scilicet in specie sub qua continentur indiuidua, & ad quam tendit directè repræsentatio speciei. Et similiter Deus cognoscit infinita, vt contenta in sua essentia, & deriuata ab ideis, & in æternitate continentur infinita non in actu proprio, sed alieno, scilicet in mensura ipsius æternitatis, quæ infinita & increata est; infinitum autem sub tali esse
infi,

infinito, & increato contineri non repugnat, sed in esse proprio, & creato, quod limitatum est, & terminatum, neque est necesse quod omne, quod Deus cognoscit, possit facere eo modo quo cognoscit ex parte cognoscentis, sed eo modo quo cognoscit ex parte rei cognitæ & factibilis; imò potius modus ex parte cognoscentis solet opposito modo se habere ad modum ex parte rei cognitæ existendo in se entitatiuè & materialiter, in cognoscente immaterialiter.

Ad ultimum resp. repugnare infinitum ex parte rei factæ. Ad primam instantiam dicitur, quod hoc ipsum quod quantitas est finitæ essentia, debet habere in re finitam terminationem, præsertim cum in quantitate ex diuersa terminatione sumatur determinata species, vel individuatio quantitatis, & infinitas in actu non est passio quantitatis, sed sine categorematica. Ad secundam instantiam iam supra diximus, quod si esset infinitum, tantum esset vñum, plures autem lineæ infinitæ non ita repugnant si in abstracto, & quasi mathematicè considerentur, in re autem non potest poni linea infinita, nisi subiectetur in corpore infinito. Ad tertiam respondetur, quod Deus potest facere omne possibile eo modo quo possibile est: potest autem infinitum diuisiue, & modo determinato, non collectiue, & modo infinito, & indeterminato facere, sicut potest fieri album, quod sit nigrum & sedens itans non conjunctionem, sed diuisim.

Ad confirmationem respondetur, quod dato illo impossibili, adhuc non sequeretur infinitum in actu, quia operaretur secundum vltimum potentia non absolute, sed secundum ap-

plicationem ad capacitatem finitam subiecti creati, vel obiecti producendi, sicut persona diuina non potest infinito modo personare naturam creatam.

CIRCA LIBRVM

Quartum Physicorum.



Intentum Philosophi in hoc libro postquam supra determinauit de proprietate entis mobilis, quæ est motus, est determinare de duplici mensura, altera ipsius mobilis, altera ipsius motus. Mensura mobilis extrinseca est locus, & quia oppositum loci est vacuum, agit primò de loco, deinde de vacuo. Mensura verò ipsius motus est tempus, & ita tertio loco agit de tempore. Diuiditur autem totus liber in 14. capita. In primis quinque agit de natura loci: in quatuor sequentibus de vacuo: in quinque reliquis de tempore.



SVMMMA TEXTVS⁸³

Libri Quarti Physicorum.

IN capite primo naturam loci inquisiturus tria facit Philosophus. Primò, præmittit pertinere ad Philosophum naturalem agere de loco. Secundò, incipit disputationem de loco in vtramque partem; primò quidem probando quod locus sit; deinde, in tertia parte capitis, ostendendò quòd locus non sit.

Circa primum ostendit ad Physicum pertinere agere de loco: tùm, quia esse in loco est commune omnibus entibus naturalibus: tùm, quia ad Physicam pertinet agere de omni motu, quorum vnus est motus localis, qui sine loco cognosci non potest.

Circa secundum, ostendit dari locum; tùm secundum rei veritatem; tùm, ex opinionibus Antiquorum. Ex rei veritate, primò quia stante eodem loco, videmus mutari corpora, sicut exeunte aqua ex vase subintrat aer, ergo locus aliquid aliud est à corporibus contentis. Secundò, quia locus grauium, & leuium non solum ostendit locum esse aliquid, sed etiam habere virtutem conseruandi locata, & propter hoc illa corpora tendunt ad talia loca, vt ibi conseruentur. Ex opinionibus autem Antiquorum id probat. Primò, ex opinione eorum, qui ponebant vacuum; hi enim debebant admittere locum, quia vacuum est locus priuatus corpore. Secundò, ex opinione Hesiodi, qui posuit primò factum fuisse quoddam chaos & confu-

sionem rerum, deinde terram latam & spaciosam quasi locum, & receptaculum rerum, quia omnia credebatur esse in loco, & sic locus aliquid est etiam secundum opinionem Antiquorum.

Circa tertium ponit rationes ad probandum, quod locus non sit. Primum, nam si locus est aliquid, maximè debet esse corpus, siquidem habet longitudinem, latitudinem, & profunditatem: non potest autem esse corpus, quia est simul cum locato, corpus autem non potest esse simul cum alio corpore: deinde quia quid est, habet rationem causæ respectu alicuius; locus autem respectu locati non est materia, cum locatum non constet ex illo, neque forma, quia aliàs omnia locata essent eiusdem formæ & speciei; neque finis, cum magis locus sit propter locata; neque efficiens, cum potius sit terminus motus, ergo nihil. Item quia omne quod est, est in loco, ergo si locus est aliquid, erit in loco, & ille locus in alio, & sic in infinitum. Denique quia si omne corpus est in loco & in omni loco corpus, ergo cum locatam crescit, crescet etiam locus, aliàs non adæquaretur locus locato, sed locus non potest crescere, quia est immobilis, ergo non datur locus.

In capite secundo, antequam Aristoteles determinet, quid sit locus, disputat duo in presenti capite. Primum, an locus sit materia vel forma. Secundò probat, quod nec sit materia, nec forma.

Circa primum, proponit duplicem rationem. Primam ad probandum quod locus sit forma. Secundam ad probandum, quod sit materia.

Pri-

Primā ēst , quia locus est duplex , alter communis , alter proprius ; communis in quo omnia corpora sunt , sicut cælum est locus communis omnium ; quæ sub illo sunt : proprius est , qui adæquatur vnicuique rei , huiusmodi autem est terminus rei , sed forma est terminus vniuscuiusque , quia per formam terminatur materia , ergo locus est forma ; quæ tamen ratio non concludit , cūm assumat vtramque affirmatiuam in secunda figura . Secundam rationem deducit ex Platone ad probandum , quòd locus sit materia , quia locus est spatium inter terminos rei continentis , quod non est aliquid sensibile , quia manet idem recedentibus corporibus sensibilibus , & ita illud spatium est per modum dimensionis interminatæ , hoc autem habet rationem materiæ , quia est aliquid terminabile per lineam & superficiem , quæ terminat magnitudinem ; ergo locus habet rationem materiæ , & receptiui .

Circa secundum , obijcit ad probandū , quòd locus non sit materia , neque forma . Primò , quia materia & forma non separantur ab eo cuius sunt , locus autem separatur à locato , seu locatum à loco . Secundò , quia locus est aliquid extra locatum , siquidem locatum dicitur esse in loco , materia autem & forma non sunt extra compositum . Denique si locus est materia & forma , erit intrinsecus locato , & sic mouebitur quando mouetur locatum ; sed quòd mouetur est in loco ; ergo si locus est materia , & forma , locus erit in loco .

Ab hoc cap. tertio incipit Philos. determinare sententiam suam de loco ; & in isto cap. præmittit quædam notabilia , In sequenti tradit

Ad resolutionem. Præmittit ergo tria. Primum quot modis aliquid possit esse in alio. Secundum, an aliquo modo possit esse in se ipso. Tertium, respondet duabus dubitationibus, quæ obiectæ sunt.

Circa primum dicit, octo modis aliquid esse in alio. Primò, sicut vna pars in toto, vt digitus in manu. Secundò è conuerso, sicut totum in partibus. Tertiò, sicut species in genere, vt homo continetur in animali. Quartò è contra, sicut genus in specie, vt animal in homine. Quintò, sicut forma in materia, siue accidentalis, siue substantialis. Sextò, sicut res sunt in suo efficiente, imperante, aut mouente, vt regnum in Rege. Septimò, sicut amans in amato, seu in suo fine. Octauò, sicut in vase, aut continente, & vt locatum in loco, ad quem modum reducitur esse in alio, vt in tempore mensurante.

Circa secundum inquit, an aliquid esse in se ipso? Et respondet, quòd dupliciter potest aliquid esse in se ipso. Vno modo primo & per se, idest ratione sui immediatè. Alio modo secundum alterum, idest secundum partem, quatenus in aliquo toto sunt partes, quarum vna est in alia. Hoc secundo modo dicit, benè posse dici, quòd aliquid est in se ipso, sicut si accipiatur hoc totum, scilicet, amphora vini dicitur esse in se ipsa, & non in alio vase; sed hoc est ratione partis, quatenus vinum est in amphora; amphora autem non in alio. At verò primo modo nihil dicitur esse in se ipso, neque per se, neque per accidens. Non per se, quia si aliquid immediatè sit in se ipso, immediatè & per se primo erit continens & contentum.

Non

Non est aliquid in se ipso per accidens, quia esse per accidens, est esse ratione illius quod est per se, sicut anima dicitur esse per accidens in loco ratione corporis, quod est per se. Unde si hoc modo aliquid est in se ipso per accidens, sequitur duo corpora esse in eodem loco, scilicet, illud ratione cuius est in se ipso, & ipsummet.

Circa tertium soluit primò rationem Zenonis inductam, scilicet, quòd si locus esset aliquid, etiam locus esset in alio loco, & sic in infinitum; respondet, non sequi, quia locus non est in alio per modum loci, sed per modum formæ accidentalis informantis; est enim superficies, quæ inhaeret in corpore, sed continet locatum. Secundò soluit dubitationem positam de loco, an sit materia vel forma, & dicit quòd locus non potest esse materia vel forma locati, quia locus est quasi vas continens & ambiens locatum, materia verò & forma sunt partes eius intrinsecæ, in quo sunt.

In hoc capite quarto, resolutivè tradit Philosoph. suam sententiam circa quidditatem loci. Consistit autem essentia in cognoscendo genus & differentiam, & indè eliciendo integram definitionem, & quia inde sequuntur passionēs, quæ notiores sunt quoad nos, ex illisque ascendimus ad cognitionem essentiae, primò præmittit affectiones, seu passionēs quasdam loci. Secundò genus eius tradit. Tertiò differentiam. Quartò integram elicit definitionem.

Circa primum explicat imprimis quatuor affectiones loci. Prima, quòd locus contineat locatum, & non sit aliquid locati. Secunda, quòd locus proprius, sit æqualis locato. Tertia,

cia, quòd locato nunquam deficiat aliquis locus, vnus enim alteri succedit. Quarta, quòd in loco inuenitur aliqua differentia sursum & deorsum, vel quia in diuersis locis vnus est superior, alius inferior, vel quia in eodem loco vna pars est superior, alia inferior. Denique colligit ad locum requiri rationem extremitatis non continuæ, sed contiguæ locato, sicut patet in loco proprio, qui est adæquatus locato, solim autem ei adæquatur vltima extremitate, quæ tangit ipsum. Requiritur verò quòd sit contigua, nam si sit continua, erit sicut pars in toto, non vt continens respectu contenti, & locans respectu locati.

Circa secundum, inuestigat genus loci proponendo, quòd locus debet esse vnum ex quatuor, vel enim locus est materia, vel forma, vel spatium inter extremitates continentis, vel tandem aliqua superficies ipsius corporis continentis. Ex his quatuor locus non potest esse materia, neque forma, neque spatium; ergo superficies vt continens, & hæc est genus loci. Quòd non sit forma nec materia, probat, quia sint partes existentes in re quam componunt, nec ab ea separantur; locus autem non componit locatum, sed est in corpore continente. Quòd non sit spatium illud inter extremitates continentis probat, quia aliàs sequeretur locum posse mutari, & cum non mutetur nisi ad locum, locus erit in loco. Sequela verò patet, quia si aqua sit in vase, locus aquæ erit illud interuallum, quod est inter extremitates vasis, & aquam, illud autem interuallum non est nisi vbi est vas; ergo mutato vase, mutabitur illud interuallum, atque adeò mutabitur locus.

Cir-

Circa tertium, statuitur differentia loci in eo quod sit immobilis, in hoc enim differt vas à loco, quod vas continens aquam mutatur cum mouetur aqua, locus autem non mutatur; deberet enim mutari ad locum, quare locus est sicut vas immobile, sicut totus fluuius respectu nauis, non sicut aqua proximè circundans nauem.

Circa quartum infert integram definitionem loci. *Quod locus est superficies corporis continentis immobilis prima.* Dicitur superficies corporis continentis, quia adæquatur locus locato, & sunt simul contiguè, non continuè. Dicitur immobilis propter rationem iam dictam. Dicitur prima, ad differentiam loci communis, respectu enim locati prima superficies, quæ occurrit extra, locus proprius est.

Explicata natura loci, duo facit Philosoph. in hoc capite quinto. Primò declarat, quomodo diuersa corpora sint in loco, & quot modis id contingat. Secundò soluit dubitationes supra positas cap. 1.

Circa primum, constat omnia corpora esse in loco tanquam locata & contenta in illo, solum autem vltimum corpus, seu sphaera est continens alia, non contenta. Et de hac est tota difficultas quomodo sit in loco, nam ex vna parte mouetur localiter, ex alia non est in loco, quia non continetur ab aliquo. Ad quam difficultatem soluendam præmittit, quod quædam sunt in loco in actu, quædam in potentia: in actu, ut quando corpus continens est diuisum à contento, & illi est contiguum: in potentia, ut quando non est actu diuisum nec contiguū, sed continuum; quia tamē potest diuidi & contigua-

figurari : dicitur in potentia continere. Dicere ergo quòd vltima sphæra est in loco per accidens & in potentia , non per se & in actu, cum enim omnes partes circumuoluantur , non datur vltima quæ sit continens aliam , sed quælibet continuatur alteri , & continetur in potentia ab illa .

Circa secundum respondet Philosoph. ad rationes supra positas , deinde reddit rationem cur corpora tendant ad loca naturalia, & in illis quiescant . Et primò respondet ad sextam, si locus esset aliquid, quod augeretur aucto corpore , & dicit hanc rationem procedere perinde ac si locus esset spatium inter extremitates corporis continentis ; cum autem sit superficies continens non crescit augmentato corpore, sed cedit ipsi vt occupet maiorem locum . Ad primam respondet locum non esse corpus, sed terminum seu superficiem corporis continentis aliud . Denique ad tertiam quòd si locus esset aliquid , etiam esset in loco ; respondet , quòd locus est in alio sicut superficies in corpore cui inhæret, non tanquam locatum in loco . Deinde assignat ex dictis , quare corpora moueantur naturaliter ad sua loca & quiescant in illis, quia enim locus se habet vt continens & res in vniuerso naturali ordine situantur , ita vt vna immediatè sit super aliam iuxta suam naturam, & proportionem , consequenter appetere locum proprium est appetere illud, quòd suæ naturæ est magis proportionatum , scilicet, suum immediatum , & connaturale continens . Similiter ex eodem semitur ratio , cur res naturales quiescant in loco proprio , scilicet , quia perueniunt ad terminum sibi magis connaturalem

ralem & proportionatum.

Ab hoc capite sextò incipit secunda pars huius libri, quæ est de vacuo, in cuius tractatu tali ordine procedit Philosophus, quòd primo disputat in vtramque partem, an sit vel non sit vacuum iuxta diuersas veterum opiniones, & hoc in cap. 6. Deinde cap. 7. explicato quid significet vacuum iuxta opiniones antiquorum, soluit eorum rationes, qui ponebant vacuum & tandem cap. 8. & 9. ostendit vacuum non esse in natura.

Igitur in hoc cap. 6. duo facit Philos. Primò ostendit, pertinere ad naturalem tractare de vacuo. Secundò disputat in vtramque partem, an detur vacuum.

Circa primum, constat pertinere ad naturalem tractare de vacuo, quia pertinet tractare de loco; locus autem carens omni locato vacuum est.

Circa secundum, refert imprimis opinionem Anaxagoræ, qui contendebat non dari vacuum, sed tamen eius rationes solum probabant aerem non esse vacuum, sed verum corpus exemplo vtrium inflatorum, qui compressioni resistunt, nisi aer emittatur. Antiqui autem qui vacuum ponebant, non dicebant illud esse aerem, sed spatium omni corpore carens, quale est extra vniuersum, aut quale ponebant Leucippus & Democritus, vt corpora discontinuarentur, quia si omnia essent plenum, putabant omnia corpora continuari & esse vnum. Sic ergo reiecta sententia. Anaxagoræ, ponit rationes eorum, qui dicebant dari vacuum. Prima, quia si non daretur vacuum, non daretur motus in loco, nam corpus quod mouetur, vel
exci-

excipitur in aliquo spatio pleno vel vacuo. Si hoc secundum, habetur intentum. Si primum, ergo penetrantur duo corpora, quod est impossibile. Secunda ratio est, quia in condensatione partes comprimuntur, & non penetrantur, ergo dabantur aliquæ vacuitates non repletæ partibus, quas partes compressæ subintrant. Tertia; viuentia augentur sumpto alimento, & alimentum est corpus, quod non potest penetrari cum corpore viuentis, ergo in aliquibus vacuitatibus seu poris intrat, datur ergo vacuum. Quarta; si in vas plenum cinere infundatur aqua, tantum aquæ capit, quantum est sine cinere; ergo aliqua vacuitas est inter partes cineris, quibus aqua excipitur, penetrari enim cum cinere non potest.

In hoc capite septimo, duo intendit Philos. Primum, declarare quid nomine vacui intelligatur. Secundum, instare rationes præcedentis cap. ostendendo efficaces non esse. Circa primum assignat, quomodo vacuum accipitur secundum communem hominum acceptionem, deinde quomodo secundum Platonicos, tandem quomodo secundum sententiam quam sequitur. Communiter ergo dicebatur vacuū locus in quo est nihil, accipiebant enim veteres pro eodem corpus tangibile, & ens, quia nihil præter corpora dari putabant. Remouet autem hanc acceptionem, quia cum apud veteres solum corpus tangibile diceretur esse corpus si in aliquo spatio poneretur color vel sonus, idest corpus cum colore vel sono, sed non cum qualitatibus tangibilibus, illud esset vacuum, quia careret corpore tangibili, & tamen in illo non esset nihil, quia esset aliquod corpus.

At

At verò Platonici dicebant vacuum esse id in quo non est hoc aliquid, nec substantia vlla corporea. Etcùm hoc aliquid sit per formam, dicebant aliqui vacuum esse materiam corporum. Quod reprobatur, quia materia non separatur à corpore quod componit; locus autem & vacuum separatur à corpore locato, neque componunt illud. Ex propria verò sententia dicit, quòd vacuum est locus priuatus corpore, & consequenter aptus repleri; vnde nec est spatium separatum à corpore, neque illi intrinsecum.

Circa secundum instat rationes supra factas, quæ non concludunt. Non prima, quia motus localis neque est in vacuo, neque in pleno penetrando illud, sed quia plenum cedit corpori intrante aere ipso vel aqua impellente alias partes, aut etiam addensante se. Non secunda, quia condensatio fit per compressionem partium, quæ recipiunt se, non in aliquas vacuitates, sed in poros plenos aere vel alio tenui corpore, quod per compressionem excluditur. Non tertia, quia augmentum in viuentibus non requirit vacuitates, in quibus intret alimentum, sed sufficit quòd intret in poros, qui sunt pleni aere vel alio corpore tenui, quod excluditur per alimentum. Non quarta, quia in cinere non oportet ponere vacuitates, sed partes plenas aere, qui excluditur per aquam.

In hoc capite octauo, & in sequenti probatur Philosoph. non dari vacuum. In isto quidem cap. rationibus à motu petitis ostendit non dari vacuum separatum à corporibus, tanquam in quo fiat motus. In sequenti verò etiam abstrahendo à motu, & similiter non dari aliquod vacuum

cum intra ipsa corpora propter condensationem.

Igitur in hoc cap. procedit duplici via ad negandum vacuum. Prima est ex ipsa ratione motus naturalis. Secunda, ex ratione velocitatis & tarditatis. Circa primum ostendit non debere poni vacuum propter motum, vt dicebant antiqui, imò vacuum obstare motui, quia motus naturalis fit in aliquid determinatum, vt ibi melius res conseruetur, vacuum autem non conducit ad conseruationem; nec est ratio cur moueatur magis corpus in hanc partem quàm illam, cum nullæ tunc essent differentię partium. Si autem non est motus naturalis posito vacuo, quia non est differentia locorum, in quam fiat inclinatio, nec etiam erit motus violentus, quia hic est declinatio quædam à motu naturali; nec etiam dabitur motus proiectionis, quia proiecta feruntur extra proijcientem propter repercussionem aeris, qui ipso impulsu impedit, ne lapis, verbi gratia, descendat deorsum ferendo illum, quod totum tollitur posito vacuo.

Circa secundum probat non dari motum ex ipsa ratione velocitatis in vacuo; velocitas enim vel tarditas prouenit aut quia medium est rarius, aut quia mobile est ponderosius. Et ex vtraque parte sequitur, quòd in vacuo motus ita erit velox, quòd fiat in instanti. Ex parte quidem medij, quia eadem est proportio motus facti per medium crassius ad eum qui fit per medium rarius, quæ est inter ipsam crassitudinem & tenuitatem medij, vt si v. g. medium sit duplo rarius, mobile duplo celerius feretur: ergo vbi nulla est proportio raritatis medij ad
crassi-

crassitudinem, nulla erit proportio celeritatis: vacui autem ad plenum nulla est proportio in tenuitate, ergo nulla erit proportio in celeritate motus, & consequenter si in medio pleno consumitur tempus, in vacuo nullum consumetur. Ex parte autem ipsius mobilis idem ostenditur, quia ideo mobile quanto ponderosius est, & figura magis accommodata, celerius mouetur quia vehementius scindit aerem seu corpus medium, ergo ubi nullum est medium, quod scindatur ut in vacuo, nihil obstat ut summa velocitate feratur: imò tantum descendet minus graue, quantum magis graue, quod est absurdum.

In hoc capite nono, duo probat Philosophus; primum est non dari vacuum etiam præscindendo à motu. Secundum, non dari vacuum intra ipsa corpora, ratione condensationis vel raritatis.

Quantum ad primum ostendit, quòd in vacuo non est corpus quod cedat corpori, si in eo ponatur; ergo si vacuum constituitur per dimensiones quasdam interminatas, ut dicebant antiqui, corpus quod ponitur in illo vacuo penetrabitur cum illis dimensionibus, cum tamen non minus illæ dimensiones repugnent penetrationi ratione quantitatis, quàm si esset corpus sensibile.

Quoad secundum dicebant antiqui, non addensari corpora, nisi quia partes se compri-
munt, & aliquas vacuitates replent, ne penetrarentur, & sic datur vacuum. Quem modum ponendi vacuum ratione densitatis & raritatis ex eo improbat, quia vel intelligitur illis vacuitates seu poros carere omni corpore, vel non
esse

esse aliquid distinctum ab ipso corpore, sed subintrare ipsas corporis partes, & causare raritatem. Si primum, ponitur idem vacuum, quod hucusque impugnatum est, siquidem ut dicitur caret omni corpore. Si secundum, in primis hoc vacuum non se haberet tanquam spatium, in quo res moueretur, sed annexum esset ipsi corpori & moueretur cum illo, vacuum autem non potest moueri. Deinde tale vacuum, cum sit vacuum raritatis, non esset causa omnis motus, sed solum motus sursum, motus verò deorsum non assignaretur causa ratione vacui. Rationi autem antiquorum respondet ostendendo, quòd rarum & densum nulla additione & subtractione materiae fiunt, sed per hoc quòd eadem materia recipiat nunc maiores, nunc minores dimensiones, sicut enim eadem materia subest modo vni formæ, modo alteri, & eadem est in potentia ad diuersa contraria, ita sub dimensione magna & parua est eadem materia, quia magnum & paruum quædam contraria sunt. Et sicut calidum fit magis calidum, non per hoc quòd aliqua pars, quæ non erat calida, reddatur calida, sed quia tota materia magis reducitur in actum calidi, ita est in raro & denso, non enim adduntur, vel subtrahuntur partes, sed eum materia suscipit maiores vel minores dimensiones, & transmutatur de imperfecto ad perfectum, vel è contra in dimensionibus habendis.

In hoc capite decimo, incipit tertia pars huius libri, in qua agitur de tempore. Et procedit Arist. tali ordine, quòd primò disputat in vtraque parte an sit tempus, & refert opiniones Antiquorum circa illud, Secundò, tra-
dit

dit resolutionem suam. Tertiò, affectiones temporis, & dubia quædam circa eius existentiam & vnitatem resoluit.

In hoc ergo capite tria facit. Primò, proponit duas rationes ad probandum non dari tempus. Secundò, ad inquirendum, an detur vnum nunc in toto tempore. Tertiò, refert & impugnat tres opiniones circa quidditatem temporis.

Circa primum, probat non dari tempus duplici ratione. Primò, quia tempus componitur ex his, quæ non sunt, scilicet, præterito, & futuro; ergo ipsum nihil reale est. Secundò, cuiuslibet rei diuisibilis existentis oportet aliquam partem existere, sed temporis nulla pars existit; nam quædam pars est præterita, alia futura, instans verò non est pars, sed vniò partium, ergo tempus nihil est.

Circa secundum, obijcit in utramque partem, an sit idem nunc in toto tempore, an diuersum. Nam quòd non sit aliud, & aliud probat, quia vel essent simul illa duo nunc, vel successiuè. Non simul, quia duæ partes temporis non sunt simul, nisi vnâ contineat aliâ, & sic maior alia, vt annus continet mensem, mensis diem; vnum autem nunc non est maius altero, cum vtrumque sit indiuisibile. Nec successiuè, quia sic corrumpereetur vnum nunc in alio succedente, & hoc non datur, cum immediate post non sit aliud nunc. Quòd verò non sit idem nunc, ostendit, quia nullius rei diuisibilis finitæ est dare tantum vnum terminum, sed ad minus duos; tempus autem est quid finitum, ergo debet habere plura nunc saltem vt extremitates.

Circa tertiam, refert tres opiniones. Prima, quod tempus est circulatio cæli. Secunda, quod tempus est ipsum cælum. Tertiò, quod tempus est motus. Primam refutat, quia pars temporis etiam est tempus, pars autem circulationis non est circulatio. Secundam impugnat, quia Authores eius dicunt tempus esse cælum, quia omnia sunt sub cælo, & omnia subsunt tempori, ergo tempus est cælum. Vbi est duplex defectus, quia & arguitur ex puris affirmatiuis in secunda figura, & cum æquiuocatione existendi in cælo vt in loco, vel in tempore vt in duratione. Tertiam ex eo arguit, quia motus est in remota, tempus autem ubique dicitur esse, & apud omnia.

In capite vndecimo, accedit Philosoph. ad explicandam naturam temporis. Et tria facit. Primò præmittit quandam suppositionem. Secundò, tradit & explicat definitionem temporis. Tertiò, ostendit quid sit instans seu nunc, quod etiam spectat ad notitiam temporis.

Circa primum, supponit, quod licet tempus non sit quicumque motus, non tamen inuenitur sine motu, cuius signum est, quia qui motum non percipiunt, vt qui dur dormiunt, non percipiunt tempus, quia coniungunt vltimum tempus quo dormire cœperunt, cum eo in quo excitantur.

Circa secundum colligit definitionem temporis, quod sit *numerus motus secundum prius & posterius*. Constat enim quod quia tempus sine aliquo motu non percipimus, & cum percipimus tempus motum aliquem intelligimus, quod tempus est aliquid motus. Tempus autem non consequitur, nec est aliquid motus, nisi

nisi ratione prioris & posterioris, quia tunc cognoscimus tempus, cum cognoscimus in motu rationem prioris & posterioris si enim accipiamus idem nunc sine aliquo, quod sit prius & posterius, non facimus tempus, distinguere autem prius & posterius in motu non est nisi per numerationem, igitur tempus erit numeratio, seu numerus motus secundum prius & posterius, & hæc est eius definitio.

Circa tertium, declarat quid sit instans seu nunc; est enim illud quod est idem in tempore, partes enim transeunt, sed illud quod simul existit de toto tempore est nunc. Hoc autem est partim idem, partim diuersum in tempore. Est idem, quatenus res mota cum qua identificatur mutatum esse & tempus manet eadem; est diuersum, quatenus subijcitur alijs & alijs successioni. Ex quo infert verificari tria, quæ attribuuntur instanti. Primum, quod non datur tempus, nisi detur instans & è contra, Secundum, quod instans distinguit & continuat partes temporis. Tertium, quod nunc non sit pars temporis. Ratio primi est, quia instans est sicut vnitas, tempus autem est numerus sine vnitate. Ratio secundi est, quia instans comparatur ad tempus sicut mobile ad motum, & sicut punctum ad lineam. Ab vnitate autem, & continuitate mobilis dependet vnitas motus. A puncto autem continuantur partes lineæ, ergo & ab instanti partes temporis. Ratio tertij est, quia sicut punctum non est pars lineæ, ita instans cum sit indiuisibile, non est pars motus, sed continuans vel terminans illum.

Explicata natura temporis, explicat in hoc capite duodecimo, quædam eius attributa seu

proprietates. Et primò numerat quinque proprietates temporis. Secundò, comparat tempus ad ea, quæ tempore mensurantur.

Circa primum, prima proprietas temporis est, quòd detur in eo minimum pro ea parte, qua est numerus, non quatenus continuum sicut numero conuenit minimum, scilicet binarius, qui in alium numerum non est partibilis. Secunda proprietas est, quòd tempus dicitur longum & breue, multum vel paucum propter continuitatem motus, sed non velox vel tardum, hoc enim dicitur per ordinem ad mensuram temporis, tempus autem non mensuratur tempore. Tertia, quòd tempus sit quodammodo idem, quodammodo diuersum. Item, quia est vnus motus mensurans alios, diuersum, propter diuersas partes priores & posteriores. Quarta, quòd idem tempus redit, non numero, sed specie, sicut idem ver, & eadem ætas. Quinta, quòd sicut motum designamus tempore, ita tempus motu, sicut rem numeratam designamus numero, & iterum numerum re numerata.

Circa secundum comparat tempus ad tria, scilicet ad motum seu moueri: ad res, quæ motui subiunguntur; ad quietem, quæ est opposita motui. Ad motum comparatur, quatenus motus est id, quod primo & per se mensuratur tempore. Ad res quæ sunt in tempore, quatenus in ista duratione subiunguntur motui. Et sicut in numero quædam continentur vt partes numeri, quædam vt numerata per ipsum; ita in tempore: qui est numerus, quædam continentur vt partes sicut dies est pars mensis, & mensis anni; quædam vt mensurata per tempus, sicut

sicut res quæ subduntur tempori. Denique quies
tem docet mensurari tempore, sicut motum, eò
quòd quies non est pura negatio motus, sed pri-
uatio in subiecto apto moueri, & sic pertinet
ad eandem mensuram.

In hoc capite tertiodecimo explicat Philos.
duo. Primum, quædam aduerbia significan-
tia, vel connotantia tempus. Secundum, quo-
modo tempus magis dicatur causa corruptionis,
quàm generationis.

Circa primum explicat, quid significet nunc
seu instans, iam, modo, subito, & similia.
Nunc sumitur dupliciter. Vno modo pro in-
diuisibili copulante partes temporis, sicut pun-
ctum lineæ. Alio modo pro eo quod est vici-
num tempori præsentī, & instat vt fiat, & idem
significat iam. Modo, significat præteritum vici-
num præsentī. Olim, præteritum remotum. Su-
bitò, cùm tempus in quo fit, est ferè insensibile.

Circa secundum, tempus dicitur causa cor-
ruptionis, quia est numerus motus, mutatio au-
tem seu motus directè remouet aliquid à sui di-
spositione, & ideò magis innotescit per corru-
ptionem, quæ aliquid à suo statu remouetur,
quàm per generationem qua in esse inducitur.

Duo facit Arist. cap. decimoquarto. Primò,
explicat vterius quod dixerat cap. 12. omnem
motum esse in tempore. Secundò, soluit tres
dubitationes, quæ ad perfectiorem explicatio-
nem temporis conducunt.

Circa primum, ostendit omnem motum esse
in tempore duplici signo; tùm quia in omni
motu inuenitur velox vel tardum, quod vtique
sumitur per ordinem ad multum, vel paucum
tempus in motu; tùm, quia in omni motu inue-

bitur prius & posterius, quod designatur secundum distantiam ad aliquod nunc respectu præteriti & futuri, & hoc pertinet ad tempus.

Circa secundum mouet tres dubitationes. Prima, quomodo tempus se habeat ad animam, id est utrum dependeat à cognitione. Secunda, quomodo tempus dicatur esse vbique, in terra, mari, &c. Tertia, de vnitatem temporis, videlicet an sit vnum, & in quo motu sit. Respondet Philosoph. primò ad secundam quæstionem quæ facilius est, quòd tempus dicitur esse vbique, quia vbique aliquis motus est, siue ætè, siue in potètia, nam etià cum aliquid quiescit, tempori subditur.

Ad primam ponit rationem dubitandi, quòd videtur tempus pendere ab anima, eò quòd est numerus; numerus autè dependet à numerante; numerans autem est anima, ergo dependet tempus ab eius cognitione. Soluit autem dicendo, quòd tempus vtrumq; est ens extra animam quatenus in motu inuenitur prius & posterius, quod ab anima numerabile est. Sed quia non habet esse fixum in re, sed transiens, ideo totalitas, seu perfectà ratio temporis, non inuenitur nisi in anima, in re autem solum est imperfectè.

Ad tertiam dubitationem respondet, quòd cum tempus sit mensura, debet esse in motu magis regulari & perfectò Primus autem motus inter ceteros est motus localis, & inter locales circularis, & inter circulares motus diurnus, qui est primi mobilis, in illo ergo est tempus. Et huic concordant, quæ dicuntur de tempore, .s. quòd omnia sunt in tempore, & subsunt illi, & consumuntur à tempore, & quòd tempus reuoluitur, & similia, quæ motui cæli conueniunt, & tale tempus vnum est.

DE LOCO, VACVO,

ET TEMPORE.

QVÆSTIO XVI.

De loco & vbi.

Vatuor in hac qu. tractabimus. Primum de quidditate loci, intrinseci, & extrinseci. Secundum, de subiecto seu re locata, cui convenit esse in loco. Tertium, de repugnantia duorum corporum in eodem loco. Quartum de repugnantia vnius corporis in duplici loco.

ARTICVLVS I.

Quid sit locus extrinsecus, & immobilitas eius.

Locus physicè, & propriè acceptus significat id, quod motu locali acquiritur. Et solet distingui duplex locus, alter extrinsecus, alter intrinsecus. *Extrinsecus* est corpus illud, siue superficies, qua circumscribitur, & contingitur ipsum locatum. *Intrinsecus* est ipsa præsentia passiva rei locatæ, quæ dicitur *Vbi*: est enim vbi forma, seu modus intrinsecus pronei-ens è loco extrinsecus circumscribente, ut à quo provenit principaliter denominatio locati. Et sunt aliqui, qui existimant hoc vbi, seu præsentiam intrinsecam ignotam fuisse Arist.

& antiquis, inuentam autem à recentioribus, eo quòd Arist. 8. Phys. tex. 59. & D. Tho. ibi, & 1. p. q. 110. art. 3. & 2. contra Gent. cap. 13. docet motum localem terminari ad aliquid extrinsecum. Cæterum per phrasin, & modum loquendi D. Thomæ, non attenderunt, qui in 6. vltimis prædicamentis non negat modos intrinsecè afficientes subiectum, vt probauimus in Logica, qu. 19. sed quia isti modi non sunt omnino absoluti, sed ab aliquo extrinseco prouenientes, & ab eo, vt à principali denominante dependentes, cum vbi sit passiuæ subiectio ad id quod circumscribit quasi actiuè, ideò solet D. Tho. dicere, quòd sunt aliquid extrinsecum, non tamen sunt extrinseca denominatio pura, aliàs enim sæpè fatetur D. Thom. dari vbi, & subiectum in ipso mobili. Nam motum ad vbi expressè ponit Philos. in hoc lib. 5. cap. 1. & 5. Metaph. tex. 14. & 11. Met. lect. 12. apud D. Th. Quod verò subiectetur in ipso mobili, aperte dicit opusc. 48. tract. de vbi cap. 1. dicens: *Quod motus localis subiectiuè est in eo, quod mouetur. Nihil autem acquiritur in re mobili, nisi vbi, quod est respectus loci ad locatum, vt circumscribit illud.* Et in q. 4. de virtut. art. 1. ad 3. *Alio modo, inquit, potest intelligi, motus secundum essentiam si sit motus secundum quodcumque adherens essentiae sicut dicimus corpus essentialiter moueri, quando mouetur secundum locum, quia de loco ad locum eius subiectum transferitur.* Non ergo negat S. Tho. præsentiam, seu vbi inhærens, ipsi rei mobili, sed negat esse modum ita absolutum, quòd sit independens ab extrinseco circumscribente, & locante, præsertim si sumatur vbi adæquatè, &

com-

completè, ut magis explicabitur art. 2. & q. seq.

Igitur in hoc 1. art. explicabimus primò locum extrinsecum, quem Arist. definiuit in hoc 4. lib. c. 4. *Quòd locus est vltimum corporis ambientis immobile primum*, idest superficies corporis, quæ immediatè, seu primò continet, & locat aliquod locatum. In qua Arist. definitione tres difficultates explicandæ sunt. *Prima*, est circa genus loci; an sit superficies continens, vel spatium, & distantia extensa. *Secunda*, circa differentiam loci, quomodo scilicet sit immobilis, & primus. *Tertia*, an istæ particulæ se habeant per modum generis, & differentiæ, an per modum subiecti, & accidentis.

Circa primam difficultatem omittis antiquorum opinionibus; quas refert, & impugnat Arist. hoc lib. 4. cap. 1. & 2. constat, quòd locus non potest esse aliquid pertinens ad ipsum locatum, siue tanquam materia, siue tanquam forma, siue tanquam accidens aliquod intrinsecum, & à nullo extrinseco dependens, cum videamus mutari locatum de loco ad locum, nullo sui intrinseco deperdito. Vndè restat, quòd locus vel debet collocari in ratione spatij, quod occupatur à corpore, vel in genere superficies, quæ circumseribit, & continet locatum. Qui ergo existimant locum esse ipsum spatium, bitariam partiti sunt. Quidam enim ex antiquis dixerunt, illud spatium esse aliquid reale per modum cuiusdam dimensionis interminatæ, quæ haberet longitudinem, latitudinem, & profunditatem; & ita cum occupetur à corpore, quod locatur in tali spatio, penetratur talis dimensio cum corpore locato. Alij verò dicunt, hoc spatium, quod occupatur à

corpore locato, non esse aliquid reale, sed est capacitas replebilis corpore, sicut distantia imaginaria, quam replet totum hoc vniuersum. Quæ opinio valuit apud plurimos antiquos, & recentiores, vt testantur Conimbricensi, hic, nec longè absunt ab ea, qui dicunt, Vbi constitui per ordinem ad spatium imaginarium, quod præsertim verificant in motu, qui fit per vacuum positiuè. *Cæterum*, quòd locus non consistat in solo spatio isto imaginario, colligimus, cum ex ipso motu locali, qui cum sit realis, debet tendere ad aliquid reale, & non solum ad vbi, quia vbi non est aliquis modus absolutus, vel independens ab extrinseco circumscriptibente, sed ab eo resultat, & in eo rem locat, vt dicemus articulo sequenti: tùm etiam id colligimus ex motu naturali; constat enim res naturales ipsi impetu naturæ ad certa, ac determinata loca tendere, vt ibi conseruentur, aut à contrarijs defendantur: si autem locus esset solum illud spatium imaginarium, quod est nihil, non haberet magis conseruare rem locatam in hoc spatio, quam in alio, nec magis ad id conduceret, cum sit nihil. Necessariò ergo requiritur aliquid reale ad locum naturalem, & non corpus, quòd penetraret cum alio, quia hoc est impossibile; ergo quòd contineat, & circumscribat aliud. Et cum non possit circumscribere, nisi ratione superficiæ ambientis; siquidem locus adæquari debet locato, nec dicimus hominem existere in toto aere, sed solum in ea parte, in qua, circumscribitur, consequenter locus debet constitui in superficie ambiente, quæ corpori contigua est.

Quid

Quod si dicas, cur non dicemus locum esse illud corpus non à quo aliquid circundatur, sed in quo sustinetur; v. g. sedes in qua seder, terra in qua stat? *Respondetur*, quòd etiam tunc corpus sustentans non tangeret locatum, nisi per superficiem corporis sustentantis. Non tamen dicitur locus solum corpus sustentans quia non adequatur locato, solum enim secundum unam partem tangit; non autem circumscribit locatum. Requiritur ergo, corpus infra sustentans & tangens, sed non sufficit ad rationem loci: unde si aliquod corpus ponatur in ultima superficie mundi, non esset in loco nisi secundum quid, & ex parte.

Secunda difficultas est circa immobilitatem loci, quæ se habet, ut eius differentia. Et est unum certum apud Authores, aliud est dubiū. Est certum, locum absolute debere esse immobilem, tūc, quia in hoc distinguitur locus à vase, quòd vas continet mobiliter, mouetur enim cum re contenta, locus verò non mouetur; tūc, quia locus habet rationem termini à quo, qui deseritur, & termini ad quem, qui acquiritur per motum: implicat autem, quòd terminus à quo moueatur; sic enim portaretur à motu ipsius mobilis, non deseretur. Similiter locus, qui est terminus ad quem, non mouetur, quia in eo sistitur motus tanquam in termino; locus ergo, ut terminus motus non mouetur: alioquin si locus moueretur, ad aliquem locum deberet moveri, & sic daretur locus loci, & iterum ille alius locus deberet moveri ad alium locum, & sic esset processus in infinitum. In hoc ergo omnes conveniunt.

Difficultas autem est, ratione cuius conveniatur

niat loco ista immobilitas. In quo triplex occurrat sententia. 1. Martinij in illustratione presentis cap. Qui dicit Arist. pugnantiā docuisse, cum ex vna parte tribuit loco immobilitatem, & ex alia constituit in superficie; superficies autem mobilis est. Nec valet dicere, quod est immobilis non per se, sed ratione fixationis in polo, & centro mundi, respectu quorum locus est immobilis: sic enim locus non esset immobilis per se, sed per accidens, idest per aliud; & consequenter non esset per se terminus motus; quia terminus motus per se debet esse immobilis. Item, quia vel debet negari, quod motus localis sit actio, vel debet concedi actio sine termino: nam si actio est, necessario debet terminari ad aliquid in ipso mobili, quod immutat, cum tamen motus localis secundum Aristot. solum ad extrinsecum terminetur, quod est nihil facere, cum extrinsecum illud non fiat, sed comparetur. Quare ipse immobilitatem loci in immobilitate ubi constituit, ut seq. art. videbimus.

Sed hec puerilia sunt, ut tanto Philosopho possint opponi. Et illud primum fundamentum adducitur, & soluitur à D. Tho. in 4. Phys. lect. 6. super tex. 41. & opusc. 52. ut statim afferemus in solutione seq. difficultatis. Secundum verò fundamentum nihil probat, quia illa actio non facit de nouo superficiem ambientem, sed facit in ipso loco subiectionem, seu passivam circumscriptionem ad talem superficiem, & hoc est ubi, quod nec Aristot. aut D. Tho. negarunt, ut supra vidimus, sed quia est modus ordinatus, & dependens ab extrinseco circumscribente, dicitur locus extrinsecus esse

termini

terminis motus subintellecto, tamen modo illo intrinseco, quo illi passivè subijcitur corpus.

Secundo, Scotus in quodlib. 11. & alijs locis locum constituit formaliter in ipsa continentia actiua loci ad rem locatam, quæ continentia apud ipsum relatio est. Hæc autem continentia, & relatio licet physicè mutetur alia, & alia superficie adueniente; tamen secundum æquivalentiam non mutatur, quia in ordine ad motum localem perinde se habet, ac si esset vna tantum relatio: sicut hæc vox *homo* dicitur idem significare, licet sæpius repetatur.

Tertia sententia sumit immobilitatem loci per ordinem, & connotationem ad spatium imaginarium, quod negativè est immobile. Ita Conimbr. hic q. 1. art. 2. Cabero tract. 4. disput. 1. dub. 1. Ad quam sententiam accedunt, qui dicunt definitivam præsentiam in loco esse immobilem, quia sumitur per ordinem ad polos mundi, veros, vel imaginarios; circumscriptivam verò non esse immobilem: de quo videatur Fuente 4. Phys. q. 1. diffic. 1. art. 2. ad 1.

Cæterum, quia D. Tho. 1. Physic. lect. 6. & opusc. 62. alijsque locis secutus Aristot. etiam salvat immobilitatem loci positivo modo in ipso loco, & corpore ambiente, oportet immobilitatem loci non solum negativè, sed etiam positivè explicare.

Pro quo notandum est, quòd locus non est sola superficies, ut inhærens corpori locanti; sic enim non est magis immobilis, quam superficies locati, & movetur moto ipso corpore, cui inhæret. Nec est ipsa superficies, ut præcisè continens aliud; sic enim etiam invenitur
in

in vase, quod continet liquorem, & mouetur cum illo; locus autem ut dixit Philosoph. est vas immobile. Quare locus debet esse superficies continens secundum ordinem situs, & distantiae, & positionis in vniuerso: hoc enim præcisè nomine loci significamus, & distinguimus diuersa loca secundum diuersas positiones, in quibus ordinantur; qua etiam ratione metaphoricè sumitur locus ad designandam diuersam dignitatem, qua homines ordinantur, & constituuntur in Republica.

Ex his ergo dicimus triplici modo posse explicari immobilitatem loci. Primò ratione distantiae negatiuæ, quam locus præsupponit, licèt non in ea consistat. Secundò ratione coordinationis, quam habet superficies ultimò, & immediatè, ambiens cum superficie primi locantis, quod est cælum. Tertio, ratione formalitatis termini motus, licèt enim superficies, & corpus ambiens moueri possit in quantum corpus mobile est, sicut alia corpora locata; tamen ut exercet formalitatem termini à quo, qui deferitur, vel termini ad quem, qui acquiritur, sub ista inquana formalitate, mobilis esse non potest; esto secundum se, ut superficies corporis mobilis, & ut non exercet officium loci, non repugnet moueri. Quæ vltima explicatio sumitur ex Philos. 5. Physic. text. 4. lect. 1. apud D. Thom. vbi eodem modo docet de loco, & de termino alterationis, & augmentationis, quòd non mouentur neque mouent, ut termini motus sunt. Et hac ratione tam ipse locus extrinsecus, quam motus intrinsecus, seu vbi, in quantum termini motus immobiles sunt.

Secunda verò explicatio immobilitatis loci docetur à D. Thom. opusc. 52. & orationem 4. Physic. lect. 5. ubi inquit: *Quòd cum locus proprius sit pars loci communis, oportet accipere proprium locum navis in aqua fluminis in quantum habet ordinem ad totum fluvium, ut est immobilis. Et subdit: Sic igitur, licet hæc pars aeris, quæ continebat, vel hæc pars aqua effluat, & moveatur in quantum est hæc aqua: tamen secundum quòd habet hæc aqua rationem loci, scilicet situs, & ordinis ad totum sphericum cæli, semper manet; sicut etiam dicitur idem ignis manere quantum ad formam, licet secundum materiam varieetur, consumpsis & additis quibusdam lignis. Itaque superficies ultima, quæ adæquatur locato, continet & ambit illud, ut subordinata primo locanti, & ambientem, quòd est cælum. Et sic licet succedant diuersæ superficies ambientes locatum, quia tamen succedunt in eadem subordinatione ad primum locans, quòd est cælum, dicitur manere idem locus, non secundum rationem superficie absolute, sed ut locantis ex subordinatione ad primum locans, sicut dicitur manere idem ignis, licet paulatim consumatur una materia, & succedat alia, quia semper succedit sub eodem ordine ad formam, & licet ipse ordo, ut est relatio quædam entitatiue considerata, varieetur in ipsa materia, vel superficie, in qua fundatur; tamen hoc non tollit absolute loquendo unitatem ignis, & unitatem loci, seu immobilitatem (idem est enim immobilitas, & unitas in presenti) quia solum variatur ordo entitatiue, & materialiter ex parte termini formalis, & continuationis sub eadem forma,*

& sub

& sub eodem primo locante, sicut est idem fluuius, & idem animal, licet partes succedant.

Denique, prima explicatio immobilitatis loci ex eo constat, quia locus necessario supponit aliquam distantiam negatiuam, quam repleat. Quando enim productum est hoc vniuersum repleuit positiue, quod solum negatiue erat distans, & spatium capax corporis. Vnde cum succedunt diuersæ superficies in illo eodem spatio, habent immobilitatem præsuppositam ratione illius spatij negatiui, quod occupant, & replent; hoc enim semper est immobile.

Ex quibus soluantur aliquæ obiectiones, quæ fieri solent contra immobilitatem loci. Primò, quia nihil est in loco, quod non sit mobile, superficies enim mouetur, & distantia quæ est relatio subiectata in illa. Quod si terminus ipse ad quem est ista relatio distantie non mouetur; hoc est dicere, quod locus solum terminatiue est immobilis, non subiectiue; & tamen Philos. dicit, quod locus est superficies immobilis prima. Ergo in ipsa superficie ultimo continente ponenda est immobilitas, & non solum in termino, vel in primo locante; imò ipsum primum locans, quod est cælum cum perpetuo moueatur non potest dici, quod est immobile, vt circundans, & ambiens.

Secundò, quia si locus est immobilis positiue in ratione superficiei, sequeretur, quod posset aliquid moueri non mutato loco; posset etiam aliquid mutare distantiam, non variato loco. Denique posset immotum manens mutare locum; quæ omnia absurda sunt, cum idem sit moueri, & mutare loca, vel è conuerso. Primum patet,

patet, si aliquis deferatur in nauis, & æqua velocità moueatur in partem contrariam, non mutat locum respectu distantie polorum, & centri, & tamen mouetur, ergo potest aliquid moueri non mutato loco. Secundum patet, si Deus totum vniuersum moueret per spatium imaginarium, corpora intra vniuersum mutarent respectum & distantiam versus illam partem, licet in se immota manerent. Tertium patet, si Deus auferret totam superficiem ambientem turrem relicto vacuo, & postea aliam distinctam subrogaret; turris esset immota, & tamen mutaret locum, quia diuersa superficies non continuata ambiret illam; ergo diuersus esset locus.

Ad primam obiectionem resp. In primis non militare contra tertiam explicationem immobilitatis loci, quia licet corpus illud, & res que locationi deseruit, mutari possit, tamen formalitas & officium loci, quatenus est terminus, qui deseruitur, vel acquiritur, non mouetur. Vt autem procedit contra secundam explicationem, dicimus ex D. Tho. 4. Phys. lect. 6. ubi hoc argumentum soluit, quod superficies, & quidquid in superficie est, variatur vt superficies est, sed non vt locus, id est, non secundum ordinem vel situm in toto immobili, quod est totum vniuersum. Quare locus non est immobilis & vnus, nisi vnitatem ordinis, non vnitatem simpliciter & omnibus modis, quatenus omnes superficies sub eadem coordinatione & termino ad primum locans succedunt. Et quando dicitur, quod hoc non est locum esse immobilem subiectiuè, sed terminatiuè. *Respon.* quod locus non dicitur subiectiuè immobilis

abso-

absolutè, sed secundum unitatem ordinis in ipso subiecto, ut dicit habitudinem ad illum terminum, & ut subest illi, sicut ignis dicitur idem numero, propter continuationem materiae sub eadem forma, & fluuius idem numero propter continuationem aquae in eodem decursu. Ita locus dicitur idem, & immobilis, quatenus coordinatur sub eodem termino, & situatione. Quando autem Philos. dicit, quòd locus est superficies immobilis prima, ly prima designat superficiem ultimam, & immediatam ipsi locato (corruptè enim aliqui legunt immobilis primo, cum text. dicat immobilis prima) insinuans per hoc, quòd superficies ultima non induit rationem loci, nisi prout induit modum immobilitatis; hoc est, non secundum se, sed ut subest termino fixo, & immobili, & ut exercet officium loci, qui per motum acquiritur, vel relinquitur. Et licet cælum ipsum, quod est primum locans moueatur, tamen quia non secundum se totum mouetur, sed semper in eodem situ, manentibus etiam immotis punctis polaribus, ideò semper datur aliquid, respectu cuius locus sit immobilis immobilitate ordinis, licet non absolutè.

Ad secundum negatur sequela; & ad primam probationem resp. quòd in illo casu ille non mouetur motu progressiuo, & recto, sed solum eleuat pedes, & deprimi subintrante nauigio, sicut qui saltat sursum, eò quòd impetus nauis deferentis, & velocitas æqualis in contrarium tendentis mutuò se impediunt, ne progrediatur ultra sed solum, ut sub eadem distantia pedes eleuat. Nec obstat, quòd defatigatur, quia etiam motus ille quasi saltationis

nis sursum, & deorsum in eodem loco defatigare potest. Ad secundam dicitur, quòd si totum vniuersum moueretur à Deo, omnia quæ intra illud sunt, etiam mouerentur motu per accidens, sicut qui deferentur in curru, licet non moueantur motu proprio. Ad tertiam, Resp. quòd in illo casu mutatur locus de reali in imaginarium, & è contra, non secundum diuersum situm, & distantiam; & ideò res locata manet immota, & solum corpus ambiens mutatur alio corpore non succedente. Quando autem succedunt diuersæ superficies in eadem distantia, tunc mutantur res exercentes officium loci, non ipsa formalis ratio loci, & officium eius, vt dictum est, sicut artifex quando in eodem opere faciendo mutat diuersa instrumenta.

Quòd si inquiras, An locus naturalis addat aliquid supra locum cõmuniter dictum? *Resp.* ex D. Thom; opusc. 52. & 4. Phys. lect. 8. addere virtutem conseruatiuam, seu formatiuam locati, quæ virtus deriuatur à cælo, tanquam à primo locante, quatenus secundum maiorem, vel minorem distantiam à cælo & ab aspectibus planetarum corpora inferiora recipiunt conuenientes, & proportionatas influentias: quædam enim sunt, quæ requirunt maiorem calorem, aliæ minorem, aut similiter humiditatem, aut siccitatem, vel alias similes qualitates, quæ secundum diuersam situationem, & distantiam à cælo, diuersimodè distribuuntur, temperantur, & ideò locus tali temperamento præditus à tali locato appetitur, vt conueniens, præsertim secundum naturam elementi prædominantis; conseruatio enim elementorum

rum maxime intenditur à natura in vniuerso.

Ex his manet soluta tertia difficultas, scilicet, an ista definitio loci sit per genus, & differentiam, an per subiectum, & accidens? *Respon.* enim, quòd superficies non potest esse genus loci, cum superficies sit species quantitatis continuæ habens positionem in illa, locus autem est extrinsecè mensurans, & quantum per accidens, vt ex D. Tho. 5. Met. lect. 15. diximus in Logica, q. 16. Quare locus non ponitur subalternatim sub superficie, sed superficies est subiectum eius, per se tamen & necessariò requisita materialiter, & ex parte subiecti; sicut album per se ex parte subiecti requirit corpus: qua ratione intelligitur D. Thom. in 2. dist. 12. q. 1. art. 5. ad 2. vbi dicit: *Quòd locus per essentiam est superficies corporis locantis.* Potest tamen reduci ad definitionem metaphysicam, dicendo: *Quòd locus est immediatum continens, seu ambiens immobiliter.*

Si petas, quænam sint proprietates loci? *Resp.* Quatuor poni à Philos. in hoc lib. 1. continere locatum (scilicet actualiter) 2. esse æqualem locato (scilicet æqualitate contigui,) 3. quòd locus numquam deficiat loco, 4. quòd in omni loco inueniatur sursum, & deorsum. Addunt alij, quòd locus sit extrinsecus terminus motus, & quòd locus, & locatum possint separari, & tandem, quòd locus sit conseruatiuus locati, quod pertinet ad locum naturalem.

ARTICVLVS II.

Quid sit vbi, seu locus intrinsecus?

Nomine vbi intelligimus id, quod acquiritur seu ponitur in locato, ex eo quòd subijcitur loco extrinsecò: de quo aliqua attigimus in Log. q. 19. & alia ad hunc locum reseruauimus. Præcipuè verò tractanda sunt tria Primò, quid sit hoc vbi. Secundò, in quibus sit. Tertiò, quotuplex sit.

Circa primum est aduertendum quòd præcipuè colligimus dari hoc vbi ex ipso motu locali, per ipsum enim motum acquiritur aliqua distantia, seu præsentia in qua constituitur mobile; & cùm subiectionetur in mobili, oportet quod in eodem subiectionetur aliquis terminus motus. Est enim motus fieri, seu via ad aliquem terminum: ergo si est ipsum fieri, oportet ponere aliquod factum esse, cùm motus non sit præter res, ad quas est motus. Similiter non potest intelligi, quòd aliquis moueatur ad locum, nisi in se immutetur, & subijciatur, seu applicetur ipsi loco: quæ subiectio, & applicatio ad minus importat nouam aliquam relationem ad locum cui de nouo subijcitur, quæ antea non erat in corpore, quando non erat applicatum tali loco: Noua autem relatio nouum exigit fundamentum proximum, hoc non est ipsum corpus secundum se; quia hoc est indifferens, vt sit in hoc loco, vel absq̃ ab illo. Ergo est aliquid superadditum corpori, & hoc vocamus vbi, quo aliquod corpus afficitur modo applicationis, & subiectionis ad

ex.

extrinsecum circumscribens , quòd est locus. Itaque ex his duobus principijs, scilicèt ex motu, & relatione coniunctionis, seu applicationis ad locum colligimus dari vbi.

Ex quo colligitur, quòd vbi circumscriptum non potest esse modus aliquis absolutus omninò independens ab omni extrinseco . Quod aliqui ita explicant , quòd vbi nec dependeat à spatio imaginario , nec à spatio vero , seu à corpore extrinsecus circumscribente , nec à punctis fixis vniuersi; sed definiunt vbi, *Quòd sit modus immobilis corporis mobilis.* Alij verò explicant vbi saltem per ordinem ad distantiam aliquam, seu spatium imaginarium, seu ad puncta fixa vniuersi , non tamen per ordinem ad corpus circumscribens , cum sine illo possit reperiri vbi; sicut & motus , vt patet , quando aliquid mouetur in vacuo. Quam tamen dependentiam negat prima sententia , quia non potest vbi dependere , & habere connexionem cum spatio imaginario , quia est nihil , & aliquid fictum .

Ceterum prima sententia omninò est intelligibilis: quia vel existimant vbi esse modum immobilem , quia non mouetur etiam terminatiuè ; idest tanquam terminus , qui acquiritur , vel deseritur per motum : vel quia non mouetur subiectiuè : quia licèt amittatur , vel acquiratur : non tamen tunc mouetur , quia non fertur cum ipsa re, quæ mouetur . Primo modo constat vbi non esse modum immobilem, cum acquiratur de nouo , quando aliquid mouetur ad locum , & amittatur , cum recedit à loco . Secundo modo certum est , quòd vbi non mouetur , sed corpus est , quod mouetur
acqui-

acquirendo, vel relinquendo ubi: oportet tamen reddere causam huius immobilitatis, quæ non est alia, nisi quia ubi constituit corpus in tali spatio, seu distantia, neque indifferenter se habet tale ubi ad diuersa spatia. Et sic cum spatium sit immobile, etiam ubi, quod ad tale spatium determinatur, immobile dicetur. Ergo non potest ubi poni omninò independens ab omni extrinseco, siue sit spatium negatiuum, siue positiuum.

Secunda verò sententia in eo deficit, quòd non distinguit in ubi circumscriptiuo id, quod circumscriptionis est, & id quod est definitiuum, & determinatum præsentis. Vt enim circumscriptiuum sit, necessariò dependet ab aliquo circumscribente; vt autem præcisè definitiuum, & determinatum sit, non requiritur corpus circumscribens, sed sufficit limitatio in se, qua ita sit hic quòd non alibi. Vt autem positiuè alteri coordinetur, requiruntur respectus aliquis ad locum, vel corpus separatum, seu remotum, respectu cuius motus localis possit acquirere propinquitatem aliquam, vel distantiam positiuam, licet non circumscriptionem: qua ratione saluabimus motum localem in vacuo quæst. seq. ratione positiuæ distantis, vel propinquitatis. Quòd si nec ista possit acquiri, quia non datur aliquod aliud corpus respectu cuius detur positiua distantia, vel propinquitas, neque circumscriptio, cessabit omnis motus positiuus.

Vnde patet ad fundamenta opposita. Dicitur enim ad fundamentum primæ sententiæ, quòd ubi non dependet à spatio illo negatiuo vt à causa, vel constitutiuo, sed vt à negatione

necessariò prærequisita, eò quod non potest inueniri distantia aliqua positina extensa, nisi replendo distantiam negatiuam, & sic supponendo illam; vbi autem necessariò importat ordinem ad distantiam, sicut etiam homo necessariò requirit negationem equi, & fides negationem euidentia, quæ est obscuritas, & materia prima negationem vltioris subiecti.

Ad fundamentum secundæ sententiæ dicemus amplius quæst. sequenti, tractando quomodo fiat motus in vacuo. Sufficit nunc dicere, quòd remoto corpore circumscribente, non remanet vbi circumscriptiuum adæquatè, & formaliter, vt circumscriptiuum est: potest tamen manere inadæquatè, & secundum quid, secundum quod importat ordinem propinquitatis, vel distantia ad corpus non circumscribens, eò quod motus non solum est ad locum, sed etiam circa, vel prope locum, vt ex Diu. Thom. opus. 52. dicemus.

Circa tertiam difficultatem, scilicet in quibus reperiat vbi, potest esse difficultas tam respectu diuersorum subiectorum, quænam sint capacia habendi vbi, quàm respectu vnius & eiusdem rei; an omnia quæ sunt in aliqua re, siue accidentia, siue partes habeant diuersa vbi, an sufficiat vnum, vt sint in loco? Et quantum ad primum, dependet ex dicendis seq. art. vbi inquiremus; quænam res sint in loco, illa enim habebunt vbi.

Circa secundum, quidam affirmant, tot dari vbi in corpore, quot entia; vt ex P. Suarez disput. 51. Metaph. sect. 5. & Valentia 3. p. disp. 6. q. 4. punct. 1. & ex alijs asserit Cabero hic disput. 2. dub. 3. idque deducunt ex motu, quia
omnia

omnia illa mouentur, siue per se, siue per acci-
dens; ergo omnia acquirunt vbi, quod est ter-
minus talis motus: & deinde quia si omnes qua-
litates separarentur à quantitate, quælibet ha-
beret suum vbi, ergo etiam modo, quando sunt
illi coniunctæ.

Nihilominus, cum omnia, quæ in aliquo cor-
pore continentur sint in loco mediante quanti-
tate, vt docet S. Thom. in 4. dist. 10. q. 1. art. 1.
ad 3. & dist. 44. q. 2. art. 2. quæstion. 5. & quod-
lib. 7. art. 8. dicendum est, quod sicut sufficit
vna quantitas extendere omnes partes, & acci-
dentia, quæ sunt in subiecto; ita sufficit vni-
co vbi commensurare ea loco, quia vbi est
modus resultans ex circumscriptione loci in
re locata; ergo vbi est tantum vna circumscrip-
tio, & extensio ad locum, quia est tantum vna
quantitas in re circumscripta, tantum resulta-
bit vnum vbi. Quod si dicas, esse diuersam
rationem de quantitate, & de vbi, quia quanti-
tas non potest multiplicari in eodem subiecto,
alias essent plures quantitates penetratiue: &
similiter quantitas est accidens reale, quod po-
test afficere omnes partes materiæ. At verò
plura vbi non important penetrationem ali-
quam, & cum sint modi, non possunt identi-
ficari cum pluribus rebus distinctis. Contra
est, quia vbi non identificatur immediatè nisi
cum quantitate, eò quod vbi circumscriptionum
non conuenit alicui, nisi vt quantificatum est,
quantitas autem est vna pro omnibus, quæ ex-
tendi possunt in subiecto, ergo & idem vbi; si-
cut quia figura est modus quantitatis, eadem
sufficit pro omnibus partibus figurati, cum
quibus non identificatur ille modus nisi me-

diatè, & per quantitatem. Et magis v̄rgetur, quia res sunt in loco mediante vltima superficiei, qui contiguntur & tangunt locum ambientem, hæc autem superficies vltimo tangens vna est, & denominat omnia, quæ in corpore sunt, vt dicantur locata seu attacta per illam, ergo & vnicum vbi huius superficiei sufficit, vt denominentur omnia vbicata. Et præsertim hoc apparet in anima nostra, quæ spiritalis substantia est, & in accidentibus supernaturalibus, quæ in ea sunt: ex motu enim corporeo, quo mouetur homo, non potest produci vbi spirituale, vel supernaturale, cum motu corporeo solum producat vbi corporeum, quod cum substantia spiritali, & entitate supernaturali identificari non potest: & tamen ista mouentur per accidens nobis motis: ergo ad motum per accidens non requiritur distinctum vbi.

An verò etiam in corpore Christi Sacramentato detur motus per accidens, & vbi per accidens, quando mouetur hostia? Respondetur ex D. Tho. 3. p. q. 76. art. 6. & in 4. dist. 10. q. 1. art. 3. quæstiunc. 4. quòd duo sunt modi essendi in loco, & acquirendi locum per accidens. Vno modo, quia licet aliquid sit in loco per se, sed tamen mouetur ad motum alterius, vt quando fertur in curru, vel in navi, & hoc modo Christus non mouetur per accidens ad motum hostiæ, quia Christus non est ibi tanquam in loco, neque ille motus potest producere vbi indiuisibile, & Sacramentale, sed corporeum, & diuisibile in hostia, cui coniungitur Corpus Christi, sicut Angelus lapidi, qui mouetur. Alio modo mouetur aliquid per accidens,

cidens, quia nec mouetur per se, nec est in loco per se, sicut dicuntur moueri formæ, etiam si spirituales sint coniunctæ corporibus; & hoc modo mouetur Christus per accidens in Sacramento. Hæc enim supponuntur non esse circumscriptiuæ per proprium vbi, sed per alienum, & per coniunctionem ad alterum.

Ad fundamenta opposita patet ex dictis. Dicitur enim ad primum, omnia illa, quæ per accidens sunt in loco, moueri per accidens, & ad motum alterius, & sic si habent eandem quantitatem, etiam eodem vbi commensurantur loco, illoque afficiuntur mediatur, sicut quantitate.

Ad secundum respondetur, quod qualitates, & aliæ formæ, separata quantitate, non afficiuntur vbi circumscriptiuo, nec per se, quia carent quantitate, nec per accidens, quia non coniunguntur alicui habenti quantitatem. Quare, vel non erunt in loco, vel erunt modo indiuisibili, sicut res spirituales, vel alio modo præsentia nobis incognito, ad istum tamen reducibili.

Circa tertiam difficultatem, scilicet, quotuplex sit vbi, supponendum est; quod cum vbi dicat modum existendi in loco, eo modo diuidendum est vbi, quo ipsa ratio existendi in loco. Constat autem non omnem præsentiam constituere vbi sicut patet de præsentia solius vnionis, sicut anima est præsens corpori, & Diuinitas Christo: neque enim dicuntur præsentia ratione vbi, sed ratione vnionis. Quia ergo præsentia vbicalis dicitur per ordinem ad locum, & secundum D. Tho. 1. p. q. 52. art. 1.

esse in loco dicitur æquiuocè de corporibûs, & spiritibus, quia spiritus sunt in loco non vt commensurati, & subiecti loco, sed vt subijcientes sibi locum: ideò vbi æquiuocè dicitur de vbi spiritali, & de vbi corporeo. Itaque si sumatur vbi in communi pro quacumque præsentia ad locum, sic diuidi solet in circumscriptium, & definitium, & supernaturale, seu Sacramentale. Omittimus autem præsentiam Dei ad loca; tùm quia non est creata, neque prædicamentalis, sed substantia Dei; tùm quia non est vbi, sed vbique. Vbi circumscriptium definitur, *quod est circumscriptio passiva corporis à circumscriptiōe actiua loci proueniens.* Vbi definitium est illud, *quod ita ponit determinatè in vna parte mundi, quòd non in alia;* vt explicat S. Tho. opusc. 48. tract. de vbi cap. 1. non tamen tale vbi ab aliqua commensuratione, vel subiectione ad locum prouenit. Vbi Sacramentale, *est modus ille indiuisibilis qui conuenit Corpori Christi secundum præsentiam ad species Sacramentales,* qui supernaturalis est quantitati Christi, eo quòd supra corporis naturam est esse præsentem non localiter, sed indiuisibiliter, nec ab aliquo principio fieri potest, non tamen est illa præsentia definitiua, vt S. Tho. docet in 4. dist. 10. q. 1. art. 3. q. 2. quia non ita determinatur ad istas species, quòd non sit in alijs, sed vbicumque est panis ibi potest esse; vel vbicumque Deus velit conuertere aliquid in ipsum, & sic non dat præsentiam definitam, sed quia caremus alio nomine, vocamus Sacramentalem. Et quia supernaturalis est, ad illam reducimus omnem aliam præsentiam, seu alia vbi, quæ
su.

supernaturaliter à Deo possunt tribui rebus creatis.

Propter hæc solet ubi circumscriptum dici à D.Tho. opusc.cit. propriè esse ubi ; & similiter in 1.diff.37.q.3.art.1.ad 1. dicit: Quod res incorporeæ propriè non conveniunt esse in loco. Alia ergo quæ dicuntur ubi , solum propriè dicunt præsentiam rei ad locum , sed non propriè dicuntur ubicare , quia ubicatio importat præsentiam , ut mensuratam loco , & ponentem distantiam , vel propinquitatem in re locata respectu aliorum , qui modus vicationis in ubi spirituali non invenitur. Et sic , sicut actio prædicamentalis propriè dicitur illa , quæ inferre passionem , licet in quantum causalitas agentis etiam conveniat actioni non inferenti passionem sed præcisè producenti effectum , & sicut quando , propriè non dicitur de quacumque duratione , sed de duratione temporali , qua aliquid secundum diversam successionem mensurantur , & quandatur . Ita non dicitur propriè ubicari aliquid per quancumque præsentiam ad locum , sed per illam , qua commensuratur loco , & qua secundum mensurationem distantie , vel propinquitatis positivè distinguitur .

ARTICVLVS III.

Primum omnibus corporibus conveniat esse in loco , & habere ubi ?

Supponimus , nullum corpus comparari ad locum commensurativè , nisi mediante quantitate , & modo proprio quantitatis ; re-

moti autem quantitate, vel modo extensiuo illius, res non commensurantur loco, unde dicit D. Thom. in 4. dist. 10. q. 1. art. 2. ad 5. *Quod nullum corpus comparatur ad locum, nisi mediantibus dimensionibus quantitatis.* Quare si remota quantitate, aliqua substantia conseruaretur à Deo, sicut modo corpus Christi sine modo quantitatis ponitur in Sacramento, tale corpus non erit in loco, sed manebit ut pars vniuersi sine loco; sicut Corpus Christi non est in loco per proprias dimensiones, sed per quantitatem hostiae. Et sic dicit Aug. epist. 57. *Quod si tollantur spatia à corporibus nullibi erunt, & quia nullibi erunt, neque erunt;* intelligitur enim, quod non erunt quantum est ex natura sua, nisi à Deo conseruentur.

Ex quo colligitur. Primò, quod corpus positum in vacuo, aut extra totum vniuersum non est in loco; non quidem defectu extensionis propriae, sed defectu extensionis circumscriptibentis, sine circumscriptione enim non datur locus positivus. Quid autem acquiratur per motum localem in vacuo, dicemus quaest. seq.

Secundò colligitur, punctum separatim non esse per se in loco, caret enim quantitate: & illud dicitur per se esse in loco, quod per se potest loco moueri; punctum autem non potest per se moueri loco, ut dicemus infra q. 30. art. ult. quia correspondet tantum indiuisibili loci; si autem moueretur per se, immediatè post responderet alteri indiuisibili, non dantur autem duo indiuisibilia immediatè. Solum ergo punctum est per accidens in loco ratione partium, quae ponuntur in loco.

Tertiò

Tertio colligitur, solum id esse per se in loco, quod per se afficitur quantitate; & sic formarum, siue substantiales, siue accidentales non sunt in loco per se, sed per accidens ratione totius, in quo sunt, & quantitatis, qua afficiuntur in ipso toto. Et sic D.Tho. 4. Phys. lect. 7. circa text. 45. inquit: *Quod quaedam sunt in loco per accidens, sicut anima & omnes formae*; & idem habet in 4. dist. 10. q. 1. art. 3. q. 4. & sic diximus præc. art. quod ea quæ afficiuntur unica quantitate, unicum habent ubi afficiens immediate ipsum totum, cui primò, & per se convenit quantitas, mediate autem, & per accidens illis, quæ tali toti conveniunt, & quantitate afficiuntur. Sicut etiam convenit eadem figura, & situs toti, & partibus, quia figura, situs, & ubi, seu circumscriptio sunt modi ipsius quantitatis, & sic afficiunt, & variantur, vel non variantur eo modo, quo quantitas. Si quid verò existit unitum corpori, quod quantitate non afficitur, nec mediate, nec immediate; sicut quilibet spiritus unitus corpori, vel tanquam agens, vel sicut Corpus Christi est in Sacramento, moto illo corpore dicitur moveri per accidens, non quia ex vi talis motus acquirat, vel amittat aliquod ubi spirituale, cum hoc fieri non possit ex vi motus corporei, sed solum ratione concomitantiae dicuntur moveri, eo quod ex vi suæ unionis dicuntur esse ubi est corpus cui uniuntur; non autem per participationem effectus formalis circumscriptionis, seu existentiae in loco. Et sic in se non mutant præsentiam ubicalem, sed continuant unionem ad corpus, quod mutat locum, & distantiam, ex se autem nihil distan-

tia, aut extensionis, vel vicationis habent, de quo videatur D. Tho. cit. loco dist. 10. qu. 1. artic. 3.

Inser corpora ergo per se habentia quantitatem modo diuisibili extenso solum est difficultas; Quomodo vltimum corpus totius vniuersi existat in loco? quod antiqui existimauerunt esse primum mobile: nos autem intelligimus esse cælum Empireum. Nam ex vna parte videtur esse in loco, quia mouetur loco, vel saltem moueri potest à Deo. Ergo debet esse in loco, per motum enim localem locus acquiritur. Ex alia verò parte non circumscribitur, neque continetur loco, quia est vltimum continens omnia; ergo non est in loco circumscriptiue. Nequè potest dici, quòd est in loco ratione centri circa quod mouetur, vel superficiiei corporis inferioris, quod immediate tangit. Hoc enim non est esse in loco circumscriptiue, sed circa locum, quod etiam potest habere corpus positum in vacuo; corpus enim inferius positum circumscribitur, non circumscribit. Nos autem inquirimus, quomodo cælum illud sit in loco circumscriptiue.

In hac difficultate aliqui sentiunt vltimum corpus non esse in loco, neque per se, neque per accidens, sed solum replere spatium imaginarium; quod etiam aliqui recentiores sequuntur. Alij locum tribuerunt cælo, sed quia locus est immobilis, quidam assignauerunt centrum pro loco cæli, quia immobile est. Alij attendentes ad superficiem, quæ etiam pertinet ad locum, dixerunt superficiem inferiorem cæli esse locum eius. Cui tamen non conue-

nit circumscribere, sed circumscribi.

Igitur sententia est Arist. in hoc lib. cap. 9. ultimam sphaeram esse in loco per accidens ratione partium, quæ tamen non sunt actu in loco, sed potentia, quod est dicere cælum simpliciter non esse in actu in loco, sed potentia, quod sufficit, ut possit moveri motu circulari. Dicuntur autem partes cæli esse in loco in potentia, quatenus omnes existunt in continuo una post aliam, & una unitur alteri in circulo; & ratione huius continuationis, seu concatenationis una continet aliam continuatione, non circumscriptione, quia diuisa & contigua non est: & ideo solum in potentia dicuntur illæ partes esse in loco, quia ut sine actu circumscriptæ una ab alia, solum deest illis diuisio, qua reddantur contiguæ illæ quæ sunt continuæ. Ita docet Philos. cit. loco, ubi inquit: *Quod cum id quod est simile partium continuum est; tunc partes potentia sunt in loco; sed cum sunt separatae, atque ut in cumulo sit, se tangunt, tunc in loco sunt actu.* Et subdit *Cælum autem non est alicubi totum; neque est ullo modo, si nullum ipsum continet corpus, sed quo movetur, hoc & locus est partibus; Alia namque partium alij habet. Alia verò per accidens, ut anima, atque cælum. Omnes namque partes quodammodo sunt in loco, circumquaque enim alia aliam continet; ubi aperte docet partes cæli non absolutè esse in loco, sed quodammodo, quatenus una continet, seu cohaeret alteri: & tamen quia istæ partes sunt in continuo, & non separatae, ideo non sunt actu in loco, ut circumscriptæ, sed sunt in potentia in loco, quia possunt diuidi, actu autem conti-*

næ sunt, non contigæ. Idem docet D. Tho: in hoc lib. lect. 7. & opusc. 52. Itaque in cælo non possumus considerare, nisi vel quod est supra ipsum, seu extra ipsum, vel quod est infra ipsum, & ab eo contentum, vel quod est in ipso, ut partes eius. Non potest dici, quod ultimum cælum sit in loco, quia supra, vel extra ipsum detur aliquod corpus continens, cum ipsum sit ultimum; neque quod sit in loco, quia intra ipsum detur aliquid contentum; hoc enim potius est locatum ab eo, quam locus eius; & idem est de centro, quod etiam non est continens ipsum cælum, neque actu, neque potentia: est autem contentum non potentia, sed actu. Relinquitur ergo quod dicitur esse per accidens in loco, & in potentia solum ratione partium, quatenus una continuatur alteri, sed non circumdatur ab illa, quia separata non est ab ea.

Sed obijcies primò, quia hac ratione non solum partes cæli, sed etiam totum cælum est in loco in potentia, quia etiam est in potentia, ut sibi aliud corpus superponatur, & ab eo circumscribatur in loco. Et licet hoc non possit naturaliter fieri, sed à solo Deo, etiam partes ipsæ cæli non possunt diuidi, nisi à solo Deo. Secundò, quia de facto cælum mouetur, & non solum in potentia: ergo debet acquirere locum in actu, & non in potentia, nam motus in actu debet habere terminum in actu, & nullum alium, quam esse in loco, quia est motus localis. Ergo partes cæli habent locum in actu; imò & totum cælum, quia motus subiectatur in toto cælo, & ipsum totum mouetur, & non solum pars. Tertiò, quia motus cæli est

primò

primus motus : ergo est magis in actu , & per se , quàm alij motus : ergo non debet habere terminum per accidens , & in potentia . Id enim quod est in actu , & per se , est potius eo , quod est per accidens , & in potentia . Et sic , cum primum cælum sit nobilissimum corpus , debetur ei nobilissimus modus essendi in loco , ergo non per accidens , & in potentia . Vltimò , cælum actu habet vbi in suis partibus , & in ipso toto , alioquin non possemus designare vbi modo est Sol , quando oritur , & vbi postea quando occidit . Et idem est de partibus ultimæ sphaeræ ; sed illud vbi designatum , & in actu est circumscriptiuum , utpotè acquisitum motu locali in actu : ergo partes sunt actu in loco , siquidem actu habent vbi .

Ad primum respondetur ; verum esse quòd etiam tota sphaera est in potentia , ut sit in loco , sed hoc respectu corporis , quod nondum est in rerum natura , licèt possit à Deo creari . At verò partes dantur in re , licèt earum diuisio non possit nisi de potentia Diuina dari , ideò magis dicitur existens in loco respectu partium , quæ iam sunt in re , licèt non sint diuisæ , quàm respectu alterius corporis superponibilis , quod nondum datur in re .

Ad secundum respondetur , Cælum moueri ratione suarum partium , sicut etiam corpus dicitur videre , quia videt oculus . Talis autem motus in cælo , licèt de se sit productiuus vbi circumscriptiuum , tamen per accidens , quia est corpus vltimum , non habens aliud circumscribens se , non producit de facto vbi circumscriptiuum , ratione cuius dicatur esse in loco : producit tamen aliquid in actu , & de facto .

scilicet modum aliquem propinquitatis; vel distantiae respectu alicuius corporis circa quod mouentur illae partes, & ipsum totum, & hoc etiam pertinet ad ipsum ubi saltem inadæquatè, eo quod ubi non solum dicit circumscriptionem in loco, sed etiam distantiam aliquam, vel propinquitatem, siue modum applicationis, qui sit fundamentum relationis distantiae, vel propinquitatis. Et sic dicit Diu. Thom. opusc. 52. *Quòd motus localis non solum est in loco, sed circa locum*, de quo explicatius dicemus seq. quæst.

Ad tertium respondetur, quod, vt notat S. Tho. 4. Phys. lect. 7. primo motui conuenit minus de potentia, & de variatione locorum in ipso mobili, & minus differmitatis, & ita, quantò minus in actu variantur loca in mobili, magis acceditur ad vniformitatem, & immobilitatem. Vndè non sequitur, quod motus actualior, & perfectior magis dicatur ponere aliquid in loco, quia esse actu in loco est esse subiectum circumscriptum & limitatum à locante. Et ideò, quia primus motus est nobilior, & primi continentis non contenti ab alio, ideò non conuenit illi ponere tale corpus actu in loco, idest actu subijcere loco, sed solum in potentia; minus enim perfectionis est actu esse dependens, quàm potentia, licet modum distantiae, vel propinquitatis actu ponat.

Ad vltimum respondetur, quod partibus cæli conuenit habere ubi determinatum, & designatum, quantum ad id, quod definitionis est in ubi, non quantum ad id, quod circumscriptionis. Hoc enim est ubi inadæquatè sumptum.

p̄tūm in corporibus ad differentiam vbi definiti-
tūi in Angelis, qui ita sunt in vno loco, quod
non in alio, sine aliqua tamen distantia, vel
propinquitate positua in ordine ad aliud, quia
distantia mensurationem dicit extensionis, quæ
non potest desumi ab vno Angelo ad vnum cor-
pus, vel è contra. In corporibus autem etiam
si non sint circumscripta, potest sumi ista di-
stantia, & mensura extensionis ad alia corpo-
ra, idque per motum localem potest in vacuo
variari, vt dicemus quæst. seq.

ARTICVLVS IV.

*Verūm duo corpora possint penetrari in eodem
loco diuina virtute?*

TRiplex est sententia in hac parte. Duæ ex-
tremæ, & vna media. Prima extrema pu-
tat etiam naturaliter posse duo corpora pene-
trari. *Ratio est;* tūm, quia non est de essentia
quantitatis, vt alterum corpus semper expellat;
tūm, quia plures experientia id videntur com-
probare; videmus enim vas plenum cinere
tantum aquæ recipere, quantum sine cinere
remanet. Ferrum candens ignem recipit in-
tra se, & panis madefactus recipit aquam, &
vas aqua plenum recipit nummos, nec effundi-
tur, quæ omnia sine aliqua penetratione cor-
porum non possunt contingere.

Secunda sent. extrema est Duran. in 4. dist. 44.
qu. 6. qui dicit esse probabile, quod neque per
diuinam potentiam duo corpora possunt pene-
trari. *Fundamentum* similiter est, tūm ex ra-
tione, tum ab exemplis. Ratione quidem, quia
effe-

effectus formalis non potest impediri stante forma: est autem effectus formalis quantitatis occupare locum, & stante occupatione loci sequitur tanquam effectus priuatiuus expulsio alterius corporis; ergo hic secundus effectus non potest impediri stante primo. Constat autem, quòd in praesenti loquimur de penetratione corporum occupantium locum, nam remota occupatione loci, ut in Corpore Christi Sacramentato, non est dubium, quòd possit simul esse cum altera quantitate. Consequentia verò patet, quia ideò non possunt duæ formæ substantiales esse simul in eadem materia, quia effectus formalis vnius habet adiunctam priuationem alterius; sed similiter occupatio loci habet adiunctam priuationem, & expulsionem alterius corporis à loco. Ergo non potest impediri stante primo effectù. Ab exemplis autem probatur; rùm, quia duæ quantitates successiuæ non possunt simul penetrari, v.g. quòd duo dies sint in vno, sic enim tolleretur eorum successio; ergo neque duæ quantitates permanentes in eodem loco; rùm, quia si potest vnum corpus penetrari cum alio, etiam posset vna pars corporis cum alia, & sic tolleretur essentia quantitatis, quæ est habere partem post partem. Imò posset pars esse æqualis toti, ut si quantitatem manus intra digitum Deus penetraret.

Tertia sententia vera, & tenenda, quæ communi calculo Theologorum probatur, dicit, quantitatem etiam extensam in loco posse diuinitus cum alia penetrari, non tamen naturaliter. De hoc videri potest S. Tho. in 4. dist. 44. q. 2. art. 2. & super Boet. de Trin. q. de pluralitate cau-

recausarum art. 3. Scot. in 4. dist. 49. q. 16. Capreol & Argentinas, Soc. Suarez, & alij, quos citant Cursus Carmelitanus hic, disput. 19. q. q. 7. & Conimbricensi, q. 4. art. 2. Et supponimus nihil aliud esse duo corpora penetrari, quàm sub eadem superficie ambientis corporis, & in eadem distantia contineri. Hoc ergo dicimus repugnare naturaliter, non diuinitus. Et repugnantia naturalis manebit probata ex ipsa explicatione non repugnantia diuinitus.

Quod ergo diuinitus non repugnet, sumitur, tum à posteriori, quia sic factum est; tum à priori ex ipsa repugnantia naturali, quæ potentia diuinæ non obstat. A posteriori ergo probatur, quia in primis Corpus Domini in natiuitate exijt clauso utero Sacratissimo B. V. & in resurrectione exijt de sepulchro inuiolato, & immutato lapide: & ad Discipulos intrauit clausis ianuis; & cælos penetrauit nulla facta diuisione in eis.

Respondet Durandus, in egressione ex utero potuisse partes dilatari, & si non referari, ad eum modum, quo in statu innocentia parerent foeminae. Vel secundò exijisse non transeundo per medium. Similiter egressum à sepulchro, quia corpus gloriosum ita potest contringi, ut per minimum foramen, vel porum exeat. Ad Discipulos verò potuisse intrare ianuis subita quadam velocitate apertis, & iterum clausis. Cæterum primæ duæ solutiones non solum falsæ, sed etiam iniuriosæ videntur illi mysterio. Prima quidem, quia multum derogat lummæ Virginis integritati. Secunda, quia derogat Natiuitatis veritati. Primum patet, quia tanta partium dilatatio, ut corpusculum exeat

exeat sine penetratione, nihil aliud est, quàm apertio, & reformatio. Sicut etiam in statu innocentiae parientes foeminae integritatem virginalem non conseruarent, licet sine dolore parerent. Miraculum autem Natiuitatis Christi non solum celebratur, quia partus fuit sine dolore, sed quia fuit salua omni moda integritate: & in hoc præcipuè assignatur miraculum, quia clauso utero exijt. Nullum autem esset miraculum, quod facta dilatione partium exiret. Secundum verò patet, quia si transiret de utero ad terram, & non per medium, verè non nasceretur, quia non pareretur, parere enim est emittere foetum motu physico, & corporali, sic enim procedit à matre. Motus autem corporalis non potest esse de extremo ad extremum, nisi per medium, si verus motus est. Ergo sine motu corporali non datur partus, & sine partu non datur vera natiuitas. Quod verò dicitur de corpore glorioso, omninò ridiculum est, quia tanta restrictio corporis sine magna alteratione per modum addensationis, vel compressionis contingere non potest, quod utique eius impassibilitati non congruit. Denique dicere, quod fores fuerunt apertae, quando ingressus est ad Discipulos, vim facit Scripturae, quae dicit, *Cum fores essent clausae*, Durandus autem dicit esse apertas.

A priori autem probatur hæc veritas considerando rationem, ob quam vna quantitas naturaliter resistit penetrationi. Putant enim aliqui, quantitatem resistere per aliquam efficientiam, quatenus vnum corpus pellit aliud à loco quando intrat in illum; sic enim pellit,
sicut

sicut trahit, trahit autem per virtutem efficientem, ergo, & pellit: & quia Deus potest denegare hunc concursum ad efficiendum, potest consequenter vnum corpus non pellere alterum è loco. Quam sententiam sequitur Martinus in illustratione istorum cap. notabil. 7. Ceterum falsa est ista sententia; tum quia quantitas non est actiua, neque in quantum quantitas est diuidens, sed diuisibilis; diuisio enim fit ab aliqua virtute motiua, v. g. à gravitate, vel impulsu, vel aliquo simili; quantitas autem non est virtus motiua; tum etiam, quia si quantitas expelleret effectiue, id faceret producendo aliquid, quod esset impossibile penetrationi, omnis enim efficientia aliquem terminum producit, quo formaliter fiat id, quod ab efficiente fit actiue: iste autem terminus, seu forma, quam quantitas producit, quando expellit, & resistit penetrationi, eandem patitur difficultatem atque ipsa quantitas: præsertim, quia illa efficientia expellens non potest esse nisi per motum, motus autem solum producit vbi, quod non est forma resistens penetrationi, aut saltem de hoc inquirimus rationem, cur repugnent duo vbi in diuersis corporibus sub eadem distantia.

Quare ratio impenetrationis reducitur à D. Tho. dist. 44. cit. ad ipsam quantitatem ratione effectus secundarij, qui est siccualiter collocare partes in ordine ad locum; pertinet enim ad quantitatem ponere vnâ partem post aliam, primò quidem in ordine ad se ordinando partes in toto. Secundò verò ordinando eas in loco, & extendendo in diuersis spatijs & terminis, sicut videmus in corporibus exten-

ensis, siquidem essentia quantitatis in extensione consistit coordinante vna parte post aliam in ratione partis, vnde sequitur tanquam proprietas, quod diuersis spatijs faciat diuersas partes respondere, sic enim coordinantur. Hæc autem extensio localis obstat penetrationi; tùm partium inter se in eodem continuo, alias omnes partes essent confusæ, & ad locum indiuisibilem redactæ, vel potius ad nullum. Tùm etiam vnius corporis erga aliud à se diuisum, quia cum non sit continuum multò magis pertinet ad quantitatem extra se illud ponere, quam vnā partem extra aliam, quæ est connexa in eodem continuo; si autem ponit vnā extra aliud, non relinquit intra proprios terminos loci, & hoc est non penetrari. Ex ipsa ergo extensione quantitatis nascitur, quod corpora, & partes se tangant penes extremitates, seu indiuisibilia & terminos, ita quod vna non intret in aliam, nec penetretur sub eodem loco. Hæc autem extensio actualis ad locum non est effectus primarius quantitatis, quia salua quantitate, potest totaliter tolli, ut patet in Corpore Christi Sacramentato, vbi est quantitas eius, sicut & reliqua accidentia sine extensione ad locum; ergo à fortiori poterit salua natura quantitatis iste effectus impediri, ne de facto aliud corpus expellat, sed intret in terminos eius sine diuisione ipsius quantitatis, sicut sine eius diuisione totaliter tolli potest in Sacramento. Neque sequitur, quod idem effectus pendeat à duplici causa totali, v. g. à duobus corporibus idem locus. Respondetur enim, quod in illis corporibus penetratis ponitur duplex vbi passiuum, quamuis vnus locus

cus

eus circumscribens ; non repugnat autem ab eadem causa multiplicari effectus in diuersis subiectis, tunc enim comparantur quasi in adæquata respectu illius, sicut ab eodem igne multiplicatur calor in diuersis subiectis.

Ad primum pro prima sententia respondetur. Quòd licet non sit contra essentiam quantitatis penetrari cum alia, est tamen contra eius proprietatem, seu effectum secundarium, qui illi connaturaliter debetur, & ideò naturaliter repugnat, non essentialiter.

Ad secundum respond. quòd in vase pleno cinere tantum recipitur de aqua, quantum est sine cinere, quia propter nimiam cineris siccitatem plurimum aquæ euaporatur, & reliqua imbibitur, & multa loca in cineribus plena aere, replentur, & constipantur aqua. Similiter, quando iniiciuntur nummi in vas plenum aqua, faciunt aquam crescere in cumulum, quandiu labra vasis sunt sicca, illis autem madefactis effunditur aqua. In ferro candenti ignis intrat poros ferri, qui nimio calore plus aperiuntur, & admittunt plus ignis. Et similiter infusa aqua in pane, quidquid aeris est intra panem, repletur aqua, & constipantur partes sicca madefactæ ab aqua, & sic dant ipsi locum.

Ad primum pro secunda sententia respondetur, quòd actualis expulsio non fundatur in sola quantitate, aut formali eius effectu quomodocumque, sed in quantum habet contactum actualem in ordine ad alterum ; cum autem contactus fiat penes ipsas superficies, quia, vt dicit Philosophus 5. Physic. cap. 3. ea se tangunt, quorum extrema sunt simul, tunc facit Deus, quòd penetrentur duo corpora, quan-

quando impedit contactum vnius corporis ad alterum, nam hoc ipso non sunt simul penes superficies, seu extremitatem partium, sed se totis, quod est penetrari. Potest autem fieri ista penetratio stante effectu formali quantitatis, etiam secundo, qui est occupatio loci, quia potest Deus impedire istum contactum respectu vnius corporis, & non respectu alterius; & sic impedire expulsionem vnius corporis, & non alterius, atque adeò poterit habere contactum ad corpus circumscribens, & locans, quod est occupare locum, & tamen impediri contactum ad aliud corpus sibi appropinquans sicque admitti, vt sit simul in eodem loco.

At verò in formis substantialibus expulsio vnius formæ ab eadem materia non fundatur in aliquo contactu actuali respectu vnius, & non respectu alterius, sed in ipsa ratione informationis substantialis in materia, quæ est informatio primæ actualitatis, & sic non potest supponere aliam priorem; vnde forma secundo adueniens, & informans repugnat, quòd sit substantialis, idest, quòd det primum esse, vt supra diximus q. 11.

Ad secundum fundamentum, ab exemplis respond. *Ad primum*, est maxima disparitas, eò quòd ipsa ratio successionis essentialiter petit vnam partem esse post aliam; vnde quomodocumque ponantur partes esse simul, seu penetrari, tollitur successio. At verò ratio quantitatis permanentis non consistit in contactu ad alia corpora, & potest stante quantitate contactum amittere absolute, vt Corpus Christi in Sacramento, vel stante contactu ad vnum

Vnum impediri ad habendum contactum erga alterum, & sic esse simul cum eo in eodem loco, non tangendo illud secundum superficiem, sed etiam secundum partes diuisibiles, per quod non tollitur extensio in ordine ad totum, quod est effectus primarius quantitatis, neque in ordine ad locum, quia potest manere contactus ad locum, & impediri respectu alterius corporis, ut dictum est. *Ad secundum exemplum* dicitur, quod si Deus reduceret totam quantitatem vnius brachij ad locum digiti, illa quantitas extrinsecè, & in ordine ad locum esset æqualis suæ parti, sed radicaliter, & intrinsecè in ordine ad totum esset maior, quia plures habet partes, & ex se petit maiorem extensionem in loco, quàm sua pars, licet de facto non occupet illum.

ARTICVLVS V.

Verùm implicet vnum corpus esse in pluribus locis circumscriptiue?

LOquimur de præsentia circumscriptiua, quia esse in loco vnum corpus circumscriptiue, & non circumscriptiue in alio constat ex Fide, nam Corpus Christi extensiue est in cælo, & Sacramentaliter in Eucharistia. Sed quia circumscriptio ita adæquat rem locatam, quod supponit in illa ultimam superficiem, ultra quam non continuatur, neque extenditur, ideo specialem difficultatem habet: an res semel locata, & circumscripta possit in alio loco similiter circumscribi, & altera superficie terminari manente adæquatione loci, & vnitæ loga-

locati. Et hoc dupliciter potest fieri, vno modo stante eadem substantia & quantitate corporis, eademque superficie: alio modo posita duplici quantitate in eadē substantia corporis, ita quod secundum vnam terminetur in vno loco, & secundum aliam in alio, nulla facta diuisione in eadē quātitate, sed in alia superaddita.

Est igitur in hac difficultate duplex sententia inter Scholam D. Tho. & Scoti; Nam Scotus in 4. dist. 10. q. 2. per totam tenet non implicare contradictionem vnum corpus circumscriptiuē esse in duplici loco, quem præter eius Scholam sequuntur communiter recentiores, vt Conimbric. Suarez, Bellarm. Valent. Rubio, & alij qui citantur in cursu Carmelit. hic disp. 19. qu. 8. Imò multi addunt hanc sententiam esse conformiorem veritati, & principijs fidei, quibus realis præsentia Corporis Christi in Eucharistia stabilitur.

Fundamenta huius senten. reducitur ad tria capita. Primum, ex effectibus, quia de facto ita aliquando contingit. Secundum, ratione. Tertium, ab exemplis. Primum probatur, quia in primis, quando Christus apparuit Paulo, visus est ab eo in proprio corpore, vt argumentatur S. Tho. 3. p. q. 57. art. 6. quia alias non posset esse testis Resurrectionis eius; & tamen Christus tunc non recessit à cælo, quia vsque ad diem iudicij non descendit indè, iuxta illud Actor. 3. *Quem oportet calum suscipere vsque ad tempus restitutionis omnium.* Et August. dicit: *Quod donec sæculum finiatur sursum est Dominus.* Ergò oportuit, quod tunc Christus Dominus non recedens à cælo videretur in aere à Paulo, & sic extitit in duplici loco.

Omit-

Omitto alias visiones, quibus Christus Dominus visus est in terris, vel apparuit in Eucharistia. Hæc enim referri possunt, non ad visionem in proprio corpore, sed in aliquo apparente; atque adeò non ita probant, sicut visio illa Pauli.

Secundum fundamentum est ex ratione, quæ desumitur ex responsione, vel improbatione implicationis contrariæ; videntur enim valde infirmæ rationes, quibus ista implicatio probatur, & si aliquid probant, etiam probarent Corpus Christi non posse indiuisibiliter esse in pluribus hostijs, nam quòd dicitur locum circumscriptiuium ita adæquatè terminare, & comprehendere corpus, quòd extra ipsum non permittit esse circumscriptiue; eodem modo probat, quòd non permittit esse Sacramentaliter; nam si potest excedere illos terminos circumscriptiuos existendo alibi indiuisibiliter, quid refert quòd excedat illos existendo alibi diuisibiliter attendendo præcisè ad adæquationem primæ circumscriptionis? Quòd verò additur sequi, quòd idem corpus esset diuisum, si poneretur in duplici loco, vel quòd etiam posset idem corpus esse in infinitis locis, si semel potest esse in duobus, quia est eadem ratio de infinitis: vtrumque sequitur eodem modo in Corpore Christi Sacramentato, & ibi soluenda sunt hæc inconuenientia. Nam etiam sequitur, quòd possit esse in infinitis hostijs sine termino. Nec tamen sequitur, quòd si vnum corpus sit in infinitis locis, quòd sit vbique sicut Deus, quia neque à se ipso, nec primò, & per se esset vbique; Deus enim ita est totus in omni loco, quòd est totus in omni par-

parte loci , & sic totus est vbique , illud autem corpus est in quolibet loco per suas partes . Similiter non sequitur Corpus Christi esse diuisum , & indiuisum , ex eo quòd est in cælo , & extra cælum sub quantitate aliena , scilicet sub speciebus panis . Quare ergo erit diuisus , si sit alibi sub quantitate propria , præsertim , si duplicem quantitatem haberet ? præterquam quòd solum sequitur diuisio ista quoad locum , & circumscriptionem , non quoad entitatem , & substantiam , quia hæc non sumitur ex multiplicatione locorum , quæ accidentalis est .

Tertium fundamentum sumitur ab exemplis . Nam in primis potest idem corpus esse in duplici loco , altero diuisibili , altero indiuisibili , vt patet in Corpore Christi ; ergo potest dependere à duplici præsentia , altera naturali , altera supernaturali , & indiuisibili , quarum quælibet adæquatè , & totaliter in suo genere reddit illud corpus præsens . Ergo similiter poterit dependere à duplici præsentia circumscriptiua , licet vtraque sit adæquata . Neque enim ex eo , quòd sit circumscriptiua aliquid amplius addit supra alteram circumscriptionem , quàm multiplicare ipsa loca , quæ solum accidentaliter se habent ad multiplicationem substantiæ . Item non repugnat idem corpus affici duplici quantitate , vel duplici albedine , aut calore , neque repugnat eandem naturam duplici subsistentia diuina terminari . Ergo neque repugnabit duplici vbi circumscribi , licet vtrumque sit adæquatum , & sufficiens . *Confirmatur* , quia vnitas loci stat cum duplicitate corporis , vt patet cum duo corpora penetrantur . Ergo etiam duplicitas loci stabit cum

cum unitate corporis. Consequentia patet, quia si diuersitas corporum dependet ex diuersitate loci, etiam unitas dependebit ex unitate: & e conuerso si unitas non dependet, ut manifestum est, etiam non dependebit diuersitas, sed accidentale sibi erit.

Opposita sententia perpetuò defenditur à D. Tho. in multis locis, ut in 4. d. 10. q. 1. ar. 3. questione 2. & apertius dist. 44. q. 2. ar. 2. questione 3. ad 4. ubi dicit: Quòd vnum corpus esse simul localiter in duobus locis non potest fieri per miraculum; & quodlibet 3. art. 2. ubi dicit: Quòd corpus esse in duplici loco circumscriptiuè est ponere duo contradictoria simul. Idem insinuat 3. p. q. 75. art. 1. in argumento 3. adiuncta eius solutione. Et opusc. 70. q. 4. art. 4. Sequuntur D. Tho. communiter omnes eius Discipuli, & præterea S. Bonau. in 4. dist. 54. art. de dote subtilitatis, Duran. in 4. dist. 10 q. 4. nu. 8. Herberus, Palud. Aegidius, Abulens. & alij, quos sequitur Pater Vazquez tom. 3. in 3. p. disp. 189. cap. 4. & Mag. Lorca in manuscriptis de Eucharistia, ut citat Cabero hic disp. 1. dub. 5.

Ex pluribus autem implicationibus, quæ afferuntur; ad illam tanquam ad præcipuam cæteræ reuocantur; quia ita vnum corpus sub vnica quantitate existens adæquatur ad vna circumscriptiue, quòd si ponatur in duplici loco circumscriptiuè, diuidetur eius quantitas, & consequenter ipsum corpus: sicque erit simul idem, & diuersum. Quòd quantitas diuidatur hoc ipso, quòd ponitur eo modo in duplici loco, ex eo probatur, quia illud corpus sic positum in duplici loco, haberet duplicem superficiem terminantem, ita vt si simul acce-

derent, tangerentur vero contactu, sicut & tangunt illa loca, in quibus ponuntur, aliàs non locarentur in duplici loco, si in utroque non haberent contactum ad dicta loca: illa autem se tangunt, quorum extrema, seu superficies sunt simul, ut dicitur 5. Phys. cap. 3. Ergo si illud corpus ponitur in duplici loco, duplicem debet habere superficiem, siquidem, si poneretur in loco sibi immediato, verè esset sibi contiguum, & verum contactum haberet ad se sicut habent duæ manus, & sicut habet verum contactum ad corpus circumscribens se in duplici loco; si enim penetrarentur, hoc ipso non esset in duplici loco, quod est destruere casum, potest autem poni in loco sibi immediato, si semel potest poni in duplici remoto, sed ea dicuntur habere contactum, & esse contigua, quorum extrema sunt simul; ea verò continua, quæ communi termino copulantur; ergo illud corpus positum in duplici loco sibi immediato, verum contactum habebit: atque adeò duplicem superficiem. Non ergo stante eadem quantitate, seu superficie potest poni in duplici loco modo circumscriptum. Et amplius hoc patet, quia si ponatur corpus in duplici loco à se remoto, ve. gr. Romæ, & Compluti, hoc ipso quantitas illius corporis manet diuisa: ergo non potest manere eadem. Consequentia est manifesta; & antecedens probatur; quia illa quantitas discontinuatur, ergo diuiditur, tunc enim discontinuatur quantitas, quando inter hanc, & hanc quantitatem interponitur, aliquod corpus medium, quod non continuatur cum tali quantitate; sed posito corpore Romæ, & Compluti interiacet

iacet aer, vel multa alia corpora, quorum nulum continuatur cum illo; aer enim, qui ambit corpus Romæ, est contiguum illi tanquam locus eius, non continuum; & similiter aer, qui est Compluti. Ergo discontinuatur quantitas istius corporis hoc ipso, quod ponitur in duplici loco, & sic est quantitas diuisa, non eadem; & sic est contradictio, quod idem corpus, seu eadem quantitas ponatur in duplici loco, & non maneat diuisa.

Huic rationi tripliciter potest responderi. Primò, instando illam, inam etiam quantitas Corporis Christi est in cælo, & in Sacramento, nec tamen est diuisa, nec alia. Ergo similiter non erit diuisa ex eo, quod ponatur circumscriptiue in duplici loco. Secundò dicendo, quod ex ista positione in duplici loco, non sequitur diuisio intrinseca in quantitate, vel corpore, sed solum extrinseca secundum duplicem vicationem, seu locum, quod verissimum est. Tertiò, quod saltem non repugabit esse corpus in duplici loco, si ei duplex quantitas tribuatur à Deo, quod nullam repugnantiam inuoluit.

Ad primam instantiam respondetur, quod Corpus Christi in Sacramento habet eandem quantitatem, & superficiem, quam in cælo, quia modo indiuisibili, & incircumscripto illam habet in Sacramento, & sic bene stat, quod sit eadem superficies, quia ex ipso modo existendi non diuiditur, neque discontinuatur, sed existit ad modum substantiæ in Sacramento sine vilo contactu ad alia corpora: & sic non currit argumentum contra modum existendi Sacramentalem, sicut contra modum

circumscriptiuum in duplici loco, quia non diuidit superficiem hoc ipso, quod non ponit illam modo diuisibili in alio loco. Nec oportet reducere explicationem huius mysterij ad eas angustias, quas paritur existentia in duplici loco circumscriptiuo, sit enim illud mysterium minus intelligibile precipue Philosophis, si intelligatur Corpus Christi ad modum corporis diuisi in duplici loco, aut si dependeat intelligentia huius mysterij a positione corporis in duplici loco circumscriptiuè; licet enim hoc videatur reddere magis intelligibilem existentiam duplicem corporis in calo, & in Sacramento, minus tamen intelligibilem reddat entitatem eiusdem corporis, quoniam duplicata circumscriptiōe discontinuatur.

Ad secundam instantiam respondetur, quod non est intelligibilis illa duplex ubicatio, & circumscriptio, sine discontinuatione, & diuisione quantitatis, quia nihil aliud est quantitatem diuidi, quam ita poni in loco, quod interponatur aliud corpus medium non continuatum cum illis extremis, sicut necessario sequitur posito corpore in illo duplici loco per modum contactus, & circumscriptiōis.

Ad tertiam instantiam dicitur, implicationem allatam non currere, si vnum corpus habeat duplicem quantitatem, idque videtur sentire D. Thom. quodlib. 3. art. 2. vbi ponit argumentum: *Quod dimensio panis posset conuertere in quantitatem Corporis Christi, sicut substantia panis in substantiam Corporis Christi.* Et respondet: *Quod si dimensio huius corporis conuerteretur in illam dimensionem alterius*
cor.

corporis, iam non erunt due dimensiones, sed una tantum; & sic non commensuraretur diuersis locis, sed vno tantum. Ergo à contrario sensu, si daretur duplex dimensio, non repugnaret commensurari duplici loco. Et sicut modò Corpus Christi mediante dimensione panis, cui alligatur, est in duplici loco, vno per se, idest per propriam dimensionem in caelo, altero per accidens, idest per alienam quantitatem in terra: ita si talis dimensio, vel alia similis, & eiusdem figuræ cum dimensione propria Corporis Christi, ei non alligaretur extrinsecè, sed per inhærentiam intrinsecam vniretur, non minus posset esse in duplici loco, altero per se, altero per accidens ratione illius duplicis quantitatis sibi inhærentis. An verò hoc sit possibile de potentia absoluta, vt duplex quantitas eidem corpori tribuatur per inhærentiam intrinsecam, non disputo in præfenti, neque in eo inuenio apertam repugnantiam, vt sicut alligatur aliena quantitas panis Corpori Christi, ita ei inhære possit alia similis figuræ, & extensionis cum sua propria; sed quod dicimus est, quòd. stante eadem quantitate, repugnat poni circumscriptiue in diuerso loco, quia hoc est idem ac diuidi; si tamen daretur duplex quantitas, nulla currit implicatio.

Omitto plures alias rationes ab inconuenienti deductas, in quibus soluendis valde laborant Authores oppositi; v. g. quòd si ponatur vnum corpus in duplici loco, poterit moueri idem corpus motibus contrarijs, & hic habere summum frigus si ponatur inter nites, ibi summum calorem, si inter ignes; hic occidere, vel

occidi, alibi non; hic fame perire, ibi saturari, & multa similia, quæ faciliè considerari possunt. Quæ absurda oppositi Authores ea distinctione solvunt, quòd illa accidentia, quæ dependent à loco; vt. moueri sursum, & deorsum flagellari, & percuti, & similia, ita conueniunt in vno loco, quòd non in alio. Quæ verò à locali distantia non pendent vt esse mortuum, & viuum, calidum & frigidum, si conueniunt in vno loco, conueniunt etiam in alio, quòd tamen in singulari explicare satis difficile est, præsertim cùm plura ex his quæ à loco non pendent, priuatiuè opponantur. Sed in hoc non facimus vim.

Ad primum fundamentum oppositæ sentent. respondetur, quando Christus Dominus apparuit Paulo, corporaliter quidem apparuisse, vt conuincit ratio S. Tho. aliàs non posset Paulus testis Resurrectionis esse, sicut alij Apostoli; si ipsum verum Christi Corpus non vidisset, sed si hæc apparitio facta est in aere (ex Scriptura enim non constat in aere vidisse Christum, vel in ipso cælo, sed solum lumen de cælo circumfulsisse eum) re vera descendit Corpus Christi de cælo. Nec oppositum ex illis auctoritatibus vlllo modo deducitur, solum enim probant Christum esse in cælo vsque ad diem iudicij tanquam in loco sibi debito ad gloriam & honorem, sicut Regi debetur thronus, non tamen, quia necesse sit semper ibi sedere, & nunquam moueri. Vndè notanter Scriptura dicit; *Quem oportet calum suscipere*; non tamen addit, quem oportet semper retinere. Et August. dicit: quòd sursum est Dominus, donec sæculum finiatur quantum ad habitationem

nem sibi debitam, non quantum ad alligatio-
nem localem, neque enim habet cælum pro
carcere, sed pro gloria, quæ nullo modo mi-
nuitur Beatis ex descensu Christi, quia æquè
benè videbunt corpus eius, etiam si descende-
ret ad hunc mundum inferiorem. De alijs ap-
paritionibus Christi non ita constat in proprio
corpore descendisse, sed secundum aliquam
apparitionem, aut per Angelum aliquem in
assumpto corpore. Si tamen verè aliquibus
apparuit in proprio corpore re vera ad illos
descendit. Præcipuè autem in Eucharistia
non videtur apparere Christus in proprio cor-
pore, sed formari ex aere circumstante corpus
aliquod in specie carnis, vel pueri, aut quid si-
mile, in quo apparet, ut constat ex D. Thom. 3.
p. q. 78. art. 8. Quòd si veller Christus Domi-
nus in Eucharistia demonstrare corpus proprium
in specie propria, id deberet fieri descenden-
do de cælo.

Ad secundum confas, in quo consistat impli-
catio existendi in duplici loco circumscriptivè,
quæ tamen non sequitur ex eo quòd sit Sacra-
mentaliter Christus in Eucharistia, & modo
quantitativè in cælo, inde enim non sequitur,
quòd sit sub duplici terminatione sibi adæqua-
ta in eodem genere circumscriptionis, sed sub
diuerso genere, & secūdum diuersum modum,
alterum diuisibilem, alterum induisibile, nec
resultat aliqua diuisio, & multiplicatio super-
ficiei, vel quantitatis in Corpore Christi, cum
in Sacramento non sit in loco per contactum
ad alia corpora, neque diuisibili modo & con-
sequenter neque talis separatio locorum facit
diuisionem, seu discontinuationem. Quando

verò instatur, quòd etiam non manebit diuisum illud corpus, si ibi maneret sub propria specie; negatur consèq. Et disparitas constat ex dictis, quia illa quantitas aliena non discontinuat, neque diuidit propriam, quia Christus est in cælo, cùm sit quantitas distincta. Si autem propria quantitas ibi ponatur modo circumscriptiuo, hoc ipso etiam ponitur modo diuisiuo, quia ponitur modo diuisibili secundum diuersam terminationem, & locationem, quod non potest stare sine discontinuatione quantitatis. Si verò modo indiuisibili in alio loco ponatur, non addit nouam terminationem, qua nouum contactum habeat, & consequenter neque discontinuationem, sed eandem superficiem, & quantitatem, sub modo indiuisibili ponit. Et licet discontinuatio illa sit quo ad locum, essentialiter tamen illi annexa est discontinuatio quantitatis, quæ consistit in duplici terminatione; diuisa autem quantitate diuiditur corpus, cuius indiuiduatio dependet ex designatione quantitatis, & in diuisione eius, tanquam ex conditione per se requisita, vt in libris de generat. dicitur. Sed tamen implicatio posita currit præsupposito quòd sit eadem quantitas in corpore existente in duplici loco, & non aliter.

Ad tertium resp. quòd quoad attinet ad primum exemplum, iam satis dictum est, quòd illa præsentia Sacramentalis non est præsentia propria corporis, sed diuersi generis, & ideo respectu illius non currit implicatio allata; neque enim diuidit quantitatem, vt dictum est.

Ad secundum exemplum dicimus non esse contra nos, quia si eidem corpori attribuatur

du-

duplex quantitas, non repugnabit esse in duplici loco sine diuisione eiusdem quantitatis, in quo consistit implicatio allata.

Ad tertium exemplum dicimus, quod personalitates diuinæ non habent oppositionem relatiuam nisi inter se, non respectu naturæ, quam terminant, vel assumunt; cum ex eadem perfectione, & eminentia proueniat in ipsis personis terminare alienam naturam: eodem enim modo persona Patris potest terminare humanitatem assumptam, sicut persona Filij. At verò diuersitas loci circumscriptiui discontinuat quantitatem, quia non potest aliter intelligi existentia in loco distanti, nisi cum discontinuatione quantitatis seu diuisione, cum qua non fiat identitas eiusdem quantitatis, quæ est implicatio allata.

Ad confirmationem respondet ex D. Tho. in 4. dist. 44. supra citata, ubi ponit idem argumentum, quod cum unitate loci extrinseci fiat diuersitas quantitatis; cum diuersitate verò loci non fiat unitas, eo quod sufficit ad discontinuandum, & diuidendum quantitatem discontinuatio loci, ut probatum est. At verò unitas loci non sufficit constituere unitatem quantitatis, si aliud subiectum, in quo est quantitas, non est vnum; accidentia enim maximè habent unitatem suam ex unitate subiecti, licet quantitas etiam dependeat ex unitate loci, siue qua discontinuatur, & diuiditur, quare unitas quantitatis dependet ex duobus, scilicet ex unitate subiecti, & loci, & quocumque sublato, soluitur unitas, quia malum ex quocumque defectu. Et ideo fiat benè cum diuersitate quantitatis penetratio, & existentia

gia in eodem loco, quia ob diuersum subiectum illa quantitas supponitur diuersa, non autem stat cum diuersitate loci circumscriptiua vnitas quantitatis, quia diuersa circumscriptio discontinuat.

QVÆSTIO XVII.

De vacuo.

ARTICVLVS I.

Verum vacuum naturaliter sit dabile?



Supponimus definitionem vacui traditam ab Aristot. in hoc lib. c. 7. *Quod sit locus non repletus corpore.* Quod autem aliqui addunt: *Aptus tamen replevi*, superfluit, vt benè notat Magist. Seco in præsentis q. 3. Nam hoc ipso, quod dicitur locus, aptitudo ad repletionem designatur. Et ideo in hac definitione non includitur vacuum negatiuum, quale est extra cælum, quia ibi non datur locus, idest, superficies aliqua non continens intra se aliud corpus. Exest tamen definiri, quod est spatium carens omni corpore, de quo D. Thom. 1. p. q. 46. art. 1. ad 8. vbi inquit: *Quod supra cælum nihil est, & ly supra designat locum imaginariū.*

Suppono secundo, vacuum negatiuum de facto dari, cum supra cælum nullum sit corpus,
cūm

cū ibi finiatur hoc vniuersum. Vacuum autem priuatiuum intra vniuersum non datur, ex ipsa inclinatione naturæ, eò quod tale vacuum impediret ordinem, & dispositionem corporum in vniuerso; quod constat corporibus ordinatè dispositis. Vacuum autem cum priuet corpore, ad nihil deseruit, nisi vt tollat istum ordinem, & ideò singula corpora toto impetu feruntur ad replendum vacuum etiam cum detrimento proprii loci, vt cum aqua ascendit per fistulam aere attracto. De potentia tamen absoluta Dei nulla est implicatio, quòd detur vacuum, quia potest annihilare, vel separare quodcumque corpus, & impedire, seu denegare concursum, ne aliud moueatur ad locum eius.

Difficultas ergo tota consistit. An detur aliqua virtus in rebus creatis, siue in corporibus, siue in spiritibus, ad faciendum vacuum contra inclinationem naturæ. Nam licet ex parte corporum plures afferantur experientiæ, quibus natura obsistit vacuo: non tamen ex hoc probatur nullam dari virtutem ad ponendum vacuum, licet prouidentia diuina id non permittat propter conseruationem vniuersi, sicut ex causis naturalibus potest generari tanta pluuia, vel ignis quòd destruat totam terram, si id prouidentia diuina permittat. Ad hæc, necessitas illa, & dependentia mundi sublunaris à cælesti, non ostendit in rerum natura non esse vim aliquam ad inducendum vacuum; tū quia hæc ratio non procedit in ipsis corporibus cælestibus, in quibus non est dependentia pro sui conseruatione ab influxu cæli: cur ergo saltem ibi non poterit dari vacuum? Tū secundo, quia non est certum, quòd de-

ficiente influxa cæli, etiam ad momentum statim peribit corpus inferius, & dato hoc, solum probatur non posse naturaliter fieri tale vacuum; quod totus mundus inferior priuaretur cælesti influxu. Quod verò pars aliqua mundi tali influxu careat, non est maius inconueniens, quàm quòd illa pars destruaturs; quotidie autem videmus partes vniuersi immutari, & corrumpi. Denique, licet videamus ista corpora inferiora tanto pondere inclinari ad impediendum vacuum, hoc tamen solum probat, non posse induci vacuum ab inferiori corpore, quod solum potest operari circa aliud corpus inferius, non tamen probat quòd à corpore cælesti; vel ab aliqua occultiore vi non possit vacuum induci.

De spiritali virtute maior est difficultas, eo quòd quantum, & quid possit virtus Angelica, valde nobis occultum est. Potest tamen aliquàlter fieri argumentum; tum quia Angeli mouent totum cælum, ergo à fortiori poterunt mouere totum elementum, & impedire, ne vnum corpus alteri succedat; tum etiam, quia virtus totius naturæ corporeæ ad replendum vacuum est finita; ergo poterit ab aliqua maiori etiam finita vinci, maior autem est spiritalis virtus, quàm corporea; ergo non repugnat, quòd totius naturæ spiritalis, ver. gr. omnium Angelorum virtus superet totam vim naturæ corporeæ ad replendum vacuum. Denique licet influentia cæli teratur per lineam rectam, & idè non possit transire posito vacuo, tamen poterit ab Angelo auferri illa influentia per lineam obliquam ad conseruandum corpus infra vacuum positum, & sic poterit contin-

tin-

emurati cum lationibus superioribus.

*Propter hæc multi affirmant posse virtute naturali saltem Angelica fieri vacuum, licet attento ordine vniuersi à Deo constituto contra illum ordinem non possit, non ex defectu potestatis, sed ex denegatione permissionis; sicut Angelus, qui cælum vertit ab Oriente in Occidentem, vim habet ad mouendum contrario modo ab Occidente in Orientem, quo casu totum mundum turbaret; & tamen supposito ordine à Deo constituto non potest Angelus id facere. Et sic intelligitur, quòd Scriptura dicit ad Hæbreos 2. *Quod Angelis non subiecisset Deus orbem terræ: & Job. 34. Quem constituit alium super terram: aut quem posuit super orbem, quem fabricatus est?* Id enim intelligitur ratione ordinis à Deo constituti, non ex defectu potestatis in Angelo. Ita tenent quidam suppresso nomine apud Conimbric. q. 3. de vacuo, art. 1. & in specie tenet P. Suar. disp. 35. Metaphysic. Martinez hic, & Cabero disput. 7. dub. 2.*

Nihilominus oppositum, & probabilius, & communius est. Et communiter hoc deduci solet ex ipsa dependentia, quam habent inferiora corpora ab influxu, & motu superiorum, qui communicari non poterit posito vacuo; quia deerit corpus in quo subiecerentur influentia cælestes. Cæterùm hæc ratio, licet deducatur ex Arist. 1. Meteor c. 2. non tamen est sufficiens; tum, quia solum probat in hoc mundo inferiori non posse dari vacuum, in quo est dependentia ab influentijs cælestibus, non absolute in toto vniuerso; tum, quia saltem post diem iudicii, quando cessabunt influentia, &

mq.

motus cæli, non repugnabit fieri vacuum etiam in hoc mundo inferiori. Aliunde ergo sumi potest ratio vniuersalior huius repugnantie propter præcipuum bonum vniuersi, quod consistit in ordine, & colligatione omnium partium eius, multò magis quàm bonum animalis in colligatione suarum partium; licet enim possit vnum corpus mutari de vno loco ad aliud, semper tamen subrogatur aliud corpus, quo manent illæ partes coordinatæ, & colligatæ: si verò nullum corpus succederet, sed relinqueretur vacuum, hoc ipso totus illæ ordo deficeret partibus laxis non colligatis, & si aliquod corpus illuc moueretur, & non repletet totum vacuum, maneret illud corpus separatum ab vniuerso, vtpotè disiunctum ab omnibus eius partibus. Sic ergo vacuum dissoluit præcipuum ordinem, & bonum vniuersi, quod ex partium colligatione dependet: & sic sicut materia nunquam potest manere sine forma, ita neque locus sine corpore.

Ex quibus deduco in natura corporea non esse vim ad faciendum vacuum. Patet, quia omnia corpora habent inclinationem ad conseruandum colligationem, & ordinem partium vniuersi, etiam contra peculiare ipsorum inclinationes ad propria loca. Ergo nullum corpus potest vacuum inducere. Patet consequentia, quia vel induceret illud ex virtute peculiari, & sibi propria, vel ex communi, qua inclinatur in bonum vniuersi. Non primum, quia omnis inclinatio particularis, & propria non potest vincere inclinationem communem, cum potius contra propriam inclinationem moueantur corpora ad tollendum vacuum.

Non

Non secundum, quia inclinatio communis non respicit destructionem, sed conseruationem illius; idem est autem facere vacuum, & facere contra bonum commune.

Deduco secundo. Neque vim Angelicam posse vacuum inducere. Sumitur ex D. Tho. 3 simili inq. 16. de malo art. 10. ad 8. ubi inquit. *Sicet demones possint mouere aliquam partem terre, non tamen totam terram; quia hoc non est proportionatum naturæ ipsorum, ut mutant ordinem elementorum mundi.* Cum ergo in inductione vacui, maximè ordo vniuersi, & elementorum mundi mutetur, non est id concedendum naturæ Angelicæ. Quæ ratio, ut poenitus explicetur, duo sunt aduertenda. Primum, quòd Angeli directè non possunt aliquid facere nisi motu locali, scilicet applicando actiua passiuus, ut probat S. Thom. eadem q. 16. de malo, art. 9. & 1. p. q. 110. art. 1. Vnde tantum poterunt immutare de ordine vniuersi, quantum ordo iste pendet ex motu locali, sicut si mouerent cælum motu opposito ad eum, qui nunc est, mutarent omnia, quæ ex isto motu dependent. Secundum est, quòd natura non solum resistit vacuo motu locali, sed etiam si opus sit rarefactione, aut condensatione, vel ut aliqui existimant vi attractiua, vel alijs modis sibi possibilibus. Ex hoc ergo deducitur, non posse Angelum facere vacuum, quia deberet impedire motus omnium corporum quæ ad illud impediendum concurrerent; ita quòd si corpus proximum non posset impedire vacuum, distans ad id moueretur, & si non posset motu locali, conaretur motu rarefactionis, vel condensationis, aut alioquo-
cum.

cumque. Omnes autem istos motus Angelus non potest impedire, quia vel impediret propria virtute, & directè, vel applicando actiua passiuis. Non primo modo, cum solum possit motu locali operari circa corpora, non alijs modis alterationis, quibus etiam natura vitur ad resistendum vacuo. Non secundo modo, quia actiua & passiuæ, quæ potest applicare Angelus, sunt corpora, quæ neque virtute propria, neque communi possunt ad vacuum operari. Si autem Angelus remoueret omnia corpora, quæ possunt vacuum impedire, deberet totum vniuersum remouere, quia omnia corpora ad impediendum vacuum concurrerent.

Ex quibus rationes dubitandi solvuntur. Dicimus enim ad primas, quod non possunt corpora etiam ex æltia præcipuum vniuersi ordinem immutare: neque diluuium vniuersale ex sola stellarum dispositione provenire, sed etiam diluuium virtute operante, qua sapientia sunt omnes fontes Abyssis, ut dicitur Genes. 6. Et de vltima conflagratione mundi dicit D. Th. q. 6. de potentia art. 6. ad vltimum: Quod non provenit ex aliqua naturali causa, sed provenit ex imperio divine voluntatis; & videri etiam potest in 4. dist. 46. q. 2. art. 1. q. 3. Et tamen maior resistentia est ad vacuum, quam ad diluuium, vel conflagrationem; quia in vacuo dissolvitur substantialis colligatio partium vniuersi, ad quam omnia corpora concurrunt etiam contra proprias inclinationes; in diluvio vero, vel conflagratione vnum corpus succedit alteri in loco.

Ad alias rationes ex parte virtutis Angelicæ

respond. probare, quod Angeli poterunt vincere motus peculiare, quorumcumque corporum erga locum: sed non probant, quod possint vincere omnes motus etiam alterationis, & refractionis, & omnes alios, quibus tota natura resistit vacuo. Et licet non sit virtus infinita illa, qua resistitur vacuo, tamen virtus, quae nunc est in vniuerso, non potest illam finitam virtutem vincere, quia non potest immutare substantialem colligationem, & ordinem vniuersi, siue motu locali, siue alijs motibus, vt explicatum est.

Argumenta, quae solent fieri ad probandum vacuum naturaliter esse possibile intra hoc vniuersum, facilia sunt. *Primum*, quia duo corpora perfecte plana sine villo medio se tangunt; ergo si simul totaliter separentur, non poterit in illo primo instanti totus aer occupare illud spatium intermedium, cum per motum intret. Ergo saltem breui aliqua mora dabitur vacuum. *Secundum*, si vas plenum aqua calida, & vndique occlusum exponatur frigori, congelabitur aqua, cum totum vas penetretur frigore: ergo contrahitur illa aqua congelata, ergo cum vas sit occlusum manebit aliquod vacuum.

Denique, natura non mouetur ad replendum vacuum violenter, sic enim non ferretur in illud tanto impetu nullo extrinsecus mouente. Neque naturaliter, quia fertur contra propriam inclinationem & bonum, quod est maxime appetibile; quia vt dicit Philos. 8. Ethic. cap. 2. Amabile quidem est bonum, maxime autem proprium; contra proprium, ergo bonum non potest aliquid, nisi violenter feri.

Ad primum respondetur, illa duo corpora non posse instantaneè disiungi, aut copulari, sed oportet dare locum corpori ingredienti, aut recedenti, quod fit per motum, sicut nec lacera follium possunt auelli, si foramen est occlusum, nisi vel aperiatur, vel rumpantur latera follium. Neque obstat, quòd corpus planum eadens super aliud planum nimis ponderosum sit, v. g. moles ferrea, detinebitur enim vi totius naturæ, ne in instanti coniungatur alteri plano quousq; interclusus aer exire possit, quod fiet in breuissimo tempore.

Ad secundum respondetur, in eo casu, vel aquam non congelandam, vel vas rumpendum si aer nullo modo ingredi possit, vel aquæ euaporatione generari. Et illa fractio vasis incipiet per partem debiliorem, vel ubi maius frigus incumbit. Quòd si ex omni parte vas sit æquale, & frigus circumstans etiam æquale, vel non congelabitur aqua resistente natura, ne detur vacuum, vel ad primam causam pertinebit determinare, qua parte vas rumpendum sit.

Ad ultimum diximus supra, q. 9. art. 4. motum illum ad supplendum vacuum esse naturalem, & ex ipsamet gravitate posse procedere, quatenus est pars vniuersi, quod est non esse naturalem absolute, sed respectu totius vniuersi, & supposita eius exigentia, sicut enim ad conseruationem terræ gravitas inclinatur deorsum; sic propter conseruationem totius, & consequenter ipsius terræ, ut pars totius inclinabitur terra, & eius gravitas ad ascendendum sursum vehementiori impetu. Et sicut in animali videmus eleuationem pedis esse naturalem,

lem, secundum formam animæ, non secundum rationem corporis, ut docet Aristot. 8. Physic. tex. 27. & ibi D. Tho. lect. 7. ita motus ad sup-
plendum vacuum est simpliciter naturalis re-
spectu boni communis. Quando autem dicit
Arist. bonum proprium maxime esse amabile,
comparauit bonum cum bono priuato alterius,
non cum bono communi, quia hoc etiam per-
tinet ad ipsam rem: neque est bonum extra-
neum, seu alienum, cum maxime ab ipso pen-
deat conseruatio proprij.

ARTICVLVS II.

Verum corpus in vacuo possit moueri?

Difficultas potest sumi, vel ex intrinseca
ratione ipsius motus, qui non potest in
vacuo acquirere terminum, vel ex aliquo ex-
trinseco, quia posito vacuo deficiet influentia
cæli, à qua dependet omnis motus corporis
inferioris. In presenti loquimur de motu in
vacuo absolutè, & quantum est ex natura mo-
tus, non attenda dependentia ab extrinseco,
quæ vel potest suppleri à Deo, vel non cur-
rit, nisi in corporibus inferioribus, vel non
nisi durante hoc statu rerum, non cessante mo-
tu cæli.

Resolutio ergo nostra est. Non repugnare
motum in vacuo, absolutè loquendo, licet ex-
tra vniuersum non fiat motus naturalis à gra-
uitate, vel leuitate. Hæc sine dubio est sen-
tentia D. Tho. nam 3. p. q. 57. art. 4. ad 2. docet,
*Corpus Christi Domini esse extra totam conti-
nentiam celestium corporum, & non esse in loco*
con-

continente. Et quodlib. 6. art. 3. docet: *Quod nihil prohibet Angelum, & corpus gloriosum esse in connexo cæli Empirei; quia nō dependent ista corpora à primo continente, quod est cælum.* Vbi pondero S. Thom. non restrinxisse modum existendi Corporis Christi in cælo ad hoc, quod tangat superficiem ultimam cæli aliqua parte corporis, sed absolutè dicit, quod est extra totam continentiam cæli. Et saltem aliquæ partes corporis Christi, vt caput, & brachia, extra continentiam cæli sunt, etiam dato, quod pedibus tangat ultimam superficiem; ab illa enim tunc nō circumferibitur, & sic non erit locus: sed illuc peruenit Christus per motum localem, quod scilicet ascendit super omnes cælos. Ergo aliquas partes corporis sui mouit per illud spatium, quod est extra cælum, quod est vacuum negatiuum. Denique in 4. Physicor. lect. 11. circa finem, dicit D. Tho. *Quod in vacuo non moueretur aliquid motu proijcientis, nisi quamdiu veheretur à manu proijcientis, sed statim emissum à manu caderet.* Ergo sentit, quod daretur aliquis motus in vacuo absolutè loquendo.

Deinde constat vltimum corpus in sentent. Philosoph. & absolutè loquendo posse moueri; constat autem, quod superficies vltimi corporis non est in loco, cum ultra illud non sit aliud corpus ambiens; ergo motus in vacuo dari potest. Denique nulla est repugnancia ad motum in vacuo, nam ex parte corporum datur potentia motiua, præsertim si sit viuens: similiter datur aliquis terminus, quem acquirat, potest enim approximare, vel recedere ab aliquo alio corpore posito etiam in vacuo: & sine

dubio si Deus annihilaret corpora sublunaria, & relinqueret ignem in terra, ille ascenderet; tùm ad conseruandum se in loco proprio iuxta cælum; tùm ad replendum vacuum; ergo moueretur per illud. Quòd verò Aristot. in 8. cap. huius lib. probauerit, non dari vacuum, quia in eo non potest dari motus, non absolutè id Philosophi docet, sed ad hominem arguit eos, qui dicebant impediri motum, si spatium esset plenum; contra quos probat, quòd vacuum potius impedit motum, saltem naturalem, & projectionis, quia tunc non dabitur locus determinatus, ad quem feratur, vt quiescat, sed in infinitum mouebitur, sed non probat de omni motu in vacuo, v.g. qui fieret, si poneretur vacuum intra hoc vniuersum ad replendum illud, vel qui posset fieri etiam extra cælum per motum progressiuum, aut motum vltimi corporis. An verò sequeretur fieri motum in instanti, si daretur vacuum, statim dicemus.

Contra hanc tamen resolutionem obijcies primò. Nàm motus localis solum terminatur ad vbi, quod est modus intrinsecus proueniens ab extrinseco circumscribente; sed in vacuo nullum datur circumscribens; ergo neque aliquid vbi circumscriptum, & consequenter neque motus corporeus qui solum vbi circumscriptum, & corporeum potest producere. Et præsertim hoc vrgetur in sentent. D. Tho. 1. p. q. 110. art. 3. vbi dicit: *Quòd mobile secundum locum non est in potentia ad aliquid intrinsecum in quantum huiusmodi, sed ad aliquid extrinsecum, scilicet locum.* Ergo cum in vacuo nullus sit locus extrinsecus, non dabitur motus in illo. Si dicas motum in vacuo non esse ad locum, sed

sed circa locum, quatenus potest acquirere distantiam, vel approximationem ad aliud corpus. Contra hoc est, quia talis approximatio, vel distantia non est ubi positium, cum careat omni circumscriptione, & consequenter non est terminus positivus motus: neque enim remoto ubi apparet, quid acquiratur per motum proprium. Et deinde, si omnia corpora essent annihilata à Deo præter unum tantum, illud non posset acquirere distantiam, vel approximationem positivam, quæ est respectu alterius corporis: ergo saltem tunc nihil positium erit acquirendum per motum, & sic non movebitur illud corpus.

Secundò; si daretur motus in vacuo, sequeretur quòd esset in instanti, atque adeò destrueretur ipsa ratio successivi, quò argumento utitur Arist. in hoc lib. contra veteres. Sequela probatur, quia mobile ideò consumit tempus, quia medium illi resistit, quantò enim medium est subtilius, tantò motus est velocior: ergo remoto omni medio, nulla erit resistentia, & sic nullum tempus consumeretur, sicut lux in instanti illuminat, quia nihil ei resistit; & generatio substantialis fit in instanti, quia omnis resistentia contrarij per dispositionem ablata est. Tum, quia aliàs duo corpora inæqualis gravitatis, ut moles terrea, & granum milij mouerentur eodem tempore per vacuum, ideò enim aliquid velocius mouetur, quia facilius scindit ipsum medium: ergo ubi nullum est medium, æquè facilè vtrumque movebitur.

Tersio, est difficultas, quia in vacuo neque fit motus naturaliter, neque violenter, neque per impulsum, neque progressivè; ergo nullo
mo.

modo. Non esset naturalis, quia motus naturalis tendit sursum vel deorsum propter sui conservationem, in vacuo autem non est positio aliqua sursum, vel deorsum, neque virtus conservandi in vna parte magis, quàm in alia. Non violentus, quia motus violentus opponitur naturali, & declinat ab illo: ergo vbi non potest dari motus naturalis, neque violentus. Non per impulsum; quia res proiecta ideò fertur per impulsum; quia aer concitatus impulsu defert & sustentat projectum ne cadat: sed in vacuo non est aer, neque aliud corpus: ergo projectum non potest deferri per vacuum. Denique non datur motus progressivus ea generali ratione, quia si corpus occupat spatium in vacuo, hoc ipso quòd recedit ab illo spatio, relinquit illud vacuum, & sic naturaliter faceret vacuum per motum.

Ultimò, magis liber est à loco spiritus, quàm corpus, sed spiritus non moueretur in vacuo; ergo neque corpus. Minor probatur quia spiritus mouetur acquirendo vbi spirituale, quod resultat non ex passiva circumscriptione, sed ex operatione suæ virtutis, vel applicatione ad operandum, v. docet D. Thom. 1. p. q. 52. & communiter Thomistæ; sed in vacuo non potest operari circa aliquid; ergo nullum vbi potest acquirere, neque aliquem terminum motus.

Ad primum respondetur, motum in vacuo posse acquirere vbi, & si non actualiter, & formaliter circumscriptivum, virtualiter tamen, vel inadæquatè, seu reductivè. Dupliciter enim potest intelligi vacuum, & motus in illo. Vno modo, ita quòd vacuum fiat intra hoc universum, & licèt tollatur superficies immediate

diatè ambiens, non tamen tollatur ipsa superficies primi locantis, scilicet cæli, sub quo moueri potest corpus, licet non immediatè circumscribatur, sed sit in vacuo. Et sic motus in tali vacuo factus acquirit vbi circumscriptiuium circumscriptione mediata, & superiori, quia licet non acquirat locum formalem, idest adæquatum, & immediatè circumscribentem se, acquirit tamen locum mediatè circumscribentem; & hoc vocamus vbi virtualiter circumscriptiuium. Alio modo potest moueri aliquid in vacuo, quod est extra totum vniuersum, & tunc non potest acquirere vbi prout dicit circumscriptionem locantis mediatam, vel immediatam, sed solum potest acquirere rationem aliquam distantiae, vel propinquitatis respectu alterius corporis à quo recedit, vel cui appropinquat. Neque enim motus localis est solum ad locum, vt dicit Dion. Thom. opusc. 52 sed etiam circa locum.

Nunc autem colligimus, quòd ad motum localem non solum pertinet acquirere vbi, quod simpliciter, & perfectè circumscriptiuium sit, sed etiam, quod imperfectè vel inadæquatè, & solum reductiuè sit vbi circumscriptiuium. Illud dici ur vbi adæquatè, & perfectè, in quo inueniuntur omnes conditiones ad vbi circumscriptiuium requisitæ: illud verò inadæquatè, & imperfectè, in quo non reperiuntur omnes, sed aliquæ tantum. Requirit autem vbi circumscriptiuium duas condiciones. Altera est, quòd detur aliquod corpus extrinsecum circumscribens: Altera, quòd detur aliqua distantia, vel propinquitas respectu alicuius termini fixi, & immobilis. Neque enim sola cir-

circūdatio corporis extrinseci sufficit ad locum ; hoc enim etiam inuenitur in vase respectu eius quod continet , & in veste respectu eius , quod circūdat , & neutrum est locus , quia cum ipso mobili defertur , non acquiritur , vel relinquitur . Ratione verò distantie habet locus id , quod proprium est loci , scilicet diuersam situationem , vel distantiam acquirere , & aliam relinquere ; & hæc non defertur cum ipso mobili , quando mouetur , & ideo vocatur immobilis . Remoto ergo corpore circūscribente in vacuo . potest manere ordo propinquatis , vel distantie ad aliud corpus circa quod , vel penes quod moueatur aliquod corpus . Et hoc est acquirere vbi inæquatè , seu quantum ad aliquid , & non quantum ad omnia , idest non quantum ad circūscriptionem , sed quantum ad distantiam ; & dicimus , acquiri etiam aliquem modum , qui sit reduciue , & imperfectè vbi , quando sic mouetur aliquid in vacuo , quia relatio distantie , vel propinquitatis non potest immediatè fundari in ipso corpore mobili , quia indifferens est ad hanc , vel illam distantiam , vel propinquitatem , & sic requirit aliquem modum , seu determinationem de nouo aduenientem , in quo ista diuersa relatio fundetur , vel mutetur . Quod ex eo etiam dari colligimus , quia cælum est in potentia ad vbi , & non ad esse , vt ex Philosopho docet S. Tho. & videri potest in 2. dist. 1. q. 1. a. 1. 5. ad 8. secundo loco , & tamen vbi ultimi cæli non est circūscriptum adæquatè . Et licet in ipso spatio vacuo distantia positiua non sit , potest tamen in ipso corpore , quod mouetur in vacuo positiua distantia fieri .

dari respectu alterius corporis, à quo recedit, vel appropinquat & sic positiuè moueri. Quòd si nullum aliud corpus sit creatum à Deo, nisi tantum vnum in spatio imaginario, tale corpus non poterit moueri motu locali positiuo, quia tollitur omnis differentia locorum, sicut etiam sentiunt Conimbricenses hic q. 4. ar. 2. §. *Ad rationes*. Sed hoc est per accidens, quia deest materia circa quam producatu'r vbi, siue perfectum, siue imperfectum, sicut ignis defectu materiae non alterabit, neque generabit. Et sic etiam saluamus dictum D. Tho. quòd motus localis semper est ad extrinsecum, idest vel ad extrinsecum distans, aut propinquum; semper tamen supponendo quòd producatu'r aliquis modus intrinsecus ipsi mobili, erga tale extrinsecum, & hoc vocatur vbi; & sic patet ad omnes replicas primæ obiectionis.


Ad secundum, negatur seq. ex D. Tho. in 4. dist. 44 q. 2. art. 3. q. 3. ad secundum, vbi docet, quòd resistentia non sumitur solum ex parte medij ad motum, sed etiam ex parte mobilis ad mouens & ex parte locorum inter se, quia cum distantiam aliquam habeant, quæ est sicut contrarietas positiua, illa non potest vinci in instanti, sed in tempore. Rationes autem Philosophi in cap. 8. huius libri, solum procedunt contra aliquos, qui totam resistentiam motus ponebant ex parte medij; sic enim sublato omni medio tollebatur omnis ratio resistentiæ. Constat tamen non inde solum oriri resistentiam, vel distantiam tempore vincendam, vt patet tum in ipso cælo, in quo non est resistentia ad motum ex parte medij, & tamen consumitur tempus; tum etiam, quia si à cælo usque

vsque ad terram esset vacuum, & moueretur lapis vnus palmi, si vnico instanti moueretur à cælo ad terram, in eodem instanti esset præsens simul cælo, & terræ, & intermediæ distantia, cum tamen solum sit vnus palmi; si autem in diuerso instanti est in cælo, & in terra, iam mouetur in tempore, quia inter duo instantia est tempus medium. Et sic patet ad rationes in contrarium: neque enim tota ratio resistentiæ, aut maior facilitas se mouendi, est ratione medijs, quod resistit, licet inde sumatur aliqua pars resistentiæ; sed sumitur etiam ex ipsa distantia loco um, & maior, vel minor facilitas motus ex maiori pondere, vel virtute mouentis.

Ad tertium respondetur, quod extra cælum non esset motus naturalis ratione grauitatis; vel leuitatis, quia ibi non datur centrum, seu locus naturalis conseruatiuus, ad quem inclinant istæ virtutes, & consequenter neque dabitur motus violentus illi oppositus. Poterit tamen dari motus progressiuus, sicut in Corpore Christi ascendente vltra cælum, vel etiam per impulsu impressu ipsi corpori, non aeri deferenti. Quod ve.ò tunc ex motu corporis relinquatur vacuum, non obstat, quia hoc non est facere vacuum remouendo corpora ne illud repleant, sed super vacuum iam præsuppositum mutare distantiam propriam.

Ad vltimum respondetur, quod D. Thomas illo quodlibet 6. supra citato docet, Angelum, posse esse in conuexo cæli Empirei, sicut corpus gloriosum, quod vltra cælum moueri potest. Quid autem Angelus acquirat in illo vacuo dependet ex diuersis sententijs, quomodo Angelus sit in loco, & quid sit vbi spiritus

tuale, quod non pertinet ad Physicum, sed ad Theologum. In sententia Diu. Tho. quod Angelus est in loco per ubi in se receptum, mediante tamen contactu non formali, qui est per quantitatem, sed virtuali, qui est per operationem, quatenus potest extra se agere erga corpus, sicut anima informare materiam; dicendum est, quod Angelus in vacuo poterit moueri ad aliquod corpus, quod sit distans à se motu discreto non transeundo per medium, quia non datur aliquod corpus cui assistat, & quod operatione sua continuata tangat. Si autem nullum sit corpus in rerum natura, moueri non poterit, sicut nec esse in loco operatiuè, quod tamen est per accidens ex defectu materie circa quam operetur, sicut anima remoto corpore non potest informare. Nec tamen potest Angelus in vacuo acquirere distantiam, vel propinquitatem, sicut corpus, quod mouetur per vacuum, eò quod Angelus non potest fundare distantiam positiuam immediatè in se, cum careat omni occupatione loci, & diuisibilitate, sed solum potest fundare illam mediatè; idest mediante corpore cui assistit.



QVÆSTIO XVIII. ¹⁷³

De Tempore.

ARTICVLVS I;

*Verum tempus sit aliquid reale in genere
mensura durationis.*



Errum est nomine temporis communiter intelligi aliquid pertinens ad durationem earum rerum, quæ mutatione, & successione durant. Vnde aliquando sumitur tempus largiori significatione pro duratione intrinseca cuiuscumque motus, vt docet D. Tho. in 2. dist. 12. q. 1. art. 4. ad 3. & 1. p. q. 85. art. 4. ad 1. & alibi sæpè. Strictius autem, & proprius sumitur tempus pro duratione motus magis uniformis, & regularis, sub quo cæteri continentur, & quo regulantur, & hoc est tempus extrinsecum respectu motuum inferiorum, licet intrinsecum respectu primi motus.

De tali ergo tempore agimus in præsentì, de quo supponimus, quòd est continuum in se, sicut & ipse motus in quo inuenitur, continuus est, & successiuus. Ad mensurandum autem per illud aliquem motum, vtimur illo per modum numerationis discretæ, quæ numeratio solùm intellectu fit, eò quòd non potest res successiua accommodari ad mensurandum per numerationem, nisi coniungantur partes illæ successiue, quarum vna transit, & iam non est, & alia est transitura, & nondum

est : & sic indiget intellectu comparante & as-
sumente illas per modum vnius . Et rursus,
quia continuum est , & successuum , constat
partibus copulatis per indiuisibilia etiam suc-
cessiua , & transeuntia , quæ vocantur instantia,
& correspondent indiuisibilibus motus , quæ di-
cuntur mutata esse . Datur tamen tempus di-
scetum , quod est duplex ; aliud corporale,
quod non est aliud , quàm duratio motus inter-
rupta ; aliud spirituale , quod non est aliud ,
quàm pluralitas operationum , quarum quæli-
bet indiuisibiliter durat in se , quia successiua
non est , & hoc modo datur tempus in operatio-
nibus Angelorum , de quo nihil ad præsens .

¶ *U*rgo quidditas temporis clarius explicet-
ur , tria disputanda sunt . *Primum* , quid sit du-
ratio , quæ pertinet quasi ad genus ipsius tem-
poris , & applicata ad motum constabit de spe-
cifica eius ratione , duratio enim iuxta natu-
ram rei durantis variatur . *Secundum* , an tem-
pus dependeat ab aliquo rationis , vt constitua-
tur in suo esse mensuræ . *Tertium* , tandem id
quod pertinet ad eius differentiam ; quomodo
distingatur ab alijs durationibus , v. g. æter-
nitate , æuo , & alijs similibus , quæ sunt du-
rationes permanentes .

¶ *P*rima ergo difficultas inquit de ipsa ra-
tione durationis in communi . Et suppono ex
Logica , q. 19. quod duratio in communi non
est idem , quod prædicamentum *quando* , vt ali-
qui existimarunt , ita quod complectatur etiam
durationes permanentes , & indiuisibiles . Sed
tamen *quando* solum est modus relictus ex ad-
iacentia temporis , sicut vbi ex circumscriptione
corporis . Vnde differentia ipsius , *quando*
de-

desumuntur penes differentias successiuas, ut heri, hodie, cras, &c. Vbi autem duratio est permanens, & immutabilis, non est *quando*, sed *semper*. Aliud ergo est durare, aliud est in ipsa duratione quandari, seu diuersis mensuris successiuæ durationis distingui.

Igitur duratio in communi accepta nihil est aliud, quam persistencia in existendo. Sumitur ex D.Tho. qui in 1. dist. 19 q. 1. art. 1. inquit: *Quod omnis duratio attenditur secundum quod aliquid est in actu, tandiu enim res durare dicitur, tandiu in actu est, & nondum est in potentia.* Et aliqui existimant in primo instanti nondum dari durationem, quia nondum est continuatio, & perseverantia in esse. Alij verò è contra etiam in primo instanti dicunt dari durationem; sunt enim aliqua, quæ dicuntur durare tantum per instans, & sic mensuratur instanti eorum duratio. Veritas tamen est, quod in primo instanti res dicitur durare inchoatiuè, incipit enim tunc duratio, consummatur autem in ipsa continuatione existentiae, quæ sequitur post instans.

Hinc autem maior nascitur dubitatio, an duratio aliquid addat super existentiam, tanquam modus, & formalitas eius. Multi enim durationem non distinguunt realiter ab existentia, sicut neq; existentiam ab essentia. Ita Suar. disp. 50. Metaph. sect. 1. & 2. Vazq. 1. p. dis. 33. c. 3. n. 18. Cabero hic dis. 4. dub. 3. Martinus in præsentia in 2. notab. qui existimat rem, se ipsa, esse durationem, sed non per se, & ex se, sicut etiam dicitur de existentia, & sic consequenter duratio non distinguitur à re durante. Fundamentum est; tum quia duratio, & existentia non pos-

sunt separari, implicat enim rem existere actu, & non durare; ergo sunt idem realiter: tàm, quia duratio vel superaddit existentiae aliquid extrinsecum, vel intrinsecum. Non extrinsecum, quia duratio debet intrinsecè denominare, sicut existentia, quod enim extrinsecè tantum durat, intrinsecè desinit, vel si non desinit intrinsecè durat. Si addit aliquid intrinsecum, oportet quòd illud de nouo producat; ergo durare, seu continuare esse est idem, quod de nouo produci, & sic non dicetur res durare per continuationem primæ productionis, sed per nouam productionem, qua recipit aliquid intrinsecum de nouo. Et illud intrinsecum, quòd recipit, vel seruit pro toto tempore, quo res durabit, vel solùm pro quolibet instanti, seu tempore de præsenti. Si primum, sequitur quòd qui modò recipit durationem iam in se habet durationem cras futuram, quia accipit durationem pro toto tempore, quo durat. Si secundum, tot erunt durationes nouæ, quot instantia, & sic duratio fiet per distinctas productiones, non per continuationem eiusdem.

Opposita sententia defenditur ab alijs Authoribus, vt Magistro Banez 1. p. q. 8. art. 4. & ab alijs, qui videri possunt apud Carmelitanos hic disp. 21. q. 3. Fundamentum est, quia duratio accedit existentiae; contingenter enim aliquid durat, cùm possit quolibet instanti desinere; imò & separatur existentia à duratione, nam in primo instanti aliquid existit, sed nondum durat, quia nondum continuatur, sine continuatione autem existentiae duratio non est. Ergo non minus debet distingui duratio

ratio ab existentia, quàm existentia ab essentia. Item motus, & tempus se habent vt duratio, & res durans, distinguuntur autem realiter, siquidem potest dari paruo tempore multum de motu, vel è contra; ergo duratio aliquid addit supra rem, quæ durat.

Nihilominus dicendum est, quòd in rebus permanentibus duratio non addit super existentiam aliquid intrinsecum, sed est idem cum existentia; & solum addit extrinsecam connotationem, & dependentiam ab actione continuante, & influente ipsum esse. In rebus autem successivis, quia duratio fit per novarum partium effluxum, consequenter duratio fit per superadditionem existentia, ad existentiam. Prima pars constat ex probatione adducta, quia alias non sufficeret ad durationem continuatio eiusdem actionis, sed requireretur semper nova productio, & tamen dicitur duratio accidentalis ipsi existentia accidentaliitate extrinseca, quatenus dependet à continuatione talis actionis, quæ suspendi potest. Et quantò magis dependet conservatio alicuius rei à pluribus causis, quæ possunt deficere, tantò defectibilior est duratio, & mutabilior; ideòque Angeli, & cælestes dicuntur incorruptibiles, quia in ordine ad causas creatas non est à quo debeant in sui conservatione. Sic ergo, cum duratio attendatur in aliqua re secundum quòd est in acta, & tandià aliquid durat, tandià existit, vt dicit D. Tho. dist. 19. citata, consequenter duratio ad existentiam pertinet, & posita continuatione existentia sine alia nova productione sufficienter dicitur res durare, sicut continuata luce à Sole dicitur ea-

dem illuminatio permanere. Ergo duratio non requirit aliquid de nouo productum, sed sufficit quòd idem continetur. Et ipsa continuatio, quia dependens est, & contingens, cum suspendi possit, reddit durationem contingentem.

Secunda verò pars constat, quia res successiue dicuntur durare ratione continui fluxus, quatenus vna pars definit, & alia incipit; ergo duratio ibi importat additionem de nouo ad priorem existentiam, seu inceptionem rei successiue. Sed tamen, sicut partes successiue, addunt nouam durationem, ita & nouam existentiam, ad existentiam præcedentium, sicque tota existentia successiua non distinguitur à tota duratione, sed pars à parte, quod non contingit in duratione indiuisibili rei permanentis.

Ex quibus colligitur, quomodo tempus distinguatur à motu. Nam si loquamur de tempore cæli respectu motuum inferiorum, quos extrinsecè mensurat, clarè constat, quòd distinguatur ab illis realiter. Si verò loquamur de tempore respectu motus, in quo est intrinsecè, sic distinguitur, sicut duratio à re durante, quæ in motu, cum successiua sit, non fit per continuationem eiusdem indiuisibilis existentie, sed per continuatam additionem vnius partis ad aliam, vt dictum est. Et hac ratione motus dicitur durare paucò tempore, vel multo, non quidem respectu temporis ipsi motui intrinseco, hic enim motus in duratione adæquatur tempore sibi intrinseco, sed comparatiue ad tempus extrinsecum mensurans, dicitur enim velox motus, quando multum spatij con-

consumit pauco tempore, & tardus è conuerso qui coexistit paruo tempori in decurrendo multum spatij, ipsa autem duratio intrinseca motus non est maior, nec minor, quàm motus ipse.

Ad rationes dubitandi allatas à principio patet ex dictis. Fundamenta enim primæ sent. probant, durationem non distingui intrinsecè ab existentia, sed esse eius continuationem, dependentem tamen ab actione extrinseca continuante, & ratione huius, qui recipit existentiam hodie, nondum recipit durationem cras futuram, quia duratio crastina importat existentiam non absolutè, sed cum illa continuatione, quæ erit cras, quæ hodiè nondum habetur. Fundamenta verò secundæ sententiæ probant durationem distingui ab existentia, eique accidere, non ratione alicuius intrinsecè superadditi existentie permanenti, sed ratione continuationis dependentis ab actione extrinseca, ratione cuius contingenter conuenit duratio existentie, & separari ab illa potest, quatenus desinere potest, non quia seorsim existentia, & duratio consistere possint.

Secunda difficultas.

PEtit an tempus simpliciter & absolutè sit aliquid reale, vel aliquid rationis? Huius difficultatis resolutio plenius constabit ex his, quæ seq. art. circa existentiam temporis tractanda sunt. Interim dico, tempus esse aliquid reale secundum entitatem suam, eo modo, quo motus cuius duratio intrinseca est, requirit tamen aliquam formalitatem rationis in ordine

ad mensurandum, quia non potest mensurare nisi coniungantur aliqua partes, & designentur, ac distinguantur per numeros, quod fieri non potest designatione aliqua reali, sed rationis comparante, & assumente partem praeteritam cum futura. Hæc est contra aliquos ex Antiquis, qui dixerunt tempus esse ens rationis absolutè, quos refutat D. Tho. opusc. 44. cap. 1. quibus aliqui recentiores videntur adhærere, ut Perer. lib. 12. Physic. c. 13. & ex parte Vazq. 1. p. disput. 34. cap. 2. ubi dicit, quod tempus aut est ens rationis, aut eo completur, scilicet relatione mensuræ in motu. Nos tamen dicimus, tempus neque entitativè esse aliquid rationis, neque formaliter consistere in relatione mensuræ; dicit enim Aristot. in hoc lib. text. 99. *Quod tempus est idem cum motu in re, licet consequatur ipsum secundum prius, & posterius*, & text. 131. inquirens, an tempus sit aliquid extra animam dicit; *Quod est ipsum prius, posterius motus, licet sit hec, ut numerabilia*. Quod exponens D. Thom. ibi, sect. 23. inquit: *Quod tempus est utrumque ens sine anima, sicut contingit motum esse sine anima; sicut enim ponitur motus, ita necesse est poni tempus. Dependet tamen in numeratione ab anima, quia motus non habet esse fixum in rebus, neque aliquid actu assumi potest de ipso, nisi aliquid indivisibile præsens & sic totalis motus non accipitur, nisi per considerationem nostram comparantem partem priorem posteriori*. Et in 1. dist. 19. q. 5. art. 1. inquit: *Quod tempus habet fundamentum in motu scilicet prius & posterius iostius motus, sed quantum ad id, quod est formale in tempore, scilicet numeratio, completur*

pletur per operationem intellectus numerantis.
 Ergo in se tempus non est aliquid rationis, sicut neque partes ipsæ, secundum prius, & posterius. Relatio autem mensuræ non est ipsum tempus, sed fundamentum huius relationis. Est enim tempus id, quo mensuramus, sicut pannum mensuramus vlna, & triticum modio, & tamen vlna, & modium non sunt relationes, sed fundant relationes mensuræ. Videri etiam potest D.Tho. 1. p.q.10. art.5. & opus. 44. cap. 1. Constatque explicatio huius ex dictis, quia tempus dicit aliquid successivum, ut mensurans. Eas autem successuum à partē rei datur, & à parte rei durat successivè, aliàs non duraret motus in re; sed tamen hoc ipso quòd successivum est, non possunt colligi eius partes, & applicari, nisi per actum rationis; sicut si partes vlnæ essent dispersæ, & oporteret eas colligere, ut componeretur vlna ad mensurandum. Sic ergo per actum animæ tempus habet duo, quæ ad rationem mensuræ requiruntur, scilicet simultaneum, seu collectionem partium, quæ in re fluunt, & solum per operationem animæ colliguntur, in re enim simul non existunt. Secundum est applicatio talis mensuræ ad id, quod mensuratur. Et sic dicit S.Tho. lect. 23. citat. *Quòd ipsa totalitas motus accipitur per considerationem animæ comparantis prius, & posterius, idest ipsa simultas, & collectio partium in motu, & eius duratione, quæ applicanda est alicui ad mensurandum.*

Quod si objicias, D.Thom. in 2. dist. 12. q. 1. art. 5. ad 2. dicentem: Quòd locus est idem per essentiam, quod superficies corporis locatis, tempus autem non est idem numero, cum aliquo accidens.

cidente in substantia fundato. Ergo entitatiuè tempus non est aliquid reale, sicut locus. Philosoph. etiam in hoc lib. c. vltimò dicit, quòd tempus ita pendet ab anima, quòd si non esset anima, non esset tempus; ergo sentit, quòd tempus quantum ad suum esse, & non solum quantum ad suam formalitatem numerationis dependet ab anima. *Respondetur*, quòd quando D. Thom. dicit tempus non esse idem numero cum aliquo accidente fundato in substantia, intelligitur de accidente permanente, & fixo. Id enim significat ly fundatum, locus autem est idem cum superficie, quæ est aliquid permanens, non tamen negat tempus esse idem cum aliquo successiuo, & transeunte. *Ad Philosoph.* respondetur, quòd dubitatiuè dicit tempus non posse esse sine anima, quia numerus non est sine numerante: resolutiuè autem dicit, quòd tempus vtrumque est ens sine anima, idest imperfectè, vt explicat D. Th. & per modum successionis fluentis. Reliqua, quæ circa hanc difficultatem possunt adduci, seq. artic. dicemus.

Tertia difficultas.

Inquirit, quomodo distinguatur ratio temporis, à reliquis durationibus permanentibus. De quo videri potest S Thom. 1. p. q. 10. art. 5. & opusc. 44. cap. 4. Et supponimus measuras permanentis, & indiuisibilis durationis esse duas, scilicet æternitatem, & æuum, inter quas est quædam mensura media, quæ vocatur modus æternitatis. Æternitas definitur à Theologis ex Boetio, quòd est *interminabilis vite*

vita tota simul & perfecta possessio, vel vt alijs verbis dicamus, *est duratio mensurans esse omnino immutabile, tam in esse, quàm in operatione*. Vtrumque enim designatur nomine vitæ; dicitur autem possessio, quia in æternitate nihil expectatur, vt futurum, sed totum est in possessione. Aeuum est duratio mensurans rem immutabilem secundum esse, & mutabilem secundum operationem, & talis est, quæ mensurat esse Angeli, & cæli, & cuiuscumque rei incorruptibilis. Modus æternitatis est mensura rei supernaturalis, præcipuè visionis beatificæ, & amoris, quia illa visio eleuat intellectum ad operandum modo immutabili, quia variationem non recipit, in quo excedit æuum, quod recipit mutabilitatem in operatione. Videndus est D. Th. loco cit. ex 1. sent. dist. 19. vbi distinguit istas mensuras secundum quod aliquid plus, vel minus habens de potentialitate, & mutabilitate, quia aliquis actus inuenitur purificatus ab omni potentialitate, & talis est Deus, mensuraturque æternitate, quæ omni caret mutatione. Alius autem est actus admixtus potentia, scilicet creatura: & hoc dupliciter, quædam enim potentia est totaliter completa per suam actum; quia statim habet totum suum esse, licet non totam operationem, & talia mensurantur æuo. Quædam verò non habent completè totam actualitatem suam, sed successiue acquirunt, & talia mensurantur tempore.

Ex dictis patet, quod æuum non solum excludit successionem prioris, & posterioris, sed etiam rationem innouationis; quod aliqui male distinxerunt, vt refert S. Tho. in 2. dist. 2. qu. 1. art. 1, & 1. p. q. 10. art. 5, & quodlib. 10.

art. 4.

Art. 4. quia vbi cumque est prius & posterius, oportet intelligere, quod partes priores, & posteriores non sint simul, alioquin vna non esset prior, & alia posterior; ergo oportet, quod posterius adueniat de nouo, & id quod est prius transeat, quod est habere innouationem vnus, & veterationem alterius; & sic non inuenitur successio sine innouatione, neque cum vnica & indiuisibili existentia, sicut res permanens, sed cum tot quot sunt instantia transeuntia, vt seq. art. dicemus. Neque est simile de radio, qui continuò exit à Sole sine innouatione aliqua; nam etiam exit sine successione, quia illuminatio non est motus. Quare æuum orani successione caret formaliter, & omni etiam innouatione in sua substantia. Potest tamen concedi in æuo aliqua successio virtualis, & extrinseca. Tùm quia habet durationem ita dependentem, quod potest modo desinere, & potuit etiam non incipisse, quando incipit, sicut si Deus vellet modò creare vnum Angelum, sicut creat animas, aut si vellet annihilare illum, Angelus, qui modò crearetur, minus durasset, quàm Angelus ab initio mundi creatus; & qui modò annihilaretur minus etiam duraret, quàm qui non annihilaretur; sed hoc plus, vel minus durationis non est ratione alicuius successionis intrinsecæ, sed ratione extrinsecæ dependentiæ, à causa libere conseruante, ratione cuius etiam Angelus hodie durans nondum durauit cras, quia potest cras annihilari: Tùm etiã quia habet extrinsecè successionem, quatenus non simul coexistit omnibus partibus temporis succedentis, sed secundùm earum mutationem, licet in se sit

sit aliquid fixum , & non transiens , sed tamen propter limitationem suam non omnibus simul coexistit , sed expectat res , quæ succedunt . sicut arbor fixa in fluuio non coexistit simul omnibus partibus aquæ fluentis , sed coexistit illis secundum successionem , non suam , quæ fixa est , sed aquæ , quæ illi aduenit : & sic expectat illas , vt illis possit coexistere . At verò æternitas propter suam infinitatem , & immutabilitatem non solum in essendo , sed etiam in mensurando etiam caret ista successione extrinseca , & non expectat res successiuas , vt fluant , & tunc illi coexistant , sed immutabiliter eas continet antequam mutabiliter in se existant per modum superioris mensuræ , à qua deriuantur ; sicut si esset arbor tantæ magnitudinis , quæ occuparet totam aquam fluuij , simul omnibus partibus coexisteret , licet illæ succederent inter se . Sed hæc ad Theologos remittimus , qui speculantur æterna .

Ex dictis deducitur integra definitio temporis tradita à Philosopho , scilicet , quod *tempus est numerus motus secundum prius & posterius* . Dicitur numerus , & non duratio , quia definitur tempus , prout est mensura cæterorum . Intelligitur autem de numero numerato , idest existente in ipso motu secundum partes successiuas , quæ sunt priores , & posteriores . Sed tamen si tempus sit discretum , habet istas partes actualiter diuisas , & interruptas in re , si autem sit continuum , non habet illas diuisas in re , sed solum per intellectum cum diuisione , aut simultate acceptas . Et ita licet tempus definiatur per numerum , tamen ex parte rei numeratæ continuitatem habet in re ratione motus ,

motus, vt aduertit S. Tho. in hoc lib. lect. 17. & in 1. dist. 37. q. 4. art. 3. & ita solum habet numerum fundamentaliter, & virtualiter, sicut dicimus, quod hoc lignum habet decem vlnas, non quia habet illas diuisas actu, sed quia potest in illas diuidi, vnde malè aliqui explicant rationem numeri in tempore per modum aggregationis, & multitudinis, quia aggregatio, & multitudo importat actuale diuisionem, sine qua partes non aggregantur, sed continuantur. Tempus ergo est numerus aggregatione partium, sed continuatione.

ARTICVLVS II.

Utrum realis existentia temporis solum inueniatur in instanti, vel etiam in alijs partibus?

VNa ex rationibus quam Philosophus obiecit in hoc lib. tex. 88. ad probandum non dari tempus est, quia componitur ex partibus, quæ non sunt, nam cum sint fluentes, & successiuæ, quæcumque pars componitur ex parte, quæ transit, & parte, quæ transitura est. Ergo nulla pars, vt pars realiter existit, sed solum instans. Ex alia verò parte difficillimè intelligitur, quod partes vt partes sint præteritæ, nisi aliquando extiterint. Et hoc non inuenitur in instanti, quia partes non proportionantur durationi indiuisibili, alias partes eius essent simul idest in instanti. Nec minus difficile intelligitur, quomodo instans reddat existentem partem futuram, cum potius supponat illam non existentem, idest non præ-

sen.

sentem. Ergo existentia instantis non afficit illam intrinsecè, sed extrinsecè, extrinsecè autem existere, est non existere realiter.

Propter hoc diuisi sunt Authores in hac parte, quidam enim existimant, partes temporis non solum existere ratione instantis, sed ratione propriæ existentia diuisibilis, & fluentis, sicut partes ipsæ fluentes sunt. De quo videri possunt Conimbr. hic q. 1. art. 4. P. Suar. disp. 30. Metaph. sect. 9. nu. 22. Rubio, Martinez, & alij plures secuti Durandum in 2. dist. 2. q. 4. & explicant hoc dicendo, quod licet ens successuum includat negationem simultatis partium, quia non possunt omnes esse præsentis, sed quædam præteritæ, & quædam futuræ: dantur tamen partes prætereuntes, & quatenus realiter fiunt & transeunt, componitur ex illis ens successuum.

Alij verò tenent tempus in facto esse, & præsentialiter solum existere ratione instantis, illas verò partes prætereuntes non esse aliud, quàm ipsam successionem, seu fieri secundum partem præteritam, & futuram, ut copulantur instanti, quod reddit utramque præsentem suo modo, idest successiuè. Tenent hanc sententiam plures ex antiquis, & videri potest M. Soto 4. Phys. q. 4. Tolet. q. 11. Carmelitan. disd. 21. q. 8. & alij. Et videtur esse D. Tho. qui oppusc. 44. cap. 1. sic inquit: *Intelligendum est, quod esse successiuorum consistit in hoc, quod existant secundum aliquid indiuisibile sui, quod manifestari potest, quia qualibet pars cuiuslibet successui diuisibilis est in diuersas partes. Si ergo aliquid successuum existeret, non solum secundum aliquid indiuisibile sui, sed*
secun-

secundum aliquam partem, sequeretur, quod multæ partes alicuius successiui simul essent, quod est contra rationem successiuorum. Idem docet in hoc lib. 4. lect. 23. dum inquit: Quod non inuenitur aliquid ætæ in rebus de motu, nisi quoddam indiuisibile motus, quod est motus diuisio, sed totalitas motus accipitur per considerationem animi comparantis priorem dispositionem mobilis ad posteriorem. Sic igitur tempus non habet esse extra animum, nisi secundum suum indiuisibile. Quid clarius? & 1. p. q. 66. art. 4. ad 3. nihil (inquit) est accipere in ætæ de tempore, nisi nunc. Idemque habet quæst. 46. art. 3. ad 3.

Denique sumitur fundamentum huius sententiae ex ipsa natura successiui, & ex modo mensurandi temporis. Natura enim successiui postulat ut nulla pars simul existat cum alia. Ergo postulat taliter existere, quod vna pars non sit, sed transierit, altera verò futura sit; ergo postulat quod non existant ratione sui, & ut transeuntes sunt, sed solum ratione instantis; & hoc est existere fluenter, & non permanenter. Existere enim fluenter est taliter existere, quod vna pars non coexistat alteri, sed quod vna pars fluxerit, & alia fluxura sit: si autem partes non coexistunt inter se, ergo totum diuisibile, quod non est aliud quam illæ partes quibus componitur non habet existentiam diuisibilem, cum non coexistant ea in quæ diuiditur. Si autem dicatur, quod coexistunt successiue non permanenter. Contra est, quia hoc successiue destruit veram & realem coexistentiam, quia pars quæ transit, verè non est; Ergo verè non coexistit parti futu-

re, ergo ex illis non coalescit vera existentia diuisibilis totius, quia non habet veram coexistentiam partium, hoc ipso quod successiuum est; solum ergo existit ratione indiuisibilis. Ipsa etiam ratio temporis id manifestat. Est enim numerus motus secundum prius & posterius, id autem est prius, quod transiit, & id posterius, quod sequens, seu venturum est; nam si esset praesens, iam non esset post, sed de facto nunc. Ergo mensurabile a tempore solum est duratio praeterita, & futura, nulla vero praesens, quia praesens non est diuisibile in prius, & posterius, nam hoc ipso quod est prius, non est praesens, sed praeteritum, & posterius est futurum, non praesens.

Ut autem intelligatur solutio argumentorum, quorum tota difficultas in eo consistit, quomodo possint partes esse reales, & realiter transire, si nunquam realiter existunt, nisi per aliquid a se distinctum, quod est instans: quomodo etiam possit instans copulare realiter partes praeteritas, & futuras, aduertendum est, quod natura motus cum sit actus entis in potentia, est idem quod fieri, ut tendit ad factum esse, & sic partes diuisibiles successiuae se habent sicut fieri, & instans, seu mutatum esse sicut ipsum factum esse talium partium, & sic ista indiuisibilia sunt aliquid ipsarum partium, sicut terminus, & factum esse illarum. Cum ergo existentia constituat rem in facto esse, non in fieri, si partes motus se habent in fieri, & solum indiuisibile in facto esse, consequenter omnes illae partes dicuntur existere ratione indiuisibilis, quo terminatur earum fieri, & redditur factum esse transeunter; & sic partes fluunt.

fluentes secundum se, non existunt simpliciter; sed per modum fieri, quod tendit ad existentiam in facto esse tantum datur in instanti. Unde ita implicat partes existere ratione sui, & non solum ratione instantis, sicut repugnat aliquid dum est in fieri, habere existentiam, quae est in facto esse. Et dicuntur partes ipsae transire realiter; tum quia transit earum fieri adueniente instanti; tum quia etiam ipsum instans, quod est terminus earum, transit.

Quod vero dicantur illae partes reales, & realiter copulari per instans, ideò est, quia partes sunt in fieri, & tendentia ad factum esse; & ratione sui sunt reales in fieri, quod est existere in tendentia; ratione verò termini in facto esse, quod est simpliciter existere: quod autem, neque ratione sui, neque ratione termini, neque in fieri, neque in facto esse existit, nihil reale est. Non repugnat autem vnum existere per aliud, quando vtrumque ordinatur ad idem esse; sicut materia per formam, & partes per totum, & motus per terminum, ut supra diximus qu. 7. Et similiter partes copulantur per instans, non sicut partes permanentes, quae uniuntur, ut coexistent, sed sicut successivae, quae uniuntur, ut transeant, inchoando vnam partem, & terminando aliam, & ita unio successiuorum non requirit existentiam extremorum in facto esse, sicut unio permanentium, neque vnam tantum existentiam habent, sed quodlibet instans suam, eo quod vnum est, & aliud definit esse.

Ex quibus patet responsio ad rationes dubitandi à principio: Dicimus enim partes posse esse praeteritas in facto esse ratione instantis

præ-

præteriti ; in fieri verò, & fluxu ratione sui. Et quando instatur , quòd prætereunt ratione sui, ergo extiterunt ratione sui. Negatur consequentia loquendo de existentia propria , quæ est in facto esse : prætereunt enim ratione ipsius fieri, seu fluxus, quod adueniente facto esse transit , & sic extiterunt in fieri ratione sui, & in facto esse ratione sui termini .

Ad secundam instantiam respondetur , quòd instans reddit existen em partem futuram initiatiuè , quia ab illo instanti incipit , sed consummatiue redditur existens alio instanti terminatiuo , & hoc instans est extrinsecum parti fluenti entitatiue , sed non terminatiue : sine instanti verò pars fluens existit solùm in fieri, non in facto esse, nisi cum terminatur . Vnde cum vrgetur , quòd existentia extrinseca non potest reddere aliquid existens . Distinguo, quod est omnino extrinsecum , ita quòd nec sit vnum , nec vnitum illi , saltem vt terminus, transeat, quod non est omninò extrinsecum, sed vnitum, vel terminans , & aliquid eius saltem per modum termini , nego . Sic enim potest aliquid existere per aliquid sibi non identificatum , sed communicatum realiter , sibi que coniunctum , sicut materia per formam, humana natura per Verbum , vt suprà latiùs diximus ; & tamen intrinsecè denominantur existere , quia forma realiter communicata etiam intrinsecè denominat .

Adhuc tamen instabis , existentia cuiuscunque rei non distinguitur ab illa nisi ad summum , vt modus ; ergo existentia instantis non potest modificare partes. , cùm differat ab illis realiter . Item existentia instantis est indiuisibilis,

bilis, existentia verò partium est diuisibilis, sicut & ipsa entitas earum. Ergo existentia instantis non seruit pro partibus, neque illis est proportionata, sicut neque existentia Angeli, quæ est indiuisibilis, lapidi, qui est quantus. Item vel pars futura, & præterita habent aliam existentiam, quàm instantis vel non. Si non, ergo posito instanti est actu pars præterita & futura, atque adeò iam non est futura, neque præterita, sed præsens, quia tota earum existentia præsens est: ubi autem est existentia, dat effectum suum formalem, quod est reddere existens, & sic si est existentia præteriti, & futuri, reddit existens præteritum, & futurum. Ergo non transit præteritum, nec deest futurum, quia vtriusque existentia præsens est. Si verò habet aliam existentiam, ratione cuius dicitur futura, vel præterita aliqua pars; ergo illa existentia nondum est in instanti, sed immediatè post erit, vel immediatè ante fuit, quod est esse existentiam diuisibilem.

Ad primum respondetur, existentiam vnius, ut quo posse conuenire omnibus quæ illi communicant, & mediante quo participant existentiam, quæ si est modus, non est modus efficiens tantum vnâ partem, sed ipsum totum, quod est subiectum adæquatum illius, licet conueniat mediante aliquo tanquam principio quo, sicut figura est modus totius quantitatis, & non vnius partis tantum, licet median-
tibus partibus conueniat. Sic ergo ratione instantis partes successiuæ participant existentiam, quia instans est aliquid illarum tanquam terminus, quo successiuè terminantur in facto esse, sicut materia, & ipsum

totum existunt mediante forma.

Ad secundum dicimus existentiam instantis esse formaliter indiuisibilem, virtualiter autem & terminatiue diuisibilem, sicut & ipsum instans, licet sit indiuisibile terminat partes, & sicut anima indiuisibilis informat corpus: imò omnis existentia, & subsistentia, quia terminus est, simplex & indiuisibilis est, licet virtualiter diuisibilis, & ut quò, ut supra q. 7. diximus. Existentia autem Angeli, nec virtualiter diuisibilis est, & sic non seruit pro lapide.

Ad ultimum dicitur, quòd pars præterita & futura non habent aliam existentiam in facto esse, nisi instantis in quo successiue terminantur, & sic terminatiue sunt præsentès: habent tamen secundum se existentiam in fieri, quæ non est existentia simpliciter, & secundum hanc transit præterita, & nondum est futura, ratione verò instantis initiatiue est futura, & consummatiue est præterita, & sic transeunt de instanti ad instans, sicut existentia iniatiua ad consummatum: nunquam autem simul existunt completè, & adæquatè, sed inchoatiue vna, & terminatiue altera. Et hic est modus proprius existendi rei successiue, cuius existentia in facto esse non debet aspicere omnes partes adæquatè, & omni modo, sed ratione sui termini, in quo transeunter consummanur, & ratione cuius sunt in facto esse, licet pereant in ratione fieri, nam ut diximus supra in q. 14. entitas motus non est alia, quàm entitas termini, quodlibet autem instans, seu mutatum esse se habet ut terminus saltem medius, & inadæquatus partis immediatè præteritæ, & sic est ibi pars entitatiue, sicut in suo

termino. Nunquam ergo existunt simul pars praeterita, & futura in facto esse, & consummative, sed futura initiative, & praeterita consummative, quod non est inconueniens, hoc enim potius est non simul esse.

ARTICULVS III.

Quod sit subiectum intrinsecum, & extrinsecum temporis

VOcamus subiectum intrinsecum illud, cui tempus inhaeret tanquam duratio motus, extrinsecum autem illud, quod subijcitur tempori, & ab eo mensuratur extrinsecè. Et de primo inquirimus duo. Primò. An subiectum temporis sit primum mobile, seu primus motus? Secundò. An sit vnicum tantum tempus? Et circa subiectum extrinsecum; an non solum ipse motus, sed etiam ipsa substantia mutabilis mensuretur tempore?

Dico ergo primò, tempus sumptum strictè pro mensura regulari motus, subiectiuè est in primo motu, & ibi habet rationem mensurae intrinsecæ respectu sui, & extrinsecæ respectu aliorum motuum. Prima pars constat ex D. Tho. & Arist. hoc lib. lect. 23. & 1. p. q. 10. ar. 6. & in 2. dist. 12. q. 1. art. 5. ad 3. Constat enim, quòd inter omnes motus vniformior, & regularior est primus motus cæli; & est minus deficiens, & simpliciter notior, quia quotidie voluitur, ergo duratio in illo existens est mensura cæterorum. Verum tamen est; quod ad distinguendum, & memoriae commendandum ipsum tempus, & motum cæli, vtimur quibusdam

dati signis, ut horologiis, scripturis, vel alijs similibus, quibus designamus annos, & menses, non quod ista sint tempus, sed instrumenta, quibus tempus designamus.

Secunda verò pars ab aliquibus negatur, eò quod mensura debet esse notior mensurato, motus autem, & tempus sunt idem: ergo tempus non potest esse mensura motus in quo est. Item, quia motus non habet aliam quantitatem à tempore. Ergo non est mensura illius, quia mensura est id, quo cognoscitur quantitas rei; ubi est ergo eadem quantitas, non potest esse id, quo cognoscitur tanquam notiori. Eandem sententiam generaliter docet Pater Vazquez 1. p. disp. 31. cap. 5. de omni mensura intrinseca, quia nulla mensura intrinseca, ut quantitas respectu substantiæ est causa, ut res illa nobis notior fiat, neque Arist. aliud docuit, nisi quod mensura debet esse homogenea cum re, quam mensurat, quia intelligit unam magnitudinem esse mensuram alterius: & sic substantia non subijcitur propriæ durationi ut mensuræ, sed ratione propriæ durationis subijcitur alteri durationi ut mensuranti. In summa, mensura debet esse eiusdem generis cum mensurato, accidens autem respectu proprii subiecti non est eiusdem generis.

Res ista fortassè solum in verbis pugnat. Certum tamen est multa, quæ notificant alia, etiam notificare se ipsa, & mensurare, & similiter subiectum in quo sunt, quia mediante illo redditur notius, & manifestius, quod aliàs sine tali forma, vel perfectione ignotum maneret, sicut videmus, quod lux non solum manifestat colorem, sed etiam se ipsam, & subiectum in quo

est. Similiter quantitas se ipsam ordinat, & situat in loco, & partes substantiæ, quæ sine ipsa manerent confusæ, & non solum manifestat, & mensurat, id, cui extrinsecus adiungitur per contactum. Et idem est de duratione, quando est vniformior, & indefectibilior. Ergo nihil prohibet, id appellare mensuram intrinsecam, seu formalem, denotando in ly intrinsecam, quòd non mensurat per applicationem sui ad alterum, sed per informationem, qua rem ipsam reddit formaliter ordinatam, aut notificatam. Et sic loquitur in pluribus locis S. Tho. Nam in 2. dist. 2. q. 1. art. 2. ad 1. inquit: *Quòd mensura est duplex, quedam intrinseca, quæ est in mensurato, sicut accidens in subiecto, quedam extrinseca, & hanc non est necesse multiplicari ad multiplicationem mensuratorum.* Et q. 1. de vetit. art. 5. *Mensuratur, inquit, corpus mensura intrinseca, sicut linea, vel superficie, vel profunditate; & mensura extrinseca, sicut locatum loco, & motus tempore, & pannus vlna.* Ratio autem illorum est, quia hoc ipso, quòd subiectum subiiciatur accidenti, redditur illi proportionatum, & commensuratum secundum intrinsecam informationem. Ergo inuenitur ibi quidquid requiritur ad rationem mensuræ, & mensuranti, quia tale accidens ordinat & manifestat rem ipsam vt quo, subiectum autem proportionatur, & notificatur illo, non vt mensurante & notificante quod, sed quo.

Ad fundamenta opposita resp. Ad primum, quòd tempus & motus sunt idem entitatiuè, & materialiter, non formaliter, seu modaliter, & ideo tempus habet mensurare vt quo, motus

Etis autem redditur mensuratum, ut *quod*, recipit enim illam uniformitatem à tempore. Sufficit autem ad mensuram, quòd sit uniformior, & notior ut *quo*. Ad secundum dicitur, quòd licet mensura sit id, quo cognoscitur quantum, non tamen est necesse, quòd præsupponatur quantum per aliam formam, sed quòd ipsa mensura quantum reddatur, & sic notificetur: & sic licet tempus non addat nouam quantitatem ad motum, reddit tamen illam uniformem, & mensuratam intrinsecè, idest recipientem uniformitatem mensuræ, & per illam se notificantem, tanquam per rationem & principium *quo*, quod in alijs fit per applicationem extrinsecam.

Ad fundamentum Patris Pazquez respond. quòd mensura debet esse notior mensurato, sed sufficit, quòd sit notior ut *quo*, etiam si non ut *quod*; & sic mensura intrinseca respectu eius in quo recipitur, est notior ut *quo*, respectu verò eius cui applicatur ut extrinseco, est uniformior, & notior ut *quod*. Nequè Arist. oppositum huius docuit, quia esse mensuram homogeneam mensurato potest intelligi vel ut *quo*, vel ut *quod*, & respectu subiecti recipientis est homogenea ut *quo*, scilicet id, quò tale subiectum redditur homogeneum, & uniforme alteri extrinseco, respectu cuius est homogeneum ut *quod*. Denique, quòd dicitur debere mensuram esse eiusdem generis cum mensurato, intelligitur vel secundum proportionem, vel secundum similitudinem, quæ enim participant idem genus, & continentur sub illo dicuntur eiusdem generis per similitudinem, & conuenientiam. Quòd autem recipit, &

informatur ab aliquo, dicitur illius generis per proportionem, quia est capax, & proportionatum illi, quod recipit, & ab eo, ut à principio quo, reducitur ad tale genus participatiuè, non formaliter.

Dico secundo, tempus largè sumptum pro cuiuscumque motus duratione est subiectiuè in quocumque motu, & multiplicatur ad multiplicationem motus, subordinatur tamen primo tempori, quod est mensura cæterorum. Constat hoc ex pluribus locis S. Thom. ubi distinguit tempus propriè dictum, quod est in motu cæli à tempore largè accepto, quod est in quocumque motu, ut art. 1. retulimus. Hoc enim tempus non est aliud, quàm duratio cuiuscumque motus habentis prius, & posterius in successione partium; duratio autem est in re da ante sicut existentia, ergo subiectiuè est in tali motu. Quod autem subordinetur talis duratio, seu tempus primo motui, & tempori patet; tum quia omnis motus inferior dependet à primo motu cæli; tum, quia respicit illum, ut maximè regularem, & consequenter per illum mensurari potest. Et hoc modo intelligitur Aug. 10. confess. cap. 32. cum dicit: *Motum cæli non esse tempus, quia cum tempore Iosue cessauit ille motus, Sol stabat, sed tempus ibat*; loquitur enim de tempore communiter dicto pro cuiuscumque motus duratione, non pro illo, quod est maximè regulare, quod solum est in motu cæli.

Dico tertio, tempus sumptum pro duratione regularissima mensurante cæteros motus est tantum unum numero, sicut & motus regularissimus unus tantum est. Constat hoc ex
di.

dictis; deduciturq; ex Philof. in hoc lib. c. 14. ubi expresse ponit unitatem temporis propter unitatem primi motus. Et asseritur à Diu. Th. 1. p. p. q. 10. art. 6. & in 2. sent. dist. 12. q. 1. art. 5. ad 3 & alibi sæpè; constat enim, quòd primus motus cæteris vniformior, & à quo cæteri dependent est tantùm vnus. Quòd autem sæpius recurrât eadem tempora, vt ver, æstas, &c. quæ non sunt eadem numero, sed specie, non obstat; quia effectus veris, & æstatis sunt diuersi in hoc anno, & in præcedenti, sed circulationes sunt continuæ, & motus non interruptus, & propter talem unitatem, dicitur etiam tempus vnum, & motus vnus, licet ex multis circulationibus componatur. Addit autem D. Thom. etiam in rebus incorruptibilibus dari vnum æuum propter unitatem primi Angeli, qui cæteris est simplicior, & vniformior, vt affirmat quodlib. 5. ar. 7. & 1. p. q. 10. art. 6. & in 2. dist. 2. q. 1. art. 2. Quòd tamen intelligitur non solùm de ratione mensuræ secundùm maiorem dignitatem, sed secundùm vniformiorem mensurationem quantum est ex parte sua, & respectu perfectè cognoscentis, non respectu nostri, qui imperfectè cognoscimus, sic enim nihil nobis notificat æuum superioris Angeli de mēsuris inferioribus, quia æquè nobis ignotum est, atque ipsæ durationes inferiores, sed tamen ad rationem mensuræ secundùm se, non requiritur quòd sit notior quoad nos, & secundùm imperfectionem nostræ cognitionis; hoc enim solùm requireretur, vt sit mensura nobis deseruiens, sed sufficit, quòd ex parte sua & respectu modi perfectè cognoscendi sit vniformius altero, & notificatiuum illius. Sic

autem est mensura æuum supremi Angeli, quia est duratio simplicior tam in se, quam ut est radix suarum operationum præsertim primæ, v.g. qua Angelus se intelligit, quæ etiam mensuratur æuo quia nunquam cessat. Quod si in hac patitur aliquam difformitatem, Angelus, non subiugando illam Deo qui est summa simplicitas, ut fecit Lucifer, amittit esse primam regulam æuiternorum propter obliquitatem operationis æuiternæ ut non subiectæ, ut docet S. Thom. quodlib. 5. art. 7. Mensurat autem æuum cæteras durationes rerum incorruptibilium, etiam si sint corpora cælestia, quia licet differant in genere naturæ, conueniunt tamen in ratione durationis incorruptibilis, ut ait S. Tho. 1. p. q. 10. art. 6. ad 2.

Circa subiectum extrinsecum, quod est mensurabile à tempore, constat certò apud omnes ipsum motum esse mensurabilem à tempore, & mediante motu etiam ipsum subiectum motus, quod est substantia mobilis. Dubium verò est an ipsa substantia corruptibilis immediate in se, & non solum ratione motus sit mensurabilis tempore? Nam ex vna parte eius substantia non est successiua, sed permanens; & sic non proportionatur illi tempus, quod est successiuum. Ex alia verò parte non apparet, quæ mensura sit illi assignanda: nam æuum est mensura rei incorruptibilis, quod non conuenit substantiæ corruptibili: tempus autem est mensura successiua, quod etiam rei permanenti non conuenit. Unde Authores, qui sentiunt non mensurari tempore substantiam corruptibilem, ut Scotus in 2. dist. 2. qu. 2. & Conimbricen. hic q. 3. art. 3. & Suarez disp. 50. Metaph. sect. 7. & alij;

& alij; tamen disconueniunt in assignanda mensura illi conuenienti, nam quidam affirmant esse ipsum æuum suauendo illud lato modo pro mensura non solum rei incorruptibilis, sed etiam rei permanentis. Alij assignant instantem temporis discreti; alij modum æui; alij denique etiam mensuram innominatam: nihilominus circa hoc.

- Dico ultimo; substantia rei corruptibilis secundum conceptum substantiæ non est mensurabilis tempore, neque alia mensura, sed in quantum habet quantitatem durationis: & non solum ut actu est mota, sed etiam ut mobilis, seu corruptibilis actu tamen quiescens, & permanens mensuratur ipso tempore. Hæc est mens Arist. & D. Tho. ut videri potest 4. Phys. text. 118. & 119. & ibi D. Tho. lect. 21. cuius verba sunt: *Tempus mensurat id, quod mouetur, & quiescit, non in quantum est lapis, vel homo, sed in quantum est motum. & quiescens: mensuratio enim propriè debetur quantitati. Cuius ergo quantitas tempore mensuratur, illud propriè tempore mensuratur. Ex mensuratione autem temporis, cognoscitur quantum sit motus, & quanta sit quies; non autem quantum sit illud, quod mouetur. Vnde, quod mouetur simpliciter, non mensuratur tempore, & secundum propriam quantitatem, sed secundum quantitatem sui motus. Ex quo patet, quod propriè tempus sit mensura motus, & quietis, sed per se motus, quietis autem per accidens. Sic dicit D. Thom. nec vnquam oppositum docuit, nam 1. p. q. 10. art. 4. aperte tribuit mensuram temporis non solum motui, sed etiam subiecto mutabili. In opusc. autem 44. cap. 3. solum dicit: *Quod mo-*
*bilis**

hilia quantum ad id, quod sunt, sicut homo aut lapis non mensuratur tempore, quia essentia eorum non habet prius & posterius. Quod etiam verum est, nec aliud dicit, quam in 4. Physic. citato, quia videlicet res mobiles secundum conceptum substantiæ non mensurantur tempore: bene tamen secundum durationem mutabilem, licet non actu motam.


Et ratio est, quia idem est quies quod permanentia; cum illud dicatur quiescere, quod se habet nunc sicut antea. Eadem ergo est mensura rei permanentis, ut permanens est, & rei quiescentis. Quies autem rei mutabilis mensuratur tempore; ergo & ipsa substantia corruptibilis, non ut substantia, sed in quantum durans, & permanens in quiete, mutabili tamen, & corruptibili subijcietur tempori. Et præsertim hoc apparet in substantijs, quæ etiam in ipsa substantia mutantur per augmentum, vel decrementum, aut aggenerationem, tales enim etiam in ipsa substantiæ duratione subijciuntur tempori. Quæ verò non sic mutantur, tamen quia mutari possunt, & dependent in sua duratione à causis transmutabilibus, dicuntur mensurari tempore, etiam si actu non mutantur, sed quiescant.

Ex quo patet, ad rationem dubitandi à principio, dicimus enim, quod res permanens, licet actu & formaliter non sit successiva, est tamen radicaliter, & extrinsecè, eò quod ex sua radice petit posse mutari, & corrumpi; & pendet à causis mutabilibus. Et sic quando dicitur, quod in sua duratione est permanens, & idem, distinguo, permanens ratione immutabilitatis, seu ex oppositione ad motum, nego. ex causa

con-

conferuante in illa permanentiam, & quietem, cum potentia tamen ut mutetur, concedo; sed hoc est mensurari tempore, sicut quies, quam constat mensurari tempore, tanquam quid oppositum motui, sicut dicit Philosoph. in cap. 12. huius libri, & ipsa experientia constat.

Quod si dicas, quomodo ergo Arist. & D. Th. dicunt manere idem nunc in toto tempore, quia manet idem mobile, si secundum hanc resolutionem etiam mobile mensuratur tempore, & non mensuratur nunc? *Respond.* Manere idem nunc, non quia sit vetum instans, aut res ipsa solum instanti mensuretur, sed quia est mobile permanens, sed permanencia est duplex, alia quietis priuatiue, quæ scilicet est capax mutari, alia quietis negatiue, quæ omni modo opponitur mutationi; & prima mensuratur tempore, secunda æuo, quia est incorruptibilis.



CIRCA LIBRVM

Quintum Physicorum.



Ostquam Philosophus egit de natura motus libro 3. & de eius mensuris, quæ sunt locus & tempus in lib. 4. hic incipit agere de distinctione motus. Primò quidem per suas species in hoc libro. Deinde per quantitates in sequenti. Et diuiditur liber iste in tres partes. In prima agit de speciebus motus in communi, duobus primis capitibus. In secunda agit de unitate & diuersitate eius alijs duobus capitibus, usque ad 4. In vltima de contrarietate motus usque ad cap. 6.

SUMMA TEXTVS

Libri Quinti Physicorum.

IN hoc primo capite vt incipiat philosophus tradere species motus, duò præmittit. Primò, distinguit motum per se à motu per accidens. Secundò, distinguit omnes modos mutationis ex parte termini à quo in terminum ad quem, quæ quatuor modis variari possunt.

Circa primum, distinguit motum ex parte termini ad quem in motum per accidens, & simpliciter ex parte, & simpliciter per se primò; per accidens sicut si dicatur de eo quòd fit
al.

album, quod mutatur in id, quod cognoscitur, cognosci enim accidit albo: si verò dicatur quod albefactio est motus in colorem, erit motus simpliciter ratione termini in partem, si verò dicatur de eo quod albescit, quod mutatur in album, erit prædicatio simpliciter primo, & per se, quia albefactio per se tendit in albedinem. Ex quibus colligit, quod mutatio per accidens omittenda est, quia non consideratur ab arte, quia determinatam rationem non habet: mutatio autem quæ non est per accidens, inuenitur in *ex contraria*, quantum ad motum, ad qualitatem, quantitatem, & ubi, & inter contradictoria quantum ad generationem & corruptionem.

Circa secundum, ad inuestigandum species motus docet, quod cum mutatio sit de quodam in quiddam, quatuor modis contingit aliquid mutari; aut de subiecto in subiectum; aut de non subiecto in subiectum, aut de subiecto in non subiectum, aut de non subiecto in non subiectum. Et exclusa ista quarta, quæ non constituit speciem mutationis, cum non sit inter extrema opposita; nec enim duæ negationes oppositæ sunt, in reliquis tribus dantur species mutationis, & inuenitur motus. Et quidem mutatio ex non subiecto in subiectum, quæ verè satur inter contradictionem, est generatio vel simpliciter si sit substantiæ, vel secundum quid si sit accidentis, ut ex non albo in album, in quo manet subiectum simpliciter ens actu, & mutatur ex non esse secundum quid, in esse secundum quid, si autem subiectum non sit ens actu, sed ex non esse simpliciter fiat, est generatio substantialis. Mutatio autem de esse
in

in non esse est corruptio. Et istæ duæ mutationes non sunt motus. Generatio enim substantialis fit ex materia prima, quæ est subiectum generationis, quæ secundum se & sine forma non existit simpliciter, ergo non mouetur, quia quod mouetur, existit. Quod similiter corruptio non sit motus patet, quia corruptio opponitur generationi, sed motui non opponitur nisi alter motus, vel quies; ergo si generatio non est motus neque quies, corruptio ei opposita motus non erit. Ex quo infert, quod motus per se sumptus solùm inuenitur in vno modo mutationis, scilicet, ex subiecto in subiectum, seu de contrario in contrarium, intelligendo per contraria non solùm extrema, vt album, & nigrum, sed etiam media, vt viride & rubrum, imò & priuatiua. Denique in calce capitis diuidit motum sic per se sumptum in tres species, quia in tribus tantum prædicamentis inuenitur, scilicet ad qualitatem, quantitatem, & vbi.

Quod in calce capitis primi insinuauerat Aristot. in tribus prædicamentis dari motum, in præsentī cap. 2. id probat latiùs; & circa hoc facit tria. Primò, excludit omnia alia prædicamenta à motu. Secundò, concludit ad quæ prædicamenta de facto fit motus. Tertiò, soluit dubitationem quandam, scilicet ad quam speciem motus reducatur mutatio, quæ procedit secundum magis & minus in eadem specie. Et tandem docet, quomodo aliquid dicatur non moueri, seu quiescere, quia oppositorum eadem est ratio.

Circa primum, excludit Philosoph. motum à prædicamento substantiæ, & à prædicamen-

to ad aliquid, & à prædicamento actionis, & passionis, quæ nomine motus comprehendit. Quòd ergo ad substantiam non sit motus propriè dictus, probat ex supradictis, quia substantiæ nihil est contrarium positivè; motus autem est inter contraria, cum sit de subiecto in subiectum. Quòd verò ad aliquid non sit motus directè, & propter se, ex eo probat, quia contingit relationem nasci non mutato eo in quo est relatio, sed termino relationis, ut cum ego reddor æqualis alteri solùm ex eo, quod ille alter de nouo fit; ergo ad relationem non est per se motus, sed solùm relatio consequitur aliquam mutationem, sicut ex mutatione circa quantitatem consequitur æqualitas.

Quòd verò ad actionem & passionem non sit per se motus, probat, quia actio & passio entitatiuè motus sunt, sed ad motum non datur per se motus; ergo. Minorem probat, quia ad mutationem non est mutatio tanquam subiecti, neque enim mutatio est subiectum mutabile, v.g. motus non albescit, aut refrigescit, &c. Neque vna mutatio est ad aliam, ut ad terminum ad quem, quia sic deberet esse ad mutationem oppositam, cum termini à quo, & ad quem sint oppositi, & sic ægrotatio esset ad sanationem, & è contra, ergo moueretur simul subiectum contrarijs motibus. Secundò, quia sequeretur processus in infinitum; nam si vna mutatio terminatur ad aliam, etiam ad priorem terminabitur alia mutatio, & ad illam alia, quia eadem est ratio de omnibus; processus autem in infinitum est impossibilis, nam etsi per accidens posset dari processus in infinitum in motibus, ut si res essent ab æterno, generationes
nes

nes essent ab æterno ; tamen per se non potest in eis dari processus in infinitum , quia non potest dari ultima generatio , nisi deur prima ; si enim non datur prima , sed quacumque data est alia prior , nulla generatio est completa , quia ista generatio quandū fit , nondum est , sed fit , & similiter illa alia generatio nondum est , sed fit , siquidem ad illam datur generatio , & de quacumque alia retrocedendo in infinitum est verum dicere , quod fit , & non est quandū ad illam datur generatio : ergo nulla generatio est completa , & consequenter neque genitum , v.g. ignis , quem tamen generari videmus .

Circa secundum , ostendit ex dictis dari motum ad tria prædicamenta , scilicet , quantitatem , qualitatem , & ubi ; reliqua enim , ut vidimus , non terminant motum , & vocatur motus ad qualitatem communi vocabulo , alterationis ; motus autem ad quantitatem non habet commune nomen , sed per species suas vocatur augmentum , & decrementum : motus autem ad ubi vocari potest latio .

Circa tertium , ponit illam dubitationem , ad quam speciem motus pertinet illa mutatio à minus ad magis in eadem specie , ut à minus albo ad magis album , & dicit pertinere ad alterationem , quia magis & minus in eadem specie , etiam quandoque contrarietas est ; minus enim album accedit ad nigrum , & magis album recedit . Denique in calce capitis tangit de quiete , quæ opponitur motui , & dicit tripliciter dici aliquid immobile , vel quietum . Primò , negativè quod non est aptum moveri ut Deus . Secundò , quod difficile moveri potest .

test. Tertiò, quod aptum est moueri, & de facili potest moueri, sed actu non mouetur, quod est priuatiuè quiescere, & hoc solùm propriè dicitur quiescere.

In hoc capite tertio incipit secunda pars huius libri, in qua agit Philosoph. de vnitatē & diuersitate motus, & in hoc tertio capite præmittit quædam necessaria ad determinandum de vnitatē, & diuersitate eius. In sequenti autem capite determinat, & resoluit. Præmittit ergo in hoc capite definitiones quasdam de ijs quæ requiruntur ad agendum de vnitatē & diuersitate motus, idest; quæ dicantur esse simul, vel separatim, quid sit tangere, quid sit esse medium, quid consequenter se habere, quid sit habitum, & quid continuum; & primo definit hæc omnia. Secundò, comparat inter se.

Circa primum, simul secundum locum dicuntur, *quo sunt in vno loco*, scilicet proximo & immediato, seu proprio. Dicuntur se tangere, *quorum vltima sunt simul*; vltima autem sunt superficies, vel lineæ. Definit medium quòd est illud, *in quod primò pertingit id quod mouetur continuè quàm in vltimum*. Continuè moueri dicitur quod nihil vel minimū intermittit in motu. Definit ea quæ consequenter se habent, scilicet, *Inter quæ nihil eorum quæ in eodem genere sunt, medium cadit, & vnum post aliud*: quod potest esse vel secundum situm, vel secundum numerum, vel secundum dignitatem, aut perfectionem, vel secundum tempus. Definit contiguum, *id quod consequenter ad aliud se habet, & ipsum tangit*. Definit denique contiguum, *cuius scilicet partes uni-*

unico modo, seu indivisibili copulantur.

Circa secundum, comparat ista tria, scilicet consequenter se habere, tangere, & continuum, & dicit, quod consequenter se habere, latius patet, quam se tangere; nam ut aliqua consequenter se habeant, sufficit ordo in positione, vel modo etiam si non tangant, ut quæ separata sunt à materia. Tangere autem latius patet, quam continuum, quia omne continuum tangit partem sibi continuam, non tamen omne, quod tangit, est continuum, cum etiam se tangant quæ contigua sunt. Ultimò ponit discrimen inter puncta & unitates. Primò, quia punctum tangit aliquid, scilicet partes linear, unitates autem possunt consequenter se habere, sed non necessariò tangunt. Secundò, quia inter duo puncta debet reperiri aliquod medium, non enim duo indivisibilia sunt immediata; non verò inter duas unitates necesse est dari medium.

In capite quarto agit Philosoph. de unitate, & diuersitate motus: & tria præstat in hoc capite. Primò, ostendit, unde sumatur, & quomodo, unitas & diuersitas motus. Secundò, quomodo continuitas. Tertiò, quomodo regularitas, & irregularitas.

Circa primum, distinguit triplicem modum unitatis, & diuersitatis in motu, scilicet, quod sit vnus genere, vnus specie, vnus numero. Dicitur motus vnus genere, qui pertinet ad vnum prædicamentum, sicut omnes lationes sunt vnus generis. Specie dicitur vnus, qui ad vnā speciem terminatur, ut dealbatio ad albedinem. Quia verò instari poterat in motu recto & obliquo, qui possunt terminari ad idem pun-

unctum, respondet lationes non solum respicere terminos materialiter, sed lineas, seu media per quæ fiunt, est autem specie diuersa linea circularis, & recta. Denique dicitur motus vnus numero, seu vnus simpliciter, in quo tria concurrunt à quibus eius vnitas numerica pendet, scilicet vnitas subiecti, termini & temporis, quorum si aliquid discontinuatur, non erit motus vnus numero.

Circa secundum, ostendit, quid sit necessarium vt motus sit continuus. Ad quod responderet tria esse necessaria sicut ad vnitatem, eò quod motus continuus est vnus. Primum, quod habeat vnitatem speciei, quæ enim differunt specie, non continuantur. Secundò, requiritur vnitas subiecti, diuersorum enim subiectorum non potest esse idem motus. Tertiò, requiritur vnitas temporis, quia si tempus non est vnum, interruptitur quiete, quod est discontinuari.

Circa tertium, duas causas ponit irregularitatis motus. Prima, ex parte mediij, si via ipsa sit obliqua & non recta. Secunda, ex parte mouentis, scilicet quia non eodem modo mouet, sed modo velocius, aut acrius, modo tardius, aut remissius. Denique ostendit motum irregularem, licet vniformis non sit, posse esse vnum continuate, minus tamen vnus est, quàm regularis, quia plus diuersitatis habet, sicut linea habens angulum, minus vna dicitur, quàm recta.

Hoc capite quinto & sequenti tangit Philosoph. vltimam partem huius libri, scilicet de contrarietate motus, & in hoc quinto capite agit de contrarietate motuum, in sequenti de con-

contrarietate quietum. Circa contrarietatem motuum tria facit. Primò, proponit quinque modos, quibus motus contrariari possunt. Secundò, remouet ex illis eos, qui veram contrarietatem non faciunt. Tertiò, assignat verum modum contrarietatis.

Circa primum, numerat quinque modos, seu combinationes, quibus motus possunt esse contrarij. Primus, secundum accessum, & recessum ab eodem termino, sicut generatio & corruptio, ex esse, & non esse alicuius. Secundus ratione contrarietatis terminorum à quibus, vt si vnus motus sit ex sanitate, alius ex ægitudine. Tertius, secundum contrarietatem terminorum ad quos, vt motus in sanitatem & ægitudinem. Quartus, secundum contrarietatem termini à quo ad terminum ad quem ex sanitate in ægitudinem. Quintus, secundum contrarietatem vtrorumque terminorum, vt motus ab ægitudine in sanitatem, contrariatur motui è conuerso à sanitate in ægitudinem.

Circa secundum, excludit à contrarietate motuum, tam quartum, quam secundum modum; nam quartus modus inuenitur in vno tantum motu, idem enim motus est à sanitate ad ægitudinem, vt à termino à quo ad quem. Secundus autem, quia contrarietas motuum non accipitur à contrarietate terminorum à quibus: tum, quia possunt motus à diuersis terminis à quibus, terminari in vnum & idem, vt si ex albo tendatur ad viride, & si niliter ex nigro; tum, quia termini à quibus relinquuntur, & consequenter contrarietas eorum, contrarietas autem, quæ relinquitur non constituit

con-

contrarietatem, sed. quæ assumitur, & ad quam tenditur.

Circa tertium concludit, quòd contrarietas sumitur in motibus secundùm tertium & quintum modum; in mutationibus autem secundùm primum. Hi enim restant exclusis illis duobus. In motibus enim contrarietas accipitur secundùm speciem, & rationem ipsorum, propriè autem ratio motus est à quodam in quiddam, ergo secundùm contrarietatem istorum sumitur contrarietas motus, sicut ægrotare est contrarium ei, quod est sanari, & addiscere, ei quod est decipi propter contrarietatem terminorum. Secundò, in mutationibus non habentibus contrarium, ut generatio & corruptio, sumitur contrarietas pænes accessum & recessum ab eodem termino pænes contrarietatem extremorum, quia carent illo, & sic generatio ignis est accessus ad ignem; corruptio verò ignis recessus ab illo.

In hoc ultimo capite facit duo. Primò, determinat Philosophus de contrarietate quietum, tam in motibus, quàm in mutationibus. Et secundò soluit quasdam dubitationes ex præmissis relictas.

Circa primum, distinguit de oppositione motus ad quietem, & de oppositione quietum inter se; & quidem motus & quies opponuntur non contrariè, sed privatiuè, nec tamen opponitur omnis motus omni quieti, sed vnumquodque in suo genere, sicut motui locali quies in loco. Et loquendo secundùm veritatem quies in termino ad quem, quia potius motus est causa talis quietis, & ad eam tendit, non
autem

autem vnum oppositum est causa sui oppositi. At verò quies, & quies opponuntur sicut ipsi motus pænes contrarietatem terminorum, in quibus est quies, sicut quies in sanitate contrariatur quieti in ægitudine. In mutationibus autem, quæ non sunt motus strictè dicti, non datur propriè quies contraria mutationi, sed dici potest quòd non mutatio contrariatur mutationi.

Circa secundum, proponit tres dubitationes ad exactiorem contrarietatis motuum explanationem. Prima, circa alium modum contrarietatis, quæ est pænes naturale, & violentum in motibus. Primò inquit, an sicut datur naturale & violentum in motibus localibus, ita inueniatur in alijs generibus motuum, puta alterationis & augmentationis? Et Respond. etiam in alijs generibus dari violentum & naturale, sicut generationes, & corruptiones violentæ sunt præter naturam, & similiter alterationes aliquæ non secundum naturalem cursum proueniunt, vt cum quis dimittitur à feбри diebus non criticis, & hoc modo non inconuenit, quòd generatio contrarietur generationi secundum violentiam, & naturam.

Secunda quæstio est, an detur generatio quietis, ita quòd generatio eius dicatur via ad statum? Quam controuersiam disputat in utrâque partem, nec soluit eam expressè, sed implicite, dum dicit non generari quietem, dum res detinetur violenter in aliquo loco, sed cum naturaliter & tranquillè.

Tertia dubitatio est, quia ex dictis sequitur duo contraria eidem conuenire, dum enim quis tendit ab albo in nigrum, non statim habet totam

etiam albedinem, nec statim exiit totam nigredinem, sed partim habet vnam, partim alteram, quod est habere aliquid de utroque contrario. Respondet, habere duo contraria, non simpliciter & in esse perfecto, & quieto, quod repugnat, sed vnum in abiectiōe, & aliud in acquisitione, & sic contraria aliquando permiscuntur in esse imperfecto.



DE DISTINCTIONE,

Vnitate, & Contrarietate
motus.

QVÆSTIO XIX.

De vnitate, & contrarietate motus.

ARTICVLVS I.

*Verum genera motus sumantur pones diversa
predicamenta, ad quæ est motus?*



Reuiter supponenda est ex Arist. in 1. cap. huius libri, & D. Tho. ibi lect. 2. & 28. de verit. art. 1. differentia inter mutationem & motum. Mutatio enim communior est, quàm motus, nàm mutatio in communi solum dicit transitum de quodam in quiddam, quia vt dicit D. Tho. hic lect. 2. ex ipso mutationis nomine manifestatur, quòd importat aliquid esse post aliud, & vnum esse prius, aliud posterius. Hanc mutationem sic incommuni consideratam diuidit Arist. quatuor modis, quibus contingit aliquid mutari pones terminos ad quos. Aut enim mutatio est de vno termino positiuo ad aliud, v.g. ex calido in frigidum, vel de termino negato in terminum negatum, vt de non albo in non nigrum, quod propriè non est mutatio, cùm totum sit negatio: aut terminus à quo est negatio,

tio, & terminus ad quem positivus : seu de non esse ad esse, vt cum ex non albo fit album ; aut denique è contra terminus à quo est positivus, & terminus ad quem est negativus, vt de esse ad non esse. Et non possunt dari plures species, seu modi mutationum, quia nec plures combinationes possunt fieri inter terminos. Ex quibus solùm illa mutatio, quæ est à positivo in positivum habet rationem motus strictè dicti, reliqua duo se habent vt generatio, & corruptio ; generatio vt transitus de non esse ad esse, corruptio verò è contra. Excludit autem Philosoph. generationem & corruptionem à ratione motus propriè dicti, quia generatio procedit à non esse simpliciter ad esse simpliciter : ergo supponit subiectum, quod non sit ens simpliciter, sed ens in potentia, qualis est materia prima secundùm se sed non ens, impossibile est, quòd moveatur, aut quiescat ; ergo generatio non est motus ex eo, quòd non habet pro subiecto ens in actu ; vbi Arist. solùm excludit generationem substantialem à ratione motus. Exinde verò colligit, quod corruptio non est motus, quia opponitur generationi, quæ motus non est.

In hoc discursu Philos. duo aduert. 1. quàm sit constans Arist. in ea sententia, quòd materia prima secundùm se, & remota forma non sit existens, nec etiam partialiter, aliàs enervatur totus discursus Philos. tex. 8. huius lib. quòd materia non est hoc aliquid simpliciter, & ideò non posse moveri, quia impossibile est, quòd id, quod non est, moveatur, quæ conseq. nihil probat, si materia existit secundùm se saltem partialiter. Ideò enim probat Arist. materiam

quæ non est, hoc aliquid non moueri, quia quod non est, non mouetur. Vel ergo hæc probatio loquitur de eo, quod non est, nec totaliter nec partialiter, & sic habemus intentum, quod, materia nec partialiter existit; vel loquitur de eo, quod non est totaliter, benè tamen partialiter, & sic probat idem per idem; esset enim sensus Philosophi. Id, quod non est hoc aliquid, seu existens totaliter non potest moueri, quia quod non existit totaliter, licet existat partialiter non potest moueri, quod est incidere in battologiam; & ineffaciter probaret non moueri materiam primam, quia non ens non potest moueri, si re vera materia prima est ens actu, restabat enim probandum quod ens actu parziale non moueatur.

Secundum, quod aduerto est Philosophi in illo discursu plus concludere de motu, quam exprimit in probatione, concludit enim in fin. cap. quod motus propriè dictus non inuenitur, nisi ubi mutatio est inter terminos positivos, non verò inter terminos contradictorios, sicut inter esse & non esse; quod iterum repetit tex. 49. & in hoc ponit totam differentiam motus à mutatione, quod motus est à contrario in contrarium, mutatio verò non. Probatio verò, quæ exclusit generationem à motu solum expressè loquitur de generatione substantiali. Fortassè autem non meminit generationis accidentalis, ut cum aliquid mutatur de non albo in album, frequenter enim coniungitur cum motu, quia in motu datur corruptio, & non esse termini à quo, & generatio termini ad quem; non tamen motus fit ea ratione, quæ est de non esse ad esse, sed quatenus
est

Et de positivo in positivum, seu de contrario in positivum, seu de contrario in contrarium. Et quando verò accidens generetur per transitum de non esse ad esse, & non de positivo in positivum, talis erit generatio secundum quid, ut docet D.Tho. in hoc lib. lect. 2. & hæc educitur ad generationem simpliciter, ideoque seorsum illius non meminit. Quod verò Martinus super hoc cap. 5. Physic. notat. 1. notat eos qui dicunt generationem, & corruptionem non esse motus propriè dictos, eò quòd non sunt inter terminos positivos, quia id, inquit, non somnians Arist. sanè videtur ad pauca respexisse in Arist. cuius verba sunt in hoc cap. *Cum omnis motus sit quædam mutatio, tres verò sint mutationes, quas diximus, quarum una, quæ in contradictione consistunt, generatio scilicet, atque corruptio motus non sint, ut ostendimus, motum eam esse solùm mutationem necesse est, quæ ex subiecto ad subiectum acceditur.* Idem habet text. 49. Et denique in text. 50. probat, in substantia non esse motum, quia in ea nihil est contrarium, cum in text. 8. probasset, quòd in ea non est motus, quia subiectum eius est ens in potentia. Ergo non somnians Arist. sed vigilanter dixit generationem non esse motum, quia non est inter terminos positivos, & non solùm quia eius subiectum est ens in potentia, sed de hoc 1. lib. de gener.

An verò mutatio, & motus distinguantur essentialiter, ex eo præcisè, quòd illa sit instantanea, iste successivus, illa inter terminos contradictorios, iste inter positivos, & contrarios?
Resp. ex hoc præcisè non differre specie, nisi termini ad quos sint specie diversi; mutatio-

nes enim, & motus specie non differunt, nisi ex diuersitate termini ad quem. Reliqua verò, quæ pertinent ad diuersitatem termini à quo, vel ad latitudinem & distantiam ab vno in aliud, & ad diuersam durationem totum accidentale est in motu, & mutatione. Diuersitas enim termini à quo non variat speciem, quia terminus à quo relinquitur: quod autem specificat, non relinquitur sed in illud tenditur, & illud accipitur, & ita D. Th. 1. p. q. 22. art. 1. ad 3. docet: *Quòd motus non accipit speciem à termino à quo sed à termino ad quem, sicut ad rationem dealbationis parum refert, quòd qui dealbatur, fuerit niger vel pallidus.* Quòd verò sit distantia, vel latitudo in motu, & non in mutatione, ex eo contingit, quòd terminus à quo mutationis est priuatio, inter quam & esse nulla est latitudo, terminus verò à quo in motu est aliquid positium, quod fundat latitudinem ad alterum terminum positium, & sic habere, vel non habere latitudinem reducitur ad diuersitatem termini à quo, qui essentialem rationem mutationis non diuersificat. Nec obstat, quòd in ascensu & descensu diuersitas stare possit respectu eiusdem termini ad quem, solùm propter diuersitatem termini à quo. Hoc inquantum non obstat, quia isti motus sunt diuersi, non ex diuersitate termini à quo præcisè, sed quia terminus ad quem formaliter diuersus est; nam in loco non solùm attenditur illud materiale spatium in quo res collocatur, sed ipse ordo situationis secundùm quòd aliquid est inferius, vel superius in vniuerso, & sic, quia respectu descensus ille locus est inferior, & respectu ascensus superior, dicitur

tur formaliter esse diuersus locus.

His suppositis restat explicare, ex quo principio sumatur diuersitas generica motuum? Ad quod respondetur, diuersitatem genericam motus sumi ex diuersitate prædicamentorum, ad quæ est motus, & dari motum ad prædicamentum, nihil aliud est, quàm terminum motus pertinere ad tale prædicamentum. *Conclusio* hæc est Arist. in hoc lib. text. 31. ubi inquit: *Quòd genere vnus est motus secundum prædicamenti figuras*; super quem locum S. Thom. lect. 6. inquit: *Quòd dicitur motus vnus genere secundum figuras prædicamenti*; omnes enim, qui sunt in vna coordinatione prædicamenti, possunt esse vnus motus genere; sicut omnis loci mutatio est genere vnus motus, quæ est in vno prædicamento ubi: differt autem genere ab alteratione, quæ est in prædicamento qualitatis. Ratio sumitur ex dictis supra q. 14. Quia motus essentialiter respicit terminum ad quem, cum sit tendentia ad illam, in tantum quòd motus non est aliquid præter res, ad quas est motus, sed se habet vt fieri earum, & ipsæ vt terminus. Ergo ubi res ipsæ, quæ sunt terminus motus, differunt genere, etiam motus ipsi genere diuersi sunt. Et hæc ratio etiam probat de generibus intermedijs, & speciebus infimis, quæ in motibus variantur secundum speciem terminorum, ad quos est motus, vt dicit ibidem Philosoph. & D. Thom. & eadem ratio est vtrobique, quia motus reducitur ad speciem sui termini, sicut ad genus.

Sed inquires duo. Primò, quid sit terminum esse formaliter diuersum, vel vnum formaliter vt intelligatur dare specificam vnitatem, &

diuersitatem? *Respondetur*, duas conditiones inter alias ad hoc requiri. Prima, quòd motus sit per se ad tale prædicamentum, seu speciem, & non per accidens, & per quandam resultantiam. Secunda, quòd accipiat in entitate terminante illa formalitas, seu ratio secundum quam attingibilis est à motu, ita quòd in termino non attendatur sola entitas, seu species termini in se absolutè, sed ratio nouæ, vel distinctæ attingibilitatis à tali mutatione, quidquid sit de alijs conditionibus, seu connotationibus requisitis. Et prima conditio manifesta est, quia id, quod specificat debet attingi per se, quia nihil tam per se pertinet ad aliquam rem, quam id, quod specificat. Id autem, quod per accidens se habet, cum per aliud attingatur, vel resultet, iam supponit specificationem factam ab illo à quo prius attingitur. Ergo non pertinet formaliter ad rationem, specificantis, sed consequentiuè, & per accidens, & sic ut sit terminus formaliter specificans debet per se, & directè attingi à motu.

Secunda verò conditio constat, quia illa dicitur formalitas termini in specificando, ratione cuius terminat, & specificat. Ergo specificatio debet in termino sumi ab illa ratione, quæ in isto termino est ratio terminandi, & determinandi specificationem, ad hoc enim per se tendit motus, & ad reliqua omnia, quæ inveniuntur in termino tendit ratio huius; & sic se habet, ut terminus formalis. Denique inductione constat, quòd quando circa eundem terminum materiale versantur actiones specie diuersæ, una ab alia distinguitur, non ratione alicuius modi operandi, sed ratione alicuius

formalitatis ex parte termini ad quem se tenentis, v. g. generatio, & creatio hominis ex parte termini ad quem differunt, quia aliquid amplius attingit creatio, quàm generatio, scilicet materiam, & omnem rationem entis, quod generatio non attingit. Et similiter transubstantiatio attingit ex parte termini ad quem totam substantiam, quod non facit generatio, & non primò, & per se faciendo ipsam existentiam rei sicut creatio, quia potest illam supponere, & in rem præsuppositā, aliquid aliud conuertere, sicut fit in conuersione panis in Corpus Christi, quod est non facere ex nihilo. Et similiter in ascensu, & descensu respectu eiusdem loci inuenitur diuersitas formalis in termino ad quem, ratione diuersæ superioritatis, vel inferioritatis in situatione, quod per se respicitur in loco: licet enim aliqui velint omnes motus locales esse eiusdem speciei infimæ, sicut omnes calefactiones respectu caloris, tamen est longè diuersa ratio, quia Vbi non est vna species infima sicut calor, sed vnum genere, & sic fundare potest diuersas species motus. Deniquè alteratio simplex, & intensio circa eandem qualitatem differunt ex parte termini ad quem, non addendo nouam qualitatem, sed nouam actuationem, & explicationem eiusdem in subiecto, quod aliquid de nouo est, vt dicemus in libris de generatione.

Secundò inquires, quid dicatur terminus per accidens in motu, & quid ad illud requiratur? *Respondetur* ex doctrina Philosoph. in hoc lib. c. i. distinguuntis ex parte termini ad quem motum per accidens, & motum in partem, & motum per se primò simpliciter: motus per

accidens, ut si dicas album cognoscitur, album augetur, vel nutritur; accidit enim albo cognosci, vel augeri in quantum album est. Motus in partem, ut cum dicitur aliquid transmutari in colorem, quia mutatur in albedinem, cuius color est pars; & cum dicitur aliquis sanari, quia curatur pede. Motus primò & per se cum neque per accidens, neque in partem, ut cum dicitur album dealbari, sanabile sanari, quod est in quarto modo per se. Denique si volumus percipere istam distinctionem motus per accidens in partem, & per se primò, discerne per omnia quinque prædicabilia, & vide, quòd genus, & differentia sunt partes intrinsecæ speciei, ipsa verò species est totum. Deinde accidit speciei proprium, & accidens, proprium quidem necessariò, accidens autem contingenter. Sic ergo motus ad aliquam speciem attingens ipsam directè, & per se, est motus per se primò, & simpliciter. Si autem attingat differentiam, & genus immediatè, aut etiam aliquam aliam partem, & ipsa mediante totum, dicitur motus in partem, licet per se, ut opponitur ei, quod est per accidens. Si verò attingendo speciem, seu totum, attingitur mediatè proprium, vel accidens, dicitur attingi per accidens, idest per aliud prius affectum. Quòd si connexio inter terminum immediatū, & mediatum fuerit contingens, tantò magis dicetur per accidens, quia magis contingenter.

Et si dicas: hac ratione non posse alterationem primò, & per se terminari ad qualitates mixtas, seu medias, quæ ex alijs prioribus resultant, ut ad colorem viridem, qui resultat ex albo, & nigro, & ad alias qualitates, quæ ex ca-

lore, & frigore, & alijs primis resultant. *Resp.* quòd istæ secundæ qualitates dicuntur mediâ-
tè fieri, & resultare, non quia vnico motu fiat
prius vnus terminus, & resultat alijs, sed quia
est duplex motus, vnus ad vnum terminum, &
alius ad alium, licèt secundus præsupponat pri-
mum, sicut generatio supponit alterationem,
& ideò vterque motus per se respicit suum ter-
minum, licèt ordine quodam se habeant. Tunc
autem dicitur per accidens aliquid attingi à
motu, quando vterque terminus ad eundem
motum pertinet, vnus directè, & per se, alter
per accidens, seu per aliud.

A R T I C V L V S II.

Ad quæ predicamenta non detur motus per se?

VT diximus supra q. 14. ad motum strictè
dictum requiruntur duæ conditiones, se-
cundùm Philosoph. in hoc lib. cap. 2. & 3. Pri-
ma ex parte terminorum, quòd sit inter ter-
minos positivos, non verò inter esse, & non
esse. Secunda ex parte subiecti, quòd subie-
ctum motus non sit ens in potentia, vt mate-
ria prima, sed ens in actu. Hanc ergo motum
excluit Philosoph. à septem prædicamentis.
Non enim datur motus ad substantiam, neque
ad relationem, neq; ad actionem & passionem,
situm, quando, & habere; an verò ad ista præ-
dicamenta detur motus per accidens? Non po-
test æquè probari de omnibus, sed iuxta quod
ad motum consequuntur, vel connectuntur ac-
cidentaliter cum termino primario, dicuntur
per accidens terminare motum.

Et licet fundamentum vnde debemus dignoscere, quod ad aliquod prædicamentum non detur per se motus, debeat sumi ex applicatione dictarum conditionum, quæ ad motum per se requiruntur; tamen non æqualiter applicat Aristot. hoc fundamentum omnibus prædicamentis: aliter enim ostenditur ad substantiam non dari per se motum, aliter ad relationem, aliter ad actionem & passionem, & aliter ad situm, quando, & habere.

Et quidem, quod attinet ad substantiam, non dubitamus dari per se ad illam, mutationem, quæ est generatio, cum per se substantia sit generabilis, & corruptibilis: similiter etiam si sumatur generatio cum alteratione prævia, manifestum est includere in se motum, qui est alteratio, qui tamen ad substantiam per se & directè non terminatur. Sumendo ergo motum strictè dictum prout est inter terminos positivos, & contrarios, constat non dari per se ad substantiam talem motum ex duplici fundamento. Primò quia subiectum generationis est ens in potentia, scilicet materia prima, quæ secundum se non est capax procedendi ab vno termino positivo ad aliud positium, sed à priuatione ad formam, eò quod ens in potentia est materia prima, & denudata ab omni forma. Vnde si prout est in potentia tantum est subiectum generationis, formaliter talis mutatio procedit à priuatione ad formam, quia idem est ens in potentia & ens priuatum omni forma; ergo idem est esse subiectum generationis sub formalitate entis in potentia, ac sub formalitate procedendi à priuatione ad formam, non à forma ad formam.

Secundum autem fundamentum ponitur à Philof. in hoc lib. tex. 10. quia substantiæ nihil est contrarium: licet enim corrumpatur vna forma, & generetur alia, tamen hoc non fit secundum contrarietatem illarum, sed procedendo à priuatione vnius, ad positionem alterius. Cuius duo signa affert D Tho. in hoc lib. lect. 3. Primum, quia inter formas substantiales non est aliqua maxima, & determinata distantia, quia non sunt aliqua determinata media, per quæ de vna forma substantiali fiat transitus ad aliam, non est enim inter formas substantiales ordo per se, sed materia, quæ exiit vne forma, potest indifferenter suscipere aliam, nisi obstat aliqua indispositio, ratione cuius immediatè non fiat transitus de qualibet forma ad quamlibet. Secundum signum est, quia formæ substantiales dant esse, quod consistit in aliquo indiuisibili, & se habent sicut numeri, in quibus quælibet additio variat numerum. Ergo tales formæ non habent distantiam contrarietatis, quæ est maxima distantia, quia carent latitudine secundum magis, & minus. Nec obstat, quod habent proprias passiones contrarias, sicut ignis calorem, & aqua frigus: neque enim contrarietas passionum fundari debet in contrarietate formali substantiarum, sed sufficit, quod in virtuali, qualis est priuatio oppositio, in qua fundatur contraria, de quo supra diximus q. 2.

Quod si dicas, nam aliquæ formæ substantiales dantur, ad quas non potest perueniri, nisi ordine quodam per alias, sicut equus non potest generari nisi præcesserit forma embryonis, neque vinum, nisi præcesserit forma vix; ergo

in his datur aliqua determinata distantia, & contrarietas, quia ordine quodam transiunt ad formas extremas per medias. *Respond.* Formas istas non propriè & per se dici formas extremas, & medias. Tunc enim formæ sunt extremæ, & mediæ per se & ab intrinseco, quando formant aliquam latitudinem, & tunc per se illam formant, quando de vna potest perueniri ad aliam per modum cuiusdam additionis, vel minorationis, ut contingit in qualitatibus medijs, quæ ex mixtione extremarum sunt, siue secundum rationem magis, & minus. Formæ autem substantiales æquè sunt incompatibiles, neque transitus de vna ad aliam fit, nisi resoluendo subiectum usque ad priuationem omnis formæ, & excludendo omnem formam, & de tali priuatione ac materia sic nuda ab omni forma substantiali proceditur ad formam, quæ generatur, non verò per mixtionem, vel additionem ad formam præcedentem, vel minorationem secundum magis & minus, in quo fundatur latitudo, & contrarietas. Quare tota ratio quare requiruntur illæ formæ mediæ, neque potest immediatè ex quolibet generari quodlibet, est propter ipsas dispositiones: si enim in materia lapidis posset immediatè poni dispositio ad formam ultimam equi posset immediatè generari equus. Nec obstat, quòd aggeneratio est motus quidam continuus ad substantiam. Nam præterquàmquòd non est certum, quòd sit continuus, ut in lib. de generat. disquiretur; tamen si id habet, est per accidens propter continuam oppositionem materie partialis sufficienter dispositæ, non propter ipsarum formarum latitudinem, quæ exigat
& fun-

& funder continuitatem illius motus.

Quod attinet ad relationem, non est ad illam motus per se, quia vt innascatur relatio, non requiritur mutari subiectum in se de nouo, sed sufficit mutari terminum. Verba Philosoph. in presenti sunt: *Neque est motus in his, quæ sunt ad aliquid, altero enim subeunte mutationem, aliterum mutationem non subiens, verè dici potest.* Cuius perspicuus sensus est, quòd in relationis potest vnum relatiuè dici, & esse, non mutato directè subiecto in se, sed mutato termino; & cum relatio non sit in termino, sed in subiecto, manifestum est, quòd si contingit consurgere relationem nulla mutatione facta in ipso subiecto, consequenter ad ipsam relationem, quæ est in subiecto, non datur per se motus, quia per se mutari deberet, sed solum per accidens, idest, per aliud, quia ex sola termini mutatione resultat.

Ceterum circa hoc, difficultatem inuenit D. Tho. in hoc lib. lect. 3. propter relationes mutuas, quæ in vtroque extremo reales sunt. Non enim saluari potest, quòd per relationem existentem in vno extremo, dicatur alterum referri, sed vnumquodque per relationem existentem in se subiectiuè. Ergo non potest dici relatiuè, nisi sibi adueniat de nouo relatio aliqua realis, & consequenter fiet in eo aliqua mutatio, habendo quid reale, quod ante non habebat. Neque potest benè intelligi, quòd mutato termino longè distante, v. g. albo, resultet hic aliqua realis forma, seu entitas ex vi illius mutationis.

Respondet D. Tho. Quòd si aliquis per suam mutationem efficiatur mihi æqualis, me non
muta-

mutato, ista æqualitas primò erat in me quòdammòdo, sicut in sua radice, ex qua habet esse reale. Ex hoc enim quòd habeo talem quantitatem competit mihi, quòd sin æqualis omnibus, qui eandem quantitatem habent. Cùm ergo aliquis de nouo accipit illam quantitatem, ista communis radix æqualitatis determinatur ad istum, & ideò nihil aduenit mihi de nouo per hoc, quòd incipio esse alteri æqualis per eius mutationem. Ita D. Tho. vbi ponderandum est, quòd ad relationem non datur per se motus, vt relatio distincta est à suo fundamento, seu radice: sic enim posito fundamento, ponitur tota virtus, vt resultet relatio, si ponatur terminus, neque amplius alia mutatio requiritur ex parte ipsius fundamenti, sed sola positio termini. Non tamen negat D. Thom. dari aliquam mutationem, quasi metaphysicam, quæ non est aliud, quàm determinatio illa fundamenti iam antea habiti in ordinè ad talem terminum, qui de nouo ponitur, ver. gra. quantitas, quando produci-tur in vi suæ productionis accipit omnem relationem æqualitatis, vel inæqualitatis ad quemcumque terminum, qui ponatur, sed accipitur ista relatio quasi in fundamento & radice, sicut accipitur propria passio in essentia, & sic posita essentia sine noua mutatione physica resultat passio; si autem impediatur, quouiescumque de nouo tollitur impedimentum; ad hunc modum se habet relatio respectu fundamenti, ipsa enim naturali actione, qua fit fundamentum, etiam fit quantum est ex vi actionis relatio, si terminus ponatur, absolutè enim fieri non potest, cùm non sit entitas absoluta,

luta, sed respectiua, & à termino dependens. Quare non requiritur noua actio physica seu motus ex parte fundamenti, cum ab illo per resultantiam dimanet ex vi prioris actionis, qua fundamentum est positum, sed sufficit poni terminum. Et quia non effectiue procedit à termino, sed solum positio termini, est conditio requisita, vt ex fundamento resultet; ideò nihil obest distantia termini, vt relatio resultet.

Quantum ad actionem, & passionem, seu motum probat Philos. ad illas non dari per se motum, lex rationibus à textu 11. Sufficit nobis ista, quia aliàs daretur processus in infinitum in quacumque actione & motu, quia si ad actionem datur actio, & ad motum motus, rursus ad illum motum, & actionem dabitur alius motus, & actio, cum eadem ratio sit. Non potest autem dari processus in infinitum per se in actionibus, quia si aliqua actio dependet ex infinitis actionibus antecedentibus, ista in singulari non producat aliquid, quousq; omnes illæ ponantur, à quibus dependet: quælibet autem ex antecedentibus similiter non ponetur, neque exhibet ab agente, nisi reliquæ antecedentes etiam ponantur. Ergo cum non sit deuenire ad vnā primā, quæ determinatè exeat ab agente, & moueat sequentem, vt etiam exeat, nulla actio de facto exibat, cum nunquam sit assignare aliam determinatè exeuntem sed dependentem ab alia, & alia priori ita infinitum; & sic nullus vnquam dabitur effectus determinatè, si actiones sunt infinitæ.

De reliquis prædicamentis, scilicet, situ, quantitate, & habere, Philos. nunquam reddidit rationem,

nem, quare ad illa non datur per se motus, sed id supposuit; diuersa tamen ratione, vt inquit D.Th. 5. Physic. lect. 3. & 11. Metaph. lect. 12. quia prædicamenti quando non meminit, quæ significat esse in tempore, quod est mensura motus, & tempus in se motus est. Vnde probando, quod non datur motus ad motum, manet probatum, quod per se non datur ad quando. Situm autem, & habitum non numerauit, quia non explicant, nisi quendam ordinem partium in loco vel habitudinem indumenti ad indutum, quod pertinet ad relationem; & sic probando, quod ad relationem non datur per se motus, manebat probatum, quod neque ad ista prædicamenta. Sed tamen cum ista prædicamenta non dicant solum relationem prædicamentalem, & secundum esse, vt probauimus in Logica, disp. 19. aliàs non essent distincta prædicamenta, à prædicamento relationis; si autem important relationem secundum dici, & ideò non datur per se motus ad illa, etiam propter eandem rationem deberet Philosoph. prætermittere actionem, & passionem, imò & vbi, quia omnia illa dicunt relationem secundum dici. Et ideò dicendum est, quod habuit specialem rationem prætermittendi ista tria prædicamenta, quia non potest ad illa dari aliquis motus, nisi localis, qui primò, & per se est ad vbi; inde verò sequitur applicatio ordinata partium corporis, quod vocatur, quod est situs, vel adiacentia indumenti, quod est habitus; & si quid addunt fixus, & habitus super hoc, est aliquis ordo secundum dici confectus ad locum. Vnde se habet quoad hoc ad instar relationis prædicamentalis,

talís, ad quam ideò non datur per se motus, quia semper se habet vt aliquid consecutum; & similiter est de quando.

ARTICVLVS III.

Ad quæ prædicamenta detur per se motus?

R Estant ex numeratione præcedentis articuli tria prædicamenta, ad quæ terminetur motus per se, scilicet, *qualitas*, *quantitas*, & *vbi*. Nam ad qualitatem terminatur alteratio, ad quantitatem augmentatio, & ad vbi motus localis.

Et quidem de vbi nulla est difficultas, cum nihil euidentius sit motu locali, & latitudine, seu distantia, quæ est inter terminos locorum, quæ vtique per motum propriè dictum vincenda est. Et quando sic mouetur aliquid, dicitur esse partim in termino à quo, partim in termino ad quem, quia immediatus locus, qui acquiritur, est accessus ad vnum, & recessus ab alio saltem inchoatiue, & ita quando mouetur sursum etiam immediatus locus, qui attingitur aliquo modo superior est respectu inferioris à quo ascenditur. Acquisito autem vbi, quod immediatè respicitur à motu, secundariò & mediatè acquiritur aliquis situs, vt stare, vel sedere, & similia, quæ pertinent ad modificationem existendi in loco, & ideò idem motus sufficit attingere vbi, & situm.

Circa motum alterationis etiam est certum ad qualitatem dari per se motum, licet non ad omnem, quia licet in omni qualitate inueniatur vna ex conditionibus requisitis ad motum, sci-

scilicet habere subiectum in actu, non tamen concurrir alia conditio scilicet contrarietas, & sic ad secundam speciem qualitatis, & ad quartam non datur per se alteratio, quia in illis non datur latitudo contrarietatis, neque in illis, quæ consistunt in indiuisibili, aut modo indiuisibili fiunt.

Sed tamen circa hoc insurgit difficultas, quia latitudo, & distantia, quæ datur in qualitatibus requisita ad alterationem, vel sumitur ratione ipsarum qualitatum secundum se; vel ratione intensiōis, & remissionis tantum. Si primo modo, non apparet, quæ sit latitudo vincenda inter aliquas qualitates diuersæ speciei, ut inter calorem & frigus, quia non datur aliquod medium pertranseundum ratione cuius latitudo, & contrarietas inueniatur: neque erit ratio, cur etiam ad potentiam, & impotentiam, ad figuram curuam, & rectam, & similia non detur per se motus. Si verò secundo modo sumatur, ergo solum dabitur motus in qualitates prænes intensiōem, & remissionem, non secundum alterationem tantum. Deinde sequitur, quod lux & similiter actus amoris, odij, & aliorum similium immanentium terminare possint per se motum alterationis, quia habent intensiōem, & remissionem. Denique non repugnat calorem produci in instanti, ut calor ignis, qui est propria eius passio; ergo qualitas perfecta caret motu, imperfecta verò si continuè fiat, acquiritur quidem per motum, sed cum dentur infinita instantia & partes proportionales, quibus acquiritur, reddetur infinita in termino suæ acquisitionis.

Respondetur, latitudinem, & contrarietatem
in

in qualitatibus, ad quas datur motus, simi non solum ratione maioris & minoris intensiōis, sed ratione etiam ipsarum qualitatū inter se. Ad hoc autem non est opus, quod inter illas qualitates contrarias fiat transitus per aliquas medias, sed bene potest immediatē ab vno contrario ad aliud contrarium fieri motus, sicut cum color albus immediatē destruitur per nigrum, sine transitu per viride. Sufficit ergo ad motum alterationis, quod istæ qualitates tales sint, quod ex illis possint fieri aliquæ qualitates mixtæ, quæ sunt mediæ, licet non semper de facto fiat transitus per illas, & sic à calore ad frigus datur motus, & distantia vincenda, licet non semper fiat transitus per qualitatem temperatam, vel mixtam ex illis primis, puta odorem, vel colorem, ariditatem, vel tepidi aem, &c.

Ad id, quod dicitur de potentia, & impotentia. *Respondetur*, quod illæ qualitates neque sunt intensibiles, & remissibiles, si præcisè sunt potentia, neque habent latitudinem, & contrarietatem, ita vt ex earum temperamento, & mixtura aliquæ potentia mediæ resultent; & sic non terminant motum per se immediatē, sed plerumque tanquam propriae passionēs resultant ad productionem essentia. Figura autem resultant ex terminatione quantitatis. Vnde ad motum ipsius sine alio distincto motu consequuntur, & resultant tanquam modus terminationis eius, non sicut qualitates secundæ, quæ resultant aut miscentur per distinctum motum ab eo, quo producuntur qualitates primæ.

Ad id, quod dicitur de contrarietate pænes
in-

intensionem, & remissionem. *Respondetur*, esse distinctam speciem motus à simplici alteratione, & contrarietatem seu latitudinem habere in magis & minus. Vnde inuenitur in luce, quæ intensionis motum per se terminat, licet non alterationis simplicis, quia non fit ex contrario, sed ex priuatiuo. Actus autem amoris, vel odij, & alij similes immanentes habent contrarietatem intentionalem, non physicam, quæ solùm pertinet ad moti alterationis propriè dictæ, licet in potentijs sensitiuis prærequiratur aliqua alteratio circa qualitates sensibiles, sine quibus tales actus non fiunt, sed hoc est præsuppositiuè, & antecedenter. Ad id verò, quod dicitur de calore producto in instanti. *Respondetur*, hoc esse per accidens, quia producit ad generationem ignis, per se tamen non repugnat seorsum fieri per motum ad se terminatum. Non requiritur autem, quòd id, quod terminet motum in omni statu, & modo illum terminat, sed solùm in aliquo, sicut etiam ubi per se se terminat motum, & tamen non repugnat produci sine motu ad generationem, vel creationem rei existentis in loco.

De motu ad quantitatem.

Circa quantitatem maior est difficultas. An per se detur motus ad illam? Multi enim contra Arist. tenent non dari per se motum ad quantitatem, vt Martinez in præsentī lib. notabil. 3. & Cabero hic disp. 4. dub. 4. & alij. Sed mouentur diuersis vjs. Martinez, quia putat augmentationi deesse conditionem
requi-

requiritur ex parte mobilis, scilicet, quod sit in actu id, quod mouetur. Cabero, quia est diuissibilitas successionis ipsi augmentationi, licet illam habeat per accidens ratione iterationis adiunctæ. Et tandem, quia non sufficienter redditur disparitas, cur aggeneratione, & nutritio motus non sint, augmentatio uero motus sit.

Fundamentum ergo Martinij in eo stat, quia est aliquod subiectum mobile augmentationis, maxime ipsum viuens, quod augefcit, hoc autem non mutatur, nec patitur per motum augmentationis, nam quantitas, quæ in augmentatione crescit, vel producitur de nouo, vel iam productæ vnitur. Si primum illa quantitas non in viuento, quod præcedit, sed in materia, quæ de nouo aduenit, producitur; ergo sola illa materia mutatur; sed mutatio materiæ non est motus, vt Philosoph. statuit, ergo neque augmentatio. Si verò quantitas non producitur, sed vnitur; ergo idem est nutritio, & augmentatio, siquidem in tantum acquiritur illa substantia in quantum acquiritur illa substantia in qua est quantitas, quod utique fit per nutritionem, non per motum distinctum ad quantitatem: nutritio autem non est motus, quia in ea solum mutatur materia alimenti, mutatio autem materiæ non est motus.

Fundamentum autem Cabero in eo consistit, quia quantitas nunquam producitur per se sed semper consequitur ipsam materiam, in qua existit, & cui est coæua in sententia huius Authoris. Vnde nunquam producitur noua quantitas producendo partes quantitatis, nisi producendo partes materiæ. Superest ergo, quod

quòd in augmentatione crescat quantitas, quia vniuntur nouæ partes materiæ, & quantitatis: vnio autem partium fit per indiuisibilia. Ergo consistet augmentatio in hoc solùm, quòd noua indiuisibilia producantur. Vndè sequitur, quòd augmentatio erit indiuisibilis, quia solùm terminetur ad indiuisibilia, & non erit continua, quia indiuisibilia non continuantur: nec saluatur hoc dicendo, quòd per augmentationem producitur superficies vniens partes profunditatis: in superficie autem potest inueniri motus continuus, quia latitudinem, & extensionem habet. Sed tunc inciditur in aliud inconueniens: tùm quia versus profunditatem non dabitur augmentatio continua, quia ipsæ superficies non sunt sibi immediatæ, & continuæ: tùm, quia aliàs sola profunditas erit coæua materiæ, non verò superficies, & alia indiuisibilia; quia hæc producantur de nouo in augmentatione. Quòd tamen non est multum inconueniens, cùm videamus mutari in quantitate indiuisibilia terminatiua, quoties mutatur per diuisionem terminatio quantitatis: vndè tandem iste Auctor tenet per augmentationem produci superficiem vnitiuam partium quantitatis, per accidens autem quantitatem moueri ratione alternationis adiunctæ.

Denique vrgetur vtraq; sententia illo communi argumento. Quia non potest dari augmentatio, nisi adiuncta nutritione, eò quòd noua quantitas perit nouam partem materiæ, aliàs penetraretur cum antiqua, si vtraque esset in eadem parte materiæ. Sed hoc ipso, quòd producitur noua pars substantiæ, consequitur noua quantitas partialis tanquam passio

foiilius. Ergo non est necesse ponere nouum motum ad quantitatem præter illam actionem, quæ terminatur ad substantiam immediatè, & mediatè ad quantitatem.

Nihilominus sent. Arist. deferenda non est, quam communiter Peripatetici sequuntur, & vtrique Schola Diu. Thom. & Scoti, scilicet dari ad quantitatem per se motum augmentationis.

Fundamentum est, quia in quantitate inuenitur vtrique conditio ad motum requisita, scilicet, quòd subiectum eius sit ens in actu, & in ipsa dètur contrarietas. Quòd quantitas habeat pro subiecto ens in actu, constat, quia eius subiectum est corpus, corpus autem non est sola materia, sed constituitur in esse corporis per formam, quia si materia de se esset corpus in actu, generatio substantialis non terminaretur per se ad corpus, sed ad corpus vt tale, quod est non fieri simpliciter, sed secundum quid, vt argumentatur Arist. 2. Phys. text. 71. & 78. & D. Thom. ibi lect. 14. & 1. de generat. text. 11. lect. 6. Imò non potest intelligi, quomodo forma substantialis possit præbere gradum specificum talis corporis, verbè gratia, lapidis vel ligni, & non gradum genericum corporis secundum se, cum ab eadem forma, seu entitate proueniat gradus specificus, & genericus, aliàs distinguerentur realiter. Et si Deus separaret formam lapidis à materia, esset in illa forma gradus specificus sine generico, quod repugnat. Sic ergo materia habet rationem corporis per formam, atque adeò corpus est ens in actu, & non pura potentia, vt pote compositum ex materia & forma: ergo sub-

subiectum quantitatis, quod est corpus, est ens in actu, & non solum pura potentia; similiter quantitas habet contrarietatem, quia habet distantiam, & latitudinem terminorum, secundum incrementum & decrementum, non minus quam inter loca distantia datur contrarietas.

Nec obstat, quod Philosoph. in cap. de quantitate docet, quantitati nihil esse contrarium. Et deinde, quia magnum, & paruum relativè opponuntur non contrariè. *Respondetur* enim, quod contrarietas potest sumi dupliciter. Uno modo propriè pro contrarietate specifica, id est inter duas species, quæ sub eodem genere maximè distant. Alio modo minus propriè pro contrarietate quasi terminativa, seu modali, scilicet quando inter aliquos terminos datur distantia, seu latitudo percurrenda, in qua acquiruntur saltem diversi termini, seu modi sicut in eodem spatio datur hoc modo contrarietas locorum, & in eadem qualitate datur contrarietas graduum secundum intensiorem, & remissionem. Prima contrarietas negatur in quantitate à Philosoph. non secunda; species enim quantitatis, ut linea & superficies, non se expellunt à subiecto, neque contrariantur. Quod verò dicitur relativè opponi magnum, & paruum. *Respondetur*, verum esse si sumantur comparativè, non verò si sumantur absolute secundum quod important distinctos terminos secundum latitudinem, & distantiam in eadem quantitate; sicut etiam de intensiōe, & remissione poenēs magis & minus in qualitate dicendum est.

Sed dices, quantitatem quidem de se habere

se conditiones sufficientes ad motum, sed tamen ab extrinseco impediri, quia sequitur ad substantiam immediatè, ut propria passio, & sic non per se, & immediatè terminat motum, sed mediatè.

Respondet, quantitatem in prima generatione substantiæ consequi ad modum propriæ passionis: in aggeneratione autem, seu incremento non se habet ut propria passio, sed est accidens contingens, quod potest adesse, & abesse: neque habet necessariam connexionem cum re, quæ augmentatur; accidentale enim est viuenti, quòd habeat tantam, vel tantam latitudinem augmenti, vel decrementi, cum sine illa possit conservari in minori, vel in maiori, & sic potest distinctum motum terminare, non solum ab ipsa generatione, qua primo producitur substantia, sed etiam ab aggeneratione, qua producitur pars substantiæ, eò quòd benè potest dari nutritio, seu aggenerationis sine eo, quòd detur augmentatio, ut cum viuens peruenit ad terminum sui incrementi, & deinceps conservatur, & nutritur, & non crescit, nec decrescit, quia quantum aduenit de substantia, tantum deperdit. Ergo requiritur distincta actio præter nutritionem, qua, ita superaddatur noua quantitas, quòd de præcedenti non tantum consumatur, quantum superadditur: hoc enim speciale est in augmentatione, neque inuenitur in sola nutritione, & ita est actio distincta, quæ respicit nouam quantitatem non absolutè, ut poterat consequi ad substantiam, sed ut crescentem, idest ita superaddentem ad quantitatem antiquam, quòd non æquè, vel plus deperdatur, quàm

acquiratur, ad quod requiritur noua terminatio quantitatis secundum latitudinem maioris, vel minoris extensionis, quòd sufficit ad dictum motum, licet præsupponat aliam priorē actionem ad substantiam, sicut in qualitate motus intensiōis, & remissionis respicit diuersam terminationem qualitatis, & tamen est distinctus motus ab alteratione simplici.

Ad fundamentum primæ sent. Respond. negando antecedens; Ad probationem dicitur, quòd siue quantitas partialis producat de nouo, siue tantum uniatur præexistēti, nunquam habet pro subiecto nudam materiam, sed ipsam corpus viuens, quòd est subiectum quantitatis, neque ad augmentandam quantitatem sufficit solum nutritio, vel aggeneratio, vt præcisè tangit substantiam, quia saluari possunt tales actiones sine augmentatione, vt quando viuens nutritur, nec tamen crescit, & tamen sequitur quantitas ad illam partem. Quare requiritur diuersa actio, quæ respiciat quantitatem, vt superaddentem ad præcedentem quantitatem, & producentem ipsas partes quantitatis, vel saltem terminationem earum nouam, quæ faciat crescere præcedentem, & hæc habet pro subiecto substantiam ipsam viuētis, tam præcedentem, quàm de nouo aggeneratam, quia vtramque immutat, licet diuerso modo; præcedentem enim immutat tanquam id, cui accessionem quantitatis adiungit, & terminationem eius, quæ minor erat, in maiorem immutat; substantiam verò de nouo nutritam, & aggeneratam respicit, vt subiectum illius partialis quantitatis, non absolutè, sed vt coniungendæ præcedenti, & distinctam

ter-

terminationem maioris extensionis constituentis.

Ad secundum fundamentum respondetur; quantitatem non recipi in sola materia, sed in ipso composito, quod est corpus, ut iam diximus, & amplius in libris de generatione ostendetur. Dicitur autem quantitas coena materiae, sicut forma corporeitatis, ad quam sequitur, non quod eadem numero forma semper sit in materia, neque eadem numero quantitas, quae formam sequitur; sed quia nunquam deest aliqua forma corporeitatis materiae, neque aliqua quantitas. *Et quando* dicitur, quod adueniente noua quantitate, non producit ipsa noua quantitas, sed indiuisibile aliquod uniens partes eius. *Respondet.* Ipsam etiam quantitatem partialem produci, quia quantitas illa, quae erat in alimento, v. g. in pane, corrumpitur, sicut ipsa forma panis, & ad introductionem formae viuentis, consequitur etiam noua quantitas propria viuentis, quae tamen in quantum facit crescere praecedentem, & constituit maiorem, vel minorem quantitatem, secundum distinctam terminationem, accidentalis est ipsi viuenti, & potest produci distincta actione, quae est augmentatio, & non ut propria passio resultabit. Quod si quantitas sit de nouo in illa parte, quae aggeneratur inconueniens est, quod solum ipsum indiuisibile producat de nouo per augmentationem & quantitas ipsa dimanet, quantum ad partes diuisibiles: tunc, quia non est maior ratio, quod consequatur quantitas ad substantiam, quantum ad partes diuisibiles, quam quoad indiuisibilia, v. g. lineam vel superficiem, cum si-

ne istis non constet quantitas, neque coalescat: tum, quia quando fit continua aggeneratio ignis per papyrum; vel viuentis per alimentum, cum illa indiuisibilia non sint immediata, discontinuabitur ille motus, & cum non fit maior ratio, quod attingat vnum indiuisibile, quam aliud, attinget omnia distinctis actionibus, non continuando per partes, si illas non producit; & consequenter requirentur infinitae actiones, sicut sunt infinita indiuisibilia, si quodlibet seorsum percurritur & attingitur.

Ad vltimum patet ex dictis, quod nutritio formaliter solum attingit substantiam partialem, quae secundum se non producit, vt habens contrarium, nec realiter, nec modaliter, siue secundum diuersam terminationem, imò etiam vt habet quantitatem adiunctam, adhuc non producit per motum, & actionem distinctam ipsa quantitas partialis absolute considerata, sed secundum quod induit diuersam terminationem secundum latitudinem, & distantiam maioris, & minoris; sic enim habet sufficientem contrarietatem ad motum augmentationis, & sic illa quantitas in quantum maior non est propria passio viuentis, quia non est illi necessario connexa, siquidem sine ipsa potest dari tale viuens: est ergo illa terminatio solum accidens, & sic potest terminare distinctum motum ab actione producente substantiam, ex qua resultat propria passio, sed non quantitas, vt maior, vel minor.

ARTICVLVS IV.

Vnde sumatur vnitas numerica motus

Specialis difficultas est de principio unitatis numericae in motu, quia non sufficit ad illam vnitas numerica termini; tùm quia de illo erit eadem difficultas, vnde sumatur vnitas numerica termini, si enim sumitur ex eo, quòd producit ab ista numero actione erit circulus, sumendo unitatem numericam termini à motu, & motus à termino: tùm, quia circa eundem terminum non repugnat dari plures motus, vt cum idem locus numero saepius repetitur. Hoc tamen non multum vrget, quia circa eundem locum extrinsecum per diuersos motus, diuersa vbi produciuntur.

Dicendum ergo est, quòd vnitas numerica motus præsупponit quidem unitatem specificam termini à quo sumitur eius species, & superaddit duplicem continuitatem, scilicet temporis, & mobilis; vt videlicet neque motus interrumpatur quiete ex parte temporis, neque diuersitate subiecti ex parte mobilis. Ita sumitur ex Diu. Thom. in hoc lib. lect. 7. vbi inquit: Ad hoc quod motus sit continuus, requiritur, quòd sit vnus secundum speciem, quæquidem vnitas speciei est in motu ex re, in quam est motus. Secundo requiritur, quòd sit vnus subiecti, quia diuersorum subiectorum motus possunt esse habiti (id est consequenter se habentes) sed non continuus. Tertiò requiritur ad continuitatem motus, & unitatem, quòd sit vnus tempore ad hoc, quòd non interueniat ali-

qua immobilitas, vel quies, quia si deficeret aliquod tempus motui in quo scilicet non moueretur, sequeretur, quod quiesceret in illo si autem quies interponitur, erunt multi motus, & non vnus. Hæc Diu. Thom. Cum ergo stantibus istis conditionibus non interrumpatur motus, sequitur quod maneat vnus, quia eius vnitas numerica consistit in continuitate successionis, non in aliqua indiuisibilitate; & ideò requiritur ad eius vnitatem id, quod est commune omnibus accidentibus, scilicet vnitas subiecti, quia in duobus subiectis non est vnum accidens, & requiritur id, quod speciale est motui, scilicet vnitas successionis ex parte temporis.

Si verò inquiras, curetiam non requiratur vnitas motoris, seu causæ efficientis, & vnitas loci, quia à diuersis motoribus, & in diuersis locis non progreditur vnus motus. *Respondetur.* Quod vnitas motoris entitatiuè, & absolutè non requiritur ad vnitatem motus, quia potest vnicus motus procedere à pluribus causis partialibus in eodem subiecto, vt cum nauis trahitur à pluribus: solum ergo requiritur vnitas causæ, non quidem numerica, sed vna ratio causæ totalis; sed hæc non ex ratione motus, vt motus est, sed vt actio, & causalitas, quæ non potest exire à duplici causa totali, quod etiam est commune omni effectui, vt effectus est, & non solum ratione motus. Vnitas autem loci inuoluitur in ipsa vnitate mobilis, quod in pluribus locis esse non potest: & in vnitate termini, si sit motus localis, quia in diuersis locis non datur vnus terminus.

Sunt tamen quædam vulgares obiectiones, contra has condiciones. Primò, contra vnitatem

tem ex parte termini ; quia in motu locali continuo variantur plura vbi , vt cum lapis decidit , vel aliquis ambulat per leucam , variantur diuersa vbi , quia acquiruntur diuersa loca , seu distantia , & alia amittuntur ; & tamen ille motus est vnus numero , quia est continuus tempore , & subiecto . Idem argumentum fit de motu intensionis , qui eadem continuatione acquirit plures gradus , quorum quilibet potest terminare motum .

Secunda contra vnitatem mobilis est vulgare exemplum in cane decidente de turri , si in medio moriatur ; vel si deambulante prænata , animetur foetus , illi motus sunt in diuersis subiectis , scilicet cadauere , & cane , & tamen motus est vnus , quia continuus est , & nulla quiete interruptus . Ergo non requiritur vnitas subiecti .

Tertio contra vnitatem temporis , quia tempus sumit vnitatem numericam à motu , cum sit eius duratio . Ergo si motus est vnus ratione temporis , datur circulus in istis vnitatibus desumendis . *Et confirm.* quia tempus vel sumitur propriè pro tempore coeli , & hoc est vnum pro omnibus motibus mundi ; & sic ab illo non potest sumi vnitas numerica cuiuscumque motus ; vel sumitur communiter pro duratione cuiuslibet motus & tunc dicendo , quod motus est vnus , quia tempus est vnum ; est dicere , quod est vnus , quia eius duratio est vna ; & hoc est petere principium . Inquirimus enim , quando motus est vnus in duratione & continuitate .

Ad primum , relictis varijs solutionibus . Resp. quod in illo motu locali sunt plura , vbi

partialia & inadæquata; vnum verò adæquatum, & simpliciter, scilicet illud in quo ultimo sistit motus; reliqua enim, quia in illis non sistitur, potius habent rationem continuantis partes motus, & transitum de vno ad aliud, quàm rationem termini: & ita semper saluatur, quòd terminus est vnus, scilicet vbi datur ratio ultimi. Quòd si motus sistat in medio, illud vbi habet rationem termini, hoc ipso, quòd in eo sistitur; & tunc ab eius vnitatem pendet motus, sicut de vnitatem numeri diximus in Logica, q. 16.

Ad secundum resp. quòd in illis casibus discontinuantur motus propter discontinuationem subiecti, supposito quod non manent eadem accidentia in genito, & corrupto, vt ostendemus in libris de generatione, licet maneat accidens simile. Et ita fallitur sensus, putans continuari eundem motum, cum tamen non sit idem numero, sicut quando iudicat esse eandem virgam, quæ partim est viridis, partim sicca, cum tamen non sit continua, sed contigua; & si proijciatur, videtur ferri vnico motu, cum tamen duplici feratur propter duplex subiectum, sicut etiam plura ligna ligata videntur ferri vnico impetu, & tamen pluribus motibus mouentur; sic in illo instanti, quo generatur cadauer descendente cane, incipit alius motus inceptione extrinseca, quia in illo instanti motus non est, sed finis motus præcedentis, & inchoatio extrinseca sequentis; sufficitque illa quies negatiua, vt in diuersis subiectis discontinuantur motus. Et si dicas, quòd illi motus copulantur vnico instanti indiuisibili; ergo sunt partes continuæ, & non contiguæ.

riguæ. *Respond.* hoc intelligi de copulatione partium motus, vel quantitatis in eodem subiecto; in diuersis autem subiectis vnico instanti finiuntur, & incipiunt extrinsecè diuersi motus, qui erat in cane in instanti corruptionis non habet mutatum esse à se productum, sed à generatione cadaueris præuentum, à qua generatur in eo loco, in quo debebat poni à motu, si non desineret motus corrupto subiecto: & ideo non est continuatum cum motu cadaueris, sed extrinsecè ab illo incipit sequens pars motus cadaueris. Quomodo verò possit continuari idem motus in ascensu, & descensu, si per impulsum res projiciatur deorsum, & eodem impetu transeat vltra centrum, aut etiam resiliendo à pariete faciat motum reflexum; ita quòd quies aliqua interrumpat illum motum, dicemus in lib. 8. q. 23.

Ad tertium resp. motum, & tempus ad inuicem indiuiduari in diuerso genere causæ, tempus à motu in genere causæ materialis, motum à tempore, seu potius à non interruptione temporis in genere conditionis, seu formalitatis requisitæ ad vnitatem motus, negatio enim vt conditio solum se habet, sicut materia indiuiduatur à quantitate, vt à conditione, quantitas à materia, vt à subiecto. Neque in diuerso genere causæ circulus vitiosus est, vt in libris posteriorum ostendimus. *Ad confir. resp.* quòd vnitas motus pendet ab vnitatem temporis, non vt est tempus primi mobilis, quòd omnia comprehendit, neque vt est tempus proprium huius motus in singulari posituè, sed solum negatiuè idest quatenus illa duratio particularis quiete non interruptitur: & sic

pendet vnitas numerica motus à negatione interruptionis, vt à conditione, quidquid sit de positiuo tempore, quo mensuratur.

ARTICVLVS V.

Qua sit contrarietas in motibus, & vnde sumatur.

Contrarietas in motibus potest intercedere, vel inter motum, & motum, sicut frigefactio, & calefactio, sicut moueri in albū, vel quiescere in albo: vel inter corruptionem, & generationem respectu eiusdem rei.

Dico ergo primo, contrarietas duorum motuum inter se sumitur ex contrarietate obiectorum, seu terminorum ad quos, non ex contrarietate terminorum à quibus formaliter, & per se loquendo, licet quando est contrarietas perfecta motuum etiam inueniatur contrarietas in terminis à quibus. Est D. Thom. in hoc. lib. 5. lect. 8. & Philos. ibidem à textu 47. vsque ad 50. *Et ratio* primæ partis est; tūm, quia termini, ad quos dant speciem motui, ergo & contrarietatem, hæc enim conuenit ratione speciei; tūm quia termini à quibus relinquuntur, termini ad quos assumuntur à motu; ex eo ergo quod termini à quibus sint contrarij, solum sequitur, quod recedat à contrarijs, ex eo verò quod accedat ad terminos ad quos accipit contrarietatem, si illi contrarij sint. Imò ex contrarijs terminis à quibus, contingit peruenire ad eundem terminum, vt ex albo & nigro in viride. Ergo contrarietas terminorum à quibus non constituit contrarietatem

mo.

motuum per se. Secunda verò etiam ad contrarietatem conducunt, quia motus petit contrarietatem inter terminum à quo, & ad quem, cum versetur inter terminos positivos, & contrarios. Ergo sicut datur contrarietas inter terminos ad quos: ita supponetur contrarietas ex parte terminorum à quibus, si perfecta sit.

Dico secundò, in mutationibus, quæ non versantur inter terminos contrarios, sicut sunt mutationes substantiales, contrarietas earum non sumitur ex contrarietate terminorum, sed ex accessu, & recessu respectu eiusdem termini. Ita *Diu. Thom.* & *Philos.* citat. loco. *Ratio* est, quia in his mutationibus termini propriè non habent contrarietatem, licèt habeant impossibilitatem, sicut una forma substantialis non compatitur cum alia licèt non habeat contrarietatem, sicut generatio equi, & generatio ignis contrarietatem non habent ex parte terminorum ad quos. Ergo contrarietas istarum mutationum, qualis est inter corruptionem, & generationem, debet desumi respectu eiusdem termini, quia generatio ignis, & corruptio eius sunt opposita positiva, & non relatiuè, ergo contrariè. Sumitur ergo in eis contrarietas per hoc, quòd recedatur circa eundem terminum: recessus enim & accessus motus contrarij sunt, si respiciant eundem terminum: sicut etiam in passionibus animæ datur aliquando contrarietas non pœnes obiecta, seu terminos contrarios, sed pœnes accessum, & recessum erga idem obiectum, ut spes & desperatio, timor & gaudium respectu eiusdem obiecti, ut docet *D.*

Thom. 1. 2. q. 23. art. 2. vbi etiam tradit totam hanc doctrinam.

Dico tertio, contrarietas inter motum, & quietem sumitur ex terminis oppositis, in quibus aliquid quiescit, vel mouetur, respectu verò eiusdem termini quies & motus non contrariantur entitatiuè; licet quies habeat priuationem motus. Sumitur ex Aristotel. & D. Thom. in hoc lib. à text. 53. lect. 9. *Ratio* est, quia cum aliquid mouetur à contrario in contrarium, v. g. ab ægitudine ad sanitatem, non contrariatur quies in sanitate motui in sanitate: motus enim ad sanitatem, tendit ad quietem in illa; terminus autem ad quem non contrariatur motui, sed perficit, & consummat illum. Ergo neque quies in tali termino: sed quies in opposito, v. g. in ægitudine contrariatur motui ad sanitatem. Sed tamen, quia quies in termino ad quem, facit cessare motum, & priuat illo, dicimus opponi motui non quantum ad entitatem, quia hæc identificatur cum termino ad quem, sed quies opponitur ipsi moueri, seu tendentiæ de vno ad aliud, quod est imperfectionis in motu. In mutationibus autem, in quibus non est contrarietas, vt in substantia, non datur propriè quies contraria mutationi, sed solum quædam negatio mutationis in esse. Hæc enim opponitur corruptioni, eò quòd corruptio recedit à quiete, seu mansionem in esse: Quietem verò, seu immutationem in non esse, non assignatur motus oppositus, quia quiescere in non esse solum dicit negationem ipsius esse, non autem importat aliquod subiectum, circa quod versetur motus.

Quæri solet, an possit aliquid secundum eandem partem moveri duplici motu contrario alterationis, vel locali? Secundò, an possit aliquid moveri transeundo de extremo ad extremum, & non per medium? *Ad primum resp.* quòd duplici motu locali non potest aliquid moveri, quia locus est adæquatus locato, vnde si datur duplex vbi, seu locus respondens duplici motui, quantumcumque minimè distent, non erit locus adæquatus locato. Et eadem ratione non potest aliquid moveri duplici motu augmentationis, quia non fit sine aliqua distantia loci, quem occupat nova quantitas. At verò duplici motu alterationis in gradibus remissis non repugnet aliquid moveri, sed solum in gradibus intensis, quia termini alterationis sunt compatibles in gradibus remissis, vt calor & frigus, ergo & motus, quia vterque agens non impeditur agere, nisi ratione materiæ in qua non compatitur eius effectus. Ergo si compatitur, non repugnat ab utroque agente procedere motus contrarios, & recipi in eodem subiecto, sicut & terminus eorum. In gradibus autem intensis, termini repugnant & se expellunt, ergo & actiones.

Ad secundum resp. non posse in motu continuo locali fieri transitum de extremo in extremum, nisi per medium, licet non semper per lineam rectam. eò quòd continuitas motus dependet ex continuitate spatij. Si autem non transiur per medium, discontinuatur. Et quia motus localis totam suam quantitatem habet ex parte spatij, in quo acquirit loca; & sine quantitate non habet successionem, quæ ad eius essentiam pertinet, ideò, si fit transitus
sine

sine medio ad extremum, in eo ille transitus carebit spatio, & consequenter quantitate, & successione, atque adeo essentia motus Physici. Angelus autem, quia non pendet à spatio in suo motu, potest per motum discretum transire ad extremum sine medio; & Deus potest transferre corpus ad alium locum sine medio, sed non per motum talis corporis, quia hic semper dependet à spatio in sua diuisibilitate, & successione; est autem de ratione motus physici, quòd sit successiuus, & diuisibilis & quantitatem habeat. Angelus autem, quia non potest corpora mouere, nisi motu locali, non poterit sic transferre corpus. Quomodo verò globus perfectus moueatur de puñcto in puñctum per planum non tangendo partes, dicemus qu, seq. art. 2.



CIRCA LIBRVM

Sextum Physicorum.



IN hoc libro explicata diuisione motus per species & contrarietates, intendit Philos. tractare de diuisione motus pœnes partes ex quibus integratur. Et totus liber habet decem capita, & tractat quatuor. Primum est, quòd motus sicut & omne continuum est diuisibile, & non constat ex solis indiuisibilibus. Secundò, ostendit quot modis diuidatur motus, & quis sit ordo partium, quæ finitas eius aut infinitas. Tertiò, ostendit quomodo quies habet diuisionem. Quartò, expendit rationes Zenonis in contrarium circa indiuisibilia, ex quibus dicebat constare motum, & continuum.

SVMMMA TEXTVS

Libri Sexti Physicorum.

IN hoc capite primo duo facit Philos. Primò, ostendit continuum in genere loquendo non componi ex indiuisibilibus. Secundò, ostendit motum & tempus in speciali indiuisibilibus non constare. Primum, probat duabus rationibus principalibus. Et ad primam supponit definitiones supra traditas continui, contigui, & consequenter. Continua
di-

dicuntur, quorum ultima sunt unum; contigua, quorum ultima sunt simul; consequenter, quorum nihil est medium sui generis. Ex quibus formatur ratio. Quia non potest continuum componi ex indivisibilibus, neque per modum continuationis, neque per modum contactus, seu contiguationis, neque per modum consequenter: ergo. Non per modum continuationis, neque contiguationis, quia continua sunt quorum ultima sunt unum, & contigua quorum ultima sunt simul, in indivisibilibus autem non est accipere aliquid ultimum, quia carent partibus respectu quorum fit ultimum; ergo. Non etiam se habent consequenter, quia unum punctum non est immediatum alteri, sed inter quaelibet duo puncta est linea media. Quod ostendit, quia duo puncta debent distare situ, & non possunt se contingere, ergo debet aliquid intercedere, quod indivisibile non fit, sed divisibile. Denique partes in quas dividitur continuum, sunt sibi coherentes & continuæ, ergo si divideretur in sola indivisibilia, illa se mutuo tangerent & continuarentur, quod reprobatur.

Circa secundum, loquendo de motu in speciali præsupponit eandem esse rationem de constitutione ex indivisibilibus in magnitudine, motu, & tempore. Quare si magnitudo componitur ex indivisibilibus etiam motus, qui super eam fit, componetur ex indivisibilibus. Igitur cum impossibile sit aliquid simul moveri & mutatum esse, aut quando movetur, nondum mutatum est, aut simul movetur & mutatum est, hoc posterius stare non potest, ergo primum; & consequenter motus, non constat

stat ex indiuisibilibus, quæ sunt mutata esse, sed ex partibus motus. Denique idem ostendit dicendum esse de tempore, scilicet quòd non constat ex indiuisibilibus, nam si sit magnitudo diuisibilis in quinque palmos, & detur mobile vnus palmi, prius tempore decurreret partem vnus palmi, quàm omnes simul, ergo constat partibus diuisibilibus.

In hoc capite secundo vberius prosequitur Philos. id quòd in fine cap. præced. attigerat, scilicet tempus componi ex partibus diuisibilibus, & non ex solis indiuisibilibus. Et ad hoc ostendit duo. Primum, quòd magnitudo & tempus eodem modo diuiduntur. Secundò, quòd eodem modo se habent pœnes finitum & infinitum. Primum ostendit; tùm, quia illa dicuntur æquè velocia, quæ eandem magnitudinem percurrunt eodem tempore, & minorem magnitudinem in minori, si ergo detur aliqua magnitudo diuisibilis, quam pertranseat mobile in tempore determinato, mobile æquè velox pertransibit partem illius in minori tempore, ergo & tempus ita est diuisibile sicut magnitudo; tùm, quia idem mobile, quod toto tempore decurrit spatium decem palmarum, in medietate temporis decurrit medietatem spatij, & in minori minus, & sic de reliquis partibus in infinitum, ergo diuiditur tempus sicut magnitudo.

Circa secundum ostendit, quòd infinitas vel finitas temporis se habet sicut infinitas aut finitas magnitudinis, siue sit infinitum in extremis, quòd omni extremitate caret, siue infinitum diuisione, quòd scilicet in infinitum diuidi potest, quale est quodlibet continuum; vtrique
verò

verò temporis finitas aut infinitas proportionatur. Ex quibus colligit aliqua corollaria. Colligit primò solutionem argumenti Zenonis, quo probabat nihil moueri, quia sunt infinita indiuisibilia in quolibet spatio, quorum vnumquodque à mobili debet attingi, & sic infinita transiret, quod in tempore finito esse non potest. Respondet tamen ad hominem, hoc non sequi, quia sicut spatium est infinitum diuisione, non verò per carentiam terminorum, ita & tempus eandem habet infinitatem. Colligit secundò, nec finito tempore infinitam magnitudinem percurri. Colligit tertio, nullum continuum generaliter loquendo solis indiuisibilibus constare, nam si sit magnitudo tribus instantibus, & sit vnum mobile velocius, quod totam illam magnitudinem tribus illis instantibus percurrat, aliud verò tardius, quòd tantum duo indiuisibilia eiusdem mobilis eodem tempore consumat. Tunc ergo tale tempus respectu mobilis velocioris diuidetur in tria indiuisibilia, quibus transit illam magnitudinem, & rursus idem tempus diuidetur in duo indiuisibilia, quibus mobile tardum duas illas partes percurrit, ergo aut fatendum erit indiuisibile posse diuidi, aut continuum indiuisibilibus tantum non constare.

Ab hoc capite tertio incipit Philos. agere de diuisione motus vsque ad cap. 5. in quo incipit agere de ordine partium motus. Et in hoc cap. 3. præmittit tria theoremata seu præsuppositiones. In sequenti ponit duas assertiones circa diuisionem motus. Præsuppositiones quas præmittit in hoc cap. sunt tres. Prima, nunc seu instans est quoddam indiuisibile. Sumitur autem

autem nunc dupliciter . Primò , pro eo quod per se primo tale est . Secundò , pro eo quod est tale per accidens , seu secundum alterum . Dicitur nunc per se illud extremum , quo pars succedens alteri vnitur ; dicitur nunc secundum aliud , ipsum tempus præsens , ve. gr. hic dies , hæc hora , quod tamen secundum se totum non est præsens . In præsentī loquitur de instanti primo modo , & probat esse indiuisibile , quia si esset diuisibile , sequeretur quòd idem esset præteritum & futurum , scilicet idē nunc quod diuiditur in partem præteritam & futuram , & sic idem nunc partim esset præteritum , partim futurum , aut non esset omnino idem sibi ipsi quasi totum simul existens , quòd est contra rationem instantis , in quo non inuenimus successionem sicut in tempore . Est ergo indiuisibile , & consequenter idem est nunc copulans partes præteritas & futuras .

Secunda propositio , quam supponit , est quòd in instanti nihil potest moueri aut quiescere . Patet , quia si mobile tantum decurrat spatium digitale vnico momento , mobile velocius minori tempore idem spatium decurreret , ergo aliquid erit minus instanti , eritque instans diuisibile . Similiter non quiescit in momento loquendo de quiete priuatiua , quia tunc dicitur quiescere cum non mouetur , quod est aptum moueri , in instanti autem non potest moueri , ergo ibi propriè non quiescit , sed in instanti copulantur partes motus .

Tercia propositio , omne quod mouetur est diuisibile . Probat , quia omne quod mouetur transit à quodam in quiddam , & sic partim est in termino à quo partim in termino ad quem ,
siqui-

siquidem si vnum mobile esset in termino ad quem, iam cessaret motus, si autem totum esset in termino à quo, nondum mouetur, ergo necesse est quòd dum mouetur, vtrumque participet. Hoc autem est esse diuisibile, quia quod indiuisibile est, totum est in termino ad quem, vbi non loquitur de generationibus momentaneis. Videatur de hac ratione D. Thom. hic lect. 5.

In hoc capite quarto ponit Arist. duas assertiones circa diuisionem motus. Prima est, motus dupliciter diuidi potest, scilicet diuisione mobilis, vel diuisione temporis. Primum probat, quia quando mouetur Socrates diuiditur motus eius secundum partes quæ mouentur, nam aliud est motus capitis, aliud pedis, vel manus, ergo motus diuiditur secundum diuisionem mobilis. Secundum probat, quia omnis motus in tempore fit, & omne tempus diuiditur secundum partes successiuas & fluentes, ergo secundum diuisionem temporis diuiditur motus.

Secunda assertio, quinque sunt quæ eadem diuisione, qua motus, diuidi possunt, scilicet magnitudo super quam fit motus, tempus, moueri, mobile, forma ad quam est motus, siue sit locus, siue qualitas, siue quantitas. Hæc omnia simul cum motu diuisionem habent, & eandem rationem finiti, vel infiniti, licet non omnes formæ per se diuidantur, sed quædam per accidens vt qualitates in motu alterationis, quæ per quantitatem sunt diuisibiles. Probat hoc sigillatim, nam moueri seu motus in tempore fit, & in minori tempore minor pars, ergo diuiditur motus sicut tempus. Item forma
vel

el locus si acquiritur certo tempore , eius di-
vidium medio tempore acquiritur , & simili-
ter si mobile tranſit aliquod ſpatium tanto tem-
pore , in medietate temporis diuidium mobi-
lis tranſibit diuidiam partem ſpatij. Ergo om-
nia iſta eodem tenore diuiduntur ſicut motus.

In hoc capite quinto, & ſequenti, poſtquam
agit de diuiſione motus , agit de ordine par-
tium eiufdem , & quia in motu inueniuntur &
partes motus diuiſibiles , & mutata eſſe quaſi
indiuſibilia , prius in hoc capite agit de ordi-
ne inter ipſa mutata eſſe, in ſequenti de ordi-
ne inter ipſas partes . Proponit ergo in hoc ca-
pite tria theorematum , ſeu propoſitiones . Pri-
ma , quòd mutatum eſt, neceſſario eſt in eo ad
quod eſt mutatum facta mutatione . Probat
per omnia genera mutationum ; id enim quod
mutatur , deſerit terminum à quo , & accipit
terminum ad quem, ergo tunc habet mutatum
eſſe, cùm habet terminum ad quem, vel ſal-
tem aliquid de illo aſſequitur .

Secunda propoſitio, mutatum eſſe primò &
per ſe conſiſtit in aliquo indiuſibili . Dicitur
autem primò mutatum eſſe , quod non ratione
alterius , ſeu ratione partis , ſed per ſe primò
ratione ſui mutatum eſt , ve. gr. ratione partis
dicitur aliquid mutatum in die , quia in aliquo
iſtanti , vel hora diei mutatum eſt, & ſic con-
ſtat quòd tale eſt indiuſibile , quia ſi haberet
partes , non eſſet per ſe primò mutatum , ſed
ratione partis , aut nullo modo eſſet mutatum.

Tertia propoſitio , in fine motus datur mu-
tatum eſſe per modum termini , in quo totus
motus finiatur ; in principio autem motus non
datur primum mutatum eſſe. Primam partem

ex

ex eo ostendit, quia necessario datur non esse motus, quo finiatur successio eius, hoc autem est mutatum esse ex parte finis, ergo. Secundam partem probat. Primò, ex parte temporis, quia non datur prima pars temporis, ergo nec primum mutatum esse, quia mutatum esse sequitur ex motu, deinde ex parte mobilis. Quia omne mobile diuisibile est, si igitur datur prima pars motus, & primum mutatum esse, illa prima pars motus facta est tempore diuisibili; ergo medio tempore confecta est medietas illius partis motus, & rursum in minori tempore minor pars, & sic in infinitum; ergo nunquam est dare primam partem motus, & consequenter neque primum mutatum esse ratione diuisibilitatis mobilis. Et simile argumentum fit ex parte spatij, seu termini qui acquiritur, quia est diuisibile; ergo in eo prius acquiritur aliqua pars media, & priusquam media, alia minor, & minor, quia quælibet diuisibilis est; ergo non est dare primum mutatum esse, sicut nec primum, quòd acquiritur per primam partem motus.

Explicatis in superiori capite his propositionibus, quæ pertinent ad mutata esse, hic declarat ipsum ordinem quem habent partes motus, & constat tribus præcipuis propositionibus. Prima, id quòd in aliquo tempore mutatur primò, in qualibet parte illius temporis mutatur. Dicitur primò & per se ad differentiam eius, quòd mutatur per accidens, & ad motum partis, ut qui mouetur hac die, dicitur moueri hoc mense; quòd ergo ratione sui primò mouetur, vel in omni parte temporis mouetur, vel in nulla, vel in altera tantum. Si

in omni parte, habetur intentum, si in nulla; ergo semper quiescit, & sic non est ad rem, loquimur enim de eo quod mouetur. Si in altera tantum, mouetur per accidens, seu per aliud, non primò.

Secunda propositio. Ante quamlibet partem motus præcedit mutatum esse versus principium. Patet, quia si toto tempore mouetur, in dimidio temporis mutatum est, & in dimidio illius dimidij, & sic in quacumque diuisione sine termino. Item quia ante quamlibet partem temporis datur instans, ergo & ante quamlibet partem motus mutatum esse, dum durat motus; in instanti enim non mouetur, ergo mutatum est.

Tertia propositio. Ante quodlibet mutatum esse, datur moueri. Patet, quia mutatum esse est indiuisibile ipsius motus, sicut instans indiuisibile temporis, sed inter motum nullum datur indiuisibile, quod non præcedat aliqua pars, sicut nec inter tempus aliquod instans, quod non præcedat pars temporis; ergo ante quodlibet mutatum esse datur pars motus. Illud autem à quo extrinsecè incipit motus, non est mutatum esse, quia non est inter motum.

In hoc capite septimo postquam egit de diuisione & partibus motus, agit de finitate, & infinitate eius, & comparat illam cum finitate & infinitate temporis: & ponit quatuor præcipuas propositiones. Prima, impossibile est tempore infinito pertransire magnitudinem finitam, & eadem ratio est de quiete, quod intelligitur nisi reiteretur eadem magnitudo finita, vt in circulationibus cæli; & probat, quia si sit magnitudo finita, & hæc percurritur

tur infinito tempore, utique medietas eius non infinito percurreretur, sed finito, cum sit minor, minusque consumat quam tota, transitur ergo medietas spatij finito tempore, similiter ergo aliqua medietas tempore finito transitur, ergo utraque finito tempore, quia ex duobus finitis non componitur infinitum.

Secunda propositio, non potest magnitudo infinita pertransiri tempore finito, siue mo u uniformi & æquali, siue non. Patet, quia si ex illa infinita magnitudine sumatur pars quædam finita, illa pertransitur tempore finito, ergo similiter sumendo aliam atque aliam infinitam, similiter tempore finito percurreretur, ergo cum tempus sit finitum, consumitur enumeratione partium finitarum magnitudinis, & tamen adhuc non est consumptum totum spatium, quia infinitum est, & finitis partibus non consumitur, ergo enti.

Tertia propositio, eadem ratio est ex parte mobilis quoad finitum & infinitum, scilicet, quod neque mobile finitum magnitudinem infinitam, neque infinitum mobile infinitam magnitudinem tempore finito pertranseat, sed oportet adæquari omnia finita & infinita, etiam ex parte mobilis, quia eadem proportio requiritur in mobili, & in magnitudine & tempore.

Quarta propositio, non potest dari motus infinitus finito tempore. Constat ex dictis, quia quantitas motus accipitur secundum quantitatem spatij, unde idem est dicere motum infinitum finito tempore, ac dicere magnitudinem infinitam finito tempore pertransiri.

In capite octauo, postquam Philosophus de-

ter-

Terminauit de diuisione motus , & ordine partium eius , hic determinat de diuisione & partibus quietis , seu stationis : distinguitur autem ratio à quiete , quia statio dicitur generatio quietis , & sic de statione dicit tria . Primum , quòd omne quod stat , seu ad statum tendit , mouetur , quia nondum quiescit , sed generat quietem . Secundum , quod omne quod stat , in tempore stat , quia non mouetur nisi in tempore . Tertium , quòd sicut omne quod per se primo mouetur , in qualibet parte temporis mouetur , ita quod stat , in omni tempore stationis mouetur , & sicut non datur primum in motu , ita neque in statione , seu statu , quia sicut non est accipere primam partem temporis , ita nec primam partem stationis & motus .

De quiete autem dicit , quòd non est assignare primam partem quietis , sicut nec primam partem motus . Ratio est , quia omnis quies est in tempore , non in instanti , sicut supra probatum est , quiescit enim aliquid priuatiuè in eo , in quo aptum est moueri , solum autem potest moueri in tempore .

In calce capitis ponit & probat vnā propositionem , scilicet , mobile quod primo & per se mouetur , & non ratione alicuius partis tantum , impossibile est quòd in aliquo tempore sit in aliquo , in quo primo mouetur , v. g. in eodem loco , vel in eadem dispositione qualitatis . Quod ostendit , quia alias quiesceret & moueretur simul , quod repugnat ; moueretur , quia ita supponitur , quiesceret autem , quia cum illo primo tempore ibi sit , & illud tempus sit diuisibile , in quacumque parte illius

temporis verificatur quod ibi sit, vndè in vna parte temporis se habet sicut antea, quod est quiescere. Vndè colligit, quod in instanti temporis in aliquo quidem loco est, tamen ibi non quiescit, quia quies non est in instanti, sed in tempore.

In capite nono soluit rationes Zenonis & aliorum, qui tollebant motum diuisibilem & successum. Sunt autem quatuor præcipuæ rationes Zenonis, tamen prima & tertia in idem coincidunt. Prima ratio est, quia si daretur motus, sequeretur idem simul moueri & stare, consequens est absurdum, ergo sequel. probat. quod mouetur singulis instantibus, moueri non potest, & tunc stat in loco sibi æquali, ergo quiescit, ergo simul mouetur & quiescit. Respondet Philof. tempus non componi ex solis instantibus, & ideo benè stat, quod in instantibus non moueatur; moueatur verò in tempore diuisibili, nec tamen in instantibus quiescit, licèt tunc non moueatur, quia non se habet tunc sicut prius.

Secunda ratio, quæ apud ipsum erat præcipua eamque Achillem vocabat. Sequeretur enim quòd res celerrima non possit tardissimam allequi, quod est ridiculum; sequel. patet, nam si res celerrima, vt Achilles distet vno stadio à re tardissima, v. g. testudine, & moueatur decuplo, velociùs illa, nunquam poterit illam allequi, nam dum Achilles illud stadium percurrit, testudo decimam partem progredietur, & dum ille decimam partem transiit, testudo aliam decimam illius decimæ ambulauit, & sic in infinitum; ergo si motus in infinitum diuisibilis est, nunquam Achilles

studium currendo superabit.

Respondet hoc argumentum procedere ex fallacia eadem, quæ à diuisione continui in infinitum secundum partes proportionales, probare vellemus non posse diuidi per partes designatas & finitas totum continuum, in parte enim finita & designata consumuntur illæ infinitæ partes proportionales, quæ solum sunt infinitæ in potentia. Vnde cum finitam magnitudinem mobile velox conficiat breuiori tempore, quàm tardum, consequenter omnes illas partes proportionales secundum quas habet infinitatem, mobile velox consumet breuiori tempore.

Tertia ratio erat, quia aliàs sagitta quæ velociter mouetur, simul ferretur, & staret, quòd iam prima ratione solutum est.

Quarta ratio Zenonis. Sint duo mobilia æqualia, quæ per idem stadium moueantur motibus contrarijs, & vnum incipiat à medietate stadij, aliud à fine æquali velocitate, ita quòd vnum conficiat medium spatij, & aliud integrum spatium, consequenter medietate temporis vnum alterum superabit, & ex alia parte transijt vnum mobile ex illis totum aliud mobile, quod est eiusdem magnitudinis, ergo eodem tempore pertransijt totum mobile, & mediam partem spatij, & sic tempus integrum erit æquale dimidio.

Respond. Aristor. esse fallaciam in eo quod comparat eodem modo transitum per spatium quiescens, & transitum per mobile quod mouetur, quando enim mobilia sunt paris velocitatis æquali tempore transeunt idem spatium quiescens, & medietate temporis medietatem

spatij, sed si spatium etiam moueretur, bene posset transire vnum totam longitudinem alterius minori tempore, eò quòd vtrumque se mouet.


Alias rationes affert contra motum, quæ minus vrgnt, v.g. quia dum aliquid est in motu, neque in termino ad quem, v.g. in non albo, neque in termino ad quem, v.g. in albo, ergo nec album, nec non album, quæ sunt contradictoria. Resp. semper alteram contradictoriam esse veram, scilicet, quod nondum sit simpliciter & ex toto album, est tamen secundum quid scilicet in fieri & tendentia.

In vltimo capite post destructam opinionem Zenonis duo facit. Primò, agit contra opinionem Zenonis duo facit. Primò, agit contra opinionem Democriti, qui dicebat atomos non esse mobiles. Et secundò, ostendit contra Heraclitum non dari mutationem infinitam, sicut ipse dicebat, quòd omnia iugi motu mouebantur.

Circa primum, præmittit Philosoph. partes dupliciter moueri in aliquo continuo, scilicet propriè & per se, vel per accidens & beneficio totius. Indiuisibile ergo inquit non posse moueri nisi motu per accidens, sicut qui est in nauigio, scilicet motu totius, non motu proprio & per se; tùm, quia indiuisibile si mouetur vel est in termino à quo vel ad quem, vel partim in vno, partim in altero; si primum nondum mouetur; si secundum iam non est motus sed cessauit; si tertium erit diuisibile, non indiuisibile; tùm, quia si punctum mouetur in linea, & attingit spatium æquale sibi, & deinde aliud æquale sibi, constat lineam solis
pun-

punctis, si aliquid spatium minus, dabitur minus aliquid indivisibili, quod repugnat.

Circa secundum, ostendit nullam mutationem esse infinitam, quia omnis mutatio extremis clauditur, ergo nulla est infinita. Anteced. prob. inductivè in omni mutatione, generatio enim est inter ens & non ens, corruptio è contra, alteratio inter qualitates contrarias, augmentatio & diminutio inter quantitatem maiorem & minorem, latio inter loca diversa, ergo omnis mutatio terminis clauditur. In calce corporis dubitat duo. Primum, quomodo motus localis inter extrema claudatur, præsertim in motu circulari. Respondet id tantum mutari, quod potest mutatum esse, sicut id albescit quod potest esse album; cum ergo mutetur corpus per lationem etiam circularem, habet mutatum esse, & consequenter terminis clauditur. Secundum, est an re vera motus possit in infinitum aliquo modo esse. Et respondet, quod si sumantur motus specie diversi, potest unus succedere alteri in infinitum ut lationi alteratio, alterationi accretio, & sic de alijs, sicut esset si mundus duraret in æternum. In una autem specie motus existimavit Aristotel. aliquem motum posse esse perpetuum, scilicet motus cæli quem posuit ab æterno, de quo lib. 8. dicetur.



DE DIVISIONE MOTVS,

& continui per partes .

QVÆSTIO XX.

*De partibus , & indiuisibilibus
continui .*

ARTICVLVS I.

Quid sint partes proportionales, & indiuisibilia?

Nil vulgatiꝛ apud omnes eſt, quàm quòd continuum componatur ex partibus & in diuiſibilibus, tam in quantitate permanente, quàm in ſucceſſiua. Partes tam in ſucceſſiua, quàm in permanenti ſolum ſunt duplicis generis, quædam vocantur aliquotæ, ſeu deſignatæ, quarum quælibet addit aliquid diuiſibile ad aliam, ſine communicatione cum illa: aliæ vocantur proportionales, ſeu indeſignatæ, quæ entitatiuè non diſtinguuntur ab aliquotis, ſed intra eandem partem aliter atque aliter ſecundum diuerſas proportionẽs, & comparationẽs diuiſibilitatem eiꝛ explicant, ita quod nunquam poteſt diuiſibilitas partis exhauriri, ſed quacunque ſignata illa poteſt diuidi, & partes in quas diuiditũr etiam poſſunt ſeruire alteri immediatæ, vt per illas diuidatur, & hoc eſt iſtas partes proportionales eſſe communicantes inter ſe, non quia

quia penetrantur, sed quia quæ deseruiunt vni si designetur, etiam possunt seruire sequenti, si designetur, & sumatur vt diuisibilis.

Indiuisibilia habentia positionem in continuo permanenti sunt tria, scilicet punctum, quod caret omni parte: linea, quæ caret partibus latitudinis & profunditatis: superficies, quæ caret partibus profunditatis, de quibus egimus in Logica, quæst. 16. Indiuisibilia successiua sunt duplicis generis, quædam pertinent ad motum, & vocantur mutata esse terminatur enim motus in fieri per mutatum in facto, & similiter per illud continuatur, si ibi non sistat motus. Alia pertinent ad tempus, & vocantur instantia, quæ non distinguuntur à mutatis esse, nisi sicut duratio à re durante & sicut tempus à motu.

His suppositis circa indiuisibilia, & partes continui, quinque se offerunt explicanda. Primum, vnde constet in philosophia dari istas partes proportionales. Secundum, an indiuisibilia sint aliquid positium, & reale. Tertium, an indiuisibilia, & partes proportionales sint actu in ipso toto, vel solum in potentia. Quartum, an sint actu infinita. Quintum, an inueniantur indiuisibilia etiam in substantia, & alijs accidentibus præter quantitatem. Tria prima in hoc articulo tractabimus, reliqua in seq.



Prima difficultas.

Primò ergo quæritur vnde deducantur dari partes proportionales, & indiuisibilia in continuo? *Respondetur*, quòd supposito quòd sensu constat dari partes diuisibiles certas, & designatas, in quas quotidie videmus diuidi quantitatem, easque competere quantitati, etiam separatae, vt in Eucharistia; discursu ducimur ad intelligendum dari partes proportionales ad inuicem communicantes, supponendo id quod art. sequenti ostendetur, quod nullum diuisibile potest solui in indiuisibilia, ita quòd partes eius diuisibiles non sint, ex hoc enim constat, quòd cum omnis pars in continuo hoc ipso quòd sumitur vt pars, sit diuisibilis, necessario illi assignandæ sunt partes; quæ etiam diuisibiles sint, quarum quamlibet si velimus assumere, etiam diuisibilis erit, sed in partes quæ conueniebant ipsi parti prius diuisæ, quia est sibi immediata, & sic sunt partes communicantes ad inuicem, quarum vna seruit diuisioni alterius, & cum quælibet diuisibilis debeat includere partes, nunquam potest exhaustiri diuisibilitas istarum partium, ita quòd remaneat aliqua indiuisibilis.

Dari autem indiuisibilia in continuo, deducitur partim aliquibus experientijs, partim ex ipsa ratione secundum officium, quod exercent ista indiuisibilia terminandi partes, & continuandi. Experientiæ sunt, in primis, quia lux in corpore perfecte opaco tantum recipitur in superficie, quia si vltra illam transferet, hoc ipso non esset opacum, sed aliquo modo

mōdo diaphanum. Similiter locis ambit locatam secundum ultimam superficiem, quia si tangeret secundum profunditatem; locus non adæquaretur locato, sed secundum aliquid diuisibile excederet. Item si daretur globus perfectè sphaericus, & tangeret perfectè planum tangeret illud in puncto, quia si in aliquo diuisibili tangeret, in illo globus adæquaretur plano, & sic non esset perfectè sphaericus. Quomodo autem sic tangens in puncto moueri possit per planum, sequenti articulo dicemus.

Ratione verò deducitur dari ista indiuisibilia, tūc ob terminationem partium in continuo, tūc propter continuationem. Et quidem terminari quantitatem clarè videmus, cū sit finita, implicat autem terminari aliquo diuisibili, quia si hoc diuidatur, prius sumetur vna medietas quā alia, & sic prius terminabatur illa, & rursus in prima illius medietate terminari non potest, quia etiam diuisibilis est in alias medietates, & sic currit idem argumētum quousque deueniamus ad aliquod, quod ultra diuisibile non est, & hoc est indiuisibile. Similiter constat vnā quantitatem tangere aliam sine penetratione, ergo per indiuisibile, quia si tangeret in aliquo diuisibili, totum illud esset simul & non extra id quod tangitur, & sic penetraretur.

Quantum verò ad officium continuandi partes licet sensui minus manifestum sit, tamen ex ipsa ratione continui deducitur, quia sicut ea dicuntur se tangere, seu contigua esse, quorum extrema sunt simul, idest quando duæ superficies iunguntur, ita ea dicuntur continua, quorum partes termino, seu indiuisibili com-

inuni copulantur. Quod idem necessarium est, quia si una pars diuisibilis copularetur alteri diuisibili se ipsa, & non per extremitatem, seu indiuisibile, penetraretur, siquidem se tota vniretur cum illa, & non tantum per extremitatem, sed taliter, quod in quantum diuisibilis vniretur, & sic pars vnita esset intra aliam, quia quod vniretur alteri parti, vniretur per aliquid, quod posset diuidi, & sic non sola medietas, illius esset vnita, sed etiam altera medietas, atque adeo non esset tota extra aliam, sed intra, quod est penetrari cum illa, & confundi. Ratio ergo cur pars est extra partem in loco, & nihil vnus est intra aliam, est, quia vnitur per indiuisibile, quo copulatur alteri, & non intrat in aliam.

Secunda difficultas.

Secundò queritur, an ista indiuisibilia sint entia positiua distincta realiter à partibus? Respond. indiuisibilia ista, neque dicere solam negationem vltioris extensionis, neque partem ipsam cum connotatione talis negationis; neque ipsum formalem vnionem partium, sed realitates esse per se vel reductiue pertinentes ad quantitatem. Explicantur singula; non sufficit negatio prædicta, quia ista indiuisibilia requiruntur ad contactum posituum, nec solum deseruiunt, vt quantitas dicatur finita, & limitata; hoc enim posset etiam intelligi negatiue per hoc, quod vltiores partes non haberet; sicut dici solet communiter, quod si Deus impediret, ne resularet indiuisibile terminans, quando aliquid diuiditur, maneret quan-

quantitas terminata negativè, non positiuè. Sed tamen requiritur positiuus terminus, seu indiuisibile, quia quantitas habet positium contactum cum alia quantitate, qui contactus non fit in aliquo diuisibili, sic enim in rarer pars tangens cum parte contacta, non totaliter maneret extra: nec fit in aliqua negatione, quia sic tangeret in nihilo, sine resistentia penetrationis sicut si tangeret vacuum, quod est negatio corporis. Et eadem ratione non sufficit entitas partium diuisibilis, & positiua cum connotatione negationis aliarum partium, quia id quo formaliter fit ipse contactus, neque est illa negatio connotata, quia sic tangerentur in nihilo, neque ipsæ partes connotantes, quia diuisibiles sunt & diuisibile si tota diuisibilitate iungitur alteri, non tangit extra manendo, sed penetrando, seu intra alterum manendo.

Quid verò indiuisibile non dicat ipsam formalem vnionem, constat manifestè in ipso indiuisibili terminante, quod est verum indiuisibile, & non vnit, sed terminat partes; imò in diuisibile continuans potius reddit partem vnibilem, quàm formaliter vniat, eò quòd reddit partem non se tota communicabilem alteri, & penes diuisibilitatem, sed penes extremitatem, quæ est vnibilis alteri sine penetratione: sed manendo extra partem. Potius ergo indiuisibile reddit partem sic communicabilem impenetratiuè, quàm sit ipsa formalis communicatio, seu vnio.

Denique, quòd sit realitas pertìnens ad prædicamentum quantitatis per se, vel reductiuè constat, quia linea, & superficies sunt veræ species

cies quantitatis continuæ, habentes suam specialem dimensionem, qua parte diuisibiles sunt, ergo sunt realitates per se pertinentes ad quantitatem. Punctum autem quia caret omni parte & extensione, solum pertinet reductiue ad quantitatem, tanquam positius terminus eius. Et Diu. Thom. opusc. 36. cap. 2. sentit, quod est aliqua realitas, dicit enim: *Quod punctus nihil est de ipsius lineæ essentia, quia nihil unum, & idem realiter omnibus modis indiuisibile potest simul in diuersis partibus eiusdem continui permanentis esse. Nec potest esse terminus eius, vel continuatio aliqua, cum ille punctus sit aliquid unum realiter, unde non possunt esse plures puncti realiter. In linea tamen sunt plures puncti, & realiter ad inuicem diuisi, ut duo eius termini, & similiter in eius continuatione.* Ita D. Tho. Qui etiam videri potest q. 3. de poten. art. 17. ad 5. ubi dicit: *Quod instans est aliquid temporis, non ut pars, sed ut terminus.* Est ergo indiuisibile aliquid positium, cum effectus habeat posituos pertineatque ad quantitatem, eo modo quo dictum est.

Quod si dicas, videri superflua ista indiuisibilia, tum quia sola negatione vterioris extensionis potest quantitas finire, præsertim si Deus impediat, ne facta diuisione resultet aliquid distinctum indiuisibile; tum etiam, quia qualitas, & alia accidentia habentia latitudinem, non requirunt indiuisibilia ad vniorem suarum partium, ergo nec extensio quantitatis, & similiter partes substantiæ vniuntur sine indiuisibilibus, aliàs essent impenetratæ, etiam sine quantitate; tum denique, quia quantitas Corporis Christi in Sacramento vnit suas partes

tes indiuisibilibus, neque enim caret illis, sicut neque in coelo, & tamen penetratur illa quantitas, ergo indiuisibilia non requiruntur propter impenetrationem partium.

Respondetur ad primam probationem, quod quantitas sola negatione posset finire negatiuè, non tamen positiuè, idest secundum situm & ordinem resistentem penetrationi, & sic facientem contactum positium. Quod si Deus impediret resultantiam indiuisibilis, maneret illa quantitas penetrabilis, & continuabilis cum alio indiuisibili, si ei applicaretur non contiguabilis. Ad secundam probationem dicitur plures etiam concedere indiuisibilia in intentione qualitatis, de quo dicemus in libris de generatione. Quidquid tamen sit, dicimus cum Conimbricensi. hic, q. 1. ad 3. Ad primum esse disparem rationem, quia in partibus qualitatis, ut qualitas est, non requiritur situatio, & impenetratio, imò in eadem parte, & in eodem puncto fieri potest intensio, in partibus autem quantitas requiritur impenetratio, ita quod partes se totis non vniuntur, sed situatione extremitatum, & indiuisibilium, ut vna pars sit extra aliam. De substantia verò dicemus dubio 5. non habere indiuisibilia sine quantitate, ut etiam diximus in Logica quæst. 16. Ad tertiam probationem dicitur, quod partes corporis Christi in Eucharistia etiam vniuntur indiuisibilibus in ordine ad totum, quia partes illæ non sunt confusæ, & se totis vnitæ, & sic quantum est ex se petunt non penetrari cum alia quantitate, etiam quoad locum, sed hic effectus secundarius impeditur in illis partibus, quia non situantur in loco modo
quan-

quantitatiuo, sed modo indiuisibili substantiæ.
 Quomodo autem recipiantur indiuisibilia in substantia, si illa indiuisibilibus caret dicemus dub. 5. eadem enim ratio est, ac de partibus, nec enim est necesse, quod in substantia sint partes, & indiuisibilia actu, & formaliter, sed solum virtualiter, & secundum capacitatem.

Tertia difficultas.

Tertio inquiritur. Vtrum ista indiuisibilia sint actu in continuo vel in potentia? Tres sunt sententiæ. *Quidam* omnino negant, tam continua quam terminatiua esse in actu. Contra quos egimus dub. 1. *Alij* terminatiua ponunt in potentia, continuatiua verò in actu. *Alij* è contra terminatiua ponunt in actu, & continuatiua in potentia, de quo Fons. 5. Metaphysic. cap. 16. quaest. 6. qui solum concedit superficiem externam, physicè & actu dari, lineas verò & puncta solum mathematicè intra ipsum corpus, & de partibus proportionalibus, eadem est difficultas, an detur actu in continuo, non enim desunt qui id negant.

Nihilominus resolutio est, dari actu in continuo indiuisibilia, tam terminatiua, quam continuatiua, hæc enim solum differunt penes munus, & officium, continuatiua enim sunt finis vnius partis, & principium alterius, terminatiua autem solum sunt finis, vel solum principium. Similiter etiam partes proportionales dantur actu quantum ad suam realitatem, secundum quam non distinguuntur physicè ab aliquotis.

Prima pars conclusionis sumitur ex D. Tho.
 opusc.

opusc. 36. cap. 2. vt supra retulimus, vbi dicit, quod in linea sunt plures puncti, & realiter ab inuicem diuisi, & similiter in eius continuatione, & in hoc lib. lect. 5. in fine generaliter docet, *quod omnis linea est media inter duo puncta*, sicut ergo datur linea in actu, ita, & puncta. Videri etiam potest 28. de veritat. art. 2. ad 10. *Ratio* sumitur ex supra dictis, quia continuum, & contiguum datur in re, actu, & physicè, sed continuum est cuius partes vnicoterminino, seu indiuisibili copulantur, contigua autem, quorum extrema seu indiuisibilia sunt simul, ita quod duo indiuisibilia se tangunt, ergo sicut datur actualis copulatio partium continui, ita etiam dantur actualiter indiuisibilia. Similiter partes manent actu impenetratæ, quod habent beneficio indiuisibilitum, quibus vniuntur, ergo talia indiuisibilia sunt in actu.

Secunda verò pars, de partibus proportionalibus constat, quia partes proportionales sunt inclusæ in aliquotis, nec ad illas faciunt additionem, sed solum explicant modum indiuisibilitatis earum, quia diuisibilitas exhausti non potest per diuisionem, & solui in indiuisibilia, vt sequenti art. dicemus. Itaque illa est pars aliquota, & designata, in qua est dare primum & vltimum, partes autem proportionales in quibus non est inuenire primū, & vltimum, quod amplius non sit diuisibile. Constat autem, quod in eadem parte in qua assignamus primum, & vltimum secundum terminationem, non est assignare primum, & vltimum secundum diuisionem, & sic ad eandem entitatem partis pertinet esse aliquo-

tam, & includere in se partes proportionales ratione diuisionis, & sic sunt ipsæmet partes aliquotæ in quantum inexhaustibiles per diuisionem, taliter quod soluantur in partes non amplius diuisibiles, licet per diuisionem designatam, & aliquotam, idest in alias partes etiam diuisibiles finiatur quodcumque diuisibile.

Sed obijcies, quia Diu. Thom. sæpius assignat istas partes, & indiuisibilia in potentia, non in actu; ut patet in 1. Physic. lect. 9. ubi inquit: Quod quantitas totius consurgit ex partibus, sed hoc intelligendum est de partibus existentibus actu in toto, sicut caro, neruus, &c. existunt in animali, & per hoc excluduntur partes totius, continui, quæ sunt in potentia in ipso. Et in 4. dist. 19. q. 1. art. 2. quæst. 3. ad 1. dicit: Quod partes alicuius homogenei continui ante diuisionem non habet esse actu, sed potentia tantum. Et hac ratione in partibus hostiæ, non dicitur poni Christus infinities, quia non sunt infinitæ partes in actu, sed in potentia, ut videri potest 3. par. quæst. 76. art. 3. ad 1. & in 4. distin. 11. quæst. 1. art. 2. quæstiunc. 3. Resp. D. Tho. non loqui de partibus quantum ad entitatem, sed quantum ad numerum, sic enim sunt in potentia plures, quia non sunt actu diuisæ: ut clarè deducitur ex ipsis verbis, S. Thom. loco illo allegato ex 4. Sent. concludit enim: Vnde in actu non est accipere ipsarum partium numerum, sed potentia tantum. Et eodem modo loquitur in 7. Metaphys. lect. 3. quando dicit: Quod duo dimidia in vna linea sunt in potentia tantum; quia scilicet non sunt diuisa, & consequenter neque plura in actu & quando 1. par. q. 85. art. 8. ad 2. dicit:

Quod

Quòd in linea infinita, & circulari non est punctum, nisi in potentia, loquitur de puncto terminante.

Dices secundò. Quando diuiditur quantitas, resultat noua superficies, & in linea nouum punctum, ergo illud antea erat in potentia, aliàs non resultaret de nouo. Item illa puncta & partes proportionales non habent propriam vnitatem totius, aliàs essent diuisa; ergo neq; realitatem, hæc enim vnitatem sequitur. Item omnes partes, in quas diuidi potest continuum actu ibi sunt, nec enim per diuisionem crescunt & continuum diuidi potest in infinitum, ergo actu sunt infinita: & cum successiuè percurrantur à motu omnes illæ, in quas potest diuidi, motus erit infinitus, & sic impertransibibilis.

Ad primam instantiam respondetur, quòd in diuisione quantitatis aliquando resultat noua superficies simpliciter in termino diuisionis, aliquando non simpliciter resultat, sed illud quod erat continuatum, redditur terminatum per hoc solum, quòd partes quæ immediatè post illud indiuisibile sequebantur, ab illo separentur, sed quia immediatè post indiuisibile non sequitur aliud in continuo, sed pars, ideò si diuisio fiat in parte, & non in ipso indiuisibili, necesse est quòd resultet nouum indiuisibile in actu, quod antea non poterat esse nisi in potentia. Ad secundam dicitur, quod illæ partes, & illa indiuisibilia habent vnitatem partialiter, & communicantem in vnitatem continui, non absolutè distinctam, & eo modo etiam habent vnitatem partialem. Ad tertiam respondebitur artic. sequenti.

ARTI.

ARTICVLVS II.

*Verùm indiuisibilia & partes proportionales sint
actu infinita in continuo ?*

Multi affirmant, sed tamen quia istæ partes sunt se cōmunicantes, non efficiunt actu & categorematicè infinitum. Ita ex Patre Suarez disp. 40. Metaphys. sect. 5. Rubio & alijs docet Cabero hic disp. 1. dub. 2. Alij, & est communior sententia, solum agnoscunt infinitas partes, & indiuisibilia in potentia.

Procedit autem ista quæstio inter duas difficultates; nam ex vna parte videtur concedendum esse infinitum in actu. Si vero hoc effugimus, inciditur in aliud inconueniens, quia diuisibile vltimatè per diuisionem finietur, & terminabitur. Vtrumque probatur, nam partes omnes in quas potest diuidi continuum actu sunt in illo, & similiter omnia indiuisibilia, quæ actu vniunt istas partes; vel ergo quælibet pars diuidi potest in aliam, atque aliam distinctam, vel non potest, ita quòd sit deuenire ad aliquam, quæ vltèrius diuisibilis non est. Si hoc secundum dicatur, erunt quidem partes finitæ, sed tamen diuisibile exhaurietur per diuisionem. Si verò dicatur primum, necessario debent esse partes actu infinitæ, & non solum in potentia, quia cum in infinitum diuisibilis sit illa quantitas, vt contentæ in continuo, infinitæ actu esse debent, quia quantum est diuisibile in ea quæ insunt, ergo omnes illæ in quas potest diuidi quantum in infinitum, actu insunt in illo. Nec potest dici, quòd sunt partes

partes se communicantes, quæ non faciunt infinitum simpliciter. Nam contra est, quia etiam sine vlla communicatione partium, & separando quamcumque medietatem ab alia, & non repetendo easdem partes, quælibet est diuisibilis in alias distinctas alioquin si per repetitionem, & communicationem partium diceretur diuidi in infinitum, non esset in infinitum diuisibile, sed repetibile.

Item si solum dantur partes infinitæ in potentia, finitæ autem in actu, ergo etiam erunt indiuisibilia finita in actu, & sic solum partes finitæ afficientur indiuisibilibus: & actu manebunt impenetratæ, reliquæ vero quæ in infinitum diuidi possunt, penetratæ manebunt, & non potest assignari, quibus competat habere indiuisibilia & quibus non, imò oportet assignare quomodo punctum afficiat partem, quia cum quælibet pars sit diuisibilis, non potest designari, quòd aliquid illius afficiatur puncto, quin prius medietas illius afficiatur, & quælibet alia medietas in infinitum prius, & antecedenter afficiebatur.

Nihilominus in sent. Diu. Thom. partes in continuo non sunt actu infinitæ quoad numerum, neque etiam indiuisibilia, vt ex locis allegatis in præcedenti difficultate constat. *Et ratio est*, quia si intelliguntur partes actu infinitæ, ita quòd quælibet seorsum ab alia faciat additionem, vel diminutionem ad illam, sine dubio erit infinita quantitas in actu, quia quodcumque diuisibile quantumuis minimum, quòd talis est naturæ, quòd potest superaddi ad alterum, & extensionem facere cum illo, si multiplicetur actu in infinitum in ipso continuo,

nuo, faciet continuum infinitum; si verò pars superaddita alteri non extendit, nec facit maius, hoc ipso solum est pars in potentia, & communicans cum altera, non distinctam extensionem ponens in actu.

Quare diuisio in infinitum, in quocumque continuo non intelligenda est collectiuè, sed diuisiuè, ita quòd nulla pars in particulari signari, & determinari potest, quæ diuisibilis non sit in alias partes. Et quantum ad hoc optimè dicitur, quòd nulla diuisione potest exhaustiri diuisibile, quia cum diuisione ipsa designetur pars quæ diuiditur, hoc ipso non potest aliqua pars diuidi, nisi in partes diuisibiles. At verò collectiuè non potest diuidi in partes infinitas, ita quòd vnā post aliam diuidendo actu fiat diuisio infinita, sed si plures diuisiones fiant, exhaustietur quidem diuisum, sed penes partes aliquotas diuisionibus finitis; partes verò proportionales solum habent posse in infinitum diuidi, & nulla diuisione exhaustiri, si quælibet sumatur diuisiuè, & in particulari quantumcumque minima sit, & hoc loquendo quantum est ex natura quantitatis, & modo mathematico, nam ratione subiecti non valentis infra quacumque diuisionem quantitatis saluari, non poterit fieri talis diuisio, nisi destructo subiecto, vt etiam notat S. Tho. hoc lib. lect. 3.

Et hinc intelligitur quomodo partes illæ proportionales dicantur communicantes inter se, non quia penetrentur, cum hoc sit impossibile, penetratis enim partibus proportionalibus quam extensionem haberent aliquotæ, quæ nõ distinguuntur ab illis? Nec ex eo quod communicant ipsi toti; hoc enim non sufficit, quia
etiam

etiam partes aliquotæ communicant toti, imò etiam partes physicæ ut materia & forma, nec tamen inter se sunt communicantes, sed una extra aliam. Dicuntur ergo communicantes quantum ad ipsum modum, & designationem diuisionis, quia in toto continuo quælibet pars diuiditur in sibi immediatas, & si hæc immediatas diuideretur etiam in partes sibi immediatas, tunc erit pars illius ea, quæ ante diuidebatur in illam, & sic sunt communicantes non in extensione & in additione materiæ, sed in modo exercendi diuisionem & designandi, partes verò secundum extensionem in actu semper sunt finitæ, siquidem secundum eam crescunt, vel decrescunt, sed sub ista finita extensione continetur infinita diuisibilitas sine categorematicè, & ex parte modi faciendi diuisionem. Et hoc oportet benè discernere, quia in eo cum magna confusione Authores loquuntur, & vix inuenitur qui ad plenum satisfaciatur; optimè autem intelligitur dicendo, quod partes proportionales non important distinctam extensionem, & additionem materialem ad aliquotas, sed diuersum modum designandi diuisibilitatem partium, & pars quæ seruit uni, seruit alij, ideoque communicantes dicuntur ut infinitæ in potentia designationis, non in actu extensionis. Ex quibus patet ad rationes dubitandi. *Ad primum resp.* quòd partes proportionales non possunt diuidi in partes distinctas, & non se communicantes in infinitum, sed solum in partes se communicantes ut explicatum est, quod est diuise esse in infinitum diuisibiles, non collectivè, licet unaquæque seorsum & diuise sumpta diuisibilis sit

in

in partes distinctas, & in ea quæ insunt, & de facto sunt in ipso continuo, vt in partes aliquotas. Hæc tamen, quæ de facto sunt in ipso continuo, non sunt actu infinita, nisi secundum repetitionem, & communicationem earundem partium, quòd est esse infinita in potentia, & sine categorematicè. Quòd si solueretur continuum in omnem sui partem, ita quod neutra alteri communicaret, sequerentur duo contradictoria, & quod essent infinitæ indiuisibiles, quia vltèrius diuidi non possunt, & quod essent finitæ, & diuisibiles, quia partes sunt continui finiti. Vndè, quando dicitur accipienti vnā partem, semper restat alia, ergo sunt infinitæ in actu, distinguo anteced. Restat alia quæ sit aliquota & nouam extensionem addat ad præcedentem nego, acceptio enim partium aliquotarum tandem finitur. Restat alia proportionalis, & communicans ad inuicem cum præcedente, ita quòd in ipsa designatione quomodocumque accipiatur, semper in infinitum diuisiue possit alia sumi, transeat, sed hæc acceptio non est partis actu separatæ ab alia, & addens distinctam extensionem in infinitum, sed est pars communicans cum alia, vt explicatum est.

Ad secundam Respondetur, non dari infinita in diuisibilia actu, sed potentia in continuo, quæ est expressa sententia Aristot. qui cum hoc lib. 6. text. 77. soluens rationem Zenonis, quòd infinita media, quæ sunt in continuo, non possunt pertransiri tempore finito, respondit, etiam tempus eandem infinitatem habere quàm continuum postea verò in lib. 8. tex. 68. hanc solutionem reuocat, quæ solum erat ad homi-

hominem, & dicit, quòd si quærat de ipso tempore, quomodo sit infinitum, dicendum est, quòd solum habet infinitatem in potentia, finitatem verò in actu. Et idem docet S. Th. 6. Physic. lect. 11. *Quod mobile non utitur infinitis, quæ sunt in magnitudine quasi actu existentibus, sed quasi in potentia.* Quomodo autem intelligi possit quòd solum sint indiuisibilia finita in partibus continui diuisibilibus in infinitum? *Respondetur*, quòd vnum indiuisibile afficiens vnâ partem formaliter, afficit plures inadæquatè & virtualitèr, quòd de indiuisibili terminatio satis constat, quia omnes partes vnius lineæ vno puncto terminatæ redduntur; de continuatio etiam patet, quia post vnum punctum immediatè sequitur pars, quæ vtique non potest tota formaliter tangi à puncto adæquate, sed inadæquatè, cùm indiuisibile non possit adæquari diuisibili, virtualiter autem adæquat totam, quia reddit illam impenetratam & coordinatam alteri penes extremitates. Quantum autem vnius partis possit afficere vnum punctum, nescimus; sufficit enim dicere, quòd vnum punctum non sequitur immediatè post aliud, sed pars, & illud quod immediatè post sequitur, afficitur ab indiuisibili, ne penetretur cum alia parte, & sufficit illi parti vnum indiuisibile. Vnde si pars illa diuidatur inter punctum & punctum, resultabit nouum indiuisibile terminans actu, quod signum est ibi fuisse in potentia tantum.

Ex quo respondetur ad id, quod vltimo in argumento insinuat, scilicet quomodo possit indiuisibile afficere partem, quia quacumque parte data, alia medietas est prior, quæ afficit.

ficiatur indivisibili. Sed respondetur, quòd indivisibile non potest afficere adæquatè, & totaliter partem, licet inadæquatè afficiat, & virtualiter totam. Et hoc ideo, quia punctum est initium partis, aut terminus, principium autem rei non afficit totam adæquatè, & totaliter, aliàs esset totum, sed afficit totam inchoando illam, & hoc est afficere inadæquatè, & non totaliter.

Quid de indivisibilibus substantiæ?

Multi recentiores communiter tribuunt substantiæ, & partes ordinatas, & indivisibilia à quantitate distincta. *Et fundamentum* præcipuum est, quia in substantia dantur partes ante quantitatem coordinatæ, substantia enim corporea secundum se partes habet, ergo & indivisibilia, quibus partes coordinentur. Et sicut in substantia dantur partes, quia correspondere debent partibus quantitatis, ita & indivisibilia, quibus correspondeant indivisibilia quantitatis. Ex quo sumitur secundum fundamentum, quia indivisibile quantitatis non subsistit, sed inhæret, & non in partibus, quia divisibiles sunt & improporcionatæ indivisibilibus, ergo in indivisibili substantiæ, ergo substantia habet indivisibilia, ut correspondeant indivisibilibus quantitas, quæ recipit.

Nihilominus oppositum omnino certum solidumque existimo, nam destruitur tota ratio, & essentia quantitatis, si ponuntur in substantia partes formaliter ordinatæ per indivisibilia, ut in Logica tractauimus, q. 19. Et sicut in substantia solum admittimus partes radicaliter,

sister, & secundum capacitatem, ita & indiuisibilia. Ratio huius est, quia si substantia habet indiuisibilia, quibus formaliter vniuntur partes, & ordinentur, necessario debemus fateri in substantia ante quantitatem dari sufficiens principium impenetrationis, tam quoad se, quam quoad locum; & sic extensio quantitativa nihil omnino addit super extensionem substantiæ entitativam, nec ab ea differt, siquidem si substantia habet partes extra partes extensas in ordine ad totum, quia ordinatæ vniuntur in ipso, & in ordine ad locum, quia habet sufficiens principium impenetrationis, ratione cuius extenditur in ordine ad locum, non habet quantitas aliquid amplius tribuere, quia omnis extensio etiam quantitativa exhaustitur extensione quoad totum, & quoad locum, nec amplius potest præbere quantitas, quam principium impenetrationis, remota enim quantitate, substantia penetrationi non resistit, imò quantitas modo substantiæ posita, ut in Corpore Christi in Eucharistia penetratur cum quantitate panis.

Quod ergo hoc sequatur, si substantia habet indiuisibilia, quibus eius partes vniuntur & coordinentur, inde constat, quia illæ partes vniuntur indiuisibilibus, quæ non se totis vniuntur, sed solum penes extremitates, si enim se totis vniuntur, non indiuisibilibus vniuntur, sed vna pars diuisibili coniungeretur, non penes extremitatem aliquam, sed penes ipsam diuisibilitatem, atque adeò vna pars intraret aliam, quod nihil aliud est quam penetrari, id est intra diuisibilitatem alterius constitui. Ergo quæ vniuntur non se totis, sed penes ex-

extremities & indiuisibilia , hoc ipso habent principium resistendi penetrationi , quia principium resistendi penetrationi est principium vniendi vnā partem alteri penes extremitatem seu indiuisibile , ratione cuius vnā pars non intrat in aliam , sed sola extremitate vnitur illi . Ergo si substantia habet indiuisibilia vnitua partium , habet principium resistendi penetrationi , quā vnā pars intrat in aliam , & vnitur illi non per solam extremitatem .

Dices, substantiam solum ordinare partes, & extendere erga totum , non erga locum, neque erga alia corpora, sicut facit quantitas , sed penetrari posse ab alijs , eo modo quo ipsum corpus Christi in Eucharistia non habet modum impenetrationis erga locum , licet habeat erga totum : id ergo quod miraculose habet quantitas Corporis Christi, habet connaturaliter substantia remota quantitate , scilicet quod resistat penetrationi in ordine ad alia corpora, non in ordine ad proprias partes .

Sed contra est . Primò , quia essentia quantitatis non consistit in hoc , quod est actu resistere penetrationi , potest enim vnā quantitas etiam localiter circumscripta actu penetrari cum alia quantitate, vt supra lib. 4. ostendimus, sed consistit in eo , quod habeat principium, & potentiam , quæ petat resistere penetrationi quantum est ex se, licet actualis penetratio tanquam secundarius effectus quantitatis possit impediri à Deo : si ergo substantia habet partes vnire impenetratiuè in ordine ad se , ex vi talis modi petit , & habet sufficiens principium, quo reddatur impenetrata loco seu corpori contiguo, quia non stat, quod illud indiuisibile, quod

quod sufficit reddere vnam partem impenetratam alteri parti continuæ non sufficiat reddere impenetratam alteri corpori contiguo, si bi apponeretur, ergo habet principium sufficiens, & petens impenetrationem cum altero, quod est habere totum effectum quantitatis. Deinde, quia si substantia habet indiuisibilia continuatiua, vt recipiat indiuisibilia quantitatis, etiam habebit indiuisibilia terminatiua, vt recipiat indiuisibilia terminatiua quantitatis, ergo ratione illius indiuisibilis terminantis tanget alterum corpus, seu substantiam, mediante illo indiuisibili, tanquam aliquid contiguum, & non continuum, ea enim se tangunt contiguum, quorum extrema seu indiuisibilia sunt simul, ergo non minus habet principium resistendi penetrationi aliorum corporum penes indiuisibile terminans, quam resistendi penetrationi partium continuarum penes indiuisibile continuans.

Ad primum fundamentum oppositum respondetur, non præhaberi in substantia partes, & indiuisibilia formaliter, formalitate coordinationis, & extensionis, sed capacitate substantiæ, quæ solum radicaliter habet partes, & indiuisibilia, non formaliter, idest habet capacitatem recipiendi indiuisibilia, & ordinationem formalem partium per quantitatem, quod non habet Angelus, vt in q. 16. Log. diximus.

Ad secundum respondetur, indiuisibilia non subsistere, sed recipi in substantia, non tamen in indiuisibili substantiæ formali, sed in radicali, idest in entitate capaci indiuisibilium. Imò

Ut benè aduertunt. Conimbricenses hic quæst. 1. art. 3. ad sextum, indiuisibilia non sunt in subiecto adæquatè quasi eis correspondeant indiuisibilia distincta in subiecto, sed inadæquatè, hoc est, sunt in substantia ratione quantitatis, quæ sine superficie, & linea, & punctis non coalescit, & mediante tali quantitate substantia recipit indiuisibilia; qui autem ponunt indiuisibilia in substantia, non facillè se expediunt, quomodo sint ista indiuisibilia in forma, & in materia, & si sunt distincta indiuisibilia, quomodo se coniungant? Quod si sunt in sola materia, quomodo ergo per indiuisibilia materiæ partes formæ extendantur?

Si dicas, quomodo ergo Corpus Christi reum est in puncto, si substantia panis puncta non habet? *Respondetur*, Corpus Christi correspondere puncto specierum panis, quod est punctum formale, & quantitatum: conuertere autem substantiam panis, etiam quantum ad punctum in Corpus Christi, non quantum ad punctum formale substantiæ, sed radicale, id est illa entitas panis, quæ de se est capax recipiendi quantitatem cum puncto.

A R T I C V L V S III.

Verùm continuum componatur ex solis indiuisibilibus?

Sensus quæstionis est, an continuum ita constet ex partibus, quod si illæ diuidantur, possint peruenire ad aliquam, quæ vltèrius diuisibilis non sit, & ita si diuidantur omnes indiuisibiles maneant? Vnde si constat solum
ex

Ex illis, solum constabit ex indiuisibilibus.

Sententia Arist. in hoc 6. lib. cap. 1. est contra Zenonem, & alios antiquos, continuum non constare ex solis indiuisibilibus, quod etiam tradit D. August. 11. de Trin. cap. 10. & lib. de quantitate animæ, cap. 21. in fine. D. Thom. expressè in præsentī lib. lect. 1. & in tantum in Philosophia inualuit hæc sententia, quòd Concilium Constantiense sess. 21. inter errores Ioannis Hus posuit tanquam errorem in Philosophia, quòd dixerit lineam componi ex punctis immediatis, aut simpliciter finitis. Et tamen non desunt aliqui recentiores, qui Zenonis opinionem suscitauerint, sentiendo contra Aristot. continuum solis indiuisibilibus componi.

Rationes quibus Philosophus probat suam sententiam physicæ sunt, quibus alij addunt rationes ex Mathematica petitas; præcipuæ ergo rationes Philosophicæ ex duobus principijs pendent. Primum est, quòd indiuisibile additum alteri indiuisibili, licet multiplicet numerum quod est facere quantitatem discretam, non tamen facit maius & extensius quod est constituere quantitatem continuam. Secundum est, quod vnum indiuisibile unitum alteri se toto illi coniungitur, & eundem locum occupare potest, vnde si tota quantitas constaret ex indiuisibilibus, tota esset in eodem loco, & non extensa in illo, imò nullæ darentur partes in quantitate, quia indiuisibilia solum sunt extremitates partium, non partes ipsæ.

Primum principium ex eo constat, quia indiuisibile caret omni extensione, & omni principio constituente diuisibilitatem, cum in se

nullam habeat, sed solum rationem termini, quo partes terminantur, vel continuantur; ergo coniunctio plurium indiuisibilium non potest constituere totum, quod constat partibus diuisibilibus; neque enim indiuisibilia ex eo, quòd coniungantur, aliquam positionem partium inducunt, cum ipsa in se nihil partis habeant, sed carentiam partium; ergo plura indiuisibilia sunt plures carentiae partium.

Dices esse formaliter indiuisibilia, & ut quod; tamen virtualiter, & ut quo dant diuisibilitatem, quatenus vnum coniungitur alteri, sicut vnitas, licet sit indiuisibilis in genere numeri, tamen coniuncta alteri facit numerum, seu extensionem discretam, & instans adiunctum parti praeteritae facit durationem maiorem.

Sed contra est, quia vnum punctum respectu alterius, non se habet ut forma diuisibilitatis, sed ut materia, quia in illa indiuisibilia diuiditur totum, ergo non se habet ut principium quo diuisibilitatis; neque enim est forma, qua redditur diuisibilis, sed id in quod diuiditur ipsum totum. Et sicut vna substantia spiritualis posita iuxta aliam non facit extensionem, quia neutra in se extensionem habet, ita nec punctum ex eo quòd ponatur iuxta aliud, faciet extensum, quia vtrumque caret extensione. Denique punctum, quod immediatè sequitur post aliud, non extrahit illud à negatione diuisibilitatis, ergo quod consequenter se habeat, nihil ad diuisibilitatem confert, siquidem ipsa consecutio non potest facere extensionem, nisi iuxta materiam in qua est, ut in rebus spiritualibus consequenter se habentibus extensio non datur; consecutio enim non est aliud quam

quātm relatio, seu ordo vnus post aliud; relatio autem formaliter non potest facere extensum, ergo si ipsa materia extensionis sunt sola indiuisibilia, quæ in se carentiam habent extensionis, ex eo præcisè quòd vnum consequenter se habet post aliud, non constituet extensionem, sed solum ordinem consecutionis. Et in hoc est lata differentia inter vnitatem respectu numeri, & punctum respectu extensionis, quia vnitas facit numerum segregando & diuidendo ab alio, quæ est extensio discreta, punctum autem, seu indiuisibile componendo, & coniungendo. Est autem contra rationem indiuisibilis extendere diuisibiliter, non autem segregare, & diuidere, vel segregari ab alio, & consequenter numerum, vel multitudinem facere. Similiter instans vel indiuisibile additum parti non facit maiorem durationem, sed addit terminationem illius, & sic instans non importat maiorem durationem supra durationem præteritam, sed complementum terminans ipsam durationem.

Secundum principium ex eo deducitur, quia punctum caret partibus, ergo non potest tangere alterum punctum secundum aliquid sui, & non secundum aliud, secundum extremitatem, & non secundum medietatem, quia totum quod est in puncto, est extremitas, & sic vel tangit totum vel nihil, si ergo indiuisibile tangit aliud se toto, penetratur cum illo, & manet intra eundem locum, ergo quantumcumque superaddantur indiuisibilia, non extendunt quantitatem, quia occupant eundem locum & sic vnum non ponitur extra aliud, neque ex sua natura id petit, atque adeo non extenditur.

Dicitur, indiuisibile positum iuxta alterum, non tangit illud se toto, nec penetratur cum illo; potius enim indiuisibile resistit penetrationi, & facit ut duo corpora secundum extrema se tangant, & non penetrentur, ergo non se totis se tangunt, nec ponuntur in eodem loco, & hoc constat; tùm in puncto terminatio, quia contiguatur cum alio terminatio alterius lineæ, & sic non est in eodem loco, alioquin penetrarentur duæ extremitates lineæ, vel duæ superficies corporum; ergo sunt in diuersis locis, etiam si sint indiuisibilia, consequenter se habentia; tùm etiam in indiuisibili continuatione, quia punctum inhæret alicui parti, & tamen non penetratur cum illa, sed alteri vnitur, ergo à fortiori non penetrabitur cum altero puncto, si immediatum illi esset.

Sed contra est, quia indiuisibile resistit penetrationi partium, quia est earum extremitas, & sic facit, quòd partes penes extremitatem se tangant, & non secundum se totas. At verò punctum sine partibus sumptum non tangit ut extremitas alterius, cuius aliz partes non tangunt, sed totum quod in puncto est, extremitas est. Si autem punctum inhæret parti, & pars mediante illa tangit, vel vnitur alteri, hoc ipso non se tota vnitur illi, sed per aliquid sui non diuisibile, sed indiuisibile, & sic non penetratur. Vnde ad primam instantiam dicitur, quòd duæ superficies quando se tangunt, sub eodem indiuisibili loco continentur; ut expresse docet S. Thom. q. 28. de verit. art. 2. ad 10. Itaque plura indiuisibilia non requirunt distinctum locum, sed tanguntur se totis, quia idem est in illis tangi, & tangi se totis, cum careant

teant partibus; faciunt tamen ne partes penetrentur, quia faciunt ne partes se totis tangentur, sed solum penes extremitates. Ad secundam instantiam dicitur, quod punctum continuatum inhaeret parti inadæquate, scilicet toti parti, sed non totaliter, nec eam comprehendendo, & vndique penetrando, cum sit illi improporcionatum, utpotè indiuisibile cum diuisibili, sed inhaeret parti tanquam subiecto, ut principium eius vel finis. Si verò punctum immediatè vniatur alteri puncto, se toto vnitur illi, cum sit illi adæquatum, nec sit in eo aliud tangere extremitate, & tangere se toto.

Plures rationes, quæ ex Mathematica deducuntur, omittimus in præsentî. Videri possunt apud Conimb. hic q. 2. art. 2. & alios quos ipsi citant. Plures etiam diximus in textu Aristot. huius libri.

Soluantur argumenta.

Primò arguitur, quia si continuum non componitur ex indiuisibilibus, sed ex partibus, vel illæ sunt semper diuisibiles in alias, vel deuenitur ad aliquam, quæ vltèrius diuisibilis non sit. Si hoc secundum, habemus intentum; si primum, sequitur in quolibet continuo dari infinitas partes, & infinitum in actu, quia quamlibet partem accipiendo, semper alia restat accipienda, nec sufficit dicere, quòd illæ partes sunt proportionales, & se communicantes; nam quæcumque pars diuisibilis habet actu partes illas, in quas diuidi potest, & cum illæ sint diuisibiles, aliquid ad-

dunt ad præcedentes, & constituunt maius, seu extensius, alioquin si non constitueret maius, esset indiuisibile, ergo cum in quolibet continuo semper restet accipienda pars, quæ per additionem sui faciat maius, utique est pars non communicans. Item cum mobile successiue transeat partes spatij, si illæ partes sunt infinitæ, quacumque signata prius aliam attingit, & prius aliam, ergo nunquam incepit motus, quia nunquam est signare unde incepit: nec similiter poterit pertransiri aliquod spatium finito tempore, quia sunt infinitæ partes pertranscundæ, & quacumque transacta, restant aliæ pertranscundæ. Ac denique positis partibus infinitis, etiam indiuisibilia erunt infinita, & singulis indiuisibilibus potest creari vnus Angelus, ergo in fine eorum dabitur infinitum actu. *Confirmatur*, quia Deus potest diuidere omnes partes continui actu quia omnes diuisibiles sunt, ergo ab aliqua potentia diuidi possunt, siue diuisiue, siue collectiue: facta autem hac totali diuisione, non possunt amplius diuidi, ergo remanent indiuisibiles, ergo continuum componitur ex indiuisibilibus.

Respondetur, solutione data, quod quælibet pars est diuisibilis, hoc ipso quod est pars, sed dicuntur omnes partes continui esse diuisibiles in partes communicantes, quia pars quæ seruit diuisioni vnus, potest etiam seruire diuisioni suæ partis immediatæ, ut articulo præcedenti explicauimus. Vnde ad replicam dicitur, quod quælibet pars seorsum sumpta, & secundum se facit additionem, & extensionem ad aliam præcedentem, etiam designatè
sum-

sumptam, & quæcumque restat diuidenda, hoc ipso quòd accipiatur, & designetur cum partibus sumitur, in quas diuidi potest, sed tamen istæ partes inclusæ in ipso toto quòd diuiditur, non faciunt maius respectu talis totius, quia in illo sunt inclusæ, sicut quòd vnus aureus valeat decem argenteos, non addit valorem distinctum super ipsum aureum, sed in eo includuntur, eique communicant. Similiter partes quæ in hoc continuo seruiunt ad diuisionem vnius partis; & includuntur in ipso toto, & possunt seruire pro diuisione partis immediatæ, & hoc est ad inuicem esse communicantes, atque ita omnes partes seruant semper diuisibilitatem, nec tamen addunt infinitatem; quia vt essent infinitæ per additionem, requirebatur quòd adderent diuisibilitatem ex nulla parte se communicantem diuisibilitati aliarum partium, vt autem sint infinitæ diuisione, sufficit quòd quæcumque secundum se & diuisiue sumpta sit diuisibilis in partes, & actu habeat illas, in quas diuiditur, sed cum communicatione, & coniunctione ad alias partes, in quas etiam diuiditur pars immediata, & seruit vna pars (si verè existit) pro diuersis, ideoque hæc infinitas non est actu, sed potentia.

Ad secundam replicam dicitur, quòd mobile pertransit infinitas partes se communicantes, & sine categorematicè infinitas, quas Philosoph. in 8. Physic. dicit esse infinitas in potentia, quæ infinitas vt supra explicauimus, consistit in hoc, quòd quæcumque signatur, semper diuisibilis est, & nunquam signari potest aliqua, quæ non sit diuisibilis, quantum-

om̃que in infinitum signetur, vt diuidatur. Et verum est, quod non potest signari prima pars, vnde incipit motus intrinsecè, sed potest signari vnde incipiat extrinsecè, quia immediate post aliquod instans incipit, vt dicemus sequenti quæstione.

Ad tertiam replicam dicitur, quòd in quolibet instanti designato potest creari Angelus, quia hoc ipso quòd creatur, designatur instans, sicut designatur res producta, dicendo, nunc est Angelus. Instantia autem designata non sunt infinita, nec in vna hora, nec in toto tempore, cùm includantur sub terminis finitis, sed signatio eorum dicitur infinita sine categorematicè, quia non potest signari aliquod instans aliqua parte temporis, quin in aliqua alia minori signari etiam posset. Ex hoc tamen in fine horæ non dantur actu infinita instantia actu, sed designabilitas eorum est infinita sine categorematicè.

Ad confirmationem respondetur, quod implicat per viam diuisionis omnes partes continui actui solui, quia per diuisionem ita diuiditur pars, quòd semper diuiditur in partes, & consequenter quælibet manet semper diuisibilis, & hoc modo dicuntur omnes esse diuisibiles, non quia omnes simul diuidi possint, sed omnes diuisiue, & seorsum, sicut omnes creaturæ dicuntur possibiles, non quia omnes collectiue, & simul creari possint) in probabiliori sententia) sed quia omnes diuisiue: vnde non cognoscit Deus vltimam, quæ amplius diuidi non possit, quia hoc non est dabile: posset tamen Deus soluere omnem partem continui, non per viam diuisionis, sed destruendo

do omnia indiuisibilia, quibus partes vniuntur: sed tunc partes illæ manebunt penetratæ, & non extensæ, sicque destruetur quantitas, non manebunt partes.

Secundò arguitur, Globus perfectus in plano perfecto tangit planum in puncto vt demonstrat Euclides 3. lib. Propos. 16. asseriturque ab Arist. 1. de anima, cap. 1. tex. 13. & 3. de cælo, tex. 69. & constat, quia si in parte diuisibili tangeret planum, adæquaretur illi parti, & sic pro illa parte non esset perfectè sphericus, sed talis globus in plano potest moueri motu continuo, vt si velocissimè impellatur; ergo immediatè post vnum punctum tangit alterum; ergo in illo plano sunt plura puncta immediata, quæ tanguntur à globo. *Confirm.* quia secundum Mathematicos, si punctum moueretur, faceret lineam, si linea superficiem; sed punctum motum non potest relinquere vestigium, nisi constans ex punctis, neque enim potest tangere nisi puncta, ergo linea componetur ex solis punctis.

Respondetur, illo argumento conuinci Scotum ad asserendum, quòd indiuisibile separatim potest moueri successiuè, vt videri potest in 2. dist. 2. q. 9. §. *Ad argument.* Nec tamen concedit continuum componi ex indiuisibilibus, si immediatè post vnum punctum mouetur ad aliud; dicunt enim Scotistæ (licèt in hoc satis varient) non esse inconueniens, quod punctum globi tangat partem inadæquatè per modum motus, & fluxus, non verò permanenter in eo quiescendo, quia sic non potest quiescere, nisi in loco sibi adæquato, quod est indiuisibile.

Scot.

Ceterum hæc sententia manifestè eneruatur probationem Philos. vt patet in hoc lib. c. 10. vbi id expressè improbat, & similiter c. 3. & 8. Physicorum, tex. 40. vbi probat omne mobile esse corpus, quia est diuisibile, nec enim Philosoph. diuisibilitatem posuit in motu, solum ratione spatij, sed etiam ratione mobilis, ergo quod non est corpus, nec diuisibile, mobile non est; & videri potest S. Thom. in hoc lib. lect. 5. in fine, vbi ostendit Philosoph. loqui de diuisibilitate mobilis in partes quantitativas, aliàs non rectè probaret Philosoph. quòd mobile debet esse continuum, nisi esset diuisibile, ergo indiuisibile separatum non potest moueri motu continuo physico. Et præter hoc vrget satis fundamentum adductum, quia si mouetur continuè, immediatè post tangit aliud indiuisibile, & sic erunt plura indiuisibilia immediata in continuo. Dicere autem, quòd potest tangere partem in fluxu, & motu, sed non quiescendo in illa, nihil est, quia etiam quando mouetur, mouetur in loco sibi adæquato, quia deserit vnum locum, & acquirit alium, & omnis locus adæquatus debet esse locatus, si verè locus est. Quòd si potest moueri in loco sibi inadæquato, qualis est locus diuisibilis, multo melius in eo quiescet, quia quanto amplior est locus, tanto melius in eo quiescitur, si cesset impulsus sicut in eo moueri potest. Adde quòd indiuisibile nihil expellit à loco, cum sit inextensum, vt ipsi Scottistæ concedunt, ergo non mouetur loco, nisi penetretur cum eo, quod non expellit à loco.

Ad argumentum autem de globo super planum,

nūm, quod est fundamentum Scoti, relictis
varijs solutionibus, mihi nullū videtur di-
ficultatis. Dico enim quòd globus ille non
tangit planum continuè, sed discretè, & ta-
men mouetur continuè. In quo magna con-
tingit hallucinatio, quia existimatur, quòd spa-
tium, per quod mouetur globus ex parte infe-
riori, est solum ipsum planum, quod tangit,
cū tamen sit etiam ipse aer, non solum qui
à parte superiori circumdat globum, tanquam
locus eius, quem constat non esse planum,
nec in puncto attingi à globo, sed per suas
partes circumdari, verum etiam aer inferior,
qui est inter punctum, quo tangitur planum
à globo, & partes eleuationes ipsius globi, &
per hunc aerem inferiorem mouetur globus
continuè, licet ipsam planum tangat in pun-
cto discrete, sicut quando animal eleuando
pedes, & deprimendo ambulat per terram,
certum est quòd pedes animalis non tangunt
continue omnes partes terræ, sed discrete se-
cundum eleuationem pedum, & tamen mo-
uetur motu continuo per aerem, in quo pe-
des eleuantur; ita ille globus non tangit par-
ter plani, sed puncta contactu discreto, sed
tangit aerem, qui est inter planum, & glo-
bum tactu, & motu continuo, & sic respec-
tu plani se habet, vt motus modo pregressi-
uo, aut per saltum, quod tamen respectu
aeris continue mouetur. Vnde etiam Ange-
lus si se collocet in puncto, non se poterit
mouere motu continuo ad motum ipsius pun-
cti, sed solum ratione suæ virtualis exten-
sionis, qua diuisibili spatio potest assiste-
re,

Ad confirmationem respondetur, quòd punctum secundum Mathematicos, solum mouetur motu imaginario, non reali, vt per hoc explicetur longitudo lineæ sine latitudine, & sic motus puncti si daretur in re, faceret lineam quantum ad negationem, scilicet carentiam longitudinis, & profunditatis, non quoad positionem partium.

Ultimò arguitur, quia post primum punctum lineæ nullo alio puncto considerato, vel immediate post sequitur indiuisibile, & sic habemus intentum, vel sequitur pars diuisibilis, & sic illud quod immediate sequitur, sine punctis est diuisibile, & continuum, quia vt suppono solum sumimus primum indiuisibile, & illud quod sequitur immediate post; ergo eadem ratione reliquum omne, quod sequitur in continuo sine indiuisibilibus continuari poterit. *Confirmatur*, quia secundum Philosoph. 1. Topic. cap. 14. sic se habet indiuisibile ad continuum, sicut vnitas ad numerum, sed numerus componitur ex solis unitatibus, ergo continuum ex solis indiuisibilibus.

Respond. quòd si post primum punctum sumatur aliqua pars lineæ designata, & aliquota, non est dubium, quòd in illa includantur plura puncta sicut & plures partes continuatae. Si verò consideretur pars non designata, sed id quod immediate sequitur post punctum, antequam aliud punctum sumi possit, dicimus quod illa entitas partis nondum est pars actu continuata, sed aliquid continuabile per modum partis mediante puncto sequenti, sine quo non datur actu continuatio, & sic non est simile de reliquo continuo.

Ad confirmationem respondetur, indiuisibile comparari unitati non in omnibus, sed in eo quod unitas non est diuisibilis discretè, sicut punctum non est diuisibile continuè, & secundo quia indiuisibile est initium continui, sicut unitas numeri. Sed quia indiuisibile pertinet ad continuum terminando, & continuando, non autem partes diuisibiles præbendo, non potest continuum quod habet partes solis indiuisibilibus constare, sicut numerus solis unitatibus, quia separatione & diuisione non compositione constituitur numerus.

QVÆSTIO XXI.

De inceptione, & definitione rerum.

Res quæ incipiunt & desinunt, solum reducuntur, vel ad permanentia, vel ad successiua, sub quibus continentur instantanea, & quæ tempore durant. De permanentibus agemus in hoc articulo, de successiuis in sequenti.

ARTICVLVS I.

Explicantur regule inceptionis, & desitionis in permanentibus.

Cum inceptio significet initium durationis & desitio finem, nihil aliud sunt termini.

mini inceptionis, & desitionis quàm instantia, sicut termini lineæ sunt puncta, & sic tota difficultas in inceptioe, & desitione rerum consistit in designandis instantibus, quibus res initiatur, aut finitur. Vt autem diximus in quæst. 8. duo sunt modi incipienti, & totidem desinendi, scilicet intrinsecè & extrinsecè; intrinsecè dicitur aliquid incipere, quando in aliquo instanti habet existentiam, & immediatè antea non habebat, & hoc vocatur incipere per primum esse. Extrinsecè dicitur incipere, quando in aliquo instanti nondum habet esse, sed immediatè post habebit, eò quòd talis res incipit modo temporis diuisibili, non modo instantis, & ita non potest signari vbi primo incipiat; & hoc vocatur incipere per vltimum non esse, idest per instans vbi vltimò non est, & immediatè post incipit esse. Ex parte desitionis terminus intrinsecus est, quando in aliquo instanti est verum dicere, nunc est, & immediatè post non erit, & hoc est desinere per vltimum esse. Extrinsecus modus desinendi est, quando est verum dicere, nunc non est, & immediatè antea erat, & vocatur desinere per primum non esse, eò quòd non designatur vbi res vltimo fuit, sed vbi primo non est. Res autem spirituales licèt nostro tempore & instantibus non mensurentur: quia tamen virtualiter illis coexistunt, & nostro modo intelliguntur, etiam ad mensuram nostrorum instantiam eas regulamus.

Circa res ergo permanentes, sit prima regula. Substantiæ permanentes siue generatione, siue creatione instantanea fiant, incipiunt

piunt per primum esse, non obstante quod generationem præcedat alteratio, quæ est motus. Hæc conclusio intelligitur per se, & connaturaliter loquendo. Ratio est; quia istæ substantiæ sunt actione indivisibili, ergo in instanti. Antecedens patet, quia non suscipiunt magis, & minus in quantum substantiæ sunt, neque creatio est productio per partes, & per motum, cum sit totius entis productio ex nihilo, ergo instantaneè producit. Quod si produceret, per motum, ita quod esset verum dicere, nunc non est, immediatè post hoc erit; vel immediatè post incipiet totum, vel pars? non totum, quia illa mensura est partibilis, & habet prius, & posterius, ergo prius est attingibilis pars quàm totum, alias mensura attingendi non esset partibilis, ergo è contra, si non assignatur pars prior, & posterior, sed totum simul, non incipit modo diuisibili, sed indivisibili. Si autem immediatè post non incipit totum sed pars, ergo illa actio non est factiva totius nisi mediantibus partibus sicut motus, atque adeò non est per se primo productiva totius entis. De substantia vero quæ producitur per generationem; constat etiam produci in instanti; tùm quia substantia non habet contrarium, cum non suscipiat magis & minus; tùm quia terminus per se primo generationi est aliquod totum subsistens, non ut producitur per partes, sed ut totum est, ergo non respicit productionem modo diuisibili, sed indivisibili, scilicet ut totum, & integrum, nec potest in quacumque parte minori, & minori produci, cum exigit determinatam quantitatem ut producatur, ut diximus supra quæst. 8.

Vi.

Videatur D. Thom. quodlib. 7. art. 9. & in hōs lib. lect. 7.

Statim vero se offerebat argumentum de dispositione vltima, quæ fit per motum alterationis, & in illo instanti terminante motum est verum dicere, nunc est vltima dispositio, & in illo instanti adhuc non est verum dicere nunc est forma genita, aliàs in illo instanti iam non esset forma corrupta, & consequenter vltima dispositio numquam esset in subiecto corrumpendo, sed in generando, atque adeo non desineret forma corrupta ex vi dispositionis vltimæ, quidquid autem infra vltimam dispositionem est, compatibile est cum illa. Si ergo in illo instanti est dispositio vltima, & in illo nondum est forma genita, immediatè post erit, atque adeo non incipiet in instanti intrinseco.

Hoc argumentum multa tangit, quæ tractanda sunt in libris de generatione. Nunc sufficit dicere, quod vltima dispositio numquam est nisi in subiecto generando, quia semper est coniuncta ipsi formæ genitæ, nec producitur à sola alteratione, sed ab ipsa generatione producente formam substantialem, quia ut coniuncta illi, & non seorsum producitur. Desinit autem forma corrupta ex vi vltimæ dispositionis, non quia in ipsa recipiatur, sed quia cum ipsa non compatitur, sicut etiam expellitur à forma substantiali, non simul existente cum forma corrupta, sed simul non compatiente, quidquid autem infra vltimam dispositionem est, compatitur cum forma corrupta, & in illa recipitur, sed cum aduenit vltima dispositio, aduenit etiam forma substantia-

stantialis, ut illi coniuncta, & expellitur in genere dispositionis ab ultima dispositione, & à forma substantiali in genere causæ formalis: de hoc autem puncto in dicto loco plenius tractabitur.

Quod si inquiras, utrum possit per creationem produci aliquid non in instanti, sed in tempore de potentia absoluta? Resp. Plures id negare, ut Vazq. 2. tomo primæ partis, disp. 220. cap. 10. Alij è contra sentiunt, posse creari in tempore, de quo videri potest Cursus Carmel. hic, disp. 26. quæst. 4. Fidente 6. Phys. quæst. 2. difficul. 3. art. 3. & alij. Veritas tamen est utramque sententiam quoad aliquid veram esse. Nam si intelligamus posse aliquod creari in tempore quantum ad mensuram intrinsecam creationis, vel rei productæ, hoc repugnat, quia illa entitas, & actio ab intrinseco habet incipere modo indiuisibili. Si vero loquamur de successione extrinseca, id est de mensura coexistente extrinsecè tempore diuisibili, sic non repugnat creari aliquid à Deo in instanti correspondente tempori nostro diuisibili, sicut substantia indiuisibilis Angeli coexistit spatio, & tempori diuisibili, modo tamen indiuisibili ex parte sui. Sic ergo non repugnat immediate post instans nostri temporis aliquid creari à Deo, non quidem in instanti eiusdem temporis, quod non immediatè sequitur, sed in instanti alterius mensuræ, quod æquualet nostro tempori, v. g. in mensura xui. An vero possit similiter annihilari, vel desinere substantia in mensura temporis, statim dicemus.

Secunda regula, seu conclusio. Res permanentes desinunt per primum non esse connaturalis

raliter loquendo, etiam si desinant per annihilationem, supernaturaliter autem, seu praternaturaliter, non repugnat aliquid desinere per ultimum esse. Prima pars quantum ad annihilationem probatur, quia annihilatio est suspensio totius concursus quo res fuit creata & conseruatur in esse. Hic autem, cum momo indiuisibili detur, eius suspensio connaturaliter fit in instanti, sicut creatio in instanti fit: si autem suspenditur concursus in instanti intrinseco desinit creatura. Neque enim potest suspensio concursu in eo instanti durare, & immediatè post desinere, atque adeò erit verum dicere in illo instanti; nunc non est creatura, & immediatè ante erat hoc autem est desinere per primum non esse, quia tunc primo non est, si autem desineret per ultimum esse, esset verum dicere, nunc est, & immediatè post non erit, atque adeo esset verum dicere, sine concursu Dei in hoc instanti creatura est, & immediatè post ablatum concursum non erit. **C**eterum; quia potest Deus suspendere suum concursum, non in instanti nostro, sed immediatè post illud, quia immediatè post liberè continuat, & potest non continuare, ideò si immediatè post instans tollat concursum desinet per ultimum esse dicendo, nunc est, immediatè post non erit. Quæ regula nullo modo potest negari, licèt aliqui Authores oppositum dicant fortasse mutatis terminis.

*S*ecunda pars conclusionis intelligitur de re quæ desinit ad generationem alterius incipientis per primum esse: nam si aliqua forma incipiat per ultimum non esse; tunc illa, quæ desinit ad eius inceptionem necessario desinit per
 vlti-

ultimum esse, eo quod desinit immediatè post instans: sic enim aliud incipit. Ex hoc probatur conclusio posita, quia tales res permanentes desinunt ad generationem alterius, ita quod idem est instans generationis vnius, & desinens alterius, & ita si res generatur per primum esse, necessario desinit res corrupta per primum non esse, aliàs esset verum dicere, nunc est res illa, immediatè post non erit, si desineret per ultimum esse; sed in illo nunc res est generata. Ergo esset simul in eodem instanti forma genita, & corrupta, vel si in illo nunc non est forma genita, sed immediatè post erit, non generabitur in instanti per primum esse, sed in tempore per ultimum non esse, cuius oppositum ostendimus.

Ex quo sequitur, quòd quando incipit motus per ultimum non esse, dicendo, nunc non est motus, immediatè post erit, talis motus non excludit necessario formam, quæ toto tempore antecedenti quærit, sed incipit excludere; compatitur enim motus ad vnâ formam cum retentione oppositæ, licet via corruptionis, sicut ægrotudo cum vita, & frigus cum calefactione mouente ad calorem.

Dices primo. Repugnat quod substantia desinat per primum non esse, si desinit per annihilationem, quia totum illud esse est indiuisibile, & suspensio concursus est indiuisibilis; ergo desinit ad modum instantium, sed instantia desinunt per ultimum esse. Ergo talis substantia, quæ desinit per annihilationem, desinit per ultimum esse. Secundo nulla res permanens, nec per se, neque per accidens, nec etiam supernaturaliter potest desinere
per


per ultimum esse ; nam quod desinit per ultimum esse , habet totum non esse in tempore , quia est verum dicere , nunc est , immediatè post non erit : immediatè autem post est tempus : sed hoc non potest convenire rei permanenti , quia convenit ei totum suum esse indivisibiliter . Ergo non esse , quod est eius oppositum , etiam indivisibiliter debet poni , quia id , quod tollit , indivisibile est , ergo non in tempore . Tertiò ; res successiva , nec de potentia absoluta potest incipere , aut desinere in instanti per ultimum esse , si enim esset in instanti , non haberet partem post partem , quod est contra quidditatem successivi ; ergo non potest verificari , quod sit in instanti . Ergo etiam res indivisibilis non potest verificari , quod sit in tempore .

Ad primum negatur antecedens . Ad probationem dicitur , quod indivisibile formale , ut instans , solum desinit per ultimum esse : indivisibile autem subiectivè & materiali er , scilicet , id quod est subiectum indivisibilis durationis , benè potest desinere per primum non esse , si desinit annihilatione , sed successione temporis , quia in instanti , quo est , non potest annihilari : desinit ergo immediatè post , quod est per ultimum esse . Res ergo , quæ annihilatur , desinit ipsa annihilatione in instanti , in quo suspenditur concursus , non immediatè post , atque adeò per primum non esse . Neque est necesse , quod primum non esse sit privativum , idest adiunctum generationi aliquius rei ; sufficit quod sit pura negatio essentiali .

Ad secundum negatur antecedens . Ad probationem .

bationem respondetur, quod benè potest non esse rei indiuisibilis dari in tempore, & non in instanti intrinsecè; imò quod desinit per vltimum esse, non habet ipsum non esse in instanti, sed immediatè post, quia non esse non mensuratur duratione, sicut ipsum esse, nisi per accidens, quando sequitur ad inceptionem alicuius esse, per cuius inceptionem aliquid corrumpitur: tunc enim desinit res in instanti, in quo primo opposita forma generatur & est. Secus est, si Deus suspendat concursum in tempore, & non in instanti, tunc enim desinit per vltimum esse, vt dictum est.

Ad tertium respondetur, quod motus non potest intrinsecè mensurari duratione indiuisibili, quia sic, destrueretur ratio motus, quæ petit partem post partem: instans autem habet negationem partium. Nec potest coexistere instantaneæ durationi, nisi sic instans æquiualens multo tempori, sicut est instans æui, quod tamen non correspondet motui, vt propria, & adæquata mensura, sed inadæquata: multa enim successiua coexistunt instanti Angelico. Et similiter res indiuisibiles, licet intrinsecè non possint mensurari mensura diuisibili, & successiua temporis, benè tamen extrinsecè coexistendo in mensura, quæ æquiualeat, & coexistit multo tempori, vt explicatum est.



ARTICVLVS II.

*Regula inceptions, & definitionis in successiua
& instantaneis, & quiete.*

Prima regula. Motus incipit per vltimum non esse, & definit per primum non esse. Ratio primæ partis est manifesta, quia motus successiuus non habet esse in instanti, cum non habeat esse indiuisibile. Ergo in tempore, ergo non incipit per primum esse, aliàs esset verum dicere: nunc est, & immedia è, ante non erat. Non potest autem verificari de motu, quod nunc est, hoc enim pertinet ad mutatum esse, quod est terminus motus: & sic ad tale mutatum esse præcedit moueri, vt probat Philosoph. in hoc lib. 6. Ergo motus vt d. distinguitur à mutato esse, quod est indiuisibile motus, non incipit in instanti indiuisibili, sed diuisibiliter, quod est incipere per vltimum non esse, & non per primum esse.

Non potest dici, quod motus incipit per aliquid indiuisibile, licet non sit mutatum esse, quia hoc est terminus motus, non initium. *Nam contra* est, quia illud indiuisibile, quod dicitur initium motus, modò est & ante non erat, cum in illo instanti incipiat. Ergo est aliqua mutatio, seu mutatum esse, & cum ante illud non præcesserit aliquod moueri, erit actio instantanea sine aliquo motu præcedenti, sed quiescente subiecto toto tempore ante in opposita forma; de qua actione non loquimur, sed de successiua: imò inde probat D. Thom. 1. par. quest. 53. art. 3. non posse Ange-

Angelum moueri in instanti, quia non potest aliquid toto tempore præcedenti quiescere, & in ultimo instanti illius temporis moueri, seu aliter se habere. Quæ doctrina est eadem cum ea quæ traditur à Philosoph. in hoc libro text. 56. & ibi à Diu. Tho. lect. 8. quòd cum motus strictè dictus sit de vno positiuo ad aliud positiuum, non potest stare quòd subiectum toto tempore quiescat sub vna forma positiua, & in ultimo nunc illius temporis inueniatur mutatum ad aliam, eò quòd in illa forma est tanquam in termino à quo, quiescendo tanquam in forma positiua, & sine motu & tendentia ad terminum ad quem, vt supponimus, quia toto tempore quiescit, ergo si in ultimo nunc illius temporis est in termino ad quem, sine transitu & tendentia mutatur de termino à quo ad terminum ad quem, cum nunquam ante illud ultimum nunc moueatur, sed quiescat, quod naturaliter esse non potest, nam etiam in generatione substantiali datur motus & alteratio præcedens, & ante illuminationem de nouo motus luminosi; supernaturaliter autem potest oppositum contingere, vt si Deus subito producat terminum ad quem, & destruat terminum à quo, sine transitu medio de vno ad aliud.

Quod vero omnis motus desinat per primum non esse constat, quia si desinere per ultimum esse, esset verum dicere, nunc est motus, immediate post non erit, nunquam autem verificatur de motu, quod est in instanti, & in nunc, cum essentialiter sit diuisibilis secundum partes priores, & posteriores, quæ non possunt esse in instanti.

Secunda regula. Res permanentes, quæ incipiunt & desinunt modo successivo, vt calor, quantitas, & similia, incipiunt & desinunt ad modum motus quantum ad suam entitatem absolutam. Si verò considerentur quantum ad gradus, vel ratione maioris, & minoris quantitatis, si gradus sit certus, & determinatus, & in parte certa, & determinata incipiunt per primum esse. *Prima pars* probatur, quia motus non est præter res ad quas est motus, sed est ipsa res in fieri, & tendentia, & sic incipiente motu incipit res ipsa, v. g. qualitas ad quam est motus, ergo sicut motus incipit per vltimum non esse, ita & res illa ad quam est motus, & simile est de eius corruptione, supposito quod corrumpitur per motum.

Secunda verò pars probatur, supponendo quòd in qualitatibus, v. g. non solum datur latitudo ab vna qualitate ad aliam, sed etiam datur latitudo gradualis à minori ad maiorem gradum, & è contra; inter gradum autem & gradum datur latitudo diuisibilis secundum magis, & minus ad modum partium proportionalium. Et qualitatem secundum istas partes proportionales vocamus formam indeterminatam, sed secundum partes aliquotas, seu gradum certum vocamus formam determinatam. Dicimus ergo, quòd vt graduatio qualitatis, qua redditur tanta, incipiat per primum esse, debet concurrere duplex conditio, prima, quòd gradus ipse, seu pars qualitatis sit certa. Secunda, quòd subiectum, seu pars subiecti in qua incipit, sit certa, & determinata, si verò altera conditio deficiat, incipiet per vltimum non esse.

Ratio est, quia stante vtraque conditione, si inciperet gradus caloris, v. g. vt quatuor per vltimum non esse, esset verum dicere, nunc non est talis gradus caloris, & immediatè post erit. Vel ergo in illo instanti deest aliquid ad illum gradum determinatum, vel non; si non deest, ergo iam datur, & sic non incipiet immediatè post in illa parte. Si deest aliquid, vel diuisibile, vel indiuisibile; si diuisibile, non incipiet immediatè post in tota illa parte, quia de illo diuisibili prius attingetur vna medietas quàm alia, & sic immediatè post adhuc non incipiet tota. Si indiuisibile, non potest acquiri immediatè post in tempore, sed in instanti, quod est mensura indiuisibilis, ergo non incipit immediatè post instans, ergo neque per vltimum non esse. Cæterum si pars, in qua incipit gradus qualitatis, non sit determinata, vel ipse non sit certus, & determinatus gradus, benè potest incipere per vltimum non esse, vt patet, quando intensio est motus vniformiter difformiter diffusus, sic enim calidum, v. g. vt quatuor si in aliquo instanti applicetur lubiecto, ita diffundit calorem, quòd in superficie immediata ponit calorem vt quatuor, & in eo, quod immediatè sequitur post superficiem, quidquid est infra calorem vt quatuor, & sic consequenter minus ac minus, vsque ad non gradum. Si ergo incipiat motus intensiois, cùm debeat incipere per instans extrinsecum, seu vltimum non esse oportet, quod immediatè post instans, illa pars, quæ immediatè sequitur post superficiem, maiorem intensioem acquirat, ergo cùm talis calor sit illud, quod immediatè est infra gradum vt quatuor, si im-

mediate post crescit, immediate post accipiet gradum ut quatuor, & sic incipiet ille gradus ut quatuor immediate post instans in illa parte incerta, quod est incipere per ultimum non esse. Et eodem modo incerta pars formæ poterit incipere immediate post instans ratione motus uniformiter difformis.

Quod si dicas, currere hic argumentum supra factum, quia in parte immediata post superficiem, vel deest aliquid diuisibile, vel indiuisibile ad gradum ut quatuor, & quidquid dicatur, non potest incipere immediate post ille gradus certus.

Respond. deesse aliquid diuisibile per modum partis proportionalis, & designatæ, sed illa vincitur per motum, qui etiam immediate postmodo diuisibili incipit, & sic etiam ponimodo diuisibili, quidquid restat ad gradum, ut quatuor. Et si urgeas, cur non idem dicemus quando in parte certa incipit gradus certus, *Respond.* Quod illa pars cum sit certa, non potest vinci per illam partem motus, quæ incipit immediate post instans, quia illud quod immediate post instans sequitur, est aliquid diuisibile indesignatum, & proportionale, & sic non potest afficere qualitate totam partem certam. At verò si tota pars certa moueatur usque ad ultimum instans, quo incipit certus gradus in ea, tunc immediate ante instans non deest nisi aliquid indiuisibile, ut producat ille gradus, quia nihil deest quoad fieri, & diuisibilitatem eius, sed quoad terminari, & ut sit in facto esse, quod est indiuisibile.

Quod si petas, quomodo desinant istæ formæ, quæ sunt per motum, siue secundum se, siue

sive secundum graduationem ? *Respondet*, quòd desinunt ad inceptionem formæ oppositæ, v.g. calor incipit remitti ad motum frigoris, frigus autem incipit per ultimum non esse, quia incipit per motum, in quo est verum dicere, nunc non est frigus, immediatè post erit, & sic necesse est, quòd desinat ille gradus caloris, seu remittatur per ultimum esse, in quo est verum dicere, nunc est talis gradus, immediatè post non erit, quia nunc non est frigus, & immediatè post erit, & cum frigore introducto non stat ille gradus caloris. Si autem calor desinat, non solum quantum ad gradum, sed etiam quoad totam entitatem, desinit per primum non esse, quia non desinit, nisi ad totalem introductionem formæ oppositæ, quæ introducitur in instanti terminante motum, in quo est verum dicere, nunc est frigus, immediatè antea non erat, & consequenter nunc non est calor : & sic verificatur, quòd nulla forma perfectè, & totaliter desinit per ultimum esse, nisi sit instantanea.

Tertia regula. Quæcumque indiuisibilia successiua incipiunt per primum esse, & desinunt per ultimum esse. Constat hoc, quia tantum durant per instans. De instanti autem est verum dicere, nunc est, & immediate antea non erat, & similiter nunc est, & immediate post non erit ; ergo incipit per primum esse, & desinit per ultimum non esse, dicendo, nunc non est, & immediatè post erit, darentur duo nunc, seu instantia immediata. Indiuisibilia autem permanentia, vt punctum in quantitate, actus indiuisibilis in intellectu, & similia, incipiunt lege rerum permanentium,

Ultima regula. Quies negatiua motus incipit, & desinit sicut instans, quia solum datur in instanti, in quo est incapacitas ad motum. Quies autem priuatiua incipit per vltimum non esse, & desinit per vltimum esse. Et probatur, quia non potest incipere illa quies in instanti intrinseco, quia in illo non est capacitas ad motum, & consequenter non est quies per modum priuationis, ergo incipit immediatè post instans, quia immediatè post potest esse motus, & consequenter si tunc non mouetur, incipit quiescere priuatiue. Desinit autem quiescere, quando incipit moueri ab vna forma ad oppositam; licet enim adhuc in illa sit (quia non corrumpitur illa forma, quousque altera introducatur quæ est terminus motus) tamen non est in illa quiescendo, sed tendendo ad oppositam, tollitur ergo quies, quando incipit motus, sed incipit motus per vltimum non esse; ergo desinit quies per vltimum esse, quando est verum dicere, nunc est quies, immediatè post non erit, quia immediatè post est motus.

Soluuntur argumenta.

Primò arguitur, ad probandum motum incipere per primum esse, seu dari primum mutatum esse, nam aliquis terminus motus, v. g. aliquis locus primò acquiritur, aliàs non relinqueretur aliquis terminus à quo, si aliquis non acquiritur. Ergo sicut est dare primum terminum à quo, qui relinquitur, ita primum terminum ad quem, qui acquiritur. Si autem nullus assignatur; ergo versus principium omnis motus est infinitus, cum careat prin-

principio . *Confirmatur*, in illo casu supra pō-
sito de cane cadente ē turri , qui moritur in
medio, tunc enim ille motus distinctus, qui in-
cipit in cadauere , incipit in instanti, quia cum
generatione continuatur ; ergo potest motus
incipere in instanti . Denique in motu datur
ultimum mutatum esse , in quo desinit motus :
ergo eadem ratione poterit dari primum muta-
tum esse , licet in instanti non sit motus .

Respondetur , non dari primum terminum
acquisitum per motum , nisi talem terminum
præcedat aliquis motus, quo acquiratur ; atque
adeo motus non initiatur in ipso termino . Et
licet detur terminus à quo designatus , tamen,
quando primo incipit motus , non relinquitur
in facto esse, sed quando terminatur motus : &
sic quando motus incipit , adhuc mobile potest
esse sub termino à quo licet non in esse quieto,
sed in moueri , & via corruptionis , sicut dum
quis mouetur ad mortem per ægritudinem, ad-
huc est in vita, neque hoc est carere principio,
& esse infinitum versus initium, quia non caret
principio extrinseco motus , sed intrinseco, ne-
que habet infinitatem , nisi sine categoria, quia
non est dare primam partem motus , cum
incipiat modo diuisibili , & pars illa sit diuisi-
bilis in infinitum , licet sub parte finita conti-
neatur .

Ad confirmationem iam supra respondimus
illo instanti , quo generatur cadauer , non dari
motum , sed incipere extrinsecè , & discontin-
uari à motu præcedenti propter generationem
distincti subiecti , à qua generatione , & non
à motu procedit illa acquisitio loci , in qua ca-
daver inuenitur, quando primo generatur. *Ad*

Ultimum dicitur, dari in motu ultimum mutatum esse, quia datur finis motus, qui finitur in aliquo termino producto, & tale mutatum esse præceditur à toto moueri. At verò si daretur primum mutatum esse, non præcederet aliquod moueri, aliàs non esset primum principium motus illud mutatum esse, sine moueri autem non potest dari mutatum esse. Nec intelligimus, quòd ultimum mutatum esse terminat motum, quasi intrinsecè includendo in se partes priores, & posteriores, sed quasi ab illis relictum, & extrinsecè terminans motum.

Quòd si instet, quia in ultimo mutato esse existit motus; ergo adhuc non desinit extrinsecè; & per primum non esse, sed per ultimum esse. Antecedens constat, quia motus est diuisibilis; ergo non possunt omnes partes simul desinere, sed vna prius, quàm alia; ergo quando aduenit ultimum instans, non omnes simul desinunt, sed aliquid desinit, & aliquid permanet: ergo adhuc aliquid motus tunc datur; & deinde, quia motus existit per suum indiuisibile, sicut tempus per instans; ergo in illo indiuisibili adhuc existit motus. Imò non nisi per illud, sicut patet, quando incipit aliquis gradus caloris per primum sui esse, vt diximus, tunc enim vel adhuc existit motus, vel incipiet ille gradus caloris, sine actione, si tunc non datur motus. Denique in quantitate permanente quantumcumque dentur partes in infinitum diuisibiles, tamen datur aliquis primus terminus, & ultimus, inter quos illæ partes includuntur, & redduntur finitæ. Ergo similiter partes motus priores, & posteriores aliquo primo termino includuntur, quia vbi da-

tur

cū prius datur primum , nisi sit processus in infinitum .

Respondetur, quòd in ultimo mutato esse nulla pars motus inuenitur intrinsecè , & ita in illo non desinunt simul omnes partes , neque aliqua illius permanet , sed immediatè ante omnes partes successiue transferunt ; in ultimo autem instanti iam non transeunt , sed terminatiue transactæ sunt . Dicuntur autem desinere in illo instanti , non quia in illo adhuc sit motus , sed quia in facto esse iam non est , cū immediate ante successiue desinerent transeundo . Partibus autem transeuntibus succedit instans .

Ad secundam probationem dicitur , quòd tempus , & motus existunt per indiuisibilia continuatiua , non per terminatiua , durat enim per illa , per quæ continuatur eius esse in ratione succedendi : terminatiuum autem instans est desitio non existentia motus . Ille autem terminus , seu gradus , qui producit in illo instanti terminatiuo , habet in illo instanti actionem terminatiue existentem , & virtualiter , non successiue , & formaliter . Hæc est enim natura motus , quòd vna pars resultat , & sequitur ex alia ; & sic licet illa transeat successiue , altera producit ex illa terminatiue , & sic producit vna ex alia succedendo illi . Nec requiritur , quòd tunc existat formaliter pars antecedens , quando existit , & producit sequens , sed sufficit , quòd immediatè præcesserit , & illi altera continuetur : ratione enim continuationis virtualiter dicitur manere , seu terminatiue , de quo amplius dicemus in libris de generat .

Ad ultimam probationem dicitur, quòd tam in quantitate permanente, quàm in successiua partes clauduntur terminis seu indiuisibilibus, sed cum hac differentia, quòd in quantitate successiua termini sunt extrinseci ipsis partibus, nec positionem habent in illis, quia se habent, vt terminus à quo, & ad quem: & à primo incipit motus relinquendo illum: in secundo terminatur cessando. In quantitate autem permanente termini, seu indiuisibilia habent positionem in ipso continuo, & coniuncta sunt permanenter partibus, nec se habent tanquam terminus à quo, & ad quem, & idèd sunt intrinseci, & permanentes in ipsa quantitate, non extrinseci, vt in motu.

CIRCA LIBRVM

Septimum Physicorum.



In hoc libro incipit Aristor. ex motu quem hucusq; e explicuit assurgere ad ipsa mouentia, vsque ad primum mouens & primum motorem, quod vberius prestat in l. b. 8.

In hoc autem libro duo præcipuè intendit. Primum est tractare de principio motus vsque ad primum motorem, & hoc cap. 1. 2. & 3. Secundum est comparare ipsa mobilia & mouentia inter se quoad velocitatem, tarditatem & proportionem quam habent; & hoc cap. 4. & 5.

SVMMA TEXTVS

Libri Septimi Physicorum.

VT ostendat Philosoph. quod in motibus deueniendum est ad vnum primum motorem, duplicem propositionem ponit & explicat in isto 1. cap. Prima est, omne quod mouetur ab alio moueri. Secunda, non dari processum in infinitum in motoribus, sed sistendum esse in vno primo, qui moueat & non moueatur. Prima ergo propositio, qui moueat & non moueatur. Prima ergo propositio, quæ in fronte libri ponitur, procedit de eo quod primo & per se mouetur, non de eo cuius tantum pars mouetur, & alia mouet, ibi enim etiam distinguitur mouens & motum. Supponit ergo, quod id quod per se primo mouetur, vel mouetur ab extrinseco mouente, vt si impellatur ab aliquo, vel mouetur ab intrinseco; si primo modo, constat ab alio moueri, si mouetur ab intrinseco, etiam debet distingui mouens & motum, quia in eo quod mouetur à se, semper est vna pars mouens, & altera mota; ex eo enim quod totum mouetur, non sumitur sufficiens ratio quod non sit pars mouens, & pars mota, neque hoc est primo & per se moueri, sed mediantibus partibus.

Secunda propositio est, in mouentibus non est abire in infinitum, sed est deuenire ad vñ, qui sit princeps motionis. Ratio est, quia si esset processus in infinitum, daretur infinitus motus, finito tempore, quia licet quodlibet

mobile finito & determinato motu moueantur, ista tamen collectio motuum infinita est, & tamen omnia finito tempore mouebuntur, quia motus, qui sit ab ultimo mobili, finito tempore absoluitur, ergo &c. Denique ut aperte videatur inconueniens, quod sequitur, si infinita mouentia finito tempore moueantur, etiam si plura sint, urget inde rationem, quia si omnia illa mobilia in vnum continuarentur, fieret ex illis vnum infinitum mobile, quod finito tempore conficeret infinitam motionem, cum corpus infinitum etiam si circulariter moueatur, infinitum spatium, conficiat, quamuis breui tempore, ut lib. 3. ostensum est.

In hoc capite secundo proponit Philos. vnicam propositionem, scilicet id quod primo mouet, idest non interuentu alterius, coniunctum debet esse ei quod mouetur ab illo. Hanc propositionem probat discurrendo per omnia genera motus, scilicet localem alterationis, & augmentationis. Et de motu locali id ostendit quia omnis motus localis, vel sit à principio intrinseco, vel extrinseco; si ab intrinseco, manifestum est id quod mouetur, esse coniunctum ei quod mouet; si ab extrinseco, solum potest quatuor modis moueri, scilicet, tractu, pulsu, vectione, & volutatione, seu vertigine, quos sigillatim explanat, & omnes reducit ad tractum, & pulsum; constat autem quod impellens & trahens proximum est ei quod mouet, ut constat ex definitione pulsus, & tractus: nam pulsus est motus aut à se, aut ab alio ad aliud: tractus autem est ab alio ad se, aut ad aliud; motio ergo quidquid loco mouet, proximum est rei motæ, quæ primo mouetur.

In motu alterationis idem probat, supponendo quòd qualitas ad quam est alteratio, est qualitas tertix speciei, vt calor & frigus, humor, siccitas, &c. Id ergo quod primo alterat, coniunctum est ei, quod primo alteratur, vt patet in sensibus, manus enim calefit ab igne distante, quia primo aer ei coniunctus alteratur, & ab aere manus, & in visu species coloris primo accipitur in aere, inde mouet visum, & similiter se habet in reliquis rebus. Vltimò in motu augmentationis auctio non fit nisi opponendo, & diminutio detrahendo ei, quod augeatur vel minuitur, ergo illi debet esse proximum id quod mouet tali motu, & sic in omni motu, & sic in omni motu mouens primo est proximum rei primo motæ.

In hoc capite tertio occasione eius, quòd in præcedenti dictum fuit, quòd alteratio ad qualitates tertix speciei solum terminatur, id laucius demonstrat discurrendo per alias species, & ostendendo solum ad illas posse terminari alterationem. Præsertim autem probat non versari alterationem immediatè circa figuram, & circa habitus, v. g. vitia aut virtutes & scientias, quæ omnia in textu clara sunt, nec multum interest ea specialiter exponere.

In hoc capite quarto & seq. differit Philosophus de comparatione motuum inter se. Et in præsentiquidem tradit quasi in communi, quæ mobilia aut motus comparari possint inter se. In capite verò vltimo tradit in particulari, quomodo proportionales istorum motuum sint faciendæ: Igitur quantum ad primum in hoc capite proponit duas dubitationes. Prima, utrum quilibet motus comparari possit cum quo-

quolibet motu, quantum ad velocitatem, & tarditatem, quam quæstionem postquam disputat in vtramque partem.

Respond. quòd vt motus comparari possint, debent esse vniuoci, idest eiusdem generis, sicut non benè comparantur vinum, & sonus, vt dicamus vinum esse acutius sono; imò & eiusdem speciei esse debent, sicut non benè comparantur albedo & nigredo, sed duæ albedines, vel duæ nigredines, vndè motus circularis & rectus, & multo minus alteratio, & latio non benè comparantur sunt enim diuersæ rationis. Nec obstat quòd aliqua vniuoca videmus non posse comparari, vt multum & parum in aqua & aere, vel saltem duplum & dimidium, nec tamen comparamus aquam cum aere in multitudine, aut in duplo; non enim hæc obtinent eandem rationem in aqua & aere, sed diuersam, dicitur enim aer multus respectu aquæ, quia magis diffunditur & extenditur; aqua verò respectu aeris, quia plus materiæ habet, quæ sunt rationes diuersæ comparationis, & solum secundum quid comparari possunt, non eo modo, quo aqua cum aqua, & aer cum aere.

Secunda dubitatio est, specialiter circa alterationes, & generationes, quomodo comparari possint secundum velocitatem, & tarditatem, cum eis non æqualitas, sed similitudo conueniat.

Respondet, alterationes posse compari quoad velocitatem, si circa eandem qualitatem versentur, & fiant æquali tempore; sumitur enim ibi æqualitas ratione continuitatis in motu, similitudo verò ratione qualitatum. In generationis.

tionibus autem fit comparatio poenes velocitatem, & tarditatem, quando res eiusdem speciei æquali tempore gignitur, vel corrumpitur; velociiores autem quando æquali tempore diuersum quid generatur, vel corrumpitur, idest magis perfectum & absolutum, vt si eodem tempore membra foetus in vtero ad maiorem perfectionem euadant.

In hoc capite quinto quasdam regulas tradit ad declarandum in particulari comparationes, seu proportiones motuum, & tradit septem regulas circa motum localem, tres circa alterationem & augmentationem. Supponit autem in motu locali inueniri quatuor, scilicet id quod mouet, id quod mouetur, tempus, & spatium. Prima regula est. Virtus mouens aliquod mobile tanto tempore, v.g. horæ, mouebit dimidium mobile per duplum spatium eodem tempore. Secunda, virtus æqualis mouet dimidium mobilis per totum spatium, quo mouebat integrum mobile dimidiato tempore, quo integrum mouebat. Tertia, si aliqua virtus tantum pondus mouet quodam certo tempore per tantum spatium, mouebit dimidium pondus, dimidio illius temporis per dimidium spatium. Quarta, dimidium talis virtutis mouebit dimidium eiusdem ponderis æquali tempore per idem spatium. Quinta, si aliqua virtus tantum pondus per tantum spatium tanto tempore mouet, non est necesse quod duplum ponderis dimidio tempore moveat, sed potest esse quod nullo modo mouere illud possit. Sexta, si dimidium virtutis mouet dimidium ponderis per aliquod spatium, non sequitur quod totum & integrum pondus per aliquod spatium

Moueat, sicut si multi trahunt nauim per aliquod spatium non poterit vnus trahere aliquo spatio. Septima, cum duæ virtutes ita se habent, quòd vnaquæque per se aliquod pondus certo tempore per aliquod spatium defert, si coniungantur, poterunt vtrumque pondus per æquale spatium eodem tempore mouere.

Circa alterationem, & augmentationem ponit tres regulas. Prima, virtus quæ augeat vel alterat tanto tempore, duplo longiori tempore duplum alterabit, scilicet, si perseueret eadem. Secunda, eadem virtus dimidio temporis augebit, alterabitque dimidium. Tertia, si aliqua virtus certo tempore tantum augeat, vel alteret, non sequitur quòd dimidium virtutis eodem tempore dimidium alteret vel augeat, potest enim nullo modo vinci resistantia passi. Plura de proportionibus videri possunt apud Magist. Soto super 7. Phisicor.



DE COMPARATIONE

mouentia, & mobilium.

QVÆSTIO XXII.

*De conditionibus requisitis
ad mouendum.*

Conditiones istæ sunt tres, scilicet ex parte agentis existentia, ex parte rei motæ, & effectus distinctio à mouente, neque enim potest aliquid mouere, & facere se ipsum, & ex parte passi & agentis, requiritur applicatio. De existentia egimus supra qu. 7. Quomodo autem saluetur in instanti ultimo quando iam desinunt dispositiones ad corruptionem subiecti in lib. de generat. dicetur. De reliquis duobus agemus in præsentiquæst.

ARTICVLVS I.

Verum omne, quod mouetur ab alio mouetur;

Propositio ista Philos. à multis reiicitur, qui existimant non requiri realem distinctionem inter id quod mouet & mouetur, quod attribui solet Scoto 9. Metaph. q. 14. & videri potest Placa in 2. Physic. disp. 1. q. 7. qui plures refert, & sequitur etiam Cabero hic disp. vnica, dub. 2.

Fundamentum huius sententiæ sumitur, tum
ex

ex varijs actionibus, in quibus mouens & motum non distinguuntur realiter; tùm ex destructione fundamenti Philosoph. Primò ergo est difficultas in motu cordis, & in motu grauium, & leuium. Totum enim cor mouetur, & totum mouet, quia cum sit motus vitalis est à se ipso. Similiter totus lapis mouetur deorsum, & totus se mouet, quia non impellitur ab aliquo extrinseco. Et similiter aqua calida se mouet ad frigus, non per emanationem, sed per motum successiuum, vt videmus, atque adeo idem est, quod mouetur, & quod mouet. Nec dici potest, quòd in istis motibus materia mouetur, & forma mouet, quia vt supra qu. 19. probauimus ex Philos. mutatio materiæ primæ non est motus strictè dictus; sed motus requirit pro subiecto ens in actu. Et ita D. Tho. 22. de verit. art. 3. docet, quòd formæ non possunt esse mouentes, sed solum principium, quo aliquid mouetur. Quare, cum prædicti motus sint motus propriè, non potest sola materia esse mota, quia motus non habet pro subiecto solum materiam, vt in 5. Phys. dicit Arist.

Secundò, est difficultas in actibus immanentibus, qui in eodem à quo egrediuntur recipiuntur, aliàs non essent immanentes; ergo in illis idem est agens, & patiens, mouens, & motum.

Tertiò, est difficultas in emanatione propriæ passionis, recipitur enim passio in eodem subiecto, à quo emanat. Ergo idem se habet actinè, & passiuè respectu passionis emanantis, & receptæ.

Quartò, viuentia mouent se ipsa: in hoc enim præcisè distinguuntur à non viuentibus, vt docet S. Thom. 1. par. qu. 18. art. 1. Ergo in eis
idem

idem debet esse mouens & motum. Nec sufficit dicere, quod in viuentibus sint diuersæ partes, quarum vna est mouens, & alia mota: contra enim est, quia vt Philosoph. ostendit lib. 8. tex. 30. lect. 7. apud D. Th. in fine, nullum continuum mouet se ipsum, partes autem viuentis sunt continuæ, ergo ratione partium non mouet se ipsum: & deinde quia si vna pars mouet aliam, illa quæ tantum est mota, non viuet, quia non mouetur à se, pars autem quæ tantum mouet, & non mouetur, erit ætus purus; si autem mouetur ab alio extra se, hoc ipso non est viuens, quia mouetur tantum ab alio.

Vltimò, fundatur hæc sententia, destruendo fundamentum Arist. scilicet, quod non potest idem simul esse in actu, & potentia respectu eiusdem, & consequenter non potest idem simul esse mouens, & motum, quia in tantum est mouens, in quantum est in actu, & in tantum mouetur, in quantum est in potentia. Sed hoc faciliè soluitur, dicendo quod non potest esse simul in actu, & in potentia formaliter, benè tamen virtualiter, sicut aqua calida formaliter caret frigore, & est in potentia ad illud, virtualiter tamen in actu habet frigus ratione formæ substantialis, cuius virtute exit: & voluntas est in potentia ad actum amoris, & in actu habet virtutem ad producendum illum.

Hæ sunt rationes, quibus aliqui infirmum putant hoc axioma. Vnde P. Suárez disp. 29. Metaphys. sect. 1. non multum illi fiât, vt ex illo deducatur demonstratio ad probandum dari vnum primum motorem, qui est Deus;

magis autem id confirmari ex alio principio, scilicet, quia omne quod fit, ab alio fit, & disp. 18. Metaph. sect. 7. conatur Arist. explicare, & defendere, maiori forsitan labore, quam profectu.

Ceterum D. Thom. perpetuus est in hac doctrina Arist. defendenda in toto rigore, non solum in hoc sensu, quod omne quod mouetur, debet habere virtutem, quia moueatur, ab alio productam, & receptam; sed etiam, quia praeter virtutem requiritur, quod motio, qua aliquid mouetur, sit ab alio. Et certè si hoc principium destruitur, consequenter oportet affirmare ex principiis philosophicis, quae fundantur in motu, non posse nos sufficienter demonstrare Deum esse, siquidem Philosophi qui ex natura motus processerunt ad ostendendum dari vnum primum motorem, qui sit immutabilis & aeternus, in his solum duobus principiis fundati sunt, quia omne quod mouetur, ab alio mouetur, & non est dare processum in infinitum in causis mouentibus. Si autem id quod mouetur, non est necesse quod ab alio moueatur, nec etiam est necesse sistere in aliquo, quod sit mouens non motum, cum idem possit moueri, & mouere se ipsum. Constat autem Arist. tam hic lib. 8. c. 4. quam in 12. Metaphys. tex. 35. solum per viam motus processisse, & per praedicta principia ad ostendendum Deum esse, ut ibi lect. 6. in fine, & 1. contra Gent. cap. 13. aduertit D. Th. qui etiam latè explicat hoc principium loco citato contra Gent. & 1. p. q. 2. art. 3. Nec per aliam viam Philosophi antiqui processerunt; Plato enim qui posuit aliquod mouens esse, quod se mo-

ueret, loquedatur de motu, qui est intelligere, sicut inuenitur in Deo, vbi tamen proprie non est motus, sed metaphoricè, de quo D. Tho. 7. Phys. lect. 1. & loco citato contra Gent. Constat autem Philosophos sufficienter demonstrasse dari Diuinitatem, & æternitatem in Deo, vt aperzè eos reuincit Apostolus ad Roman. 1. dum inquit: *Indiuisibilia Dei per ea que facta sunt intellecta conspiciuntur, sempiterna quoque eius virtus, & diuinitas: ita vt sint inexcusabiles, quia cum cognouissent Deum, non sicut Deum glorificauerunt.* Sentit ergo Apostol. non solum ratione naturali Deum cognosci posse, sed etiam de facto à Philosophis esse cognitum, ergo consequenter tenemur admittere, quòd principia quibus Philosophi processerunt, sunt certa, & sufficientia ad talem demonstrationem.

Et quia Aristot. hoc principium inductione ostendit in hoc lib. 7. cap. 1. & 8. Phys. cap. 4. & 5. nos in præsentia illud admittimus, & explicauimus, iuxta vniuersalius fundamentum, quod comprehendit omnem operationem creatam, quæ per modum motus agitur, vbi enim operatio rei differt à substantia, & aliquid potentialitatis supponit in subiecto, aliquem modum motus habet, vt dicit S. Thom. in 1. dist. 8. q. 3. art. 1. ad 4. hoc autem fundamentum est illud supra insinuatum & positum à Philosoph. hic cap. 5. text. 40. quod non potest idem simul esse in actu, & in potentia respectu eiusdem, neque idem potest esse dependens à se ipso; vnumquodque autem in tantum est mouens, in quantum est in actu & mouum in quantum est in potentia, & similiter in quan-

quantum motum dependet à mouente ; vnde non potest esse idem simul mouens , & motum respectu eiusdem .

Quod verò non sufficiat dicere , quod idem est simul in actu virtualiter , & formaliter in potentia, ita quod sufficit habere virtutem motuam , & subiectum recipiens motum , constabit manifestè ex solutione ad vltimum , vbi ostendemus , quod nihil sufficit actu mouere, ex eo præcisè quod in eo est virtus , sed requiritur , quod habeat aliquid de motu in actu, ratione cuius moueat id quod est in potentia, quia omnis motus est de quodam in quiddam, & tanquam actus entis in potentia habens, scilicet aliquid de actu , & transiens ad id quod est in potentia .

Sic ergo istud axioma intelligitur cum duplici conditione . Prima per modum negationis , quod nihil à se ipso mouetur , vt à primo & per se mouente, & primo & per se moto , vt intelligit S. Thom. 7. Phys. lect. 1. Quod enim mouet supponendo aliud prius cuius virtute mouet , vel mouet ratione partis mouentis, & partis motæ , iam supponit aliud esse mouens & aliud motum ; non verò idem se mouere formaliter loquendo . Secunda conditio est quod intelligitur de motu procedente de potentia ad actum , ita quod per id quod est de actu reducit, id quod est in potentia. Et ad hoc non sufficit habere actum qui est virtus ipsa , sed habere virtutem actu motam , vt transeat per actum ad id quod est de potentia ; sola enim virtus est indifferens & indeterminata de se ad mouendum , per hoc autem quod habeat aliquid de motu in actu , mouetur

cur ad id in quo est in potentia ; habere autem aliquid de motu in actu non potest à se primo, quia id etiam debet habere per motum , & reducendo se de potentia ad actum , si enim sine motu habet per se primo mouere , illud mouere non est motus physicus , quia non est exiens de potentia ad actum, sed erit mouere independens ab alio reducente de potentia ad actum, quod est esse primum mouens. Quod si in mouendo est independens etiam in essendo , quia operari sequitur esse , & esse est propter operari : & sic si aliquid est per se mobile quia est natura , & per se primo mouens se sine motu ab alio , aperitur via ut dicatur naturam esse primum mouens , & esse Deum sine alio principio primò mouente, quod his temporibus introducere conatus est impius , & damnatae memoriae Iulius Cæsar Vaninius in lib. de admirandis naturæ arcanis .

Quare rectè dixit D. Tho. 7. Physic. lect. 1. in fin. idem esse, Quòd omne quod mouetur , ab aliquo mouetur, ac dicere, quod omnis motus debet esse diuisibilis , & non potest aliquid se toto esse motum , & esse mobile , sed ex parte motus in actu debet procedere ad partem motus in potentia . Quod etiam verificatur in intellectu & voluntate, & in omni motu , seu operatione procedente de potentia ad actum ; nam intellectus ex cognitione principiorum mouetur ad conclusiones , & voluntas, ex fine ad media , & in actu finis ab intellectu , & à Deo , & intellectus in primo actu à Deo . Et sicut non sufficit habere virtutem motiuam , ut aliquid dicatur se mouere , sed requiritur , quòd hæc virtus ut mota moueat , & ab vna parte mo-

tus transeat ad aliam, & consequenter non moueat actu, nisi habeat motum in actu: ita non sufficit habere formam, ut dicatur per illam mouere se ipsum ex parte materię, quę est in potentia, quia tam forma, quam uirtus se habent ut principium quo mouendi, non ut ipse motor, ut dicit D. Thom. 22. de verit. art. 3. præterquàmquod id quod mouetur motu strictè dicto, non est sola materia, ut probat Philosoph. 5. Physic. sed corpus, ut etiam docet S. Tho. 3. cont. Gent. cap. 13. Nec denique materia est mobilis, sed informabilis à forma in genere causę formalis non efficientis, quę est mouens.

Ad primum à princip. respond. quod de motu grauium, & leuium, & reliquis ibi numeratis sequenti quæstione latius agemas. Interim dicimus, omnes illos per emanationem oriri à natura, cui conueniunt, quod etiam de aqua reduc̃ta ad pristinam frigiditatem, notat Caiet. 1. p. q. 54. art. 3. Emanatio autem respectu naturę, à qua dicitur emanare non est motus, & consequenter, non procedit in ea prædictum axioma, nec enim dicitur per emanationem res se mouere. Respectu autem generantis naturam, & consequenter passiones eadem actione & motu, iam in tali emanatione verificatur, quod mouetur ab alio natura recipiens passiones, aut in illas se de nouo reducens, scilicet à generante saltem mediatè, ut sequenti quæstione latius dicetur. Motus autem cordis, quia vitalis est, non ita facilè percipitur, quod à generante sit. Sed tamen quia etiam vita in rebus creatis est accepta, & deriuata ab alio, non ita uiuens mouet se, quod non

non etiam moueatur ab alio in primo motu, quo incipit vita, vt D. Thom. docet 1. p. q. 18. art. 3. & q. 105. art. 4. ad 2. & ita ille motus est vitalis tanquam initium vitæ receptæ ab alio, non tanquam consummatio, & perfectio vitæ; hæc enim operatio viuientis, est à se mouente, quatenus per vnā partem iam motā, & factā in actu mouet alias; & ita ille motus cordis non ordinatur ad quiescendum in aliqua forma, sed vt constituatur in actu ad mouendum reliquas partes, quæ constitutio à generante debet procedere, cum sit primus motus: in quo etiam assimilatur motus cordis motui cæli, v. docet D. Thom. opusc. 35. quia cælum non mouetur ad quiescendum in aliqua forma, sed vt constituatur mouens, & primum alterans respectu aliorum.

Ad secundum, de actibus immanentibus, *Respondetur*, quòd in primis in eis agens, & recipiens non sunt idem: nam agit potentia cognoscens simul cum specie, recipit verò sola potentia, non species, & appetitus agit vt motus à cognitione & à Deo; recipit verò sola potentia; qua ratione istæ potentie solent dici passiue.

Secundo dicitur, quòd licet agens & recipiens actionem sint idem, non ita repugnare; tum, quia actio ipsa egreditur vt accidens; & consequenter vt inhærens; vnde si sit actio perticiens ipsum agens tanquam actus vltimus illius, non autem transmutans alia, non repugnat, quòd egrediatur, vt inhærens, & recepta in ipso agente; tum, quia actio non requiritur, quòd sit diuisibilis; & de quodam in quiddam, sed potest esse indiuisibilis. At verò motus ne-

cessario est diuisibilis, & secundum partes priores, & posteriores procedit, & ita omne quod mouetur secundum partem posteriorem, & motam, necessario supponit partem priorem, ut mouentem, ut fiat transitus de vno ad aliud, & illa pars prior si etiam est mota, etiam est ab alia priori mouente, quousque deueniatur ad aliquam, quæ vel sit sine motu, vel sit ab alio extrinseco mouente; & sic si verè aliquid mouetur, semper ab alio priori mouetur, non verò si aliquid agit, debet in alio distincto ponere actionem receptam: vnde aliud est actio, aliud motio, aliud agens & recipiens, aliud mouens & motum; quod mouet, reducit de potentia ad actum, & procedit de quodam in quiddam, quod agit præcisè dicit elicientiam actionis.

Ad tertium, constat ex dictis, quòd emanatio ut emanatio potest recipi in eo, à quo emanat, ut autem est idem cum motu, semper est ab alio, scilicet à generante; & vide quæ diximus de emanatione, q. 12. art. ult.

Ad quartum respond. quòd viuens non se totis, nec per se primò se mouent, sed mediantibus partibus, quatenus vna pars organica mouet aliam, ut Philos. explicat 8. Physic. cap. 4. Nihil ergo, quod per se primo mouetur, à se potest moveri, sed ab alio. Et ad replicam dicitur, quod Arist. cum dixit nullum continuum se ipsam mouere, loquitur de continuo homogeneo, quod habet partes omnino similes; sic enim est perfectè continuum, quia perfectè simile. Viuens autem habet partes organicas & etherogeneas, quæ licèt sint continuæ quantum ad quantitatem, sunt tamen dissimiles

quantum ad dispositionem, & qualitatem, secundum quam mouent, & mouentur. Neque in his partibus mouentibus, & motis proditur in infinitum, sed prima pars mouens mouetur ab alia motu vitali, elicitum quidem ab eo viuentem, sed motu à mouente extrinseco generante, quod potest dare motum vitam, non quidem consummatum & perfectum, à inchoantem reliquos, eo quod vita in nobis participata, & ita non repugnat inchoationi eius esse ab alio. Pars autem ultimo motu non mouet se ipsam per se primò, sed ab alia re eiusdem viuentis mouetur, & sic respectu totius, motus eius vitalis est.

Ad ultimum respondetur, non sufficere virtutem, qua aliquid constituitur virtualiter in actu, ut dicatur aliquid mouere se ipsum, quando est in potentia ad actum producendum tali virtute, quia talis virtus vel producit illum actum ut motu, seu mediante motu, vel per simplicem emanationem sine motu. Si operetur ut motu, clarum est, quod non sufficit virtus illa, qua dicitur esse in actu virtualiter, quia licet sit principium mouendi ut quod, non tamen est ipsum mouens, neque constituit aliquid in actu mouens, nisi supposito motu, non tanquam ex priori parte motus transeat ad actum. Ad hoc autem, ut virtus constituatur motu, oportet, quod vel ille motus habeatur per alium priorem motum, & sic semper quod mouetur, mouetur ab alio, vel deueniatur ad actum priorem motum, qui sit ab alio quod moueat, & non per motum. Si verò illa virtus operetur per simplicem emanationem, vel per non motum, hoc ipso non comprehenditur

sur sub isto axioma, quod mouetur, ab alio mouetur, nisi quatenus simplex emanatio est motus generantis, & tunc ab alio mouetur, scilicet à generante: quomodo autem generans dicatur mouere genitum, etiam si non sit illi præsens, vel generatio sit discontinuata, dicemus quaestione sequenti.

ARTICVLVS II.

Virum requiratur approximatio mouentis, ad mobile, ut operetur?

DVplex approximatio inter mouens, & mobile potest intelligi, altera formalis, quæ vocatur immediatio suppositi, ut cum ipsa substantia agentis proxima est passo. Altera virtualis, quæ vocatur immediatio virtutis, ut cum virtus agentis diffunditur in aliquid distans, ubi ipsa virtus est præsens, & non substantia ipsa: & de vtraque procedit difficultas, an videlicet requiratur immediatio suppositi respectu eius, unde incipit motus, & secundo an per virtutem diffusam prius debeat agere in propinquum, quam in distans.

Sunt ergo aliqui Authores, qui absolutè existimant non requiri approximationem, quia putant posse aliquid agere in distans, quin agat in propinquum, qui citantur à Conimb. hic super cap. 2. q. 1. art. 2. At verò Scot. in 1. dist. 37. q. unica, non absolutè sentit, quòd potest aliquid agere in distans, quin agat in propinquum, sed quòd qualitates diffusæ ab agente distante non producant substantiam, etiam tanquam instrumenta, sed positis illis dispositi-

tiq.

tionibus producit substantia in parte distant
ti, sine eo quod producit in medio.

Nihilominus opposita sententia omnino tenenda est, quæ est expressa Arist. in hoc lib. 7. cap. 2. & ibi eam latè probat Diu. Tho. lect. 2. & 3. & 1. p. q. 8. art. 1. & 3. contra Gent. c. 68. quæ sententia continet duo. *Primum* est, quod in omni agente requiritur approxinatio, seu immediatio suppositi, respectu sui primi effectus, & consequenter respectu passi, si effectus ex passo educitur: quod si non educitur ex passo, ut in creatione, agens erit immediatum ipsi effectui. *Secundum* est, quod in agentibus quæ diffundunt suam virtutem in remotum, oportet quod prius agant in propinquum, & sic respectu omnis effectus, debet dari aliquis contactus, seu propinquitas agentis saltem virtualis; & communiter sequuntur Philosophum omnes eius interpretes. Et præter probationem à Philosopho allatam per inductionem in omni genere motus; videmus enim in omni motu alterationis, & augmentationis, & in motu locali, qui fit per impulsum, vel tractionem semper reperiri aliquem contactum inter mouens, & passum, quod immediate mouetur. Vterius etiam probatur necessitas huius contactus, quia alias non esset unde limitaremus spheram actiuitatis in agentibus, posset enim quodcumque agens agere in omnem distantiam: si enim sine transmissione virtutis per medium potest agere in aliquid, quod distet duobus palmis, cur non poterit similiter agere in id quod distat duobus miliaribus, vel in quodcumque aliud sine termino, siquidem non dependet à medio, ut operetur virtus.

Quod si dicas, non minus id sequi in nostra sententia, quia diffusio virtutis non sic per hoc, quod transeat de subiecto in subiectum, sed per hoc quod multiplicetur de vna parte subiecti in aliam, & sic quælibet pars poterit æqualiter agere in aliam, & totam virtutem suam imprimere: quæ est ergo ratio cur non possit ista multiplicatio fieri in quamcumque distantiam sine termino? *Respond.* Quod omne agens quod diffundit suam virtutem, diffundit illam uniformiter, difformiter per medium, & quanto magis elongatur virtus diffusa à suo agente, magis debilitatur vsque ad non gradum; cuius ratio explicabitur amplius in libris de generatione. Sufficit nunc advertere, quod actio procedit uniformiter, & magis, ac magis debilitatur, tum propter resistantiam passum, tum propter ipsum modum recipiendi, quia virtus in extraneo subiecto imperfectiori modo suscipitur, & consequenter debilius operatur, nisi à proprio agente instauretur, & consequenter si multiplicatur in subiectum magis distans, quælibet pars debilius operatur, & debilius recipit talem virtutem vsque ad non gradum.

Ratio autem à priori cur requiritur approxinatio agentis ad passum, ut effectus progrediatur ab agente, ea est, quia agens educens formam ex passu, educit illam ut unitam, aut inhzrentem illi; & sic effectus exit ex concursu passi, & agentis: oportet ergo, quod virtus sit coniuncta passu, ut effectum illi coniunctum producat. Vnde si diffundit suam virtutem in remotum, virtus illa, quæ ibi ponitur, etiam debet exire ex agente & passu, cum diffundatur ut unita passu, ergo debet supponere tale pas-

passum unitum agenti, denique non potest agens agere circa materiam sibi non subiectam & determinatam erga se; non est autem alius modus determinandi, & subiiciendi materiam agenti, nisi pernes contactum, & propinquitatem; quod enim remotum est, & distans, non habet unde determinetur ad hoc agens potius quam ad illud, cum respectu eius nullam habeat coniunctionem, neque unionis, neque propinquitatis, per quam ad illud determinatur.

Quod si dicar, quomodo sufficit virtutem agentis esse contiguam passo siquidem ex vna superficie ad aliam non transit actio, eò quòd est accidens, & non potest de vno subiecto transire ad aliud, ergo requiretur, quod virtus sit inherens ipsi passo, ut ex illo eliciat actionem, & non solum illi contigua. Quòd si dicatur communicari ab agente in passum virtutem quæ ipsi passo inhaereat, in hoc ipso est difficultas, quomodo illa virtus communicatur passo, siquidem non transit illa virtus de subiecto in subiectum, neque actio illam communicans, ergo ut producat in passo, & ei communicetur, manet idem argumentum in sua vi. *Respondetur* ad producendam actionem, & effectum in passo non requiri, nisi quod virtus producens sit contigua & coniuncta passo, & non ei inherens, imò passum debet esse distinctum ab agente, ut sit motum ab eo, non quia actio transeat de subiecto in subiectum, neque virtus diffusa, sed quia in alio subiecto non procedit ab agente, nisi in passo coniuncto, à quo educitur, & sic vnum tantum subiectum habet, non transitum de vno ad aliud;

sed tamen non potest produci virtus, ut recepta in materia distanti, sed in propinqua, quia distans cum non sit coniuncta ipsi agenti non determinatur erga illud, nec subiicitur illi, & consequenter non concurrit cum illo ad recipiendum actionem, & virtutem.

Ex quo sequitur, quare respectu Dei nihil possit esse distans; quia omnia respicit Deus ut effectum nihil ut praesuppositum subiectum, quod effectus non sit, & quia quilibet effectus ita dependet in esse à Deo, quod per suspensionem concursus potest annihilari; ideo omne quod habet esse, est immediate à concursu Dei, & non mediante concursu diffuso extra se per creaturam, quia nullus concursus creaturae est talis, quod per eius suspensionem potest res annihilari. Est ergo omne ens immediate proximum Deo, & intra quamcunque rem Deus est propter summam dependentiam à Deo, tam ex parte formae, quam ex parte subiecti, & totius esse, quod nulla habet creatura. Quod si aliquid operetur in distans prius, quam in propinquum, non est quia operetur in aliquid distans à se, sed distans respectu aliquius creaturae, non autem respectu sui, qui ubique est.

Soluntur argumenta.

Primum argumentum deducitur ex pluribus experiencijs, quibus videtur prius aliquid agere in distans, quam in propinquum, sicut in lebece ad ignem adhibito partes superiores aquae calidiores sunt, fundus autem lebetis, qui propinquior est igni, frigescit: Ignis

corripit sulfur, vel picem longè distantem; non aerem intermedium; Sol generat multa in terra, quæ non in medio, neque per qualitatem diffusam, quia id quod generatur, substantia est: torpedo facit tremere manum piscatoris, non chordam, & oculi fascinantur imprimunt malam qualitatem pueris, & non aeri intermedio, & magnes attrahit ferrum distans, & non corpus propinquum; denique phantasia residens in capite mouet appetitum, qui est in corde, & alias partes corporis distantes, & non alias intermedias. *Confirmas.* quia calidum ut quatuor applicatum medio habenti similem qualitatem ut quatuor, non agit in illud, quia non potest illud amplius intendere quia non potest agere ultra quatuor, & tamen agit in passum ultra distans, quod non habet calorem ut quatuor, ut etiam supra admissimus q. 8. Ergo potest agere in distans prius, quam in propinquum.

Respondetur, omnes illas experientias solui vnica solutione, quam tradit D. Tho. 7. Phys. lect. 4. & in 2. distin. 15. quæst. 1. artic. 2. ad 6. ubi inquit: *Quod actio cuiuslibet agentis habentis situm prius recipitur, in medio, quam in termino, non tamen oportet, quod recipiatur in utroque eodem modo, sed secundum quod exigit dispositio utriusque, sicut ponis exemplum Commentator 8. Physico. de pisce, qui retentus in reti suprefacit manum, præter hoc quod suprefaciat rete, quod suprefactionis capax non est: & tamen secundum aliquem modum rate alteratur ex virtute piscis. Ita etiam oportet, quod virtutes superiorum stellarum prius recipiantur in medijs orbibus, quam in inferiora corpora,*

quammis non eosdem effectus vtrobiq; habeant?
 Ita D. Thom. Quare in his omnibus effectus
 quidem, qui manifestè apparent fiunt in di-
 stanti, sed tamen virtus, quæ diffunditur, tran-
 sit prius per medium, licet non habeat in illo
 similem effectum, quem in remotis propter
 dissimilem dispositionem, sicut ignis non in-
 flammatur proximum aerem, quia est humidior,
 inflammatur autem sulphur distans, quia magis
 siccum, calore tamen transeunte per aerem;
 & lux Solis maiorem calorem efficit in terra,
 quam in medio, quia magis addensantur radij
 in terra, quam in medio, & diuersas res gene-
 rat in terra propter diuersam dispositionem,
 quam in medio per quod transit virtus: sicut
 etiam magnes, torpedo, oculi fascinantur emit-
 tunt suas qualitates per media, licet effectus
 faciant solum vbi inueniunt proportionem &
 capacitatem. Et similiter phantasia imprimit
 in appetitum, & alias partes corporis distantes,
 quia non in omnibus est eadem dispositio, &
 temperamentum, vt eodem modo moueantur,
 licet virtus mouens, & spiritus qui excitantur,
 descendant per partes propinquiores. Alij ta-
 men volunt, quod illa motio sit per sympathiam,
 seu radicationem potentiarum in eadem anima,
 de quo agemus in lib. de anima. Similiter in
 lebere appposito ad ignem, certum est, quod ca-
 lor, qui est in partibus superioribus aquæ tran-
 sit per fundum lebetis, sed tamen rarefacta a-
 qua per calorem, dat locum frigidiori aquæ,
 quæ est in parte superiori, quæ densior, & gra-
 uior est, vt descendat ad fundum, & infrigidet
 illud manentibus calidis partibus superioribus.
 Si tamen diu sit ad ignem, totum redditur cali-
 dum.

Ad

Ad confirmationem respondetur, quod in illo casu agens, vel conseruat calorem vt quatuor, quem inuenit in medio, & sic agit in illum conseruando, & in reliquas partes alterando, vel coniungitur cum illo calore, qui est in medio, & vterque calor per modum vnius operatur in partes non habentes tantum caloris, & sic numquam agit in remotum, quin prius agat in propinquum.

Secundo arguitur, quia diuina virtute potest aliquid agere in distans prius, quam in propinquum; ergo illa conditio non requiritur essentialiter, sed solum ratione ordinis naturalis, non est autem ratio cur non possit ordo vinci, & suppleri ab aliqua causa naturali. Eadem enim inconuenientia sequuntur, si supernaturaliter vincantur, vel si naturaliter. *Confirmatur*, quia videmus aliqua moueri in absentia, vel distantia suorum agentium sine virtute diffusa per medium, sicut sagitta impulsamouetur in parte distanti, non impulso medio, & similiter graue mouetur deorsum sine vlla motione actuali generantis. Ac denique si quis ad ostium fornacis manum apponat, calefit ab igne fornacis, si autem concludatur ostium, statim cessat calor in manu. Ergo signum est, quod aer non calefaciebat immediatè, sed ignis.

Respond. conditionem istam approximationis suppleri posse à Deo, neque essentialiter esse requisitam, sed naturaliter propter limitationem virtutis agentium naturalium, eo quod virtus limitata non solum limitatos effectus producit, sed etiam in ipso modo producendi limitata est, & ideo non potest in quamcumque distantiam sine limite operari, sed in maiorem.

teriam determinatam, alioquin non magis determinabitur ad vnam quam ad aliam, sicut non potest forma quaecumque materiam informare, sed eam quae mediantibus dispositionibus sibi appropinquat, & sibi subiicitur. Deus autem potest hanc determinationem supplere, quia virtus eius ubique tangit, & sic potest suo concursu causae creatae subicere non solum materiam coniunctam & applicatam, sed etiam distantem, quia respectu concus. Dei nihil est distans, & sic non sequuntur eadem inconuenientia, si Deus velit concurrere cum causa creata sine alligatione ad talem modum eius connaturalem, respectu materiae sibi proximae & coniunctae.

Ad confirmationem respond. quod in impulsu sagittae virtus impellens non solum est in aere proximo, sed in ipsa etiam sagitta, & in aere eam deferente, qui tamen aer à sagittante primo fuit impulsus partes sequentes, & illae alias & sic semper transiit virtus per medium, sed quia est virtus de se transiens, cum est in partibus sequentibus desinit esse in anterioribus, aer enim primo diuisus à sagitta rursus in se reclusus est, & quiescit, impulsu vltra transiente. In grauib. autem non fit motus à virtute emissa de nouo à generante, sed ipsi naturae à principio impressa, ex qua per dimanationem oritur motus, non per nouam actionem. Et ad vltimum de igne fornacis dicimus, quod recluso ostio, continuo debilitatur calor, qui est in aere vt in subiecto extraneo, & manus sentit debilitationem caloris, quousq; totaliter à contrarijs corrumpitur vel temperatur; vnde non sequitur quod non calefaciebat per mediū.

CIR.

CIRCA LIBRVM

Octauum Physicorum.



ntentum Aristot. est in hoc vltimo libro ex motu præsertim circulari, quem æternum putat sicut & ipsum mundum ad vnum primum supremumque omnium motorem ascendere, qui sit magnitudinis & mutationis expers, æternus quoque & infinitus in virtute.

SVMMMA TEXTVS

Libri Octaui Physicorum.

IN hoc primo capite, Aristoteles tria facit. Primò, supponit motum ab omnibus admitti, qui admittunt naturam; tum, quia mundum genitum fecere & consequenter per motum; tum, quia disputatio de natura est, etiam contemplatio de motu. Secundò, refert antiquorum opiniones negantes motus perpetuitatem, duplici enim via processerunt. Quidam vt Anaxagoras dixerunt, omnes res quiescisse per infinitum tempus, deinde à mente per motum fuisse excitatas & segregatas. Alij vt Empedocles vicissitudinem posuerunt motus & quietis; quiescendo per aliquod temporis spatium & mouendo per aliud, nunc amicitia congregante, nunc distrabente lite. Tertiò, eas res.

refutans ostendit non dari initium motus, sed ab æterno esse. Primò, ex ipsa natura motus, quia si motus habet principium, vel etiam incepit ipsum mouens & mobile, vel non cepit, si cepit utique per motum, & sic iam ille non fuit primus motus: si non cepit, ergo mouens & mobile per infinita secula fuerunt sine motu, quod est absurdum, nec enim dabitur ratio, cur potius modo quam ante cepit se mouere.

Secundò, quia si motus initium habuit, cum prius non esset, ergo dabatur aliquid prius quam ipse motus, ergo & tempus, quia prius & posterius in duratione tempus est, & tempus sine motu non datur, ergo ante primum motum dabatur motus.

Tertiò, nullum fuit initium temporis, ergo neque motus. Anteced. patet, quia in quolibet tempore est sumere instans præsens, sed instans est finis præcedentis, & initium futuri, ergo respectu cuiuscunque temporis designati dabatur ante tempus, & dabitur post. Autoritate etiam id probat, quia omnes præter Platonem dixerunt mundum esse æternum.

In hoc capite secundo refellit Philosophus rationes Anaxagoræ, & Empedoclis contra æternitatem motus, & facit duo. Primò eos arguit, quia non reddiderunt causam negandi æternitatem motus, aut non sufficientem, deinde soluit rationes eorum.

Circa primum ostendit insufficientem causam suæ propositionis habuisse Empedoclem, & Anaxagoram, qui dicebant motum non esse æternum, sed incepisse, quia ita natura ipsa comparatum est. Hoc autem dicitur frustra, quia
nati-

natura maximè ordinatè procedit, in hoc autem quòd mouentia & mobilia quiescant infinito tempore, aut modo quiescant, modo moueantur, nullus ordo aut ratio inuenitur, quia natura aut semper & necessario operatur, aut si habet variationem, est ex certa causa & ratione, infiniti autem ad finitum nulla est proportio.

Circa secundum, ponit tres rationes ad probandum motum, non semper fuisse, eisque respondet. Prima, quia nulla mutatio clausa terminis est perpetua, omnis mutatio est clausa terminis, cum inter duo extrema versetur, ergo non est perpetua. Secundò, in motibus particularibus motus incipit & desinit, ut cum lapis de nouo mouetur, ergo similiter tota collectio motuum in toto vniuerso potuit incipere & poterit desinere. Tertiò, quia animalia & præsertim homines incipiunt habere motum nullo facto motu ab exteriori, ergo idem poterit contingere in toto vniuerso, cum homo sit paruus mundus.

Ad primam respondet, concludere mutationem quæ est inter contraria ratione suorum terminorum esse finitam, potest tamen per iterationem perpetuari motus, qui contrario caret, sicut circularis.

Ad secundam resp. nullum esse inconueniēs, quòd aliquid de nouo incipiat moueri quod ante non mouebatur, sed tamen talem motum in singulari antecedit alius, & illum alius in infinitum versus principium.

Ad tertiam respond. falsum quòd motum animalium alius motus ab extra non præcedat. cum, quia alterationes multæ fiunt ab extrin-

seco

secundo principio in ipsis animalibus; tunc, quia in ipso motu locali, in quo se mouent, apprehensio à causa extrinseca excitatur & mouetur.

Præmittit in hoc capite tertio Arist. quandam diuisionem eorum quæ mouentur. Deinde reprobatis duabus opinionibus antiquorum, excludit ex præfata diuisione ea membra, quæ inconuenientiam habent.

Circa primam, diuisio talis est dispositio rerum quantum ad motum vel quietem, solum potest esse triplex, aut enim omnia quiescunt & nihil mouetur, aut omnia mouentur & nihil quiescit, aut aliqua mouentur, aliqua quiescunt. Et hoc vltimum adhuc potest sumi tripliciter, vel enim ea quæ mouentur, perpetuo mouentur, & quæ quiescunt, perpetuo quiescunt, aut è contra nihil est, quod semper mouetur aut quiescat, aut tandem aliqua quandoque quiescunt, quandoque mouentur, alia vero perpetuo mouentur, & alia perpetuo quiescunt.

Circa secundum explodit duas sententias extremas. Quidam dicebant nihil moueri, ut Zeno, & Parmenides, contra quos disputare ad Physicum non spectat, quia tollunt motum, qui ad omnes scientias & artes pertinet; probare autem id quod ad omnem scientiam & artem pertinet, non est Physici, sed Metaphysici. Alij è contra dicebant omnia esse in perpetuo fluxu & motu, ut Heraclytus & Cratylus. Quod Arist. refutat discurrendo inductiue per omnes species motuum, nullus enim est qui aliquam intermissionem non recipiat, cum ad sensum constet, nec semper aliquid crescere, aut decrescere, nec semper aliquid alterari, &c.

&c. Ex quo constat falsum esse, quòd omnia quæ mouentur, semper mouentur, & quæ quiescunt semper quiescunt, quia constat aliqua ex motu ad quietem, & ex quiete ad motum transire. Similiter manet exclusum alterum membrum diuisionis, quòd omnia interdum quiescunt, interdum mouentur, vt contra Empedoclem cap. præced. ostendit.

In capite quarto, cum ad primum motum, & primum motorem inueniendum solum duobus principijs innitatur Philosophia, scilicet, omne quod mouetur ab alio mouetur, & quod non datur in motibus per se processus in infinitum, licet hæc principia posuerit in initio 7. libri, nunc explicat illa vberius, & in hoc quidem cap. intendit ostendere illud primum, in sequenti secundum. Et tandem in 6. cap. colligit dari vnum primum motorem. In hoc ergo cap. 4. facit tria. Primò, ponit tres diuisiones seu diuersitates eorum quæ mouentur. Secundò, incipit probare per inductionem omne quod mouetur ab alio moueri: & tandem tertio colligit ipsam propositionem esse veram, quòd omne quod mouetur ab alio mouetur.

Circa primum. Prima diuisio est eorum, quæ mouentur aut mouent, quædam per accidens, quædam per se id habent, dicuntur autem per accidens mouere, aut moueri, quæ insunt eis quæ per se mouent aut mouentur, siue vt pars, siue vt accidens, sicut Socrates per se loco mouetur, album verò per accidens. Secunda diuisio, eorum quæ per se mouentur, alia per se alia ab alio, alia secundum naturam alia præter naturam. Et dicuntur moueri se-

cun-

cundum naturam, quia habent in se principium motus ut animalia. Tertia diuifio, quæ ab alio mouentur, quædam etiam naturaliter mouentur ut inferiora deorfum, quædam præter naturam ut inferiora furfum.

Circa fecundum, incipit inductione ostendere, quòd omne quod mouetur, ab alio mouetur. Primò enim id perfpicuum est in omni motu præter naturam feu violento, hoc enim est à principio extrinfeco. Secundò, in motu viuientium, in quibus datur pars mouens & mota, & mouentur ab anima ficut nauis à nauca. Tertiò, dubitationem habet in motu naturali inanimatorum, fcilicet in grauib. & leuib.; conftat enim non moueri à fe ipsis, quia hoc est proprium viuientium, & eorum, quæ poffunt fiftere motum fuum, & quiefcere cum uoluerint, quod non habent graua & leua. Similiter habent partes omnino fimiles, & ita vna non fe habet ut mouens, & alia ut mota, quod requiritur in his, quæ mouentur à fe. Ut ergo videatur à quo principio moueantur naturaliter, dicit quòd graua & leua poffunt effe in potentia ad formam, qua graua funt, ante quam fint genita ficut aqua eft potestate aer, & aer eft in potentia aqua: vel poffunt effe in potentia ad motum, etiam poftquam grauitatem habent, & hæc eft potentia ad actum fecundum quem habent fublato impedimento, fimiliterque ad locum ad quem mouentur, tanquam ad naturalem fedem ubi quiefcant, & in qua conferuentur. Igitur graua & leua per accidens mouentur à tollente impedimentum, à quo tamen non mouentur per fe; per fe autem mouentur ab eo quod generat.

derauit, seu fecit leue & graue, ex quo colli-
git, omne quod mouetur ab alio moueri, quod
est vltimum intentum in hoc cap.

In hoc capite quinto, secundum principium
Arist. proponit & explicat, scilicet, non posse
procedi in infinitum, sed deueniendum esse ad
vnum primum, quod moueat & non mouea-
tur, & principaliter tria facit. Primò, osten-
dit non dari processum in infinitum in causis
mouentibus. Secundò, non esse necesse quòd
quidquid mouet, ab alio moueatur, sed posse
aliquid mouere, & non moueri. Tertiò expli-
cat, quomodo id quod se mouet, sibi ipsi possit
esse causa motus.

Circa primum, ostendit non esse processum
in infinitum, sed deueniendum esse ad vnum
primum mouens immobile, quia quidquid mo-
uetur, necesse est moueri ab alio, vel ergo id
à quo mouetur, mouet se, vel rursus ab alio.
Si à se tantum, in eo sistitur, & est primum
mouens, quod non mouetur vt mouet. Si mo-
uetur ab alio & illud rursus ab alio in infinitum;
ergo in talibus mouentibus non datur pri-
mum, & consequenter, neque vltimum, cum
hoc ab illo pendeat, remoto autem primo &
vltimo mouente, nullus est motus.

Circa secundum, probat non omne quod mo-
uet necessario moueri, quia vel omne quod
mouet, debet moueri eadem specie motus vel
alia, non eadem, alioquin qui doceret Geome-
triam, deberet eam addiscere, & qui saxum
voluit, etiam deberet volui. Si diuersa cum
non sint infinitæ species motuum, sed finitæ,
necessario est standum in aliquo, quod nulla
specie motus moueatur, Quod si dicatur esse
recur-

recursum & circulum inter ista mouentia. Contra est, quia tunc sequeretur moveri aliquod à mouente secundum motum eiusdem speciei, quia si mouens motu locali, mouetur ab alteratione, & hoc ab augmentatione, & illud à motu locali; ergo de primo ad ultimum mouens motu locali, mouetur à motu locali; ex quo colligit non esse dandum processum in infinitum, sed deueniendum ad vnum, qui sit primum mouens & princeps omnium motuum, quia per se mouens est.

Circa tertium, probat, quod non potest aliquo modo dici; quod totum mouet se totum, ita quod primo & per se sit mouens, & motum, quia si se totum moueret esset idem alterans & alteratum, sanans & sanatum, in actu & potentia respectu eiusdem: deinde nec potest dici, quod totum sic se mouet, quod vtraque pars vtramque partem mouet, quia sic non daretur vnum primum mouens in quo sisteretur, sed vtrumque mouetur ab inuicem, imò hoc perinde erit, ac si totum moueret se ipsum primo & per se: quare in mouente se necesse est, quod vna pars sit mouens, & alia mota; & istae partes ita se habere debent in toto, quod se tangant mutuò, aut vna ab alia, & sic mouens & totum debent esse simul secundum contactum. Et hac ratione dicitur illud totum mouere se ipsum, quia cum sint ibi tria, scilicet mouere, moveri, & se mouere, hoc vltimum conuenit toti, non quod moueat totum, vel à toto moueatur, sed quod in se habendo partem mouentem & motam, per aliquid sui mouet aliquid sui, & sic mouet se ipsum. Colligit ergo ex dictis dari aliquod primum mouens

im-

immobile, aut cuius pars moueat, & ab alio non moueatur, cum non procedatur in infinitum in mouentibus, & mobilibus.

Tria in hoc capite sexto demonstrat Philosoph. Primum, quod primus motor sit sempiternus. Secundum, quod sit vnus. Tertium, quod primum illud, quod à primo motore mouetur, est sempiternum.

Primum ostendit ex eo, quia semper fuit motus, ergo semper fuit mouens, & primum mouens.

Secundum ostendit, quia omnes motus reducuntur ad vnum, scilicet ad motum cæli, qui æternus est, & maximè vniformis; ergo ad vnum motorem debent reduci, si enim ad duos reducerentur, non esset vnus, & continuus. Quod si dicatur, motores orbium sub primo mobili per accidens moueri, & sic primus motor poterit moueri per accidens; & tamen esse principium motus perpetui & continui.

Respondet motores orbium non moueri per accidens motu accepto in se sicut anima motu corpore, sed motu recepto in ipsis orbibus, quatenus orbis inferior rapitur ad motum superioris orbis, & ideo stat motores orbium esse causas motus æterni.

Tertium ostendit; Tùm, quia primum mouens est perpetuum & immobile, ita quod nec per se, nec per accidens mouetur; ergo id quod immediatè ab ipso est motum, æternum est. Tùm, quia nisi daretur primum mobile, quod sempiterno motu & indefectibili moueretur, non essent perpetuæ generationes & mutationes horum inferiorum; si enim non daretur corpus mobile, & variabile, & medium inter pri-

primum motorem , & ea quæ corruptioni sunt subiecta, cum prius motoreodem modo semper se habeat, hæc inferiora semper eodem modo se haberent , nec variationi essent subiecta.

In capite septimo , octauo , & nono , Philosophus probat, quiscumque motus sit primus & dignior inter cæteros, & ex tribus generibus motuum ostendit localem esse primum inter cæteros . Inter locales autem rectum & reflexum non posse esse continuum, & perpetuum, atque adeò nec primum, circularem verò esse primum, quia est continuus, & perpetuus . In capite ergo septimo docet lationem esse priorem alijs motibus natura, tempore, & dignitate . Natura, quia potest esse sine illis ; siquidem continua est, alij verò motus non, illi verò sine latione esse non possunt saltem sine latione cæli . Tempore, quia latio est æterna, & ab æterno, alij motus variantur tempore . Dignitate, quia conuenit nobilioribus entibus, utpotè animalibus perfectioribus, & cælis, & his quæ per se mouentur .

In octauo autem capite ostendit inter motus locales, neque rectum, neque mixtum, seu reflexum posse esse continuos, & perpetuos, & de recto probat, quia non potest continuari per infinitam magnitudinem, cum illa non detur, & sic non potest esse perpetuus, nisi fiat per recursum & reflexionem à puncto opposito ad oppositum. Motus autem reflexus continuus, & perpetuus esse non potest, quia motus reflexus discontinuatur à directo, cum detur aliqua quies in puncto reflexionis, & quia reflexus, & directus sunt motus contrarij, quoniam ad contraria loca tendunt, ergo non sunt idem

motus, & continuus. Hinc rursus respondet ad argumentum Zenonis in sexto libro propositum, quod mobile decurrit infinita indiuisibilia, & partes finito tempore; responderat enim etiam tempus habere similiter infinita indiuisibilia, quæ responsio fuit ad hominem. Nunc secundum veritatem respondet, partes illas actu non esse infinitas, sed finitas; solum verò in potentia infinitas, infinitum autem in potentia, finito tempore pertransiri potest.

In capite non ostendit nullam esse repugnā-
tiam in motu circulari, ut continuus, & æter-
nus sit, & redit ad probandum, quomodo id
repugnet alijs motibus; in circulari enim mo-
tu redditur ab eodem puncto ad idem pun-
ctum, & principium coniungit fini, vnde nec
debet in reflexione quiescere, neque contrarijs
motibus agitari.

In capite decimo intendit ostendere, quod
primus motor est indiuisibilis, idest incorpo-
reus, carens magnitudine, & infinitæ virtutis;
ad quod probandum præsupponit tres proposi-
tiones, deinde interponit dubitationem quan-
dam de motu projectorum. Tertiò concludit
intentum. Primò ergo præsupponit tres pro-
positiones, quarum prima est. Nulla virtus
finita potest mouere tempore infinito.

Secunda propositio. In magnitudine finita
non potest dari infinita virtus, quod intelligi-
tur de magnitudine materiali quantum est ex
vi & proportionem formæ materialis.

Tertia propositio. In magnitudine infinita
non potest esse virtus finita, quia virtus magni-
tudinis infinitæ vincit quamcumque virtutem
finitam, ergo est infinita.

Circa secundum. Interponit dubitationem, quomodo proiecta, v. g. sagitta moueatur, cum recedat à proijciente, nec moueri possit ab aere, cum sit eadem difficultas, à quo iste aer moueatur.

Respondet, moueri ab impellente quatenus tangit par em aeris propinquam, & illa aliam, & aliam & eam quæ lapidi adhæret ipsam deferre, cessat autem moueri cum virtus impressa minor est in consequenti, quàm in primo; unde talis motus non est continuus, quia licet propter unitatem mobilis videatur continuus, est tamen discontinuus propter diuersa mouentia, scilicet varias partes corporis intermediij mouentes.

Circa tertium, colligit in primo motum primum esse vnum, quia est principium vnus, & sempiterni motus; esse immobilem, quia non processus in infinitum in mouentibus motis ab alio, & sic non mouetur nec etiam per accidens, quia non habet necessitatem mouendi, quia ab alio non mouetur, sed à se mouet. Similiter non fatigatur in mouendo, quia non paritur motum aliquem, & sic virtus eius non fatigatur, neque laborat. Existit autem in principaliori parte mundi, quæ est vel suprema circumferentia, vel centrum; potius autem est in suprema circumferentia, quia illa velocissimè rapitur, & sic ibi maiorem vim suam exercet primum mouens. Et dicitur esse ibi non per determinationem suæ substantiæ ad illum locum, sed per efficaciam motus, quia inde motus incipit. Et tandem concludit non habere magnitudinem seu corporeitatem, quia hæc vel esset finita vel infinita: infinita magnitudo non

non datur, ut in tertio probatum est: finita autem non potest esse, quia primus motor mouet tempore infinito, ergo habet virtutem infinitam, quæ in magnitudine finita esse non potest, ergo caret omni magnitudine. Et sic finitur textus Aristotelis in libris Physicorum.

DE MOTV S

æternitate, & reductione in
primum Motorem.

QVÆSTIO XXIII.

*De motu rerum naturalium,
& proiettorum.*

ARTICVLVS I.

*Virum grauiæ, & leuia moueantur à se, vel
à principio extrinseco?*



Hæc difficultas admodum celebris est, & eius resolutio pendet ex principijs, quæ valdè conducunt ad alias materias, in quibus agitur de motibus dependentibus à principijs extrinsecis, ut in prima intellectiōne, & prima volitione, in motu cordis, & similibus. Et supponimus hic duo tanquam cer-

ea, & in vno est tota difficultas. *Primo*, est certum graua & leuia habere in se formam, & principium siue actiuum, siue passiuum, vt etiam in absentia sui generantis omni alio extrinseco mouente remoto moueantur, cum id constet ipsamet experientia: hoc autem principium est duplex, scilicet principale, quod est forma substantialis, quae est radix illius motus, & minus principale, quod est grauitas, vel leuitas, vt enim dicit D. Thom. in 2. dist. 14. q. 1. art. 5. ad 2. *Sicut substantia non est principium alterationis, nisi mediante calore, vel frigore, ita neque est principium motus, vel quietis localis, nisi mediante grauitate & leuitate.* Vnde male aliqui recentiores negant, grauitatem & leuitatem esse qualitates, sed substantiam ipsam grauis & leuis; nam grauitas suscipit magis & minus, vnde illud dicitur grauissimum, quod petit esse in infimo loco, vt patet in 1. de caelo, text. 18. lect. 5. apud D. Th. substantia autem non suscipit magis & minus. Sola autem compressio partium non facit grauitatem, sed hoc pertinet ad densitatem, quae etiam qualitas est, non substantia; potest autem dari corpus densum, nec tamen graue, nec leue, vt corpus Solis & astrorum, potest etiam aliquid esse minus densum, & magis graue, sicut lignum, quod natat super aquam, & corium aqua plenum fertur in profundum, aqua autem non est densior ligno, neque corium, licet verum sit quod densitas iuuat ad maiorem grauitationem.

Secundo est certum, quod generanti saltem remotè tribuitur motus grauis in hoc sensu, quia dat formam, & principium ipsi graui, quo mouetur.

uetur. Sed hac ratione etiam generans dat viuenti formam, & principium quo mouetur vitaliter, & tamen verè mouet se.

Quare difficultas in hoc consistit, an res inanimatae accipiant à generante non solum virtutem mouendi, sed etiam motum ipsum, ita ut licet habeant in se principium motus, ut quo, siue passiuum, siue actiuum, tamen principium mouens *non quod non sit ipsum* graue, quod mouetur, sed ipsum generans, à quo accipit formam & motum.

Duplex est sententia, prima docet graua & leuia moueri ab intrinseco, nec habere motum à generante, sed solum ab eo habere virtutem ut moueantur; & hac ratione attribui motum eius generanti, tanquam principio remoto, non ut proximo ipsius motus. Quae sententia attribuitur Scoto in 2. dist. 2. q. 10. Greg. dist. 6. q. 2. art. 3. & sequuntur plures ex recentioribus, ut Placa 2. Phys. disp. 5. quaest. 7. Pererius lib. 6. c. 16. Martinez 2. Phys. in illustratione cap. 1. notabili 6. Cabero 7. Phys. disp. vnica; d. lib. 3.

Opposita sententia tanquam Aristotelica docetur à D. Tho. pluribus in locis 1. p. q. 18. art. 1. ad 3. q. 105. ar. 2. & 2. contra Gent. c. 46. & 3. contr. Gent. c. 23. & 8. Phys. lect. 8. & 2. de Caelo, lect. 3. & in 2. dist. 14. quaest. 1. ar. 3. & alibi saepe. Et D. Tho. sequuntur communiter eius discipuli, & alij, qui citantur à Conim. lib. 8. c. 4. q. 1. ar. 2. & Cursu Carmel. disp. 28. qu. 2.

Continet autem haec sententia quatuor dicta, ex quibus tria tanquam certa affirmantur ab his Authoribus, & in alio est dubium inter ipsos. *Primum dictum*, principium motus grauium, & leuium per accidens, est remouens prohibens,

bens, sicut qui remouet columnam est causa, quod descendat lapis, sed per accidens, non per se. *Secundum dictum.* Principium talis motus per se *ut quod*, est generans ipsum graue, mediante tamen principio intrinseco, quod est forma grauis, & grauitas eius quæ sunt principia *ut quo*, eò quod iste motus dimanat à tali forma. *Tertium dictum.* Nullo modo ipsum graue mouet se ipsum, tanquam motor, & *ut quod.* *Quartum dictum.* Principium *quo*, scilicet forma, & grauitas alij dicunt esse principium passiuum talis motus, alij actiuum. Sed verius est in sententia D. Tho. quod est principium actiuum formale, ut distinguitur contra materiale & merè passiuum, nō autem est principium actiuum per modū motoris & agens.

De primo dicto, non est difficultas aliqua. *De quarto*, explicabimus mentem Diu. Thom. infra. *De secundo, & tertio*, probandum nobis est, quod sit sententia Aristotelis, & vera; tum quantum ad id quod negatur, scilicet graue non moueri à se; tum quoad id quod affirmatur, scilicet moueri à generante, ut à principio *quod*, & à forma intrinseca, & grauitate, ut à principio *quo*, quia mediante illo dimanat motus.

Quod ergo sit sent. Philos. constat manifestè ex hoc lib. 8. c. 4. à tex. 29. supponit enim Phil. graua & leuia suapte natura moueri, id est naturali motu, & non violento, inquit autem à quo princ. pio moueantur, & inquit: *Est autem impossibile, quod moueantur à se ipsis est enim hoc officium vite, & animarum proprium, quæ consistere in se ipsis possunt.* Subiungit autem in tex. 33. *Eorum quæ natura mouentur, iterum quæ*

cum.

in quæ à se ipsis mouentur, ab aliquo mouentur & quæ non à se ipsis, ut graua & leuia (aut enim à generante, & faciente leue & graue, aut ab eo quod impediencia, & prohibencia soluis) omnia ergo quæ mouentur, ab aliquo mouentur. Videri etiam potest Arist. lib. 3. & 4. de celo, in locis quæ infra citabimus adducendo authoritates D. Thom.

Et licet verba citata clarissima sint. Respondent tamen oppositi Authores dupliciter. Primo, quod Arist. solum voluit asserere, quod graua & leuia non mouentur à se ipsis eo modo quo animalia, scilicet motu spontaneo & progressiuo, non tamen voluit asserere, quod omnino moueantur ab alio, cum dicat suapte natura moueri. Secundo respondent, quod dixit Phyllos, graua & leuia moueri à generante per quandam attributionem non sicut à proximo, & per se mouente, nam eodem modo dixit, quod mouentur à remouente prohibens, cui tamen non attribuitur iste motus, nisi per quandam attributionem, & sic Arist. non assignat hic principium proximum motus grauium, sed remotum.

Sed prima solutio omnino aberrat ab intento Arist. cum enim ipse intendat probare, quod omne quod mouetur, ab alio mouetur, quando dicit graua & leuia non à se moueri, sed ab alio, si solum intelligitur non moueri à se motu spontaneo bene tamen alio motu, qui sit ab intrinseco: ergo ex hoc solum poterat inferre, quod omne quia mouetur, non mouetur ab alio motu spontaneo, non tamen quod absolute mouetur ab alio & non à se ipso, cum tamen absolute Phil. dicat omne quod mouetur ab alio.

moueri, & graua & leuia à se ipsis non moueri. Deinde, quia viuentia non solum mouentur à se ipsis in motu spontaneo, quem possunt sistere quando volunt, sed etiam in motu omnino naturali, quem non possunt derinere, vt in motu nutritionis, & augmentationis, & alijs similibus, ergo non sufficienter probauit Aristot. graua & leuia non moueri tamquam viuentia, & à se ipsis, si solum intelligit quod non mouentur à se ipsis motu spontaneo, sed vtrumque exclusit, scilicet, quod non mouentur motu spontaneo, neque alio motu à se ipsis, vt motu augmentationis, &c. Quod autem dicit Philos. moueri suapte natura graua & leuia, non intelligit, quod à se ipsis mouentur, sed naturaliter & non violenter.

Secunda verò solutio leuissima est tùm quia moueri à generante, vt à principio remoto, & per quandam attributionem etiam conuenit viuentibus, quia accipiunt à generante virtutem se mouendi, ergo si solum hac ratione tribuitur generanti motus grauium & leuium, quia graua & leuia accipiunt virtutem à generante vt moueant se, nullam differentiam poneret Arist. inter graua & leuia, & inter viuentia, cùm tamen dicat à se ipsis non moueri, quia hoc est proprium animatorum; tùm etiam quia intentum Arist. non erat probare, quod omnia quae mouentur, mouentur ab alio per quandam attributionem, & vt à principio remoto, siquidem id probat per inductionem in his, quae mouentur ab alio, vt à principio proximo, sicut in his, quae mouentur violenter, vt in viuentibus. Ergo insufficienter relinqueret probatum Arist. illud principium, si in graui-
uibus

uibus & leuibus non probaret, quod mouentur ab alio nisi tantum remote & per quandam attributionem, nec deberet dicere, quod mouetur, mouetur ab alio, sed quod habet virtutem ab alio, vt moueatur; hoc enim est moueri ab alio, vt à principio remoto, quod tamen non dixit Arist.

Et fundamentum huius sententię stat in duobus. Primò quantum ad partem negatiuam, quod non moueantur à se. Secundò quantum ad positiuam, quod moueantur, à generante. Quod à se non moueantur, ratio Philos. satis ostendit. Primò, quia moueri à se est proprium viuentium; in hoc enim præcisè distinguuntur viuencia à non viuentibus, quia mouent se, & non solum ab alio: & tunc dicitur aliquid carere vita, quando non amplius se mouet, vt optimè S. Tho. ostendit 1. par. qu. 18. art. 1. Et constat, quod viuencia non solum motu progressiuo se mouent, quod solum conuenit animalibus perfectioribus, sed etiam motu vegetationis, sicut conuenit plantis; & ita quilibet motus à se sufficit ad rationem vitę. Deinde etiam, quia in lapide, ver. gr. omnes partes sunt eiusdem rationis & virtutis, nec est alia mouens, & alia mota, sicut est necessarium in his, quę se mouent, vt probat Philos. in hoc lib. cap. 5. Alioquin eadem pars esset simul mouens & mota in actu, & potentia respectu eiusdem contra id, quod probatum est quæst. precedenti. Nec sufficit distinguere materiam & formam, ita vt materia sit pars mota, & forma pars mouens, quia materia sola non est capax motus strictè dicti, vt ex Phil. in 5. Physic. probat D. Tho. in 2. dist. 14. q. 1.

art. 3. & quest. 22. de verit. art. 3. & 3. contra Gent. cap. 23. respectu autem mutationis substantialis mouetur à generante. Forma autem est principium quo mouendi, non autem motor, nisi habeat adiunctas partes organicas; qua ratione dicit Philof. hoc lib. cap. 4. quod anima est pars mouens, scilicet mediantibus partibus organicis.

Quoad partem verò positiuam, scilicet, quod motor grauium & leuium sit generans, ex eo deducitur, quia id, quod acquiritur per motum in grauibz, & leuibz est esse in loco, & situ determinato in vniuerso, quod vnicuique debetur iuxta propriam naturam, perfectiori enim debetur locus superior, & inferiori inferior. Quare hoc ipsum debet dari à generante naturam, cum ei debeatur ex vi & proprietate naturæ, & in ipso instanti generationis; res enim generatur cum suis proprietatibus & accidentibus inseparabilibus, sicut res generatur cum colore & figura, & cæteris dispositionibus, ergo etiam sibi debetur situatio & ordinatio aliqua in vniuerso iuxta propriam naturam.

Est autem hæc differentia inter viuentia & non viuentia, quod propria & naturalis dispositio viuentium est esse in motu, ita quod idem est viuenti mors, quod carentia omnis motus à se. Naturalis autem dispositio non viuentium est quiescere, & remoueri à quiete & remoueri à dispositione naturali. Unde proprius actus grauis & leuis est esse deorsum aut sursum, vt dicit Phil. in hoc c. 4. text. 32. & ibi D. Thom. lect. 8. atque adeo grauitas & leuitas primo, & per se dantur ad quiescendum

in

in loco, non ad mouendum: sed quia ipsum
 quietere est quædam proprietās & passio na-
 turæ, vel ad modum proprietatis, ideo perti-
 net ad complementum generationis obtinere
 quietem, sicut obtinere alias partes & pro-
 prietates naturæ, nisi obstat aliquod impedi-
 mentum, & cum nihil generet se, ideo talem
 quietem obtinere non pertinet ad ipsum gra-
 ue, sed ad illud à quo generatur, ita quod ipsa
 tendentia ad quietem seu motus ad illam quo-
 ties à tali naturali dispositione remouetur gra-
 ue, est pars quædam generationis & comple-
 mentum eius, quod vt rectè dixit Caie. 1. p. q.
 28, ar. 1. valde notandum est pro materia gra-
 uium & leuium, inde enim pendet tota intel-
 ligentia illius. Igitur quoties impeditur pro-
 pria passio manente forma in subiecto toties
 sublato impedimento resultat in vi illius ge-
 nerationis, qua primo producta est, quia ex vi
 illius debetur, sicut ablato vno puncto in li-
 nea resultat aliud, & ablata substantia Ver-
 bi, resultaret propria in humanitate Christi.
 Quod si ex ablatione propriæ passionis vel mo-
 tus eius, forma non manet in subiecto, eò quod
 remouentur dispositiones requiritæ, non mi-
 rum, quod non amplius resultet illa passio,
 sicut impedito motu cordis, iterum non resul-
 tat, quia moritur animal, nec manet in eo for-
 ma à qua resultet.

Itaque motus in graui & leui est emanatio
 quietis seu tendentia ad quietem in loco sibi
 debito, quæ emanatio virtualiter est ipsa pri-
 ma generatio & complementum eius. Sed ta-
 men illa quies quando in loco proprio, in ip-
 so primo instanti generationis datur, resultat

siue motu per simplicem emanationem.

Si autem res sit extra proprium locum, datur per remotionem contrarij, & tollendo terminum à quo atque adeò per motum; generatio enim illa in attingentia passionum potest vim habere motus, quatenus non solum dare potest ipsam proprietatem, sed remouere ab opposito à quo impeditur, vel in quo inuenitur. Et idem prorsus est in reductione aquæ ad contrariam frigiditatem, si ablata sit.

Soluantur argumenta.

Sed dicet primò, instari hanc nostram rationem in multis alijs actionibus, quæ etiam pertinent ad naturalem dispositionem, & perfectionem rei, nec tamen attribuntur generanti; nam in viventibus motus augmentationis, & nutritionis, & respirationis, & in non viventibus calefactio ignis, & generatio alterius, attractio ferri à magnete, & similes pertinent ad perfectionem eorum. Secundò, quia motus cordis, prima intellectio, & volitio non sunt à generante; tum quia sunt actus vitales, & consequenter à principio intrinseco, non ab extra: tum, quia non sunt per emanationem sicut propriæ passionis, aliàs ad actionem daretur actio, & ad motum motus, & ipsi primi actus intellectus, & voluntatis clarum est quod per emanationem ab essentia esse non possunt, sed per veram elicientiam; cum denique, quia motus cordis non datur in primo instanti, cum in instanti motus non sit; ergo non est à generante, solum enim tribuit generans id quod in primo instanti conuenit. Tertiò, quia da-
tur

est principium elicitiuum huius motus in graui, scilicet ipsa grauitas, mediante qua mouetur; ergo non dimanat motus, vt propria passio, quia ad emanationem non exigit substantia qualitatem mediam, qua tanquam principio operetur.

Ad primum respondetur, quod augmentatio & reliqui motus naturales sunt quidem perfectiones, sed non propriæ passionis ipsarum rerum, nec propriarum passionum acquisitiones; vnde in ipsis non consumatur generatio, nec natura genita, & sic non tribuuntur à generante, sed acquiruntur à genito.

Ad secundam instantiam respondetur, omnes illos motus esse à generante, vt à mouente sicut de motu cordis docet D. Tho. 1. 2. q. 17. art. 4. ad 2. & opusc. 35. & de primo motu intellectus, & voluntatis, quo mouetur à Deo 1. p. q. 18. art. 3. & quest. 63. a. 5. & 1. 2. q. 9. a. 4. Primus enim motus intellectus, & voluntatis, quia est circa finem, se habet sicut motus cordis, quia respectu finis in communi nunquam deficit, seu peccat; respectu verò finis in particulari, si deficiat, est mortale peccatum, quasi carentia vitæ. Sed tamen illi actus, vel motus, licet sint ab extrinseco mouente, sunt tamen ab intrinseco principio elicente, quia actus vitales sunt, vnde non se habent vt propriæ passionis, quæ ita dimanant, quod sola actione generantis fiunt, ita vt ipsum subiectum, cui conueniunt merè passiuè se habeat, ideòque motus cordis solum vocatur à Diuo Thoma accidens per se consequens vitam, in 1. 2. q. 17. citata. Pertinet tamen ad generantem dare tale accidens, seu motum ipsi genito, quia

pri

primus ille motus per se requiritur ad constituendum viuens in proprio statu viuentis, quod est esse in motu, & non in pura quiete. Sed quia est in motu, non quomodocumque mouente, sed mouente vt se moueat, & vt agat, consequenter non est ab ipso viuente merè passiuè, ita vt recipiens motum illum nihil omnino agat, sed elicitiuè à principio actiuo, quia actus vitalis est; sed quia est actus vitalis talis viuentis, quod habet vitam participatam ab alio, & dependentem ab alio, seu motam ab alio, ideò in illo actu, & primo motu ab extrinseco principio mouetur, sed mouetur vt moueat, & vt agat, de quo D. Tho. 1. p. quaestio 105. art. 4. ad secundum, & q. 83. art. 1. ad tertium, & q. 18. art. 3.

Quòd si dicas, quia eadem ratione primus motus ignis ad calefaciendum deberet esse à generante, quia ipso impetu naturæ emittit, calorem, & pertinet ad generans, non solum dare proprias passiones, sed etiam accidentia concomitantia.

Negatur consequentia, quia motus ignis ad calefaciendum non pertinet ad constituendam naturam nec perficiendum in ipso primo statu naturæ, quia ignis per calefactionem non mouet se, sed alterum distinctum à se, natura autem est principium motus non alterius à se, sed eius in quo est.

Primus autem motus viuentis est motus ad mouendum se, & sic pertinet ad ipsum statum naturæ, quia debet constitui natura in ratione principij motus in se ipso; principium autem motus non est solum forma, & virtus agendi, vt in potentia, sed vt

mota

motu ad agendum, & sic pertinet ad ipsum generans constituere genitum in ratione principij moti, vt moueat, eò quòd primus motus non supponit alium priorem in ipso, per quem ad eum aliquis se moueat, sicque debet esse à principio extrinseco. Reliqui verò motus inde secuti non attribuuntur generanti, quia non pertinent ad ipsum primum statum, generationemque naturæ, nec se habent vt accidens consequens naturam, sed pertinent ad perfectionem, vel acquisitionem alicuius superadditi naturæ iam perfectæ. Et ad omnes istos motus mouetur animal ex primo motu cordis, siue sint alteratio, siue augmentatio, quia omnes spiritibus vitalibus à corde emanantibus agantur.

Quod vera dicitur, ad actionem & motum non dari actionem & emanationem. Respond. motum & actionem verè emanare, quia se ipsa & non alia actione fit, & ita si sit actio pertinet ad primum statum naturæ, consequitur naturam productam ex vi ipsius generationis, in grauibus quidem & leuibus, quia ipse motus est emanatio collocationis & situationis in loco proprio, & si fiat cum expulsionem loci oppositi, erit proprie motus ex contrario; in uiuentibus autem motus ipse non est emanatio alicuius propriæ passionis, sed est actio elicità ab ipso uiuente dependenter ab ipso generante & generatione, quatenus producit uiuens sic actiuatum vt eliciat illum motum primum, quo constituatur in ratione principij moti se mouentis, & ideo si generans non est deficiens, ille primus motus cordis, vel voluntatis deficiens esse non potest. **Quid autem illa**

illa actio producat & Respond. quòd in corde producit ubi, seu mutationem loci similem motui locali cæli, ut dicit S. Thom. opusc. 35. eò quòd est continuus, & per modum conuersionis, seu trepidationis, in intellectu autem producit conceptum, in voluntate terminum spirationis, seu amoris.

Quod verò dicitur, non dari motum cordis in primo instanti generationis. Respond. Non dari tunc formaliter & intrinsecè, sed initiatiuè extrinsecè, quia motus incipit per vltimum non esse.

Ad tertiam instantiam respond. quod petit illud quartum dictum supra positum, quomodo grauitas sit principium motus? Nam principium intrinsecum quod est forma substantialis & grauitas, aliquando vocatur à Sanct. Thoma principium passiuum, ut 3. par. quæst. 32. art. 3. & in 1. de cælo, lect. 3. Imò in hoc lib. 8. non solum id affirmat, sed addit. *Esse contra intentionem Philos.* quòd in materia sit principium actiuum, quod quidam dicunt esse necessarium, ad hoc quòd sit motus naturalis sufficit enim quòd sit passiuum, quòd est potentia naturalis ad actum. Videri etiam potest 1. 2. q. 6. art. 5. ad 2. & 3. cont. Gent. cap. 22. Quod obiter aduertendum est contra Vazquez, & alios, qui principio passiuo negant rationem naturæ, ut supra q. 9. vidimus. Quod verò in grauib. & leuib. sit principium actiuum motus, expressè affirmat quæst. 5. de potent. artic. 5. & 4. cont. Gent. cap. 96. & 1. 2. quæst. 36. ar. 2. & in 2. dist. 18. q. 1. art. 2. in fine corporis, & alibi sæpè. Veritas tamen est, quòd *l. 3. actiuum* aliquando sumitur pro principio formali, siue

fit principium emanationis, siue actionis. Aliquando sumitur pro principio effectiuo & mouente, & hoc ideò quia, passiuum, & opponitur formæ, & opponitur agenti, & ideò actiuum vtroque modo sumitur. In grauib; ergo datur principium actiuum formale, & per modum emanationis; non verò actiuum per modum mouentis, sed vno verbo datur principium actiuum, vt *quo*, non vt *quod*. Quæ resolutio sumitur ex D. Thom. in 2. dist. 14. q. 1. art. 3. vbi inquit: *Quod in motu corporum simplicium, quamuis forma naturalis sit principium motus non tamen est motor, sed essentialis motor est generans, qui dedit formam, & accidentalis est remouens prohibens, vt dicitur 8. Physicor.* Vnde in illis locis, quibus affirmat esse principium passiuum, negat D. Thom. dari principium actiuum, quo constituatur mouens eo modo, quo in viuientibus datur principium actiuum ad motum, & sic sumit *actiuum*, pro motore, vt præcipuè videri potest 1. de celo, lect. 3. & 2. de celo, lect. 2. & alijs locis. Quando verò dicit esse in eis principium actiuum sui motus, loquitur de principio intrinseco emanationis, & comparatiuè ad cælum, in quo non inuenitur principium actiuum motus, nec per modum motoris, nec per modum principij à quo emanat motus, sed pure recipit illum à mouente, & impellente extrinseco; graua autem & leua sine impellente extrinseco per formam quam habent à generante, mouentur per modum emanationis, quia tendunt ad propriam situationem in vniuerso.

Quod si dicas? quare ergo requiritur grauitas

ras, & leuitas ad huiusmodi emanationem & siquidem substantia per se ipsam est sufficiens principium emanationis, non verò requirit qualitates superadditas ad emanationem, sed ad actionem propriam? *Resp.* etiam in ipsa emanatione passionum, emanare vnā mediante alia, sicut voluntas medio intellectu, risibile mediante admiratio, de quo S. Tho. 1. p. q. 77, ar. 4. & 7. Motus autem, & quies in loco oritur in grauibz, & leuibz mediante qualitate, quæ est grauitas, & leuitas, quia locus non conuenit immediatè ipsi substantiæ, sed vel mediante quantitate quantum ad extensionem, & situationem, vel mediante qualitate quantum ad rationem loci naturalis, & conseruatiui, hoc enim maximè à qualitatibus pendet: esse autem sursum, vel deorsum secundum naturalem inclinationem conuenit alicui secundum quod in tali situ conuenienter se habet ad sui conseruationem; unde grauitas & leuitas non est virtus primo & per se motiua; neque enim datur graui, & leui ad operandum primò & per se, sed ad quiescendum, & exiltendum in loco, quia perfectio talium corporum non est in operando, sed in quiescendo, viuientium autem perfectio est in operando; & ita dixit Philosoph. in hoc libro, text. 32. quod actus grauis est esse deorsum.

Tandem obijciēs pro prima sententia, quia licet intelligi possit, quod in primo instanti generationis mouetur graue à generante; tamen quando postea generatio impeditur interruptur generatio, & rursum mouetur graue, oportet quòd sit alia actio distincta à ge. >

à generatione : & tunc iam non est generans. Ergo non potest ab illo talis actio elici. Nec sufficit ponere virtutem generantis, ve mediantē illa dicatur generans mouere, quia restat difficultas, quomodo illa virtus, & à quo moueatur, ve de nouo incipiat operari, quia omnis virtus operatur mota. Et licet sit eadem difficultas in quacumque propria passione, quando post impedimentum iterum dimanat à subiecto, siquidem emanatio non distinguitur ab actione generantis tamen specialem difficultatem habet in motu grauium, & leuium, & reductione aquæ ad frigus, quia hic interuenit verus & proprius motus à contrario in contrarium. Omnis autem motus in actu requirit, quod mouens de nouo excitetur ad operandum, & non solum virtualiter moueatur. Dicere autem, quod grauitas est principium passiuum motus, maior est complicatio, quia restat tunc inquirere, à qua virtute actiua hoc principium passiuum moueatur, si enim à generante mouetur, ab ipsa debet actiue hoc principium passiuum moueri, & cum generans non est per se ipsum præsens ipsi graui quod mouetur, debet aliquam virtutem actiuam in eo relinquere, vnde tollere omnne principium actiuum etiam emanationis in graui, est tollere quod à generante in absentia moueatur.

Respond. D. Thom. 4. de Cælo, lect. 2. vbi la- culenter rem istam tractat in eam partem inclinare, quod quando graue generatur extra locum suum, & mouetur ad locum proprium, tunc ille motus immediatè est à generante in quantum dat formam, cui competit esse deorsum; mediatum autem principium actiuum talis

alis motus est grauitas, quod etiam affirmat, 1. 2. quest. 23. art. 4. Si verò graue post ipsam generationem, & acquisitam formam suam sublato impedimento mouetur, tunc generans non est proximum mouens, sed ipsum graue est, quod proximè se mouet: nec est inconueniens, quod idem sit mouens, & motum per accidenis, quamuis sit impossibile, idem moueri à se ipso primo, & per se.

Ceterum autoritas ista non est Diu. Thom. qui quartum librum de cælo non est interpretatus, sed in tertio de cælo, lect. 8. finiuntur commentaria Diu. Thom. reliqua vero adiecta sunt à Petro de Aluernia; quare D. Thom. in 3. de cælo, lect. 7. circa fin. docet contra Auerroem: *Quòd forma grauis, & leuis non est principium ætium per modum mouentis, & sicut agens motum, sed sicut quo mouens mouet, sed motus grauium, & leuium procedit à generante immediatè.* Et expressè impugnat Auerroem, qui dicebat, quod corpus graue, & leue mouet se ipsum per accidenis, sicut nauis, qui mouet nauem, à cuius motu ipse mouetur.

Respondendum est ergo, quòd motus grauium, & leuium semper est à generante, siue fiat in principio generationis, siue postea quando sublato impedimento iterum graue mouetur, quia semper est emanatio propriæ passionis, nempe collocationis, & quietis in loco proprio. Et licet generatio prima cesseret, & interrompatur formaliter, tamen manet virtualiter, quia manet ipsa virtus generationis, qua generans generabat, quatenus manet forma genita impedita suo complemento, & propria passio.

passione ; generans autem non attingit proprias passiones immediatè , sed mediante forma , cui conueniunt & connectuntur . Vt autem dicit D.Tho. q. 3. de potent. art. 11. ad 4.
Generatum tandem mouetur de generante in gradibus , & lenibus , quandiu retinet formam sibi traditam à generante , sicut instrumentum intelligitur moueri à principali agente , quandiu retinet virtutem à principali agente impressam . Oportet autem mouens , & motum esse similes , quantum ad principium motus , non tamen quantum ad totum motum , ut apparet in proiectis .
 Ita D.Thom. Quare cum virtus relicta à generante non sit aliud quam forma geniti , ut perficiatur generatio in his , quæ habent connexionem cum ipsa forma , quotiescumque impeditur ista virtus , ne explicet se in talem emanationem propriæ passionis , sublato impedimento , iterum se explicat noua quidem emanatione , eadem virtute petente illam nouam instaurationem , & explicationem emanationis , quoties de nouo impeditur , & impedimentum tollitur . Nec ad hoc indiget noua excitatione , & motu , quia iam de se determinata est ; ut sublato impedimento emanet iterum propria passio propter necessariam connexionem , & debitum propriæ passionis cum natura genita , iam mota à generante quando primo attacta est , facta est enim ut determinata ad hanc passionem ; neque enim est aliud virtus generantis remanens in genito , quam ipsa forma generata , ut dicit D.Tho. quatenus connexionem habet cum sua propria passione , & ad talem emanationem de nouo non requiritur noua motio , aut determinatio ,

ratio, sed impediementi ablatio. Videatur etiam ad hoc D. Thom. 5. Phys. lect. 3. ubi docet, novam relationem consurgere ex vi actionis ponentis fundamentum, in quo ratio continebatur virtualiter, sed explicatur posito termino, sine nova actione, & mutatione.

Sed dices, si ille motus est emanatio propriae passionis, cur est velocior in fine, quam in principio, & non semper aequalis? *Respondet* D. Thom. 1. de celo, lect. 17. circa finem, ex eo esse, quod graue quanto magis descendit, tanto magis confortatur grauitas eius propter propinquitatem ad proprium locum. Itaque emanatio propriae passionis, vel est instantanea, si id, quod dimanat, intra ipsum subiectum est; vel si respicit aliquid extra, in quo sit, tanto est vehementior, quanto illi propinquior, quia tunc habet maiorem conuenientiam, & coniunctionem cum illo; unde inclinatio, & appetitus ad illud, quae fundatur in tali conuenientia confortatur, & maior fit. Nec tamen valet, si dicas, quod hoc modo si lapis incipit moueri prope centrum, habebit motum velociorem, quam si incipiat moueri à longe, cum tamen in principio motus ille non sit ita velox. *Respond.* enim, quod vehementia velocitatis non sumitur ex propinquitate loci ad locum, sed ex propinquitate emanationis ad quietem. Quando enim incipit emanatio ad quietendum, & prolongatur, quanto magis appropinquat, tanto est velocior. Quod verò incipiat à loco magis, vel minus distante à centro, per accidens est, ad hoc vt habeat maiorem velocitatem ex eo, quod à tali loco incipit.

ARTICVLVS II.

Qua vi moueantur proiecta?

TRes sunt difficultates breuiter tractandæ
Prima, an detur impulsus mouens pro-
 iectum, & quid sit. *Secunda*, Quomodo cor-
 rumptur talis impulsus. *Tertia*, Quomodo
 fiat motus reflexus quando resilit proiectum.

Circa primum, multi ex antiquis dixerunt,
 motum projectorum esse aerem à tergo impel-
 lentem rem proiectam, qui eandem difficulta-
 tem patiuntur in assignando, qua vi aer mo-
 ueatur, vt Arist. aduertit in hoc lib. cap. 10.
 Negauit autem dari qualitatem impulsuam
 Pereira lib. 14. Phys. cap. 5. propter difficulta-
 tes, quæ in ea asserenda inueniuntur, & autho-
 ritates quasdam Aristotelis, quæ videntur aer-
 i attribueret motum projectorum. Difficulta-
 tes sunt, quia non apparet, quæ sit ista quali-
 tas, & cuius speciei, cum modò habeat vim
 leuitatis tendendo sursum, modò grauitatis
 deorsum, modò nullius tendendo ad partes cir-
 cumstantes; quomodo autem potest vna quali-
 tas tot motuum diuersitates causare? Secundò
 est difficultas, quomodo corrumpatur ista qua-
 litas, cum non assignetur ei contrarium, à quo
 destruatnr.

Authoritates autem Philos. sunt in 4. Phys.
 text. 68. vbi dicit, proiecta non posse moueri
 per vacuum, quia non est aer à quo deteran-
 tur. Item in hoc lib. 8. text. 82. dicit moueri
 proiecta, quatenus pars aeris mouet vicinam,
 & illa aliam, quousque perueniat ad proie-
 ctum,

Aum, illudque deferat. Et in 3. de cælo text. 28. dicit, quod motus violentus videtur aere ut instrumento: quod si aer non esset, motus violentus non esset. Et denique alijs multis locis attribuit aeri motum projectorum, non impulsui impresso rei proiectæ, ut lib. de insomnijs cap. 2. & in problem. sect. 11. problem. 6. & alijs locis. Denique S. Tho. 3. de cælo lect. 7. dicit: *Non esse intelligendum, quod virtus motoris imprimat lapidi in motu violento aliquam, virtutem, per quam moveatur sicut virtus generantis imprimis genito formam, quam consequitur motus naturalis.*

Nihilominus qualitas seu vis ista impulsiva negari non potest absolutè loquendo, siue recipiatur in aere mouente, siue in ipso proiecto, aer enim concitatus & impulsus aliqua vi impressa indiget, ut concitetur: ergo eadem difficultas est in hac sententia circa qualitatem istam impressam aeri, vel impressam proiecto. Et Arist. apertè talem vim fatetur in ipso loco cit. huius libri 8. text. 82. dum dicit, tunc cessare motum projectorum, cum vis mouendi minor imprimitur. Et in sententia Diu. Thom. negari non potest virtus ista impulsiva non per modum permanentis impressa, sed per modum transeuntis, ut loquitur in qu. de anima art. 11. ad 2. *Virtus, inquit, quæ est in semine à patre, est virtus permanens ab intrinseco, non fluens ab extrinseco, sicut virtus mouentis quæ est in proiecto.* Et qu. 3. de potent. art. 11. ad 5. dicit: *Quod instrumentum intelligitur moueri à principali agente, quandiu retinet virtutem à principali agente impressam unde sagitta tandiu mouetur à projiciente, quam-*

diu

diu manet vis impulsus projicientis. Itaque à projiciente procedere vim aliquam efficientem istum motum in rebus projectis, siue illis immediatè imprimatur, siue mediante aere, nec in sententia Arist. nec D.Thom. negari potest, cum Aristot. loc. cit. dixerit: *Id quod primum mouet efficere ut aer aut aqua, aut eiusmodi aliquid quod moueri mouereque aptum sit, possit mouere*. Et ratio est manifesta, cum effectus ille, scilicet motus localis rei projectæ ab aliqua vi prouenire debet, non à sola virtute, quæ inhæret projicienti, quia hæc distat à projecto, nec potest operari in distans nulla virtute communicata illi, in quo effectum operatur; aliàs illa virtus, si posset agere in distans sine communicatione virtutis, posset in quamcumque distantiam mouere: requiritur ergo virtus aliqua extra projicientem emissæ ut operetur, sicut etiam securi communicatur aliqua vis, ut scindat tali vel tali modo, quam ex se non habet, & ab artificis motu participat.

An verò ista virtus seu impulsus recipiatur in ipsa re projecta an in aere deferente? non tanti momenti quæstio est. Videtur autem in utroque recipi. Nam verba citata D.Thom. in ipsa sagitta impulsus recipi significant. Et in 3. de cælo lect. 7. dicit: *Quod aer susceptibilior est huius impressionis, quam lapis, quod est utrique eam attribuere*. Et quidem multum iuuari ab aere concitato, tum ut feratur res projecta, tum ne cadat, ipse Aristot. docet 4. Physic. tex. 68. licet ex aliorum sententia videatur loqui, refert enim quòd alij id dicunt. Et loco cit. ex 3. de cælo, docet ipse & D.Thom.

Phil. Nat. Pars 11.

R

Quod

Quod aer est instrumentum motus violenti ; videtur etiam illa experientia iuuari , vt aduertit S. Tho. 2. de cælo lect. 8. quia res impulsæ non tanto impetu fertur in principio , nec ita ferit rem propinquam , sicut aliquantulum distantem , quia aer non ita concitat plures partes in initio impulsus sicut paulo post . Ceterum non soli aeri imprimitur iste impulsus , quasi requiratur ad motum violentum proiecti quod ab extrinseco impellente , qualis est aer , moueatur . Restat enim eadem difficultas de aere distante , qui est deferens projectum in distans , & etiam violenter , à quo alio extrinseco moueatur , cum longè distet à proijciente . Nec apparet quomodo solus aer possit esse causa motus vehementissimi , vt globi emissi à bombarda , aut cùm rota vehementissimè concitatur , cur etiam res dura & solida vt lapis vehementius feratur ab impulsu , languidius verò pluma aut res alia mollis ? Cùm tamen si à solo vento fertur , è conuerso sit ; signum ergo est impulsus non in solo aere recipi quasi ventum , vt ferat rem projectam .

Ad primum fundamentum oppositum resp. multas alias qualitates esse motiuas , præter leuitatem & grauitatem vt magnes mouet ad se ferrum , electrum paleas , & alia similia , cur ergo negemus dari impulsus , qui sit virtus ab animali impressa quasi instrumentum eius ? & ideo potest habere tam diuersos motus , sicut ipsa virtus animalis , cuius vices gerit vt participatio eius : quamuis etiam facta aliqua compressione vel dispositione corporum , possit ex motu naturali aliquis impulsus , seu motus resultare contra propriam inclinationem , quod

com.

communiter accidit propter aliquod impedimentum obliquans motum naturalem, vel propter vacuum, ne detur.

Ad quam verò speciem pertineat impulsus? Aliqui vt M. Soto hic q. 3. reducant illum ad primam speciem, quia suscipit magis & minus, & habere potest contrarium. Alij reducant illum ad secundam speciem, quia est virtus instrumentalis participata à potentia motiua; reducit autem D. Thom. instrumentalem viam ad speciem potentiae cui deseruit. 3. p. qu. 63. art. 2. In his autem quæ reductiue solum spectant ad aliquam speciem non repugnat deficere ab aliqua eius perfectione vel conditione, ideò enim reductiue solum pertinet quia non perfecte; & ita potest suscipere magis & minus talis virtus instrumentalis, licet non ipsa potentia cui ministrat. Et ita hoc est probabile.

Quòd si dicas. Ergo in impulsu datur motus alterationis, quia productiuus est qualitatis. *Resp.* propriè non esse alterationem, quia alteratio non est ad qualitatem instrumentalem, & per modum motionis deseruientem, sed ad qualitatem disponentem materiam, vel terminantem motum per modum passionis, vel passibilis qualitatis, vt Phil. probat lib. 7. cap. 3.

At secundam difficultatem statim respondebimus, quomodo corrumpatur impulsus.

At auctoritatem Philos. resp. ipsum non negare impulsu, quem aperte fatetur, sed docet imprimi aeri & mediante eo rei proiectæ, quia vt dicit S. Tho. 3. de cælo lect. 7. facilius recipit impulsu, quam res proiecta, non enim negari potest saltem aerem ab impulsu concitari.

Ad authoritatem D. Thom. resp. solum negare projectis virtutem per modum permanentis, nō per modum transeuntis, quæ à D. Thom. magis vocatur motus quam qualitas, quæ stabilem virtutem nominat, vt 1.2. q. 110. art. 2.

Secunda difficultas,

Multi existimant impulsū corrumpi solum à contrario, non quidem ab ipsa grauitate substantiali, seu habituali, sed ab accidentali; quæ non est aliud quàm grauitatio, seu conatus grauis ad tollendū impedimentum descensus. Ita P. Vazq. 1.2. disp. 81. c. 3. Montefinos 1.2. disp. 34. q. 1. Sed vrgentur isti Authores illo vulgari argumento, quia impulsus non semper contrariatur grauitati aut leuitati, vt patet, cum per impulsū lapidis projicitur deorsum, vel aer truditur sursum, quo casu non est duplex motus, quia non acquiritur duplex vbi, est tamen duplex principium motus in vnum conueniens, scilicet, impulsus & grauitas, & tamen impulsus euanescit: quod patet, quia si impellatur lapis deorsum à loco distanti, non facit tantum impetum in fine motus, quantum in medio, v. g. globus emissus deorsum à tormento bellico languescente impetu emissionis, & durante motu grauitatis non tam vehementer ferit; signum ergo est desinere impulsū quo fertur deorsum, & non à grauitate cū non contrarietur motui, quo impeditur deorsum.

Resp. P. Vazq. in tali casu impulsū à terra quam tangit corrumpi, quia impulsus ille terre impressus aliquo modo mouet eam, cū sit
libr.

librāta suo pondere quasi in bilance, & motā terra sua gravitatione contrariatur impulsui, eumque destruit. Alij respondent corrumpi à resistantia terræ impediēte motum impulsus, sicut impeditur à tecto sursum posito, ne ultra transeat impulsus; quod utique non est per contrarium motum, & ita non explicat, à quo contrario corrumpatur.

Ceterum illa prima solutio non potest sustineri, quia terra non est librata suo pondere quasi in bilance, sed tanquam in centro, ubi perfectē quiescit, & fundatur super stabilitatem suam. Unde nisi impulsus aliquis totam permeet, & violenter eleuet, non mouetur: hoc autem fieri non potest à lapillo vel grano cadente in terram, vel quolibet alio pondere; imò cum ex omni parte crebro aliqua cadant in terram, vel ambulent super eam ex omni parte, & contrarijs motibus moueretur terra sursum & deorsum. Addo, quod cum his temporibus opinio quædam Copernici, & aliorum de motu naturali terræ per modum gyrationis, edicto Sedis Apostolicæ à Paulo V. condemnata sit, iterum ut à fide dignis audiui à Gregorio XV. opinio de motu terræ, qualicumque etiam librationis damnata est, utpote eisdem Scripturæ locis contraria. Deinde contra vtramque solutionem instatur, quando leue ascendit impulsu aliquo motum, vel graue descendit, & impulsus ille cessat, antequam terram vel corpus attingat; tunc enim nullum datur contrarium, nec aliquod impediens, quo impulsus ille corrumpatur; ergo non semper à contrario corrumpitur.

Quare dicendum est, quod impulsus definit
R 3
sicut

sicut lux, & sonus, & aliæ qualitates transeuntes, quæ aliquando corrumpuntur à contrarijs, aliquando desinunt ex defectu causæ conseruantis, quia dantur per modum transeuntis, sicut & ipse motus. Sed tamen lux dependet à causa conseruante, scilicet luminoso, taliter quòd in absentia eius, nec in instanti durat, quia illuminatio fit in instanti, & non per motum, vnde cessante luminoso, in instanti desinit. Impulsus autem datur per modum motus, quia datur per modum virtutis instrumentalis ad mouendum aliquod corpus, & ideo aliquandiu durat in absentia motoris; & vt inquit D. Thom. q. de anima, art. 11. ad 2. & q. 3. de potentia, art. 11. ad 5. quia illa virtus finita est, mouet vsque ad determinatam distantiam, & tandiu mouetur aliquid à proijciente, quandiu manet vis impulsus proijcientis. Quare istæ qualitates datæ per modum transeuntis ex natura sua habent dependere à principali agente, vt à conseruante vel instantanee, vel secundum motum. Si verò occurrat motus oppositus, vel à grauitate, vel à leuitate, vel ab alia causa, ab illo corrumpetur; sicut etiam lux potest impediri ab opaco interposito, & non solum ex absentia luminosi deficere.

Quòd si dicas, impulsus non dependere à proijciente, vt à causa conseruante, quia separatus ab ipso durat. *Responderur*, quòd impulsus separatus à proijciente, & non instauratus ab ipso, durat per modum transeuntis, & via corruptionis, quia dependet ab ipso non instantaneè sicut illuminatio, sed successiuo modo sicut motus, & sic etiam si separatus sit, & non continetur cum proijciente, aliquan-
dū

diu durat, sed non diu conseruatur, quia ex ipsa sua natura transeunter datur, & solum ad determinatam distantiam.

Et hinc colliges, quomodo desinat impulsus, nam si desinit per contrarium, desinit in instanti extrinseco per primum non esse; quando est verum dicere; nunc est positum contrarium, & consequenter non est impulsus, immediatè antea erat. Si autem desinit defectu causæ conseruantis, quia peruenit vsque ad vltimam debilitationem, desinit similiter per primum non esse; quia qualitas versus diminutionem, & non gradum desinit per extrinsecum terminum paruitatis, ad quem non peruenit, & infra illum inuenitur, vt diximus supra q. 8.

Tertia difficultas :

C*irca motum reflexum* dubium est, à quò causetur reflexus motus, an à corpore, v. g. à pariete, vnde resilit, an à proijciente, vnde incipit? Nec enim videtur posse causari à pariete: tum quia paries manet immotus, & caret vi impulsua, & sic non potest mouere, & de nouo motum producere, si motus proijcientis ibi deficit: tum quia quando pila, v. g. decidit in terram, & resilit ascendendo, ille ascensus non potest causari à terra, cum sit illi contrarius; tum quia non omnia corpora resiliunt, vt ferrum vel lapis, si tangant corpus durum; ergo non est à pariete illa reflexio, sed ab alia dispositione corporis impulsæ: tum denique quia pila tanto vehementius resilit, quanto fortius proiecta fuit; ergo non potest

à solo pàriete causari : hic enim eodem modo semper se habet. A proijciente autem ille motus reflexus fieri non potest ; tùm quia est motus contrarius & discontinuus priori , cùm in pàriete frangatur prior impetus ; tùm , quia in pila cadente sine impulsu in terram, & resiliante datur idem motus reflexus, & non à proijciente, ergo à corpore vnde resilit .

Respondetur, in motu reflexo duo inueniri, scilicet , id quod per se mouet , & causat motum secundum se, & id quod refrangit motum, & causat reflexionem , quod per accidens se habet , & causat motum reflexum , ad modum quo per antiparitasim causatur maior intensio in qualitate opposita , vel ex reuerberatione lucis in alio corpore causatur intensior lux, & calor; sicut enim quando frigus circumdat calidum, calor ille à frigore repercussus reuertitur ad calidum , & intendit illud , ita etiam motus directus , siue fiat per impulsu proijcientis , siue per motum naturalem grauitatis, si tangit corpus durum, refrangitur , & fit duplex motus : & illud corpus durum est causa illius motus quantum ad discontinuationem , & refractionem , sed impellens est causa illius quantum ad substantiam motus , sicut motus tibie curue quantum ad obliquitatem est à curuitate , quantum ad substantiam motus vitalis est ab anima informante tibiam, & ibi modificante motum ; sic motus reflexus, in quantum est obliquatus , & deficiens à directo est à duritie corporis impediens motum directum, quantum autem ad substantiam motus est à proijcientis impulsu , vel vt causa mouente directe , & suo impulsu tangente corpus durum,

rum, vbi obliquatur & modificatur impulsus in contrarium motum. Vnde Arist. in hoc lib. 8. text. 32. cum simpliciter dicit, quod motus pilee non est à pariete, sed à proiiciente, intelligitur quod est à proiiciente remote, & quantum ad substantiam motus, non quantum ad obliquitatem, & refractionem illius.

Ad primum fundamentum, oppositum, Respond. quod paries vbi fit reflexio, est immotus, & caret vi impulsiva, quantum ad impellendum, & mouendum per se, non quantum ad resistendum, & impediendum motum directum, & causandum reflexum per accidens; ad hoc enim non requiritur vis impellens, sed impediens, nec requiritur quod paries sit motus, sed ipso motu directo attractus, sicut frigus circumstantis causat calorem per accidens, & corpus opacum refractionem lucis per multiplicationem & diuisionem eius.

Ad secundum dicitur, quod quando pilea cadit in terram, & flectitur ascendendo, ille ascensus per accidens est à terra, quia non est ab illa in quantum ascensus, sed in quantum motus obliquus, & refractus à directo, sicut quando aqua calefacta circundatur frigore, fit calidior per antiparitasim, non quia calor fiat à frigore, sed quia refrangitur ab illo, & consequenter multiplicatur, redeundo ad calorem aquæ. Per accidens enim non repugnat fieri oppositum effectum alicuius qualitatis refrangendo, aut obliquando motum eius.

Ad tertium respondetur, ad refractionem requiri aliquam dispositionem in corpore resiliente, vtpotè, quod sit talis densitatis, vel leuigationis, & similia, quæ si desinit non fit

motus reflexus, non ex defectu mouentis, vel refrangentis, sed ex defectu dispositionis requisitæ, sicut lux non in omni corpore refrangitur, nec frigus circumstans semper faciat antiparistatiam.

Ad ultimum respond. vehementiorem motum reflexum causari præsupposi iuè à vehementiori motu directo stante eodem corpore duro, quia tunc fit maior refractionis motus; & consequenter in reflexione e iam inuenitur maior impetus, quia eadem fortitudine, quæ exiuit à proijciente, refrangitur à repercusso.

QVÆSTIO XXIV.

De eternitate motus, & primo eius motore.

ARTICVLVS I.

Verum res permanentes potuerint esse ab æterno?



Vpponimus duo in fide certa? *Primum* est, mundum incepisse in tempore, & similiter motum eius; *Secundum*, Deum non de necessitate produxisse mundum, sed potuisse non producere, & posse nunc destruere. Hæc omnia de fide sunt, & in Philos. supponenda, vel potius suspicienda, Nam de i. constat Genes. i. In principio
se-

fecit Deus calum & terram. Et Psal. 89. *Præius quam montes fierent, aut formaretur terra & orbis.* Ioan. 17. *Præius quam mundus fieret apud te:* idque etiam definitum est in Concilio Lateranensi secundo. Nec vero per rationem potest demonstrari mundum incepisse in tempore, cum id præcisè pendeat ex voluntate libera Dei, sicut etiam rationes, quæ à Philosophis afferuntur ad probandum, quod mundus sit ab æterno, nullo modo cogant, ut luculenter ostendit S. Thom. 1. p. q. 46. art. 1. & 2. ubi etiam ostendit Arist. in hoc lib. opinatiuè locutum fuisse. Nam in 1. Topicor. cap. 9. inter problemata dialectica, ponit verum mundus sit ab æterno. Videri etiam potest Diuus Thom. hac de re 2. contra Gent. à cap. 32. vsque ad 38. & in 2. dist. 1. qu. 2. art. 5. & dist. 2. qu. 2. art. 3.

Secundum etiam constat aperte ex Scripturæ tribuente voluntati Dei creationem omnium ad Ephe. 1. *Qui operatur omnia secundum consilium voluntatis suæ,* & Apocalyp. 4. *Tu creasti omnia, & propter voluntatem tuam erant, & creata sunt.* De quo videri possunt Theologi 1. par. qu. 19. An verò mundus potuerit habere initium temporis ante instans, quo nunc creatus est. *Respondetur,* potuisse, licet nos lateat ratio, quare in tali puncto creatus sit de quo D. Thom. quæst. 3. de potentia, art. 14. ad sextum.

His suppositis, de possibili solum est difficultas, an potuerit mundus creari ab æterno, siue quoad res permanentes, de quibus in præsentis articulo agemus, siue quoad successiuas, & generationes, & corruptiones, de quibus est

specialis difficultas, de quibus agemus in sequenti articulo.

Quo ad primum, videtur repugnare creatio rerum ab æterno. Primò, quia tunc non esset signabile initium, quando talis creatura incipit quia quolibet designato antea fuit. Secundo, quia tunc non procederet de non esse ad esse, quia nunquam fuit verum dicere, quod non erat. Tertio, quia creatura non esset annihilabilis per æternitatem. Nam vel duraret finita duratione, vel infinita; si infinita, in tota illa non annihilaretur: si finita, ergo ab æterno quando incepit vsque ad illam annihilationem, solum esset duratio finita, & sic tota duratio ab æterno infinita non esset, quia finitis terminis comprehenderetur. Quarto, non esset Deus liber in creando, si ab æterno crearet, quia nec antequam crearet; supponimus enim non dari ante; neque cum crearet, quia non poterat simul creare & non creare: nec post, quia ad præteritum non est potentia. Quinto, posset creatura habere infinitam virtutem, & si tota æternitate intenderetur calor, aut gratia, vel scientia, cresceret in infinitum, quia duratio esset infinita. Denique creatura tunc esset infinita in duratione: ergo & in esse, seu essentia. Adstipulantur etiam dicta Sanctorum, nam August. 12. de Civitate cap. 15. ait: *Angelos non potuisse esse coæternos Creatori*, & Hugo lib. 1. de Sacramentis cap. 10. *Fugit, inquit, divinam virtutem, ut aliquid sibi coæternum faciat*. Et communiter Sancti negant creaturam posse esse coæternam Creatori: ut Ambros. Damasc. & alij. Hanc partem nonnulli Doctores defendunt, præsertim ex anti-

antiquis, qui videri possunt apud Conimbric.
hic, quæst. 6. art. 1. & Carmelit. disput. 29. q. 3.

Oppositum tamen omnino tenendum est, &
expressè asseritur à Sanct. Thom. 1. p. quæst.
46. art. 1. ad 1. & quæst. 3. de pot. art. 14. ubi
rationes in contrarium soluit, & 2. contra Gen.
cap. 38. & opusc. 27. Est etiam communiter
sententia Authorum huius temporis, ut videri
potest apud Conimb. & Carmel. cit. *Funda-*
mentum est, quia non implicat neque ex parte
Dei creantis, neque ex parte effectus faciendi,
neque ex parte ipsius actionis, scilicet creationis:
ergo &c. Non repugnat ex parte Dei creantis,
quia eandem habet potentiam ab æterno quam
nunc, & eandem virtutem agendo liberè, quam
si ageret ex necessitate naturæ: sed nunc po-
test creare mundum, & si ageret ex necessita-
te naturæ ab æterno crearet, sicut Sol si ab æ-
terno esset, ab æterno illuminaret, ut docet
Aug. 6. de Trinit. cap. 1. ergo ex parte Dei nec
deest potentia, nec vlla est repugnantia. Non
repugnat ex parte creaturæ, quia non est mi-
nus possibilis ab æterno quam nunc, nec enim
incepit in tempore esse possibilis, nec aliqua
impossibilitas est ipsi cum æternitate, ut in
solutionibus argumentorum ostendetur tùm,
quia de facto dantur creaturæ æternæ à parte
post, ut creaturæ incorruptibiles, ergo possunt
dari à parte ante; tùm, quia licet creaturæ es-
sent ab æterno, non tamen essent æternæ æter-
nitate per essentiam, sed in propria duratione
creata coexisterent ipsi æternitati à parte ante,
sicut modo coexistunt aliquæ à parte post.
Non repugnat ex parte ipsius actionis, quia
actio Dei non est per motum & successionem,
sed

sed in instanti, & ita non requirit tempus, sed potest esse ante omne tempus. Nec minus per illam actionem dependeret creatura à Deo liberè, quia per voluntatem Dei operantem ad extra reciperet esse limitatum & dependens, & fieret ex nihilo, & ex non esse, non quia duratione antecederet non esse, sed prioritatem naturæ, quatenus illa creatura non esset à se, sed ab alio, & ex Deo causante, ergo saluaretur tota ratio creationis.

Ad primum ergo à principio, Respondetur, quod non esset assignare principium inceptionis in duratione, sed principium originis, & causalitatis, hoc enim solum est de ratione creationis, ut docet Sanct. Tho. quaest. 3. de poten. art. 14. ad 7. in secundo loco. Quare si res fieret ab æterno, procederet sine initio durationis, sicut res incorruptibiles accipiunt durationem sine fine, & ita acciperent tunc durationem opposito modo ad tempus, idest sine inceptio-
ne, sed semper existendo, cum dependentia tamen ab alio, in quo differret à processione diuinarum personarum, quæ sine dependentia procedunt in ipsa æternitate essentiali, non in participata. Creatura autem ab æterno haberet infinitatem durationis participatæ, & ita careret initio, quia initium infinitati opponitur, sicut infinita quantitas initio & fine caret. Quare non distingueretur ibi productio & conseruatio, quia hoc ipso quod sine initio procederet, conseruata procederet & simul esset producta & conseruata, quis sine durationis initio procederet, solo causalitatis principio & originis.

Ad secundum resp. ex Sanct. Thom. loc. cit. de

de potent. ad 7. quod tunc non esse præcederet esse non duratione, sed natura, quia si sibi relinqueretur, nihil esset, & quia non produci-
tur ex aliquo præexistente esse vero non nisi ab alio habet sed per dependentiam ab eo, quâ solutionem latè prosequitur opusc. 27. cit. Et ita differt illa duratio ab æternitate Dei, quia hæc non solum caret initio durationis, sed etiam causalitatis & originis ab alio, & est tota simul.

Ad tertium respondetur, quod ex suppositione creationis ab æterno non potest illa res annihilari nisi in tempore; sicut enim ex suppositione quod res creatur, in eodem instanti annihilari non potest, ita ex eo quod creatur sine initio durationis, oportet quod sine initio daret, atque adeò infinita aliqua duratione, de quo vide M. Soto hic q. 2. Suar. disput. 20. met. sect. 6. quia idem est creari sine initio durationis, atque creari cum infinita duratione, seu cum conseruatione non habente principium durationis, siquidem tunc conseruatio & productio idem sunt, ex suppositione autem quod conseruat Deus, quandiu conseruat annihilare non potest, an vero cum hoc stare possit motus ab æterno, seq. art. dicemus. Quando verò dicit Div. Thom. quæst. cit. de potent. ad 3. quod variabilitas excludit æternitatem sed non infinitam durationem, intelligitur, quod habet variabilitatem, tum ad desinendum, sed in tempore, non ab æterno & infinita duratione; tum ad existendum, quia produci-
tur de non esse ad esse, quod non habet æternitas.

Ad quartum respondetur, quod Deus liberè
crea-

crearet ab aeterno etiam dum actu crearet, quia potest non creare absolutè, licet ex suppositione quod creat, non stet non creare, non solum si crearet ab aeterno, sed etiam nunc, & ex suppositione quod creat sine initio durationis non possit non conseruare. Et quando dicitur, quod antecedenter ad creationem non potest non creare, distingo; antecedentia durationis, transeat; antecedentia naturæ & originis, nego; aliàs si non esset liber pro illa antecedentia, necessario crearet, & non posset differre, sicut de facto distulit vsque ad tempus.

Ad quintum respondetur, in primis non concludere quod res non possit creari ab aeterno, sed quod non possit operari ab aeterno, nec de quacumque operatione, sed de illa quæ est cum motu & augmentatione, seu intensiõne, de quo agemus seq. art. Interim dicimus, nullam qualitatem posse actu intendi in infinitum, etiam si esset ab aeterno, quia infinitum actu nullo modo est pertransibile, & vt dicit Diu. Th. 2. cont. Gent. c. 38. ad 3. si mundus semper fuisset in omnibus circulationibus non esset accipere primam, & sic neque transitum, qui semper exigit duo extrema. Quæ autoritas, vt sequ. artic. videbimus, probat, non posse dari motum ab aeterno, quia motus exigit transitum, & in exceptionem, & finem inter aliqua extrema, quod totum ab aeterno esse non potest, & consequenter neque per motum, seu operationem qualitas aliqua in infinitum augeri posset. Et sicut si darentur infinitæ generationes, excipitur generatio hominum, ne dentur infinitæ animæ separatæ, ita si daretur motus intensiõis infinitus per totam aeternitatem,

tē, non daretur permanentia qualitatis intensæ, ne detur infinitum actu, sed qualitas illa transiret, & corrumpere in suis partibus.

Ad sextum respondetur, quod infinitas in duratione non arguit infinitatem in esse, aut in virtute rei durantis, sed in actione & virtute conservante illam in esse; quia duratio, cum sit continuatio existentiae, sed aliquid conveniens rei non ex proprijs, sed ex participatione agentis. Unde, quod aliqua creatura durent in infinitum à parte post, non arguit infinitatem in essentia.

Ad auctoritates Patrum dicitur ex D. Tho. 3. de poten. art. 14. ad 1. & opusc. 27. intelligi, quod creaturae non sint coeternae Creatori aeternitate propria, & essentiali, sicut est attributum aeternitatis in Deo: qua ratione dicit Boetius lib. 5. de Consolat. prosa ultima, quod etiam si mundus semper fuisset, non esset Deo coeternus, & sic recte inferunt PP. Filium Dei non esse creaturam, quia aeternus est aeternitate propria, quod nulli convenit creaturae. Plerumque etiam Sancti loquuntur de creaturis prout de facto inceperunt, & creatae sunt, non de possibili.

ARTICULVS II.

Utrum repugnet res successivas fuisse ab aeterno?

Res successivae sunt motus, & generationes rerum, & per motus intelligimus tam locales, quam alterationis; & in localibus maio.

maiolem difficultatem habet motus rectus, quàm circularis; continuus, quam discretus. Est autem specialis difficultas in rebus successivis, quod fuerint ab æterno, quia deberent carere omni principio. Si enim assignaretur illis aliquod initium, hoc ipso non essent ab æterno, quia inter illud initium, & hoc instans essent duo termini, inter quos non posset includi infinita duratio, qualis est ab æterno. Si autem motus caret initio, necessario est deneganda aliqua successio infinita ab æterno; de ratione enim successionis est, quod vna pars definat, quando motus fuit productus ab æterno, vel duravit infinito tempore, vel finito. Si infinito, toto illo permansit, & non transiit: & sic non fuit successio ab æterno. Si finito tempore, ergo æternitas finita duratione consumi potest, quia ab illa desitione computando vsque nunc omnis motus comprehenditur duobus terminis, scilicet illo nunc, quo desijt motus, & isto nunc, in quo modo finitur, atque adeò finita duratio est. Ergo si illa quoque duratio successiva ab æterno finita fuit, totum tempus ab æterno finitum manebit.

Due sunt sententie in hac parte. Prima negat omnem motum fuisse possibilem ab æterno, & consequenter etiam generationes substantiales, quæ sine motu præcedente non fiunt. Ita Magister Soto 8. Physicor. quæst. 2. conclusione 3. Conimbr. Rubio, Placa, & alij in hoc lib. 8. & Pater Suarez disp. 20. Metaph. sect. 6. nu. 16. licet aliqui vt Soto, & Conimbr. aliquantulum hæreant in motu circulari, qui continuus est, & videtur posse carere principio.

pio. Alij è contra admittunt omnem modum, & generationes potuisse esse ab æterno, & durasse per infinitum tempus. Ita Capreolus, Ferrarien, Scot, Soncina, Vazquez, Nazarius, & alij, quos citant, & sequuntur Carmelitan. hic disp. 29. q. 4. & Cabero tract. ult. dub. 3. & 4. Quorum fundamenta statim afferemus.

Prima sententia mihi non solum probabili-
lior, sed etiam certior apparet, supponendo,
quod corruptio sit impossibilis ab æterno, ut
statim dicemus. Successio autem sine corru-
ptione non est. Et Divus Thomas opusc. 27.
paulo ante medium, dicit, *Non repugnare, si
ponatur causa producens effectum suum subito,
quod non precedat duratione suum causatum;
repugnare autem in causis producentibus effe-
ctum suum per motum, quia oportet quod prin-
cipium motus precedat finem eius.* Ergo si repu-
gnat aliquem terminum produci per motum ab
æterno, etiam repugnabit aliquod mutatum
esse dari ab æterno, quia hic est terminus qui-
dam motus, & consequenter etiam repugnabit
motus ipse.

Fundamentum autem huius sententiæ sumi-
tur ex duplici ratione, quam D. Thom. sem-
per difficillimam reputavit, & insolutam reli-
quit. *Prima* ratio est supra posita ex natura
motus, qui successivus est, & constat partibus
transeuntibus, quarum una desinit, & altera
incipit. Si ergo datur aliqua, quæ nunquam
incipit, quia ab æterno datur motus, illa non
potuit, nec infinito tempore, nec finito dura-
re. Non infinito, quia sic toto illo tempore
non esset successio, nec transitus illius partis,
sed permanentia; & consequenter neque mo-
tus

tus ab æterno . Non finito , quia sic illa pars
 motus , sub qua mobile creatum est , solum fi-
 nito tempore duraret , & illa , quæ immediatè
 secuta est , tunc verè incepit , quia iam non fuit
 ab æterno ; & sic ab illa computando vsque ad
 istam partem motus , quæ modo datur , dabi-
 tur inter illam , & hanc inceptio & desitio ,
 atque adeo finita duratio , quia illa est finita ,
 quæ incipit , & desinit , sed ultra totam istam
 durationem finitam à parte ante solum restat
 alia pars motus etiam infinita . Ergo totus ille
 motus ab æterno finitus esset , quia finitum
 addito finito , non facit infinitum . Repugnat
 autem , quod duratio aliqua ab æterno sit fini-
 ta . Neque est idem de motu à parte post ; pos-
 set enim durare in æternum per hoc , quod
 nunquam desineret , sed hoc non est habere
 partem aliquam motus , quæ infinitè duraret ,
 sed transire partes finitas , sine vlllo termino fi-
 niente , quod est infinitum sincategorematicè .
 Res autem permanens , si durat in æternum
 à parte post , vnica duratione infinita durat ,
 quia permanens er , & non successiue : & ideò
 rectè fit indè argumentum , quod etiam po-
 tuit ab æterno talis res permanens creari .
Hanc rationem tetigit Sanct. Thom. 2. contr.
Gent. cap. 88. ratione 3. & 1. p. q. 46. art. 2. ad
6. quia scilicet , si mundus esset ab æterno es-
sent transacti infiniti dies. Et respondet : Quod
qualibet circulatio precedentium transire potuit,
quia finita fuit : in omnibus autem simul si mun-
dus semper fuisset , non esset accipere primam ; &
ita nec transitum , qui semper exigit duo extre-
ma . Ecce quomodo S. Thom. fatetur , non
posse esse transactas infinitas circulationes col-
lectiue ,

lectiuè, quòd est non dari motum ab æternò, quia cum non sit accipere primam, illa sub quamundus creatus est, caruit principio, atque adeò fuit infinita in duratione, & permanentia, quod est non esse motum. Et licet in quæstion. 3. de potent. articul. 17. ad 17. soluens idem argumentum, dicat Sanct. Thom. *Quòd illa ratio non probat, quod motus semper fuerint, sed quod motus circularis possit semper esse*: Tamen non loquitur ibi D. Tho. assertiuè, nec dicit quod illud argumentum id efficaciter probat, subdit enim. *Quod ex Mathematicis non potest aliquid efficaciter concludi de motu*. Nec Aristotel. ex circulatione motus ostendit eius æternitatem absolutè, sed supposita æternitate, ostendit, quod nullus alius motus potuit esse æternus, nisi circularis: quod totum non procedit absolutè, sed ex suppositione.

Alia ratio pro ista sententia, quæ nunquam solui potest, est, quia si motus & generationes essent ab æternò, non repugnaret dari infinitum in actu; quod in sententia Arist. & D. Th. admitti non potest. Sequela patet, quia possent esse infinitæ generationes hominum, & manerent infinitæ animæ separatae, quia immortales sunt, & vna non transit in corpus alterius; aut similiter cum essent infiniti dies, posset quolibet die creari vnus Angelus, aut vna stella, & nunc essent infinita actu. Hoc argumentum affert sæpius D. Th. & insolutum relinquit asserens aliorum Philosophorum solutiones & improbens, vt in secundo contra Gentiles, cap. 38. & opusc. 27. & tandem 1. p. q. 46. art. 2. ad 8. concludit; *Quòd hæc ratio est parti-*

particularis, & sic potest aliquis dicere, quod mundus fuit æternus, vel saltem aliqua creatura ut Angelus sed non homo; nos autem intendimus vniuersaliter, an aliqua creatura fuerit ab æterno. Ita D. Thom. vnde intentio eius est probare, quod aliquam creaturam esse ab æterno non repugnat, quidquid sit, an repugnent, generationes hominum, & consequenter reliqui alij motus & generationes, nam eadem ratio est de alijs, siquidem sicut formæ humanæ separatae naturaliter durant, ita reliquæ aliæ forme possunt per Dei potentiam separatæ conseruari, & sic esse modo infinitæ in actu. Et ita qui concedunt reliquos motus posse asse ab æterno, excipiunt autem generationes hominum: inconsequenter loquuntur, & solum ad effugiendum concedere infinitum actu, quod tamen in alijs generationibus coguntur concedere, si Deus velit omnes formas corruptibiles separatas conseruare, vt potest. Et saltem in productione infinitorum Angelorum non datur hoc effugium. Dicere autem, quod potest diuisione producere quolibet die Angelum, non autem collectiue in omnibus diebus, est intelligibile; nam si quolibet die producit Angelum, & dies sunt infiniti, & Angeli perseuerant, infiniti erunt collectiue, numerationem enim dierum sequitur illa infinitas collectiue. Et multo minus dici potest, quod si Deus quolibet die producat Angelum tenebitur alium annihilare. Vnde enim constat, teneri Deum ad annihilandum, aut quid conducit annihilatio Angeli ad productionem alterius? Solum videtur hoc confingi ad effugiendum inconueniens, quod ex illa sententia sequi-

sequitur de infinito. Et ideo rectè dixit Magister Soto ubi supra, hoc esse vnum ex fortissimis argumentis contra Philosophos ponentes generationes rerum ab æterno.

Sed pro contraria sententia obijciēs. Nam noterat ab æterno produci ignis applicatus stuppæ, qui vtique comburet illam, ergo poterit dari generatio ab æterno sicut & illuminatio si Sol produceretur ab æterno: alioquin non posset res ab æterno produci, nisi maneret omnino immobilis, & nihil operans per totam æternitatem. *Secundo*, cælum potest creari ab æterno cum motu circulari, quia hic motus caret principio, eo quod circularis est, ergo saltem ille non repugnat esse ab æterno. Denique Diu. Thom. afferens rationes eorum qui contra Aristotel. volunt demonstrare mundum non esse ab æterno, soluit eas, & ostendit non repugnare, quod mundus ab æterno sit, vt patet in locis supra allegatis, ergo in eo sensu admittit esse possibilem mundum ab æterno, quo illum posuit Aristotel. posuit autem cum motu; ergo sentit Diu. Tho. motum posse esse ab æterno.

Ad primum respondetur, quòd ille ignis sic applicatus generaret ignem, quàm primum posset motus incipere, & stупpa corrumpi, non posset autem corrumpi, nisi post infinitam durationem, quia cum producat sine initio durationis, producit vt permanens & conseruatus infinita duratione, & post illam in tempore poterit generare, quia videlicet inter corruptionem stuppæ, & eius productionem ab æterno, non mediat duratio finita tantum, quod esse non potest, sed infinita, vt ostendimus

dimus. Illuminatio autem Solis cum non fiat per motum, & quæcumque alia instantanea operatio ab æterno dari potest, sed non mutari, & desinere esse per durationem finitam, ut diximus; operatio autem cum motu esse non potest ab æterno, & ideò immobilis debet esse res per durationem infinitam.

Ad secundum respondetur, quod motus circularis caret principio ex parte mobilis, seu magnitudinis in qua fit, sed non ex parte durationis, quia oportet partem motus transire, & partem succedere, sicque debet quælibet pars finitè durare, si enim duraret infinitè, pro tunc motus non esset nec successio, finita autem duratio repugnat rei æternæ, quæ producitur sine durationis initio.

Ad D.Th. respondetur, se ipsum explicare 1. p. q. 46. art. 2. ad 8. ut supra ponderavimus; solum enim intendit potuisse mundum esse ab æterno secundum substantiam, vel aliquas creaturas permanentes, non secundum generationes & motus, præsertim propter generationem hominum. Et sicut durabit mundus in æternum secundum substantiam, sed non secundum statum, quem nunc habet, ita ab æterno potuit fieri secundum se, sed non secundum statum motus, in quo ab Aristotele recedit, qui id solum opinatiuè sensit. Quod verò dicit S.Th. 3. de potent. art. 14. ad 9. in secundo loco positum, tempus & ævum non differre ab æternitate, solum quia carent principio durationis, sed quia admittunt aliquam successionem, qua caret æternitas, & sic admittit posse dari successionem in illis durationibus, si fierent ab æterno, in hac enim præsuppositione

ione loquitur. Hoc inquam parum vrget, admittunt enim tempus, & æuum successionem formalem vel virtualem, sed non pro omni statu, scilicet non pro illo signo, quo carent initio durationis, vt si fierent ab æterno. Vnde non dicit ibi D. Thom. quòd successiua sunt ab æterno, sed etiam si essent, adhuc haberent per quid differrent ab æternitate essentiali, quæ in nullo statu successionem admissit.

ARTICVLVS III.

Quid Philosophus demonstret de Deo ex vi motus?

Respondeo, ex vi motus immediatè, & directè demonstrari, quòd primum mouēs sit omnino immobile, inde verò consecutiue demonstrari propria quædam attributa, quæ conueniunt ipsi diuinitati, & actui puro, de quibus statim dicemus.

Quòd ergo debeat dari vnum primum principium immobile. Arist. ostendit ex ipsa subordinatione causarum mouentium, vt latè declarat S. Thom. 1. contra Gent. cap. 13. & 1. p. qu. 2. art. 3. Et nititur tota demonstratio duobus principijs, scilicet quòd omne quod mouetur, mouetur ab alio, & quòd non est dare processum in infinitum in causis per se mouentibus; & formatur sic demonstratio. Nam videmus dari multos motus de nouo in rerum natura, qui de nouo incipiunt exeundo de potentia ad actum; id autem quod sic mouetur, istum motum debet habere ab alio, vel saltem virtutem se mouendi ab alio accipere, quia si

mouetur, est in potentia ad talem motum, & consequenter debet reduci in actum ab alio, quod sit in actu, vel si habet virtutem, qua se reducat, debet habere illam acceptam & motum ab alio, & non à se, quia id quod est in potentia, non potest habere virtutem mouendi à se ipso, sicut nec naturam & esse, quia id quod habet à se virtutem, nec agit per illam ut motam, nullo modo est in potentia, sed est actus purus, quia habet virtutem non acceptam, aut participatam ab alio, & consequenter neque esse, & sic est independens ab alio. Oportet ergo, quod id quod est in potentia, & de nouo mouetur, quod supponat aliud, à quo habeat vel motum, vel virtutem mouendi. Quod verò non sit procedere in infinitum in istis causis, manifestum est, quia impossibile est infinitas causas pertransiri, ut detur aliquis effectus de nouo, id enim dicitur infinitum, quod non habet terminum, neque finem, ergo si requiritur infinitas causarum ad causandum aliquid de nouo illa causatio nunquam habebit finem, quod est non habere effectum. Ergo sistendum est in aliquo, quod ita moueat, quod non habeat motum ab alio, neque virtutem mouendi, & consequenter erit immobile, & à se, & hoc vocamus Deum.

Sed potest aliquis subterfugere. Primò dicendo, quod in qualibet specie motus deuenitur ad vnum primum immobile in illo genere, non tamen ad vnum primum immobile simpliciter, & in omni genere, & consequenter non peruenitur ad vnum mouens quod sit Deus. Secundò dicendo, quod datur circularis in causis mouentibus, ita quod primus motor

in

in isto genere rursus est mobilis, ab aliquo sibi subordinato in alio genere motus, sicut causæ sunt ad inuicem causæ in diuerso genere. Denique dici potest, quod idem sit mouens, & motum, secundum diuersas formalitates, sicut agens immanens se ipsum mouet, & à sua actione patitur, vel saltem per accidens potest simul moueri, & mouere.

Sed contra primam responsionem instatur, quia licet motu physico perueniatur ad vnum primum mouens experts motus physici, tamen idem argumentum instauratur respectu alterius motus in alio genere, nam id, quod est immobile in vno genere motus, vel potest moueri in alio genere vel non. Si non, ergo est immobile in omni genere, si verò est mobile, reddit argumentum factum in illo genere, in quo est mobile, quia vel mouetur ab alio, & cum non sic dare processum in infinitum, oportet deuenire ad aliquid, quod etiam in illo genere sit immobile, nisi fortè detur circulatio in causis mouentibus, de quo statim dicemus. Si autem non mouetur ab alio in illo genere, sed à se; vel habet virtutem mouendi, & motum ab alio vel non; si ab alio, reddit argumentum de processu in infinitum; si à se, ergo sicut habet virtutem, ita & essentiam & esse habet à se, quod est esse improductū, & increatū.

Contra secundam autem responsionem instatur, quia sufficit demonstrare, quod in vno genere causæ, nempe in mouentibus efficienter, non detur circulatio, quia in eodem genere causæ non potest admitti circulus, vt quæst. 10. demonstratum est, sic enim eadē causa careret, & non careret conditionibus requisitis ad ef-

ficiendum, vnde si primum mouens ad efficiendum causas sibi subordinatas requiritur, quod fit in actu, illud esse in actu non potest per circulum habere à causa sibi subordinata, quia sic deberet supponere illam esse, vt sibi efficienter daret esse, & consequenter illud primum mouens non efficeret causam sibi subordinatam, quia iam supponeret illam habere esse. Quare in habendo esse efficienter, non potest dari circulus, & sic esse primi mouentis non potest efficienter procedere à causa sibi subordinata, sed vel habet illud ab alio, cui subordinatur, & à quo dependet, & sic non est primum mouens, nec adhuc sistitur processus in mouentibus. Si autem habet esse à se, & non ab alio, efficienter est improductum, & increatum. Et ita sufficit tollere circulum in vno genere causæ, scilicet, efficientis, vt deueniamus, ad vnum esse increatum, quod est Deus. Posito autem ente increato; & non effecto ab alio, consequenter erit actus purus, quia si haberet potentiam, esset actuabilis, & mobilis ab aliqua forma, & ab aliquo efficiente, & consequenter si est actus purus, in nullo genere causæ mobilis est, quia actus purus est summa perfectio, & à nullo alio perfectibilis.

Contra ultimam autem responsionem supra latè tractauimus quæst. 21. ostendendo, quod nihil mouet se ipsum primò, & per se, nisi ratione partium, quarum vna sit mouens, & alia mota; quod in primo efficiente non habet locum, quia est purus actus, & consequenter non diuiditur in partes, quarum vna sit mouens, & alia mota, quia pars mota est in potentia respectu partis mouentis, & consequenter repugnat

gnat puro actui, & multo magis repugnat, quod sit per se primo mouens, & per se primo mota secundum idem, quia sic esset secundum idem, in actu, & potentia, quod repugnat actui puro. Illud verò, quod dicitur de actione immanente, quæ recipitur in eo, à quo elicitur, non est ad rem. Tùm, quia in Deo non potest dari actio recepta, quia primum efficiens est totum in actu, nec habet aliquid de potentia, vt recipiat; tùm, quia in nobis licet potentia immanens recipiat actum quem elicit, tamen potentia eliciens debet esse mota ab alio, vt eliciat, sicut voluntas est mota ab intellectu, & intellectus à specie, & obiecto, & à Deo determinante, & mouente, & sic semper distinguitur mouens, & motum, licet sit idem recipiens, & eliciens secundum diuersa; imò elicit actum potentia cum obiecto, seu specie, & lumine, recipit autem illum potentia sola, & non species; & sic non est idem simpliciter recipiens, & eliciens.

Offenso, quod debet dari vnum primum mouens, quod in genere causæ efficientis sit immobile, consecutiue deducuntur plura attributa propria diuinitatis. Nam in primis demonstratur, quod primum efficiens caret omni potentialitate, tam materiali, quam obiectiua, quia vtraque supponit aliud efficiens, à quo possit moueri, materialis quidem tanquam subiectum immutandum ab aliquo efficiente; obiectiua vero tanquam obiectum possibile effici, & transiens de non esse ad esse. Et ita ratio actus puri pertinet ad ipsam entitatem entis increati.

Secundo demonstratur attributum infinitatis, tam in essentia, quam in virtute, quia habet actum

actus purus sine potentia ; ergo perfectio-
nem sine imperfectione ; perfectio enim funda-
tur in actu , imperfectio autem in opposito a-
ctus , quod est potentialitas , ergo nullam ha-
bet limitationem in ipsa actualitate , & perfe-
ctione , ergo neque in virtute , quia virtus est
actiuitas , quæ fundatur in actualitate . Item
cùm sit primò efficiens , habet virtutem supe-
riorem ad omne aliud efficiens inferius , & ad
omnem effectum ; ergo ad omne ens , & hoc
est habere virtutem infinitam .

Tertio demonstratur , quòd caret magnitu-
dine , seu quantitate , & materia ; caret enim
materia , quia materia est in potentia ad for-
mam ; actus autem purus nullo modo habet po-
tentiam . Similiter caret corpore ; tùm , quia
corpus constat materia , cùm sit aliquid mate-
riale ; tùm , quia est imperfectius spiritu , & sic
non est perfectissimum ens ; tùm , quia est di-
uisibile in partes , & sic est in potentia ad diui-
sionem , & similiter est compositum ex illis
partibus , quod repugnat actui puro , & primo
enti , quia omne compositum est dependens à
partibus , & partes à toto , & totum est maius
suis partibus , in eo autem quod est actus pu-
rus , non est aliquid maius au perfectius , vel
dependens , quia illud quod est minus , hoc ipso
non est actus purus , cùm non habeat summam
perfectionem , sed est in potentia ad totum ,
quod est maius , & perfectius illo , vbi autem
est aliquid potentialitatis deficit ratio actus
puri . Vnde similiter caret quantitate , quia hæc
sine partibus , & diuisibilitate non datur .

Quarto demonstratur , quòd sit intelligens
quia ratio intelligibilitatis prouenit ex immi-
tecia

terietate. Et præterea nobilior modus operandi est per intellectum qui dirigit, quam cum ignorantia, vel ex directione alterius. Primum autem efficiens cum sit immobile, à nullo alio dirigitur, & mouetur, & cum sit purus actus, habet perfectissimum modum operandi.

Quintò ostenditur, primum motorem esse ubique, quia eius virtus est infinita, & attingit omnia entia, & omnia mouentur, & dependent ab illo, non quacumque dependentia, sed in omni ratione essendi, & tali influxu, quod per eius suspensionem quodcumque ens annihilaretur, qui influxus non potest esse mediante aliqua creatura, sed immediatè à Deo, ergo est immediatè præsens omnibus.

Sextò, ostenditur esse sempiternum, quia est immutabile, & à se habens esse, ergo semper habuit esse sine vlla mutatione, quod est esse æternum.

Primo, sequitur esse unum: tùm quia si essent duo primi motores, vel quilibet faceret idem quod alter æqualiter cum ipso, & sic alter superflueret, nihil autem absurdius, quam ponere Deum superfluum; vel non faceret idè, neque æqualiter cum illo, & sic non essent æqualis perfectionis, vnde vnus esset perfectior alio; & perfectio, quæ esset in vno, deesset alteri, atque adeo neuter esset summæ, & infinitæ perfectionis, quod est non esse actum purum, neque ens increatum.

Plura de his tractare pertinet ad Metaphysic. lib. 12. & ad Theologos 1. p. vsque ad q. 27. Nobis sufficit hæc breuiter attigisse, quia rap-
tim à Philosophia ex ipso motu deducuntur,

eaque tractauit Arist. tum in hoc lib. 8. cum in 12. Metaph. Vt tamen perfectius reductio, & subordinatio causarum inferiorum ad primam causam intelligatur, sequentibus duabus quaestionibus de subordinatione causarum principalium, & instrumentalium agemus, quod à 2. lib. ad hunc locum transtulimus.

QVÆSTIO XXV.

*De subordinatione causæ secundæ
ad primam.*



IN subordinatione causarum à Deo possumus tria considerare, scilicet dependentiam effectus causæ inferioris à superiori. Secundò dependentiam ipsius causæ inferioris à superiori in causando, nam in essendo dependet vt effectus. Tertiò dependentiam ordinis in ipsis causalitatibus, ita quòd omnia subiiciantur ordini, & directioni diuinæ causalitatis, & nihil per accidens fiat respectu Dei. De his tribus agemus in præsentì. In primo articulo de concursu simultaneo qui influit in effectum simul cum causâ secundâ. In secundo & tertio de præuio mouente causam secundam ad causandum. In quarto de causâ per accidens, & de satq.

ARTICVLVS I.

Quid sit concursus simultaneus, & quomodo distinguatur à concursu causæ primæ?

Negauit Duran. in 2. dist. 1. q. 5. & dist. 37. q. 1. Deum concursu simultaneo operari concomitanter cum causis secundis earum effectus. *Et fundamentum* est id, quod in hoc articulo præcipuam ingerit difficultatem.

Primum, quia non potest Deus concurrere ad effectum causæ secundæ, neque eadem actione creaturæ, neque diuersa. Non eadem: quia vna & eadem actio non potest procedere à duobus agentibus perfectis, & totalibus, ita quod ab utroque tota dimanet, imò si est eadem actio creaturæ, & Dei, ergo illa actio in quantum creaturæ, non est effectus Dei, nec causata à Deo, quia idem non potest causare se ipsum. Nec potest esse diuersa actio, quia sic haberet diuersum terminum ab actione creaturæ, vel si eundem haberet, produceret rem productam, & sic superflueret.

Secundum fundamentum est: quia non est aperta implicatio, quòd aliqua creatura agat sine concursu Dei, sicut enim communicauit causis secundis virtutes operatiuas in actu primo, vt non solum essent instrumenta, sed causæ principales, cur non potuit communicare tam perfectam virtutem, quòd non indigerent concursu Dei? Si autem hoc potuit, vnde constat non fecisse? Nec propter hoc tollitur, quòd Deus vsque modò operetur, operatur enim tum res illas, quas se solo producit, vt animas,

quas creat, gratiam, quam largitur; tùm etiam ea, quæ fecit conferuando.

Primum fundamentum sumitur ex aliquibus actionibus, quæ non possunt immediate esse à Deo, sicut v. g. actiones peccaminosæ, quatenus tales à Deo non sunt, similiter actiones vitales, & liberæ sub illa formalitate vitæ, & libertatis non sunt à Deo, quia non denominantur vitales, nisi prout sunt à principio intrinseco, & proximo; imò generationes, & mutationes sub illo modo, quo sunt à creatura, non sunt à Deo, ergo saltem quantum ad illum modum aliquid non eget concursu Dei. Denique causalitates causæ formalis, & materialis non sunt à Deo, aliàs diceretur Deus formaliter, aut materialiter causare, quod illi repugnat: ergo non omnis causalitas est à Deo, cur ergo omnis actio?

Nihilominus certa, & conuersa est Theologorum & Philosoph. fementia, causas secundas indigere concursu simultaneo causæ primæ in ordine ad omnes suos effectus, præter ipsam dependentiam talis causæ in essendo à causa superiori. Et hoc constat, tum authoritate, tum ratione. *Authoritate* quidem, nam id apertè testatur Scriptura, vt cum dicitur Isa. 61. *Omnia opera nostra operatus es in nobis Domine.* Et Ioan. 15. *Sine me nihil potestis facere.* Et Act. 17. *In ipso enim vivimus & mouemur, & sumus.* Et ad Ephes. 2. *Deus est enim, qui operatur in nobis velle, & perficere, &c.* Ratione quoque id constat; quia omne ens quocumque modo sit, à Deo participatum est, & deriuatum, sed effectus ipse, & actio sunt entia quadam creata, ergo à Deo sunt participa-

ta, ergo actio nostra, & effectus illius etiam à Deo debet procedere; indiget ergo causa creata in quocumque effectui concursu Dei simultaneo, qui magis requiritur propter effectum, qui est ens participatum à Deo, quam propter ipsam causalitatem causæ secundæ. Et huius signum etiam est; quia si Deus suspendat concursum, effectus non erit, siquidem non potest aliquid habere esse, si Deus non communicet illud, aliàs non posset Deus annihilare effectum aliquem causæ creatæ; annihilatio autem non fit nisi per suspensionem concursus, ergo si effectus non indiget concursu Dei, non sunt annihilabiles per suspensionem eius. Et inde est quòd ille concursus diuinus debet identificari cum concursu causæ creatæ, quia tendunt ad eundem terminum, siquidem ipsemet effectus, qui est à concursu causæ creatæ, dependet etiam à concursu Dei, quia per suspensionem eius potest desinere, ergo oportet quòd in eodem termino conueniant vterque concursus, & hoc est identificari ratione eiusdem termini, quem produciunt.

Ad primum fundamentum Duran. dicimus cum D. Tho. 1. p. q. 105. art. 5. ad 2. quòd vna actio non procedit à duobus agentibus vnius ordinis, sed nihil prohibet quòd vna, & eadem actio procedat à primo, & secundo agente. Hoc tamen est quòd difficile percipitur, quomodo illa actio elicitivè possit procedere ab illo duplici principio, cum non possit esse à Deo, nisi tanquam effectus habens esse ab ipso Deo, non tanquam ipsa ratio agendi; si autem est effectus, ergo efficitur ab aliqua actione, & sic non identificatur cum illa, & ulterius ad

actionem dabitur actio, siquidem actio creaturæ est effectus actionis Dei. Si verò dicatur quòd actio illa creaturæ non est effectus Dei, sed actio, seu ratio operandi, non apparet quomodo illa actio dimanet immediate à Deo ut actio, & non ut effectus, nihil enim dimanat à Deo nisi ut effectus, & non ut actio, ut determinat D. Thom. 1. p. q. 25. art. 5. cum actio Dei ut distinguitur ab effectu ad extra, sit substantia Dei.

Quare dicendum est, quòd illa actio creaturæ dicitur etiam concursus Dei respectu effectus, in quem fluit, sed iste influxus cum sit temporalis, & non ab æterno in Deo, non constituit formaliter intrinsecè Deum agentem, quia non se habet ut actualitas eius, sed ut effectus. Et non est inconueniens, quòd actio temporalis sit effectus actionis æternæ, licet ad actionem temporalem, & creatam non detur alia actio temporalis etiam & creata, eò quòd immediatè dimanat ab agente: benè tamen ista actio temporalis supponit actionem æternam, quæ est radix omnium actionum & effectuum, & cuiuscumque entitatis, & sic actio creaturæ ut actio, est participatio quædam, & effectus actionis diuinæ, sicque non repugnat actionem illam esse effectum respectu actionis diuinæ, esse autem actionem, & non effectum respectu potentie creatæ. Quando ergo dicitur quòd actio illa iam non diceretur eadem cum concursu Dei. Respondemus, quòd est eadem cum concursu Dei ad extra, qui est effectus, & participatio diuina, licet distinguatur ab actione increata, & æterna Dei, cuius est participatio, & effectus ad extra; & ad talem

lem actionem, seu concursum datur actio v^t dictum est, non quidem actio temporalis, sed actio increata, & æterna, sicut sup. q. 14. ar. 4. diximus de actione ex parte agentis, & ex parte effectus. Et sicut forma substantialis operatur effectum non per distinctum concursum à concursu suæ virtutis, dicitur tamen concursus formæ, seu animæ magis generalis, quia ad plures effectus, & virtutes se extendit; sic Deus se habet cum toto vniuerso, & collectione creaturarum, cum quibus concurrit eodem concursu, quo ipse creaturæ, & tamen quia Deus ad omnes se extendit, & non ad istam solam restringitur, sicut ipsa virtus determinata creaturæ, concursus Dei dicitur generalis, vndè dicit D. Tho. 3. cont. Gent. c. 70. *Quòd sicut non est inconueniens, quòd vna actio procedat ex agente, & eius virtute, ita non est inconueniens quòd producat idem effectus ab agente inferiori, & à Deo, ab utroque immediate, licet alio, & alio modo.*

Sed inquiret. An iste concursus Dei simultaneous sit partialis simul cum concursu causæ creatæ, ita quòd aliquid correspondeat concursui Dei, aliud actioni creaturæ; & similiter an isti concursus omnino adæquantur inter se, ita quòd vnus non magis se extendat, quam alter; videmus enim quòd actio creata cessare potest ipso effectui producto, actio tamen diuina non cessat, quia conseruat effectum sine causa creata. Quod si ita est, ergo non est vniuersa, & indiuisa actio, siquidem cessante vna, non cessat alia. Si verò totaliter imbibitur, & adæquatur concursus simultaneous actioni causæ secundæ, ergo ille concursus; & actio diuina

Sola non poterat producere totum effectum, sed partialiter tantum, & dependenter à causa creata, quod est partialiter Deum concurrere, nec ut causam totalem. Nec potest explicari quid correspondeat tali actioni ut est à concursu Dei, & ut est à creatura.

Resp. P. Suar. disp. 22. Met. duo dicere: alterum sect. 1. n. 23. quod concursus Dei, & creature potest partialis dici non ex parte effectus, quia si una pars effectus fiat ab uno, & pars ab alio, sed partialiter ex parte causæ, quatenus neutra causalitas habet totum concursum; sed ex utraque integratur. Secundum est sect. 4. n. 8. & 9. quod Deus in hoc concursu taliter se accommodat, quod non posset ille concursus se solo producere effectum, sed cum causa creata. Apertius docet Molin. Deum, & creaturam se habere ut causas partiales sicut duo trahentes navim, vel lapidem; de quo videri potest 1. p. q. 23. a. 4. & 5. disp. 1. memb. 6. & in concordia, pag. 60. & 61. & 171. & alijs, quod videtur sequi Martinez 2. Phys. q. 4. in consecrarijs, ubi inquit, quod concursus causæ secundæ nullatenus pendet à concursu primæ, quia sunt idem, dici tamen rectè posse Deum & creaturam quodammodo in operando dependere, non quidem dependentia rigorosa, sed quatenus limitatum concursum ad creaturam, & concursus Dei à concursu creature dependet.

Nihilominus nulla partialitas in concursu diuino ponenda est, neque ex parte effectus, neque ex parte causæ, vel actionis. Non ex parte effectus, quia si una pars effectus fieret à Deo, & alia pars à creatura, ita quod ista secunda pars non esset à Deo, non omnis ratio

entis

entis creati esset à Deo, quod repugnat. Non ex parte causæ quia sic in ipsa actione, & modo operandi Dei daretur aliqua limitatio, & dependentia quatenus illa actio Dei non potest de facto operari, nisi dependenter à concursu alterius causæ. Et explicatur implicatio in hoc, quia causalitas diuina est causalitas causæ vniuersalissimæ, quæ attingit omnia, quæ sunt in effectû, cum omnia ex participatione illius sint, ergo repugnat, quòd ex parte causæ ille concursus sit partialis, & multo minus dependens ab altero concursu causæ secundæ, siquidem propter suam vniuersalitatem omne illud attingere debet, quod attingit ipsa causa secunda, ergo ex partæ causæ, & modi causandi vniuersalissimi repugnat, quòd partialiter attingat effectum & dependenter; quia propter suam vniuersalitatem causa secunda dependet ab ipsa, & subiicitur illi, non è contra; & licet non sine illa producat, tamen quia hoc ipsum non est ex indigentia causæ primæ, sed ex abundantia, & participatione ipsius, ideò hoc non est dependenter operari à causa secunda, sed causam secundam à Deo; unde per suspensionem talis concursus, quo Deus continuat esse effectus, annihilabitur, non ergo est partialis etiam ut procedit à causa, sed modo totali procedit.

Quare dicendum est, quòd concursus simultaneous identificatur cum actione creatâ, sed non adæquatur illi, sicut ens identificatur cum vero, sed non adæquatur illi, identificatur enim etiam cum bono, & corpus identificatur cum vno modo, v. g. sessione, sed non illi adæquatur; identificatur enim etiam cum alijs modis,
 & p.

& potest illum amittere. Sic licet ex parte rei faciendæ concursus Dei determinetur per concursum causæ creatæ ad operandum talem effectum, cum possit etiam alios; tamen ex parte modi operandi ita vniuersalis, & illimitati non adæquatur ipsi causalitati creatæ: tum quia sine concursu creato potest rem producere; tum quia cessante actione creata permanet concursus diuinus conseruando rem productam, quod euidentius apparet in concursu cum instrumento, cessat enim agere instrumentum producens gratiam & non cessat actio Dei illam conseruans. Dicitur autem quando Deus producit se solo effectum, specialiori modo producere, non quia maiori concursu producat, sed quia modo magis extraordinario, scilicet, impediendo causam creatam, aut non concurrendo cum illa.

Ad secundum fundamentum respond. implicare, quod aliqua creatura operetur sine concursu causæ primæ, sicut enim est contra rationem entis creati, quod in essendo non sit participatum, & dependens à Deo: ita repugnat quod causa creata in causando non sit dependens à Deo, & ita hoc non potest communicari causæ creatæ propter limitationem illius; & ita implicat non dependere à concursu diuino, quando producitur, sicut repugnat non esse creaturam cum sit effectus creatus, ut ostensum est.

Ad ultimum respond. in primis, quod omnes illæ actiones, quæ non sunt deficientes, seu peccaminosæ, totum positium quod habent participant à Deo, alio tamen modo quam à creaturis, non quod ipse modus procedendi à crea-

creaturis non fit etiam à Deo , cùm aliquid entitatis sit, sed quia ille modus est à Deo, ut effectus participatus ab ipso , non ut ratio , sub qua participatur , & ita est à Deo ut *quod* , seu ut quid participatum non ut *quo* , seu ut ratio sub qua participatur à Deo , quia à Deo sub modo vniuersalissimo causæ primæ descendit non sub illo particulari , & limitato , quo est à creatura . Et ita vitalitas, libertas, & reliquæ, quæ ibi numerantur , à Deo sunt tanquam aliquid factum, & participatum ab ipso , non illo inferiori modo , & particulari , quo à causa proxima, unde accipiunt denominationem vitalis, & liberi, sed vn uersalissimo modo, & illimitato , quo à Deo fiunt omnia etiam ille modus particularis , & limitatus , sicut etiam dicuntur res contingenter accidere , quæ contingencia est à Deo , non tamen contingenter . Actus autem peccaminosus etiam ultra hoc, licet in eo quod habet positium, & entitatum dependeat, & participetur à Deo, tamen quantum ad id , quod habet de deficientia , & priuatione , & in quantum illam fundat , non est à Deo .

Ad id verò, quod dicitur de causalitate materiali, & formali. Resp. Etiam Deum concurrere ad istas causalitates, quia aliquid reale sunt & ab eo participatum , de quo Diu. Thom. in lib. de causis, lect. 1. Cæterum impossibile est, quod Deus concurrat tanquam causa prima materialis, vel prima formalis non solum, quia non concurrat ad componendum aliquod totum ; hoc enim est clara & manifesta imperfectio , sed etiam quia non concurrat illo modo causæ materialis, & formalis , ut inter se
mu,

mutuò causalitates exercent recipiendo, aut informando, ut videtur intendere Bonfeca 5. Metaph. q. 12. quem benè impugnât Suar. disput. 22. Meta. sect. 1. num. 29. Etenim licet Deus concursu effectiuo causet ipsas causalitates materiæ & formæ quatenus aliquid reale, & entitativum sunt, tamen per modum causæ materialis, vel formalis, idest exercendo tales causalitates, impossibile est, siquidem causalitas materiæ est receptiva, & fundatur in potentialitate recipientis; causalitas autem formæ est eius actuatío, quæ fundatur in actualitate appetente potentiam, eique communicabili, quod totum repugnat actui puro, qui ex ipsa ratione actus puri ita abstrahit ab omni potentialitate, quod neque in se illam habet, sicut materia, nec illi commiscetur sicut forma. Quando verò Deus sine subiecto sustentat accidentia in Eucharistia, non sustentat illa concursu materiali recipiendo illa, sed concursu effectiuo, quo dependebant à Deo, & conservabantur in esse, etiam sine subiecto conservantur à Deo, eò quod illud esse magis dependet à Deo, quam à subiecto. Nec Deus supplet causam formalem se ipso, sed solum rationem formæ terminantis, ut subsistentiam, & existentiam, aut speciem intelligibilem, ut in beatis.

Ex d. His colliges; quomodo actio causæ secundæ sit causata à prima, vel posterior illa, & in quo subiecto concursus diuinus subiectetur. Dicimus enim, quod actio causæ secundæ non est causata ab actione externa Dei, quia est una & eadem actio creaturæ, & Dei, licet prout correspondet Deo non adæquate, idem.

identificetur actio Dei cum actione creaturæ, sed solum inadæquatè, quia magis se extendit, & durat actio Dei ad extra, quam actio creaturæ, scilicet, quandiu durat effectus. At verò respectu actionis Dei immanentis, & æternæ, quæ in ipso est, sic omnis actio creaturæ causata est ab ipso, sicut omnis concursus Dei ad extra, & consequenter datur prius, & posterius inter actum Dei immanentem, seu ad intra, & inter concursum, & actionem Dei ad extra, sicut inter causam, & effectam. De subiecto verò concursus diuini simultanei si loquamur de ipso pro actione immanente Dei, est in ipso Deo tanquam volitio eius, & substantia eius; si verò loquamur de concursu ad extra, qui est effectus Dei, qui identificatur cum ipsa actione creata, in eodem subiecto est, in quo est actio creata: scilicet in subiecto, in quo est effectus eius.

ARTICVLVS II.

*Verum detur realis, & physicus concursus præ-
uius in causa determinans illam ad
causandum?*

Nomine concursus physici non intelligimus concursum solum pertinentem ad ens naturale, & mobile, neque ut putauit Suarez lib. 3. de auxilijs, cap. 7. concursum coarctantem ad vnum, ita ut sub illo causa creata amittat potentiam ad aliud; sed nomine concursus physici intelligimus duo. Primò motionem non metaphoricam, neque fictam, neque solum moralem; qualis sit persuasione,
vel

vel propositione obiecti, sed illam, quæ sit secundum realem actiuitatem, quo sensu accipitur hæc vox (physica, seu naturalis) apud Sanctos PP. ut patet in Diu. Cyrillo in defensione tertij anathematismi contra Nestorium, & habetur in Concilio Ephesino in 4. appendice quinti tomi, cap. 1. Secundò intelligimus nomine talis concursus illum, qui nullo modo immutat modum operandi causæ inferioris, siue sit modus operandi indifferenter, siue necessario, sed conseruat illum, solum autem tollit indeterminationem, & suspensionem ad agendum.

Et inaduertenter P. Suarez lib. 1. de auxilijs, cap. 11. num. 3. in fine, dixit, neutiquam reperiri apud D. Thom. causam primam determinare secundas ad omnes actiones earum, multoque minus reperiri apud D. Thom. mentionem physicæ prædeterminationis. Oppositum tamen euidenter constat; dicit enim D. Thom. 2. Physic. lect. 8. super tex. 48. *Quod sicut potentia motiua, quæ est ad vtrumlibet, non exit in actum nisi per potentiam appetitiuam determinetur ad vnum, ita nihil quod est ad vtrumlibet exit in actum, nisi per aliquid determinetur ad vnum, quia id quod est ad vtrumlibet, est sicut ens in potentia, potentia autem non est principium agendi, sed solum actus, vnde ex eo, quod est ad vtrumlibet, nihil sequitur, nisi per aliquid aliud, quod determinat ad vnum.* Qui locus manifestissimus est pro isto præuio concursu determinante causam ut agat. Idemque confirmat S. D. 1. p. q. 19. art. 3. ad 5. ubi inquit. *Quod causa quæ de se est contingens, oportet quod determinetur ab aliquo exteriori ad*

ad effectum ; ubi loquitur de determinatione causæ ante ipsum effectum , quæ vno nomine vocatur prædeterminatio , & sic illam vocat S. Dionys. 5. c. de diuinis nominibus , & ibi S. Th. lect. 3. ubi dicit : *Voluntatem diuinam esse existentium prædeterminatam , & effectiuam .* Ac denique videri potest S. Thom. in q. 3. de potent. art. 7. ad 7. ubi præter formam , & virtutem collatam rebus naturalibus dicit : *Aliquid per modum incompletæ motionis , & ad modum esse intentionalis superaddi à Deo ipsi cause ut agat .* Qui locus adeò est expressus , ut P. Suarez citato loco , nu. 6. non inuenerit quid respondeat ad illum , nisi quod D. Thom. tacitè retractauit sententiam , quia prætermisit in alijs locis hanc motionem , quam in isto loco posuit : quasi verò hoc sit retractare sententiam , non in omnibus locis eam explicare ; præterquamquod in 1. 2. qu. 110. art. 2. dicit D. Thom. à Deo mouente aliquid fieri in anima per modum motus , licet non per modum qualitatis ad volendum , vel agendum .

Cum ergo constet apud D. Thom. & Auctores probatos , quid nomine prædeterminationis , & concursus præuij intelligatur , restat videre , an ita sit quòd detur , & requiratur ad omnem actionem causæ creatæ . Et quidem generaliter loquendo communissimè receptum est apud Philol. quod causa secunda non operatur nisi , ut mota , & applicata à prima ad agendum ; de quo videri potest D. Thom. 1. p. q. 105. art. 5. & 1. 2. q. 6. a. 1. ad 3. & q. 100. a. 1. 3. contra Gent. cap. 67. & alibi sæpè . Et quòd iste motus , quo causa secunda mouetur , debeat in ipsa causa antecedere actionem effectus

ctus, si uidem mouetur ut agat, etiã apertissimè tradit Scotus in 1. dist. 2. q. 2. §. *Offenso*, & dist. 8. q. 5. §. *Ad argumenta*.

Tota difficultas consistit in explicando istam motionem præuiam; ut causa ipsa dicatur mota à Deo, & applicata ad agendum. Circa quod est maxima varietas, & concertatio Authorum, quorum tamen sententiæ ad tria præcipua capita reduci possunt. Prima existimat non dari alium concursum, seu motionem distinctam à concursu simultaneo, qui dicitur esse motio causæ inferioris secundum quandam prioritatem virtutalem, quatenus ille concursus est superior, & dignior, & à quo dependet concursus causæ inferioris, & ratione huius dependentiæ, & prioritatis dicitur causa secunda determinari, & applicari, seu præmoueri à prima; non tamen requiritur distinctus concursus imprimens aliquid ipsi causæ quo actuetur, & compleatur ad agendum, nisi fortè indigeat aliqua virtute, quæ à Deo, vel ab alia causa sibi conferenda sit, quia de se non habet sufficientem virtutem. Ita videri potest apud P. Suarez disp. 22. Met. sect. 2. præsertim à num. 48. Fonseca 5. Metaphys. cap. 2. q. 9. sect. 2. Molina in concord. q. 14. art. 13. disput. 96. Bellarmin. lib. 1. de gratia, & libero arbitrio cap. 15. & 16. Lorca 1. 2. sect. 4. disp. 35. & sect. 6. disp. 20. Cabero in præsenti, Martinez, & alios.

Secunda sententia est scholæ Scoti, qui simpliciter admittit præmotionem in causa creata antecedenter ad concursum simultaneum, non tamen constituit aliquid physicè impressum ex tali motione in causa creata, sed Deum
per

per solam efficaciam sui decreti quasi per quādam sympathiam, & morale imperium mouere causas secundas, sicut anima mouet manum; hac sola differentia seruata, quod causam liberam mouet mediante cognitione, cæteras verò causas motione immediata. Ita videri potest apud Fuente 2. *Physic.* qu. 5. difficult. 3. art. 3.

Tertia sententia simpliciter fatetur dari præmotionem distinctam à concursu simultaneo quæ physicè, & realiter ponit, & imprimit aliquid in ipsa causa inferiori, estque complementum, & applicatio ad agendum, non per modum virtutis in actu primo, sicut dantur habitus, sed per modum vltimæ determinationis, & applicationis actus primi ad secundum. Ita communiter Schola D. Th. & eius discipuli, tam recentiores, quam antiqui; licet enim pro opposita sententiâ citetur ab aliquibus Caiet. 1. p. q. 19. ar. 8. & Conrad. 1. 2. q. 79. ar. 1. dum inquirunt primam causam non operari præuia motione, aut non præcedere motionem Dei, voluntatem cum aliquis vult; cæterum in his locis solum dicunt contra Scotum, quod non prius attingit Deus in aliquo instanti ipsam actum causæ secundæ, quam ipsa causa secunda. Quod verò causa secunda applicetur à Deo, & coniungatur actui vt operetur, quod pertinet ad prædeterminationem, eisdem locis affirmant præfati Authores paulò post illa verba, & Caietan. etiam 1. 2. q. 109. art. 1.

Dico ergo primò, Causæ secundæ antecedenter ad influxum, & actionem, qua producant effectus, indigent aliqua præuia motione causæ primæ, qua applicentur ad agendum.

Hæc

Hæc conclusio sumitur ex locis D. Thom. sup. citatis. *Ratio* autem, & fundamentum sumitur ex duobus. *Primo*, ex indeterminatione causæ secundæ. *Secundò*, ex potentialitate eius ad operandum. Et primum constat ex eo, quod causæ secundæ possunt producere diuersos effectus, aliquando quidem diuersos specie, sicut potentia cognoscitiua & volitiua, vel saltem diuersos in indiuiduo, ut quæcumque virutes actiua, neque enim virtus aliqua creata permanens datur solum ad vnam actionem, & effectum, alioquin illo producto euanesceret virtus, utpotè iam ociosa, & ita solum se haberet per modum transeuntis, sicut virtus instrumenti, & quæcunque motio ad vnum tantum actum. Imò in hoc præcipuè differt concursus iste præuius, seu auxiliarius efficaciter mouens ab eo, quod solum dat sufficientiam, & virtutem, quod sufficiens non solum respicit vnum actum in indiuiduo, sed speciem actus, ad quem dat virtutem; efficax autem respicit determinationem in indiuiduo. Omnis ergo causa creata de se indeterminata est ad diuersas actiones, & effectus in indiuiduo. Secundum verò constat, quia causa secunda ita est in potentia ad operandum, quòd indiget mutari in se, ut de facto operetur, siquidem non semper operatur in actu; ergo necesse est quod ut operetur aliter se habeat; si enim eodem modo se habet, sicut antea manebit in potentia operans, quia antea in potentia erat operans. Nec potest mutari per ipsam operationem, quia mutatur ut operetur, & operatio non mutat agens actiue, sed passum, ut probatur in 3. Phys. & est mani-

manifestum, quia operatio non exit ab aliquo nisi prout est in actu, vnumquodque enim operatur prout in actu, & pariter prout in potentia; ergo in quantum operatur agens non mutatur à sua operatione effectiue, sic enim pateretur in quantum operans, ergo si mutatur, est antecedenter ad actionem.

Ex quibus principijs deducitur necessariam esse aliquam motionem præuiam in omni causa creata antecedenter ad eius actionem, & concursum simultaneum Dei, quia omnis causa creata indiget aliqua mutatione ad hoc, vt operetur, quia est indeterminata ad hanc, vel illam actionem in singulari, & est in potentia ad operandum, cum non semper actu sit operans, ergo indiget ab aliqua causa reduci in actum, & determinari, siquidem à causa existente in potentia, & indeterminata non exit effectus in actu, & determinatus, sed non potest à se ipsa determinari, & immutari, neque ab alia causa creata, neque à concursu simultaneo Dei ergo ab aliqua motione præuia. Non à se ipsa quia est in potentia ad agendum, & indeterminata, ergo non potest se reducere de potentia in actum, quia sic deberet supponi in actu determinante, vnumquodque enim reducitur de potentia in actum per aliquem actum; & si supponitur esse in actu vt se moueat, rursus iste actus non est primo se mouens sed motus ab alio, alias esset mouens non motum, quod est Deus. Neque per ipsam operationem; ad quam mouetur potest reduci de potentia in actum, quia ista operatio est id, ad quod ipsa causa indiget determinari, & appli-

cari ; ergo implicat quòd per ipsam applicet, & moueat ad se ipsam : nec potest ista applicatio, & motio fieri ab alia causa creata ; quia licet requirantur plures condiciones procedentes à causis creatis, vt determinetur aliqua causa, tamen omnes illæ causæ cum sint creatæ, sunt etiam in potentia ad operandum, & indigent simili applicatione & motione ; & cum non sit processus in infinitum, oportet, quod tandem à Deo fiat ista motio & applicatio, & sicut fit in illis causis, ita & in reliquis alijs, quia omnes æquè subiiciuntur Deo: præterquam quòd etiam positis omnibus illis conditionibus, aliquæ causæ adhuc manent indeterminatæ ad agendum, vt causæ liberæ, aliæ non sufficienter determinatæ ad hanc numero actionem vel effectum ; ergo oportet quod hæc determinatio tandem reducat in Deum ad quem pertinet dare ultimam actualitatem ad operandum. Nec sufficit concursus Dei simultaneous, quatenus dignitate, & perfectione prior est, quia ista maior dignitas & perfectio, vel reddit causam creatam reductam de potentia ad actum, & determinatam ad operandum, vel non : si non reddit, manet causa tam indisposita ad operandum sicut antea, utpotè non sublata potentialitate, & indeterminatione : si verò reddit determinatam, ergo iam non est solum concursus simultaneous, sed etiam præuius, quia habet effectum præuium, scilicet in ipsa causa mouendo illam ante actionem & effectum. Quare simultaneous concursus quatenus simultaneous cum non influat, nisi in effectum & identificetur cum actione causæ creatæ, non magis potest ipsam cau-

causam creatam actuare, & mouere quam ipsa
faceret actio causæ creatæ.

Dico secundo, hæc applicatio, & præuius
concurſus aliquid physicum relinquit in cau-
ſa quam mouet, & non ſolum eſt aſſiſtencia
extrinſeca, vel moralis motio, aut ſympathia.
Deducitur ex locis Diu. Thom. ſupra citatis,
præſertim q. 3. de potent. art. 7. ad 7. & 1. 2. q.
110. art. 2. ubi inquit. *Ex motione diuina re-
linqui motum in anima, quia actus mouentis
in moto, eſt motus.* Et 1. 2. q. 79. art. 2. inquit.
*Quod omnis actio cauſatur ab aliquo, quod eſt
in actu, quia nihil agit niſi ſecundum quod in
actu, omne autem ens actu reducitur in primum
actum, ſcilicet in Deum, ſicut in cauſam, qui
eſt per ſuam eſſentiam actus, unde relinquitur,
quod Deus ſit cauſa omnis actionis, in quantum
actio eſt:* ubi non loquitur S. Tho. de concurſu
ſimultaneo, quia iſte non eſt cauſa actionis,
ſed idem cum ipſa actione, & ſolum eſt cauſa
effectus, loquitur ergo de concurſu præui, qui
eſt cauſa actionis creatæ, ſed dependentia ac-
tionis ab eo, quod eſt in actu, non eſt depen-
dentia moralis, vel metaphorica, ſed phyſica,
& fundatur in reductione entis in actu ad pri-
mum actum, qui eſt Deus, quæ reductio eſt
phyſica ſecundum veram, & realem cauſalita-
tem, & dependentiam omnis entis à primo
ente, quæ dependentia moralis non eſt, ergo
S. Tho. non poteſt intelligi de cauſalitate mo-
rali, & metaphorica, ſed de phyſica.

*Eſt fundamentum ſpeciale huius conſeſio-
nis eſt;* quia ex vi illius ſympathiæ, aut volun-
tatis efficaciæ Dei ad intra, vel reſultat aliqua
mutatio ad extra in creatura, vel non, ſi reſul-

eat, ergo non est mera assistentia extrinseca, & moralis sympathia, sed realis, & vera mutatio tanquam effectus impressus à Deo ad extra: si non resultat aliqua mutatio, ergo totum intrinsecum huius causae creatae manet ita immutatum sicut antea, & cum antea esset intrinsecè in potentia, & indeterminata, etiam post illam extrinsecam assistentiam, in eadem potentialitate, & indeterminatione intrinseca manebit; ergo à principiis intrinsecis talis causae creatae non poterit dimanare actio, quam umquamque ponatur illa extrinseca assistentia; sed non dicitur causa creata agere nisi ab eius intrinseca virtute, & potentia dimanet actio, quia ipsa virtus intrinseca est quae dicitur agere, ergo si per illam sympathiam & assistentiam extrinsecam nihil de intrinseca potentialitate tollitur, non remanet causa illa intrinsecè disposita ad agendum.

Nec obstat exemplum de sympathia, & motione, qua manus mouetur ab anima; tùm quia adhuc est incertum, an ista motio fiat per aliquam impressionem physicam; tùm etiam quia est longè dispar ratio, quia potentia manus motiva, & voluntatis imperatiua radican-
tur in eadem anima, & sic non requiritur quod una influat in aliam, sed sufficit quòd anima in utramque; Deus autem est principium mouens extrinsecum, in quo non inhæret virtus creata; vnde oportet quòd ipse influat hanc motionem in causâ creatâ, præsertim quia hoc quod est causam creatam esse motam, & applicatam ad agendum, est aliquid nouum in rerum natura, & non per aliquid nouum ex parte Dei, quia est immutabilis, ergo per ali-
quid

quid nōdum extra Deum , & non nisi in causā
creata, ergo oportet, quōd illa realiter, & phy-
sicē sit mota à Deo .

Nec sufficit concursus simultaneus Dei, vt di-
ctum est ; tūm quia iste concursus simultaneus
non mouet causam , sed solum est ad effectum;
tūm quia est idem cum actione creaturæ , & sic
non magis mouet creaturam quam ipsamet a-
ctio eius , quæ nō potest mouere causam , à
qua egreditur vt agens est, sed passum , in quo
recipitur ; tūm denique quia simultaneus con-
cursus non subordinat causam creatam Deo, sed
effectum , & propter dependentiam effectus à
causa prima datur concursus simultaneus, ergo
ex vi illius non potest Deus efficere quōd causa
secunda agat , sed solum poterit impedire effe-
ctum , si non velit dare concursum , non verō
inclinare causam , & facere vt operetur.

Et ex hoc profundius aperitur necessitas po-
nendi istum concursum præiutum , e iam pro
alijs materijs Theologicis. Nam si solum causa
secunda est dependens à Deo ratione concur-
sus simultanei , quatenus non potest effectus
fieri, nisi dependenter à Deo , non tamen quia
in ipsam causam Deus imprimat, & moueat vt
operetur , sequitur quod in producendo isto
effectu causæ secundæ debeat Deus expectare
operationem causæ secundæ , vt efficaciter ve-
lit eiuseffectum , nec possit ex sua propria vir-
tute facere, quōd causa secunda efficiat nisi me-
diantibus alijs causis per quas talem causam
moueat, & inclinet, v.g. solum media persua-
sione , aut propositione obiecti , quod totum
morale est & contingens non simpliciter , &
infallibiliter efficax, licet possit impedire effe-
ctum.

etiam, si velit, suspendendo concursum suum. Quod exēplo potest fieri manifestum. Sit enim casus, quod Deus velit Petrum elicere actum amoris, vel assensum fidei, qui actus non potest à solo Deo fieri, sed simul à causa secunda, si illa causa secunda non subordinatur Deo nisi ratione effectus exequendi, non verò ex parte ipsius causæ, quia debet moueri à Deo ut actum eliciat, ergo non poterit Deus velle illum effectum, nisi expectando, quod ipsa causa secunda velit, & cooperetur, si dederit Deus simultaneum influxum, quia talis influxus non est in causam ut velit, sed in effectum, in quem influit simul cum influxu ipsius causæ secundæ, non ergo habet potestatem in causam secundam, ut efficiat, sed in effectum si causa secunda etiam efficiat, unde nisi ipsa causa secunda velit, frustra ille concursus simultaneus operatur, imò non operatur, cum sit idem cum influxu ipsius causæ secundæ, & sic frustra Deus miserebitur, nisi nos velimus, quod expressè negat August. lib. 1. ad Simplicianum, q. 3. Et non minus dicitur, quod est Dei misericordis, quam hominis volentis, & currentis, quod tanquam magnum absurdum infert Aug. in Enchirid. cap. 32. *Si rectè inquit, dictum est, non volentis hominis sed misericordis est Dei quia id voluntas hominis sola non implet, cur non è contrariò rectè dicitur, non misericordis est Dei, sed volentis est hominis, quia id misericordia Dei sola non implet?* Quod tamen, ut ibi subdit, nullus Christianus dicere audebit. Qui autem solum ponunt concursum simultaneum, & non præuium in ipsam causam, quæ præparatur, seu applicatur à Deo, non possunt dicere, quod est

solius Dei misericordis, sed etiam hominis volentis, quia scilicet ex utroque fit, idest, ex voluntate hominis, & misericordia Dei, & quousque velit homo, non sufficit inclinare illum concursus simultaneus, qui cum ipso actu identificatur, non ad illum inclinat.

Dices, sufficere solum misericordiam Dei, non ratione præuij concursus physici, sed moralis; idest mediante aliqua cogitatione moraliter inclinante. *Sed contra*, tunc quia in alijs causis, quæ non operantur cognitione, hæc moralis inclinatio locum non habet, & habet locum argumentum factum, quod Deus sua virtute non poterit inclinare causam contingentem, v. g. aut necessariam ad operandum nisi medijs causis, aut virtute creata; tunc quia illa moralis motio de se fallibilis est, & contingens, nec nisi extrinsecè allicit, ergo ut certò moueat, expectat volitionem nostram, nec nisi dependenter ab ea certam habet motionem, & inclinationem, ergo perinde est recurrere ad hanc motionem ac dicere quod expectat Deus voluntatem nostram, & frustra miseretur nisi nos velimus, quantum ad certitudinem mouendi.

Scio non deesse, qui concedat in hoc concursu, quo Deus cum causa secunda operatur, dependere Deum quodammodo à creatura in operando, in hoc sensu, quia actio Dei, qua cooperatur creaturæ ab ea sanè dependet, ergo etiam Deus, ut ea operans, quod expressis verbis concedit Martinez 2. Physic. q. 4. in tertio consuetorio, & oppositum sentientes stolidos vocat. Sed stoliditati huic parcimus, scriptum est enim: *Qui contumeliam profert,*
B 4
infi.

insipiens est: Prouerb. 10. Excessit autem ille Author attribuens actioni Dei, qua cooperatur, dependentiam à creatura, licet enim identificetur concursus Dei cooperatiuus cum actione creaturæ, non tamen ut dependens à creatura, quia non causatur è creatura, sed à solo Deo non potest autem dependere à creatura, nisi ab ea aliquo modo causetur, vel deriuetur aut esse ab ea accipiat, cum è contra sit, quia creatura & eius operatio, à Dei actione pendet illique subiiciuntur. Cum autem non ponat præuium concursum in creaturam, sed solum simultaneum, si in hoc dependet Deus à causa creata in operando, omnino destruitur subordinatio causarum à Deo, & inciditur in illa inconuenientia toties à B. August. explosa, frustra Deum misereri, si homo non velit; si quidem Deus non habet alium concursum quam simultaneum apud hunc Authorem, & in hoc non solum expectat, sed dependet à creatura ut habeat effectum volendi. Nec apparet, quomodo saluetur illa doctrina catechismi Pij V. p. 1. de primo Symboli artic. nu. 22. ubi dicitur, *Non solum Dominus vniuersa, quæ sunt, prouidentia sua tuetur, atque administrat, verumetiam quæ mouentur, & agunt aliquid, intima virtute ad motum, atque actionem ita impellit, ut quamuis secundarum causarum efficientiam non impediat, præueniat tamen, cum eius occultissima vis ad singula pertineat.* Cum quibus verbis nescio quomodo stant verba huius Authoris in primo consecrario, scilicet, causam primam, & secundam usque adeò simul concurrere in effectum, ut neutra alteram præcedat & Cui ergo credemus, huic Au-

thq.

thori dicenti. *Neutra præcedit, an Pio V. dicenti, Ita impellit, ut præueniat?*

Dico tertio. Præuius iste concursus realiter mouens causam secundam non est qualitas aliqua per modum virtutis in actu primo, nec aliquis actus, seu effectus ab ipsa causa secunda procedens, quo se moueat ad alium actum; sed est quædam motio Dei, non dans actiuitatem, sed actiuitatis applicationem ad effectum, & si est qualitas, est per modum motionis, & transeuntis. Pro istius conclusionis intelligentia est aduertendum, varias esse sententias etiã inter Thomistas, de isto præuius concursu, seu motione, quid sit, & præcipuè ad tres reducuntur. *Quidam* ponunt non esse aliquod creatum, & de nouo productum in creatura, sed solum decretum seu voluntatem Dei efficacem extrinsecus assistentem, quo statim mouetur creatura, quasi quadam sympathia, & naturali subiectione ad Deum. Alij distinguunt de causa libera, & non libera, & hanc secundam dicunt præmoueri motione aliqua, seu qualitate recepta in ipsa creatura: liberam verò in his, in quibus se ipsam mouet, priorem actum, quo excitatur voluntas dicunt esse motionem præuiam ad secundum, ad quem excitatur; primus verò actus, quo excitatur est ex motione diuina, ipse autem actus excitans, elicited est à potentia. *Tertij* dicunt, istam motionem absolute in omnibus causis esse aliquam motionem à Deo deriuatam, seu qualitatem per modum motionis, qua virtus creata applicatur ad suam operationem tollendo indeterminationem, & potentialitatem eius ad operandum.

Inter has sententias hæc vltima est certior

in sensu D. Tho. Prima enim iam supra impugnata est, & potest applicari illi ratio, qua probat D. Tho. 2. 2. q. 23. art. 2. contra Magistrum, charitatem non esse ipsum Spiritum sanctum, sed aliquem effectum eius in anima; quia charitas secundum August. est motus animi ad fruendum Deo propter ipsum, sed motus animi est aliquid creatum in anima; ergo & charitas, quæ probatio omnino deficit si Deus solo suo decreto efficaci, sine aliquo de nouo producto sufficienter potest aliquam causam mouere. Quare sicut Deus ad constituendam aliquam causam in actu primo operatiuam, non potest id facere solo suo decreto non ponendo aliquam virtutem in causa, ita ad applicandum, & mouendum causam istam, & virtutem ad actum secundum non sufficit decretum Dei prout æternum, sed aliqua mutatio eius in tempore.

Secunda verò sententia deficit; tùm, quia in causis naturalibus, de quibus in præsentia agimus, coïncidit cum tertia sententia; tùm etiam, quia in causis liberis etiam respectu actuum deliberatorum, non sufficienter procedit, quia ille primus actus voluntatis non potest esse ipsa operatio, & causalitas Dei, procedit enim & elicitur à creatura, & consequenter non potest procedere sub illa vniuersalitate, & illimitatione, qua procedit à Deo, sed est id quo causa creata in suo genere se mouet, scilicet, per modum mouentis creati, quæ motio non est confundenda cum motione, qua mouetur à Deo. Et præterea vel ille actus, vel elicitur à creatura, habet omnimodam infallibilitatem ad actum sequentem, vel non? Si
non

non habet, ergo non est motio, & auxilium diuinum, quia hoc infallibiliter mouet, cum sit operatio causæ infallibilis, alioquin ad cognoscendum infallibiliter actum sequentem non sufficeret Deo inspicere virtutem, & concursum suum, sed ipsam creaturam, ut à qua dependeat illa infallibilitas quod negant isti Auctores. Si verò habet infallibilitatem, ergo redditur infallibilitas diuini concursus ex causa creata, siquidem est infallibilis ille actus, prout elicitur à voluntate creata, & non ratione alicuius superadditi à Deo, quod est impossibile, cum illud principium sit mutabile, & contingens, non infallibile, & certum, imò ad cognoscendum aliquid infallibiliter non inciperet Deus ex decreto suo, & auxilio, sed ex ipsa operatione causæ creatæ, siquidem ab ipsa infallibilitatem habet, quod est præscire effectum antecedenter ad decretum.

Quare relinquitur tertia sententia, quæ sine dubio est D. Tho. q. 3. de potent. art. 7. ad 7. ubi inquit: *Quod virtus naturalis, quæ est rebus in sua constitutione collata, inest eis ut quedam forma habens esse ratum & firmum in natura, sed id quod à Deo fit in re naturali, quo actualiter agit, est ut intensio sola habens esse quoddam incompletum per modum quo colores sunt in aere, & virtus artis in instrumento artificis.* Et 1. 2. q. 10. art. 2. dicit: *Quod istud auxilium non est qualitas, sed motus quidam animæ, quia motus momentis est in moto.* Vbi nomine motus non intelligitur esse actus elicitus, sed aliqua inspiratio recepta ut eliciatur, quia motus in mobili recipitur, non elicitur, ut motus est. Similiter nomine qualitatæ intelligit qualitatem

permanentem, & quasi habitualementem, non autem negat esse qualitatem per modum motionis transeuntis, sicut virtus instrumenti, & colores in aere, qui non sunt motus, nec potest esse motus ad qualitatem quasi via, & tendentia ad ipsam, quia sic illa motio Dei haberet terminum ad quem tendit, qui esset qualitas per modum permanentis, & sic permanentiter causa secunda esset applicata ad operandum, neque appareret, quanam esset illa qualitas sic producta: si ergo non est motus ad qualitatem, restat quod sit qualitas per modum motus.

Quod si inquiras, quem effectum formalem habeat ista qualitas, seu motio? Respondetur, istam motionem neque posse esse actum secundum, scilicet operationem ipsam causae creatae, siquidem ista motio est praevia ad talem operationem, & mouet ad illam, non ergo est ipsa actio causae creatae, haec enim non potest mouere causam ut agentem, sed passum. Similiter non potest esse virtus per modum actus primi, haec enim datur per modum permanentis in ipsa causa, vel saltem per modum sufficientiae, ita quod sine ipsa, causa non est sufficienter constituta in ratione principij operarij; nos autem loquimur in praesenti de concursu praevio supponente causam sufficienter potentem, & virtuosam ad agendum, & sic iste concursus non dat virtutem in actu primo. Unde in hoc praecipue distinguitur auxilium dans sufficientiam, & dans efficaciam, quod sufficiens dat virtutem in actu primo, quae respicit non aliquem actum in individuo tantum, sed ipsam speciem actionis & ita deseruit pro alijs actibus in singulari. At verò praevius iste

iste concursus determinat ad actum individuum in singulari, & sic non dat virtutem in actu primo, quæ deferuiat ad varia individua. Vnde restat, quod sit applicatio quædam actus primi ad secundum, sicut applicatur, & constituitur instrumentum ad operandum effectum principalis agentis; quo nomine etiam ipsam declarat S. Aug. lib. 1. ad Simplic. q. 2. inquit: *Non defuisse Dei modum, quo mentem Esau ad credendum applicaret, voluntatemque coniungeret.* Sed est duplex applicatio, altera causæ efficientis cum subiecto, seu materia, sicut ignis applicatur ligno, altera vnius efficientis cum alia efficiente sicut duæ partiales causæ, vel causa inferior, & superior, vt Sol cum homine ad generationem hominis, & similiter Deus cum causa secunda, qui magis intime coniungitur, quàm quælibet alia causa, eo quod magis ab illo dependent omnes causæ. Ex coniunctione autem causæ inferioris ad superiorem inferior semper confortatur, & perficitur, & ita cum Deus sit causa summæ actualitatis, & perfectionis nullâ habens potentialitatem, consequenter relinquit causam creatam maximè actuaram & reductam in actum sublata omni potentialitate, & indeterminatione ad agendum, quod ex propria virtute non habebat, quia virtus creata quantumcumque sufficiens in actu primo semper est indeterminata, & in potentia ad hoc, vel illud singulare, & licet possit in quodcumque singulare vt contentum sub specie illius rei, ad quam habet virtutem, tamen propter indifferentiâ talis virtutis, deest illi non aliqua virtus ad agendum hoc singulare, sed aliqua determinatio virtutis.

Et hinc nascitur effectus formalis, quẽm præbet talis motio diuina, reddit enim causam applicatam, & determinatam ad operandum nihil immutando de modo, quo causa secunda nata est operari, ita quòd si causa secunda operatur necessario dat illi determinationem ad operandum actionem singularem, & simul dat illi, vt per modum necessitatis operetur; si autem operatur contingenter, vel liberè dat illi determinationem ad actum indiuiduum, & similiter modum operandi mutabiliter, & indifferenter conseruat; neque enim vlla est repugnantia, quòd sicut ex diuina participatione descendit in causam creatam, quòd opereatur talem substantiam actus, & quòd opereatur tali modo, scilicet, cum indifferentia, vel mutabilitate ad oppositum, ita aliqua motio, vel qualitas diuini concursus descendat à Deo, quæ vtrumque faciat, & tolleret indifferentiam potentialitatis, qua ipsa causa erat suspensa, & indeterminata. & conseruaret indifferentiam virtutis, seu modi agendi sine coactione ad vnum. Et sic facit operari non solum talem actum, sed operari liberè, & contingenter, hoc enim totum infallibile est; vtriusque enim est causa, & radix, diuina operatio multo magis, quam ipsa nostra anima, & voluntas, iuxta illud Aug. lib. de correct. & grat. c. 14. *Magis habet Deus in potestate sua voluntates hominum, quam ipsi suas*, quod est præmotionem illam esse infallibilem vt quod, & vt effectus Dei, mutabilem autem & contingentem vt quò, idest, vt ratio operandi ipsi creaturæ. Et ita antecedentia huius motionis licet sit suppositio antecedens, non tamen est suppositio necessitans, sed antec-

cedens influendo, & causando ipsum modum libertatis in actu, & determinatam substantiam actus, & ideo non tollit libertatem ista antecedentia determinans, sed causat illam in actu, & perficit, & conseruat in potentia, quæ est doctrina tradita à D. Thom. vt hoc modo conciliet efficaciam diuinæ actionis cum indifferentia nostræ voluntatis, vt videri potest 1. p. q. 19. art. 8. & q. 83. art. 1. ad 3. & 1. 2. q. 10. art. 4. & 3. contra Gent. cap. 94. & 1. Perihier. lect. 14. & 1. ad Anib. distin. 47. art. 4. & alijs locis.

ARTICVLVS III.

Expediuntur difficultates circa præmissa.

EX quatuor capitibus constantur præcipua argumenta contra hanc præmotionem physicam. *Primo*, in actibus naturalibus. *Secundo*, in liberis. *Tertio*, in peccaminosis. *Quarto*, in supernaturalibus.

Circa primum, arguitur contra istam præmotionem, quia superfluit, & quidquid ipsa facere potest, sufficienter fit per concursum simultaneum, quatenus in perfectione, & universalitate est prior nostra actione, & ab ipsa voluntate Dei definitur, & determinatur, supponitque alias condiciones causarum creaturarum, quæ in suo genere determinant ad agendum, ergo non est necessarius iste concursus præuius, imò videtur solum proprius causarum instrumentalium, quæ indigent motione, quia non habent virtutem completam ad agendum. Ad denique si ille concursus est qualitas,

litas, indigebit alia motione ut operetur, quia est virtus creata, & sic indigens praemotione, supponitque agentia creata non habere sufficientem virtutem; si autem est motus, & non qualitas, ergo debet habere aliquem terminum, qui debet esse qualitas, de qua idem inquiretur. Nec verò potest talis motus habere pro termino ipsam actionem agentis creati, quia ad actionem non datur actio, & haec motio recipitur in ipsa causa, actio verò saepe recipitur in passio. Nec habet pro termino aliquam unionem cum causa prima, quia talis unio non est intelligibilis, nec ponitur intimior praesentia cum Deo ex parte creaturae quando causat, quam ante quam causaret. Nec est determinatio aliqua ad singularem effectum, quia virtus causae creatae, sicut est ad speciem actus, ita est ad singularia talis speciei, alias indigeret causa creata tot praemotionibus, quot singularia per aliquem actum producit. Nec denique ponit aliquam excitationem ad agendum, quia excitatio si fit ab objectis, solum est respectu potentiarum cognoscentium, vel appetentium; si autem sit per aliquam alterationem, imprimis id non requiritur in omnibus causis; in quibus autem datur, non est aliud quam additio, vel complementum alicuius virtutis, vel dispositio ad agendum, quod totum non facit praedeterminatio illa, ergo non apparet ad quid ponatur.

Respondetur, non superfluere praedictam motionem, quae ita necessaria est, ut causa inferior sit subordinata, & dependens à Deo, non solum ex parte effectus, sed etiam ex parte ipsius causae, ita quod habeat Deus potentiam,

tem; & dominium in ipsam causam, ut possit facere ut illa faciat per suam propriam virtutem, non autem expectare debeat concursum ipsius, ut iam supra ponderatum est. Neque hoc est proprium causarum instrumentalium, quia instrumenta agunt ex pramotione non quomodocumque, sed dante ipsam virtutem agendi, ita quod tota ratio agendi sit motio. In causis autem principalibus sed subordinatis, & inferioribus requiritur motio non ut ratio agendi, & virtus, sed ut applicatio, & determinatio virtutis, ut hic, & nunc operetur in singulari, & à Deo ad operandum moueatur.

Et quando dicitur, quod determinatur à conditionibus, & circumstantiis aliarum causarum in suo genere, dicimus verum esse, sed non sufficere, quia si requiruntur circumstantiæ, & conditiones causarum creatarum, cur excludatur conditio, & determinatio causæ primæ? Pateret enim cum causæ creatæ non possint determinare nisi in virtute causæ primæ, quia ipsæ circumstantiæ, & conditiones, quas operantur hic, & nunc ad determinandum alias causas, procedunt à virtute creatæ, quæ de se respicit speciem actus quæ indifferens est, & indeterminata ad operandum hanc circumstantiam, & conditionem in individuo potius quam illam, ergo quod talem circumstantiam in individuo operetur, oportet reducere ad aliquam causam, quæ determinet, & tollat illam indifferentiam, & cum hoc non possit fieri sufficienter ab aliqua causa creatæ, quia est eadem ratio ac de reliquis quoad indeterminationem in individuo, oportet tandem hoc reducere ad causam primam, quæ est extra omnem potentiam.

tialitatem, & indeterminationem. Quare non est dubium requiri motionem causæ primæ, vt causa creata determinetur, sicut requiruntur motiones, & conditiones aliarum causarum.

Et ad ultimam instantiam, qua inquiritur, quid sit illa motio diuina, & quem terminum habeat, iam articulo præcedenti respondimus, quod ille motus non est per modum viæ, & tendentiæ ad aliquem terminum acquirendum, sed est aliqua qualitas producta à Deo per modum motionis, quia non datur per modum actus primi, & virtutis, sed per modum applicationis, & determinationis ad vnum tantum actum in singulari, quo cessante, illa quoque qualitas ociosa est, & ideò dicitur dari per modum transeuntis. Nec dantur tot præmotiones, quot effectus, sed quot operationes, ad quas determinatur causa creata. Et per suam actionem non determinatur causa agens ad operandum applicatiuè, & effectiue, sed formaliter in actu secundo constituitur operans, per illam autem motionem effectiue, seu applicatiue. Et ita hæc applicatio, seu motio reducitur aliquo modo ad genus illius potentie seu virtutis, quæ determinatur à Deo.

Et quando instatur, quod virtus ipsa sicut est ad speciem actus, ita ad singularitatē. Resp. virtutem operatiuam respicere singularia, prout contenta in specie sua, & cum indifferentia ad illa, hæc verò præmotio vt tollens indifferentiam, seu indeterminationem, & applicans tantum ad vnum indiuiduum, ideò non datur per modum virtutis ad multa indiuidua sed per modum applicationis ad vnum. Denique

que per hanc determinationem dicitur uniri causa secunda, & prima; eo modo, quo aliquæ causæ uniantur in ratione causandi, quod enim in alijs causis creatis non est mirum, quod coniungantur ad operandum, sicut cælum coordinatur cum causis inferioribus, cur difficile apparebit in causa prima respectu secundæ, cum magis ad illas necessaria sit; idque pertinet ad immensitatem diuinam, ratione cuius est præsens omnibus rebus, non solum ut in illo sint, sed etiam ut moueantur, & uiuant, ut dicitur Act. 17. Et ita illa motio Dei etiam pertinet ad eius præsentiam; & non est alia unio quam immensitatis, qua est præsens omnibus dando vitam & inspirationem, & omnia opera operando; præsertim quia Deus est in rebus per mutationem ipsarum creaturarum, in quibus operatur quancumque mutationem, ut docet S. Tho. 1. p. q. 8. art. 1.

Secundò arguitur, ex secundo capite contra hanc præmotionem in actibus liberis, quia hæc præmotio tollit libertatem; ergo non est ponenda. Antecedens probatur, quia illa præmotio ita est determinata ad vnum individuum, quod tantum ad illud applicat, & illa posita non stat retrahere, ut non sequatur actus, cum sit infallibilis conaexio eius cum actu, aliàs ex vi illius non infallibiliter moneret Deus causam, ut certificaretur de actu eius, sed deberet expectare determinationem causæ; ergo cum sit vltima determinatio aliam vltèrius non expectans, ex natura sua infallibilis est; ergo tollit omnem contingentiam, & indifferentiam libertatis. Patet consequentia, quia est suppositio antecedens, siquidem causat ipsum actum, & est

& est determinata ad vnum infallibiliter, & nō est in manu voluntatis illam ponere, aut positam auertere, cum veniat à principio extrinseco; ergo non relinquit libertatem ad faciendum, vel non faciendum. Nec habet hic locum vulgaris distinctio in sensu composito, & diuiso, quod potest oppositum in sensu diuiso, id est, quantum est ex vi voluntatis sic motæ, licet non quantum est ex vi auxiliij, quod est in sensu composito. Nam contra hoc est, quia posita illa præmotione, vel potest, illi resistere, vel non; si non potest tollitur libertas, & contradicatur Concil. Trident. sess. 6. c. 5. dicenti: *Agere liberum arbitrium motionem illam recipiens, quippè qui illam abhære potest.* Si verò potest resistere, & illa stante oppositum facere, ergo non est vltimo determinata ad hunc actum, sed adhuc indiget alia determinatione, siquidē adhuc habet indifferentiam, vt possit oppositum; & vnde constat, quod talis potentia nunquam reduce-ur ad actum, si retinet potentiam ad illam? nisi fortè manet impedita per appositionem auxiliij, quod est non manere libertatem expeditam ad vnum, & ad aliud.

Respondetur negando antecedens: & ad probationem dicitur non pugnare illam præmotionem determinatam cum indifferentia libertatis, quæ est indifferentia actiua, seu vniuersalitatis, & potestatis, sed pugnare cum indifferentia suspensionis, & indeterminationis, quæ est indifferentia passiuæ, & potentialitatis, quā tollit illa determinatio ad vnum actum, quasi verò non debeat dari libertas actualis in singulis quæ vtrique determinata est quoad suspensionem, non quoad coactionem & necessitatem.

fitatem. Et à præmotione causæ primæ diman-
nat non solum substantia, & determinatio actus,
sed etiam modus eius, & singularitas, puta
quod sit liber vel necessarius hic, & nunc, nec
minus causat ista præmotio quam ipsamet vo-
luntas, & anima, quæ est radix actus, & causat
actum liberum determinatum in singulari, &
tamen talis determinatio non opponitur illi
modo indifferentiæ libertatis, sed exigit illum,
quia conducit ad constituendum talem actum
in singulari. Cur ergo causa primæ, quæ est pri-
ma radix huius determinationis & singularita-
tis, & actus, non poterit similiter prævia illi
motione utrumque influere, & determinatam
substantiam actus, & modum indifferentiæ eius?
Et sic non est mirum id, quod miratur P. Suar.
lib. 1. de auxilijs, cap. 13. nu. 2. quod voluntas
participet libertatem per illam motionem, quia
illa motio est participatio, & influxus quidam
primæ radices totius libertatis nostræ, unde an-
tecedentia illius motionis non destruit ratio-
nem libertatis, quia antecedit ut causans, & fun-
dans illam, tollens autem indifferentiam su-
spensionis & indeterminatæ, ut fiat actus in
individuo, cum modo tamen libertatis, quæ
possit oppositum, sed de facto non faciat.

*Et hinc patet ad id, quod opponitur contra
sensum compositum, & diuisum, quod est idem
ac dicere, quod non potest fieri oppositum
potentia consequente, id est totaliter, quod con-
sequatur effectus in re oppositus auxilio, bene
tamen potentia antecedenti, quæ solum respi-
cit modum operandi causæ liberæ, quem con-
seruat auxilium; sicut etiam stante concursu si-
multaneo, & ipso actu dum fit, non stat oppo-
situm,*

fitum, nō fieri in sensu composito, idest, vtrumque actum coniungendo, benè tamen potest oppositum in sensu diuiso, hoc est potestatem ipsam respiciendo, quam conseruat auxilium & actus. Et ita sensus compositus, & diuisus, non est idem quod posito, vel ablato auxilio, sed ipso stante fit compositio, & diuisio secundum diuerſas habitudines, & respectus talis auxilij, nam cum causet vtrumque, scilicet determinatum actum, & modum indifferentiæ in ipso actu; sensus compositus coniungit vtrumque simul, & ponit in re, & sic non stat oppositum actum etiam ponere, quia repugnat iste actus cum opposito simul: sensus autem diuisus fit considerando auxilium sub vna tantum ratione, scilicet, quatenus dat, vel conseruat modum libertatis in operando, sic enim diuidimus considerationem, & officia auxilij, & sub ista consideratione sic diuisa potest oppositum, quia conseruat modum indifferentiæ, quæ oppositum potest, sed cum hoc posse, stat non facere.

Et quando dicitur, quòd habere illam motionem præuiam non est in manu nostra. Respondeo, quòd licet non sit in manu nostra ex parte principij dantis, est tamen in manu nostra ex parte termini, ad què datur, quia datur ad operandum modo libero, & consequenter non tollendo aliquid à manu nostra, sed perficiendo.

Ex quo etiam patet ad replicam, quomodo possimus resistere illi præmotioni infallibili, vel non resistere. Vtrumque enim verificatur secundum diuersas considerationes; nam vtrumque dicitur de ipso auxilio, vt in Scriptura; Voluntati eius quis resistet? Roman. 9. & Esth.

Esth. 13. *Non est qui possit resistere tue voluntati* : & August. lib. de correct. & grat. cap. 14. *Deo volenti saluum facere nullum humanum resistit arbitrium* , & D. Thom. 1.2. qu. 10. art. 4. ad 3. *Si Deus mouet voluntatem ad aliquid, impossibile est quod voluntas non moueatur* . Quod verò possit ei resisti , dicitur à Concilio Trident. sess. 6. cap. 5. *Quippè qui illam abijcere potest* : & in Concilio Senonensi, in decreto 15. Fidei : *Auxilium non est tale , cui resisti non possit* . Verificatur ergo quod non possumus resistere auxilio potentia consequenti , & in sensu composito , & coniungendo actum cum actu , possumus autem resistere in sensu diuiso, & potentia antecedenti, scilicet, quantum est ex parte modi , quo per tale auxilium operamur. Nec tamen inferri potest , quod si potest resisti auxilio , & fieri oppositum ipso stante , quod non erit inconueniens de facto ita poni . *Respondetur enim* , quod possibile poni in actu, non est inconueniens , quando est possibile potentia consequenti , & absolutè , non autem si solum sit possibile potentia antecedente , & in sensu diuiso , quia si ponitur in re hoc ipso fit sensus compositus , quia absolutè ponitur , si in re ponitur , & sic mutatur sensus diuisus in compositum , sicut me^s sedente possum surgere , & tamen non potest de facto proponi , quod surgam stante sessione , licèt stante illa possim .

Ex quo etiam soluitur instantia, quæ solet adduci , quia de facto aliquis faciât oppositum actum, de facto frustraretur auxilium ; ergo si absolutè potest facere oppositum , absolutè potest frustrari .

Respond.

Respondet. enim; mutari appellationem in illa consequentia, & ideò distinguenda est, si potest facere oppositum, potest frustrari, disting. si potest solum potestate antecedente, nego; si potest potestate etiam consequente, & in sensu composito, concedo: nam frustrari auxilium, dicit non quomodocumque posse facere oppositum, sed tali modo, quod contra ipsum auxilium etiam prout descendit à Deo, possit oppositum, & sic non potest, sed solum in sensu diuiso, & potestate antecedente, id est quantum est ex modo ipsius indifferentiæ & libertatis, quam conseruat auxilium. Itaque in istis consequentijs à posse ratione libertatis, & modi operandi ad posse cum absoluta positione effectus paralogizatur defectu appellationis.

Tertio arguitur, ex tertio capite scilicet ex actibus peccaminosis. Nam si requiritur præmotio physica ad actus causæ creatæ, sequitur quod etiam requiratur ad actum peccati ex parte entitatis materialis, siquidem in illa producenda in quantum entitas actus est, non minus dependet voluntas nostra à Deo, quam in entitate cæterorum actuum. Hoc autem est magnum inconueniens, sic enim determinare Deus voluntatem ad hunc actum in singulari, qui non potest à voluntate procedere nisi peccando, quod est multo magis iuuare, & impellere ad peccatum, quam qui persuadet, vel imperat illud; tùm quia causa physica fortius impellit, & mouet ad actum, quam moralis, præsertim cùm in ista præmotione Deus incipiat determinare, & reddere voluntatem ex nolente volentem respectu actus quem

quem voluntas non potest exercere, nisi peccando: tunc etiam; quia qui persuadet aliquod malum, non persuadet quatenus malum, sed quatenus utile, vel delectabile, & tamen quia illi annexa est malitia, nec potest exerceri ab altero, nisi peccando, attribuitur malitia ipsi persuadenti, vel mouenti moraliter, ergo multo magis attribuetur Deo premouenti, & determinanti physicè ad talem actum.

Respond. hoc argumentum latè tractari à P. Suarez lib. 1. de auxilijs cap. 2. & Vazquez 1. part. disp. 89. cap. 4. qui hoc vrgent contra nostram sententiam. Supponendo autem quod Deus nullo modo concurrit ad peccatum includendo deformitatem, & de hoc loquuntur omnes auctoritates, quæ nimis in hac parte exaggerantur: quod attinet ad entitatem peccati, non minus debet solui argumentum propositum ab oppositis. Auctoribus, qui negare non possunt Deum concurrere concursu simultaneo ad entitatem peccati; constat autem quod non minus attribui potest, quod sit causa peccati cooperator, quam præoperator. Dicimus ergo, quod sicut ille actus ex eo quod habet entitatem, debet deriuari & descendere à Deo, ita ipsa causa secunda ex eo quod operatur eandem entitatem pro ea parte, qua entitas est, diuinæ motioni subordinari debet, & ab ea principiari id, quod entitatis, & bonitatis est in tali actus, nihil enim est aliud Deum principiari illum actum quoad entitatem quam quod deriuetur & participetur à Deo ut à prima radice entitas illius actus, licet nullo modo influat in illum actum ut defectuosus est, nec mo-


ueat causam ut defectiue se habet in operando, sed ut effectiue.

Et quando instatur, quod illi operationi intrinsecè est annexa malitia, nec potest sine illa fieri à causa creata. Respondetur, quod est annexa illa malitia illi actui non absolutè ut entitas est, sed ut à tali principio originatur, scilicet deficiente: ad id enim quod est posituum, & entitatiuum in tali motione quatenus entitas est, non sequitur defectus, sed ad entitatem ut diminutam, & minus habentem de plenitudine essendi, & sic præmotio, vel concursus ad entitatem, & non ad diminutionem vel modum deficiendi entitatis, nullo modo nec per accidens est causa defectus, cum potius tendat ad oppositum & sit causa, ne malitia illa totum bonum corrumpat, sed aliquid bonitatis, & entitatis relinquatur in actu.

Et ad instantiam de causa morali. Respondetur, quod licet causa physica vehementius & intimius influat, quam causa moralis, quæ extrinseca est, tamen modus operandi causæ physicæ magis præcisiuus est ad effectum, quam causa moralis: quia causa physica agit actione fundata in actiuitate agentis, & quanto superior est agens, tanto actiuitas est maior & purior à potentialitate, & defectu, & sic eius actio non attingit nisi id quod in effectum de actualitate participat, & à defectu recedit, quia eius ratio formalis operandi, sub qua præcisè operari potest, solum est actiuitas, & non defectus. At verò causa moralis non influat actiuitate sua, sed proponendo obiectum, & ita non magis præscindere potest à defectu secuto in operatione, quam præscindat ipsum obic-

obiectum, quod cum deformitatem includat, nec ab ea præscindat, mouens mediante obiecto, à deformitate etiam non præscindit. Et hinc patet, quomodo Deus incipiat mouere ad illum actum non enim præmouet excitando & proponendo obiectum, licet ad entitatem excitationis concurrat: & similiter incipit mouere ad id quod entitatis est sub ratione effectus, nullo verò modo sub ratione defectus, licet ille sequatur ex modo agendi ipsius creaturæ. Nec Deus tenetur illum concursum euitare, ne voluntas creata peccet, sed potius tanquam vniuersalis prouisor debet causas relinquere iuxta suas naturas, & illi entitati talis actus dare locum, qui deberetur in vniuerso actioni defectibili. Nec voluntas in eo peccat, quod sequatur istam præmotionem Dei, sed quia non eo modo sequitur, quo Deus mouet, scilicet præcisè id quod entitatis est agendo, sed modo defectuoso & subtrahendo se ab eo quod positium, & bonum est in illa entitate actus, sicut claudicatio tibie nullo modo est ex virtute animæ mouentis, sed ex curuitate tibie non obediens motioni illius virtutis.

Ultimo potest argui ex supernaturalibus, quomodo scilicet distinguatur gratia efficax à sufficienti penes istam præmotionem. Sed hoc Theologis relinquimus, ne naturalis Philosophus supernaturalia speculetur, sed credat.



ARTICVLVS IV.

*Verum causa per accidens, vt casus, & fortuna,
na, inueniatur in subordinatione
causarum?*

Multa Philosophus de causa per accidens disputauit in libro secundo, agendo de casu, & fortuna. Breuiter tamen quid sit, & in quo consistat per sequentes propositiones explicabimus.

Dico ergo primò; in communi loquendo, causa per accidens, vt opponitur causæ per se, dicitur dupliciter, vel quia deest illi propria forma, aut quia deest illi proprius finis, quia, scilicet; non ex proposito operatur. Sumitur hoc ex Arist. in cap. 5. secundi libri. Et notandum, quod illa particula per accidens, dupliciter sumitur: vno modo per accidens, idest, per aliud, siue illud aliud per se, & necessario requiratur, siue non, qua ratione omnes causæ creatæ per accidens operantur, idest, per virtutem accidentalem, quæ tamen propriè est virtus. Alio modo per accidens dicitur illud, quod conuenit non simpliciter, & per se. Et hoc idè est, quia accidens aliud est proprium, & aliud commune; accidens proprium licèt sit distinctam à subiecto, habet tamen connexionem per se cum illo, accidens autem commune non habet, & idè conuenientia primi accidentis non opponitur ei, quod est per se, benè tamen conuenientia secundi. Loquimur ergo in præsentī de eo, quod est per accidens hoc secundo modo, &
sic

fic dicimus, quod contingit esse causam per accidens illo duplici modo, vel quia deest habitudo ad propriam formam, ut cum dicitur Album ædificat, albèdo enim non est forma, ad quam sequitur ædificatio, licet sit in subiecto ædificante, & talis causa per accidens opponitur quarto modo per se, in quo explicatur id secundum quod causa. Vel potest sumi ex defectu habitudinis ad proprium finem, ut si fodiens sepulcrum inuenit thesaurum, dicitur per accidens euenire, quia non intendebat illam intentionem, ex defectu ergo finis, vel formæ, quæ sunt principia agendi, dicitur causa per accidens.

Et primus modus causæ per accidens dupliciter dicitur. Vno modo, quia coniungitur formæ agenti per se, ut cum dicitur musicus ædificat, musica coniungitur arti ædificandi. Alio modo, quia coniungitur cum effectu per se, quia scilicet attingit aliquid, cui alius effectus est annexus, ut in remouente prohibens, sicut qui remouet columnam, est causa descensus lapidis, qui non oritur ab ipso remouente, sed à gravitate, & similiter persecutio tyrannorum est causa per accidens patientiæ martyrum per modum occasionis.

Dico secundo: casus & fortuna pertinent ad causas per accidens, quæ dicuntur agere præter intentionem. Constat hoc ex Aristotele in secundo libro, cap. 5. differunt autem casus & fortuna, quia casus magis communiter se habet, fortuna vero solum inuenitur in rationalibus; neque enim dicitur lapis, vel brutum benè fortunatum, & hoc ideò quia bona fortuna est valde affinis felicitàti; dicimus enim

benè fortunatos esse foelices, foelicitas autem solum conuenit rationali naturæ. Dicitur ergo fortuna *causa efficiens per accidens in his, quæ raro contingunt, & secundum propositum sunt propter finem*. Quæ definitio conuenit casui, excepta vltima particula, eò quod casus etiam in irrationalibus inuenitur, sicut casu accenditur ignis in sylua, vel lapis cadit, & percutit. Dicitur autem fortuna causa per accidens reductiuè sicut id quod per accidens est tale, reducitur ad id, quod est per se. Dicitur autem causa, & non effectus, quia id, quod est effectus, est fortuitum, seu ex fortuna proueniens, non fortuna ipsa: si enim fortuna esset effectus, & non causa, restabat inquirendum à qua causa proueniret, & cum non sit à causa per se, debet esse per accidens.

Dico tertio, omnes causæ creatæ, quæ coordinantur inter se, sunt capaces casus, & fortunæ. Respectu verò causæ primæ nihil fortuitum, vel casuale datur. Hæc conclusio sumitur ex D. Tho. 1. par. q. 115. art. 6. & 3. contra Gent. cap. 86. in fine, vbi etiam causis cælestibus attribuit rationem casus, seu causæ per accidens. In quæst. verò 116. art. 1. remouet rationem fortuiti à Deo, omnia enim subduntur diuinæ prouidentie, quæ ex proposito operatur. *Ratio*, huius fundatur in duplici propositione. *Prima* est quod nulli creaturæ conuenit omnium cognitio saltem respectu eorum, quæ sunt supra se. *Secunda* quod nulli creaturæ subduntur omnes causæ, præsertim liberæ, quæ in multis actionibus solum pendent à Deo. Ex his enim deducitur, quod multi effectus possunt consequi casualiter, quia
quod

quod ignoratum est ab aliquo, potest fieri præter eius intentionem, vt si Angelo iubeatur à Deo facere aliquid ex quo sequitur, quod quidam conuertantur, & hoc sibi ignotum est. Et similiter, si alicui non subduntur omnes causæ, potest concursus, & combinatio aliqua causarum fieri, in quam non influat, & sic respectu eius erit casualis effectus secutus, sicut quod aliquid sit album, habet causam, & similiter quod sit musicum, sed hæc coniunctio (Album musicum) non habet causam. Oppositum verò accidit respectu Dei, quia ipse nihil potest ignorare, & sic non potest aliquid præterire eius prouidentiam; & similiter nihil præterire eius causalitatem, quomodocumque enim combinentur causæ, hæc ipsa combinatio, & coniunctio est ex participatione Dei, quia hoc ipsum potest intelligere, & consequenter ordinare, ac disponere, vel impedire.

Dico quarto. *Falsè* dicitur omnem causam per accidens reduci ad aliquam causam per se: Et hoc axioma est valde commune, sed potest habere falsum, & verum sensum. Primo enim potest esse sensus, quod omnis causa per accidens reducitur ad aliquam causam per se proximam & particularem tanquam derivata & originata ab illa. Et hic sensus est falsus, quia multi sunt effectus per accidens, qui non originantur ab aliqua causa per se, sicut quod album sit musicum, non habet causam, cum sit ens per accidens, quod non est vnum ens, neque verè ens, & sic docet D. Thom. 1. par. q. 115. art. 6.

Secundus sensus est, quòd omnis effectus,

V 4 seu

feu causa per accidens reducitur ad aliquam causam per se presuppositiuè, quia, scilicet, supponit aliquam causam, vel effectum per se cui accidit, vel quia reducitur ad causam primam respectu cuius nihil est fortuitum, & per accidens ut dictum est. Hoc modo reducitur omne per accidens ad aliquod per se, cui coniungitur, v.g. inuentio thesauri coniungitur fossioni terræ, quæ per se est intenta, & album musicum coniungitur homini, qui est per se capax albedinis, & etiam musicæ.

Dico vltimò. Fatum est ipsa ordinatio, & dispositio causarum creatarum derivata à diuina prouidentia ad executionem effectuum, quos per ipsas ordinat, & disponit exequi. Sumitur hæc conclusio ex D. Tho. 1. p. q. 116. præsertim art. 1. & 4. fuerunt autem de fato diuersæ sententiæ, vel errores apud antiquos, quos ad duo principalia capita reducit S. Tho. Cum enim inter effectus alij sint necessario, & inmutabiliter prouenientes, ut motus cælorum, alij verò mutabiles, & casui subiecti de primis non erat aliqua difficultas, cum clarè constet illos esse naturaliter dispositos & ordinatos. Circa casualia verò, & contingentia erat tota difficultas, & in hoc quidam ad nullam causam superiorem reducebant res istas casuales, & sic omnino collebant fatum. Alij verò reducebant omnia fortuita ad causam superiorem, quam dicebant esse celum, & ita ponebant fatum non à Deo sed à cælo derivari quo sensu sancti PP. sæpius à nomine fati abhorrent, quatenus attribuitur syderibus subijcientibus sibi humanas actiones. Et ideo primi errauerunt subtrahendo à diuina prouidentia res
muta-

mutabiles, & casuales. Secundi verò subijciendo omnia casualia cælo, quod constet esse falsum; tùm in his, quæ fiunt à libera voluntate, quæ nullo modo subijciuntur cælo: tùm in his, quæ fiunt per accidens, quorum non potest esse principium causa naturalis, quia hæc operatur vt determinata ad vnum, res autem per accidens nec determinatæ sunt, nec vnum. Quare si casualia, & fortuita in aliquam causam reducuntur, illa debet esse intellectiua, quia intellectus reducit ad vnum etiam ea, quæ sunt per accidens, & ita potest de illis ordinare. Ordinatio ergo istorum effectuum casualium primo & principaliter reducitur in diuinam prouidentiam, proximè verò in causas intermedias non absolutè, sed quatenus dispositas, & ordinatas à Deo ad tales effectus. Sic ergo illa dispositio causarum dicitur fatum, quasi aliquid à Deo prælocutum, & præfatum, ipsa vero Dei prouidentia actiue sumpta potius est disponens, seu loquens, aut fans, quàm fatum & dispositum. Et sic ista dispositio fati designat ordinem habitudinis in causis, non dispositionem illam, quæ est qualitas. Subduntur autem fato omnes illi effectus, qui pendent à causis secundis mutabiliter, & quanto à pluribus causis pendent, plus fati nexibus implicantur, vt dicit Boet. 4. de consol. prosa 4. Quæ verò immediatè à Deo fiunt, non subduntur fato, sicut creatio cæli, glorificatio spirituum, collatio gratiæ, &c.

Sed obijcies, nam absolutè non datur aliquis effectus casualis; tùm quia licet in genere loquendo inuenire thesaurum sit effectus per

accidens respectu fodientis sepulcrum ignoranter, tamen hæc fossio in singulari in quantum fit hic & nunc in hac parte terræ, non stat, quod non inueniat thesaurum. Tum etiam respectu cæli, quia nullus effectus corporeus est, qui non dependeat à cælo; ergo licet respectu huius, vel illius constellationis aliquid videatur fortuitum, tamen respectu omnium simul, seu respectu totius cæli, nihil fortuitum, cum denique respectu dispositionis diuinæ in causis nihil est fortuitum, quia est fatum & dispositum, ergo nihil casuale datur, quod respectu alicuius causæ non sit per se.

Confirmet. quia ideo datur casus, & fortuna in creatis, quia id quod est per accidens non habet causam, cum non sit verè ens, quod non est verè vnum, sed hæc ratio etiam currit respectu Dei, quia non causat nisi id quod est verè ens, & verè vnum, ergo etiam Deus non est causa effectuum per accidens, vel si est causa eorum in quantum intelligens, etiam intellectus creatus poterit esse causa per se eorum quæ per accidens fiunt.

Respondet. negando antecedens principalis argumenti. Ad primam probationem respondetur, quod illa actio prout fit in illa determinata parte terræ, per se non respicit inuentionem thesauri, sed apertionem terræ, in qua, quia iuerat positus thesaurus omnino præter intentionem aperientis terram; ideo respectu huius actionis, & agentis dicitur illa inuentionis per accidens, & sola apertio terræ per se, etiam si in singulari consideretur respectu fodientis. Ad secundam probationem dicitur, quod

quod in primis nihil probat de actibus liberis, respectu quorum cælum non est causa; respectu autem aliarum rerum naturalium etiam nihil probat, quia licet diuersæ constellationes diuersos producant effectus, & quandoq; vnum alterius contrarium, tamen illa combinatio, & concursus effectuum, non est per se intentus ab illis constellationibus, quia vnaquæq; respicit suum effectum, quod verò vterque effectus simul occurrat, est illis per accidens, v.g. planeta, vel constellatio, quæ generat fulmen, solum respicit illius productionem, similiter alia constellatio, quæ siccat messem, solum intendit illam siccare, quod verò super messem siccam cadat fulmen & comburatur, non est per se intentum ab illis constellationibus, quia non agunt intendendo coniunctionem illorum effectuum, sed quælibet suum: solum autem causa intelligens, quæ comparat vnum alteri, potest intendere tanquam vnum, ea quæ plura sunt, & per accidens, vt docet S. Th. statim cit. Præterquamquod illæ constellationes in producendis suis effectibus dependent à dispositione, vel distantia materiæ, quæ si deficiat, frustratur actio cæli, & consequenter fit effectus per accidens. Ad ultimam probationem dicitur probare, quod ratio casualis, & contingentis sumitur penes ordinem ad causas particulares, seu creatas, non respectu Dei, cui nihil est fortuitum.

Ad confirmationem dicitur, quod entis per accidens, in quantum tale, nulla datur causa, sed dicitur causari à Deo, quia id, quod est per accidens in se, potest reduci ad aliquam vnitatem, & sub illa causatur, quia potest per

apprehensionem intellectus sumi ut vnum, & sic ab intellectu potest ordinari per modum vnius, & intendi, ut dicit S. Thom. 1. 2. p. q. 116. art. 1. Et sic non repugnat etiam id fieri ab intellectu creato respectu eorum effectuum, quorum habet notitiam, & quos potest causare, non tamen respectu omnium, nisi tantum Deus, qui omnia nouit, & omnia causat quantumcumque libera, & contingencia. Causæ autem naturales, quia sunt determinatæ ad vnum, non possunt ea, quæ sunt per accidens, causare per se.

QVÆSTIO XXVI.

De Instrumentis.



IN causa efficiente inuenitur, & agens principale, quod primo, & principaliter operatur, & instrumentale quod ministerialiter, & secundario, quod non præbet virtutem ipsi agenti, sed à virtute eius mouetur ad operandum, & seruiendum ei, tamquam illi subordinatum & dependens, ideoque pertinet hoc ad perfectum tractatum de subordinatione causarum. De hoc ergo duo inquirimus, alterum pertinens ad formale constitutum, scilicet qua virtute constituatur in ratione instrumenti. Alterum ad præsuppositum, an scilicet prærequiratur propria actio instrumenti.

ARTICVLVS I.

Quæ sit propria differentia causæ instrumentalis à principali &

Omittimus in præsentī instrumenta moralia, quæ vt instrumenta sint, non requirunt aliquid reale sibi superadditum, sed sufficit aliqua denominatio extrinseca, v. gr. aliquod pactum vel designatio, aut præsentia ad cuius positionem causa physica operatur, & sic tale instrumentum solum se habet vt conditio requisita, & metaphorico modo dicitur instrumentum. Agimus ergo de instrumento proprio & influente, à quo physice exit effectus, licet modo ministeriali, & inferiore ad causam principalem. Omittimus etiam instrumentum, quod est ipsa virtus causæ principalis, quæ solet appellari instrumentum, sed improprie, solum enim similitudine quadam dicitur instrumentum, quia est ratio agendi, & principium quo in virtute formæ agens, vt magis principalis, & subiecti, vt principij, quod. Verè tamen ista virtus est virtus & ratio agendi, principalis agentis. Distinguitur autem ab instrumento proprie dicto, quod virtus illa solum supponit virtutem radicalem substantiæ, dat verò formalem: instrumentum autem de quo in præsentī supponit tam virtutem radicalem, quam formalem causæ principalis, & ei ministerialiter deseruit; & hoc aliquando est coniunctum principali agenti, vt humanitas Verbo, baculus percutienti, aliquando separatum vt virtus diffusa ab agente, & Sacramen-

mentum respectu Christi.

Igitur distinctio huius causae principalis ab instrumentali maxime pendet ex duobus, scilicet ex termino, qui est effectus, & ex principio quod est virtus. Ex parte termini oportet videre, quis effectus correspondet instrumento, quis vero causae principali, vel quomodo unus, & idem effectus correspondeat utrique. Ex parte vero principij oportet videre, qua virtute, & modo constituitur instrumentum in actu primo.

Circa primum communiter dici solet, quod instrumentum debet respicere effectum improporcionatum, & excedentem, quia videlicet non assimilatur virtuti instrumenti, sed virtuti principalis agentis. Quod etiam admittit schola Scoti in instrumentis artificialibus, in quibus solum existimat esse propria instrumenta physica, nam in naturalibus non admittit vera & propria instrumenta, quia existimat accidentia non attingere substantiam etiam instrumentaliter. Aliqui tamen absolute existimant causam instrumentalem non attingere effectum principalis agentis, sed solum dispositivè conducere ad illum, quatenus aliquid praeivum attingit, quo forma aliqua resultat. Quam sententiam suppresso nomine refert P. Suarez disp. 17. Metaphys. sect. 2. n. 10. & attribuitur Fonseca 5. Metaphys. cap. 2. q. 6. Ipse verò Pater Suarez ibidem num. 17. & sequentibus, in eo praecise constituit causam instrumentalem, quod producat effectum nobiliorem se, ad quem non habet proportionatam virtutem, sed indiget elevatione superioris, causa verò principalis est, quae respicit effectum

etiam non excedentem suam virtutem, siue partialis sit, siue totalis, vnaquæque suo modo. In quo consequenter fundatur causam vitalem in supernaturalibus actibus, qui excedunt propriam virtutem agere instrumentaliter.

Quantum ad secundum, scilicet, quo principio constituitur instrumentum in actu primo, aliqui existimant solum distingui causam instrumentalem à principali, penes denominationem, quia scilicet instrumentalis est illa cui non attribuitur actio, principalis verò cui attribuitur; quod tamen insufficienter dicitur, nam etiam instrumentum denominatur agere, sicut Sacramentum dicitur dare gratiam, minister consecrare, vel absolvere, baculus percutere &c.

Inter eos verò qui ad instrumentum requirunt aliquam realem virtutem, siue assistentem siue receptam, duæ sunt sententiæ. Prima affirmat constitui instrumentum in actu primo per aliquam motionem, quæ sit participatio virtutis per modum transeuntis. Ita communiter tradunt Thomistæ, vt Caletanus, 3. par. q. 62. art. 1. & art. 4. Capreolus in 4. dist. 1. q. 1. Nazarius 1. p. q. 45. art. 5. & alij communiter. Eandem in schola Scoti tradi constat ex Patre Fuente 2. Physic. q. 6. difficul. 1. artic. 2. pro instrumentis artificialibus. Verum est aliquos solum requirere motionem moralem, idest quod principalis causa solum per assistentiam suam, & quasi sympathiam reddat instrumentum motum sine alia reali immutatione. Alij verò ponunt realem mutationem in ipso instrumento, quod communius est inter Thomistas.

Secunda vero sententia affirmat, constitui instrumentum in actu primo per potentiam obedientialem actiuam, qua potest obedire superiori agenti ad agendū, eleuari verò hanc potentiam ipso vsu seu concursu concomitante causæ superioris; quatenus adiungit sibi talem causam vt sociam, & adm. nistram suæ operationis. Ita P. Suarez 1. tom. 3. par. disp. 31. sect. 5. & videri potest disp. 17. Metaph. sect. 2. num. 19.

Pro resolutione supponimus triplex esse instrumentum, naturale, artificiale, & supernaturale, quæ distinguuntur ratione effectuum, quos producant, scilicet vel naturales, vel artificiales, vel supernaturales, & ad vnumquodcumque requiritur eleuatio proportionalis ad talem effectum.

Dico ergo primo. Necessariò requiritur ad causam instrumentalem, quod respiciat effectum nobiliorem se, non tamen in hoc solo consistit ratio causæ instrumentalis. Prima pars admittitur communiter ab Authoribus citat. & de illa videri potest Sanctus Thomas 3. par. qu. 62. art. 1. & in 4. dist. 1. q. 1. ar. 4. quæstiuncula 1. vbi inquit: *Sciendum quod actio instrumenti quandoque pertingit ad ultimam perfectionem, quam principale agens inducit, aliquando autem nō; semper tamen pertingit ad aliquid, ultra id quod competit sibi secundum suam naturam siue illud sit vltima forma siue dispositio.* Et huius ratio manifesta est, quia si instrumentum non attingit effectum perfectiorem, seu ultra suam virtutem, ergo solam attingit id in quod potest suæ virtus, & consequenter est causa principalis, siquidem operatur per virtutem

tusem quæ adæquat effectum, & assimilât illum sibi, & sic non indiget in producendo talem effectum, deferre, & ministrare alteri, quod est instrumentaliter procedere, cum in se habeat sufficientem virtutem.

Secunda pars conclusionis probatur, quia multæ causæ operantur aliquos effectus ultra propriam virtutem per virtutem participatam ab alio, & tamen sunt causæ principales, sicut patet quod aqua, & ferrum calefactum producit calorem, & Luna illuminata producit lucem participando illam à Sole, & tamen sunt causæ principales, qui effectus, quos produciunt variat, assimilantur virtuti receptæ, qua illos produciunt, scilicet calori, & luci. Similiter potentia vitalis, ut intellectus eleuatus lumine gloriæ vel gratiæ producit actus supernaturales, qui excedunt propriam virtutem, & tamen produciunt illos; ut causa principalis; tum quia illi actus non excedunt virtutem superadditam à qua procedunt, cum sint supernaturales, sicut ipsa virtus, & solum differunt sicut actus primus, & secundus, quod non sufficit ad rationem instrumenti, aliàs ad omnes actus naturales potentia & habitus se haberent instrumentaliter: tum etiam, quia isti actus sunt vitales, ergo procedunt à principio se mouente, ergo non solum instrumentaliter moto, & deferente alteri, sed ut à causa principali. Siquidem quod se mouet, hoc ipso mouet, & operatur ex virtute quam in se habet, nec ministrat alteri, sed sibi, nec ab alio expectat moueri, sed à se incipit, quia se mouet; istæ autem sunt conditiones causæ principalis, scilicet à qua primo & per se incipit mo.

motus, & quæ non deferuit, & ministrat alteri, sed sibi.

Dico secundo, propria, & formalis ratio causæ instrumentalis, ut distinguitur à principali consistit in eo, quod operetur, ut mota à principali agente, si ly ut mota dicat totam virtutem, & rationem operandi, non verò si dicat solam concausam cooperantem, vel conditionem requisitam. Hanc conclusionem paucis verbis indicavit Caietan. 1. par. qu. 18. art. 8. in secunda responsione ad primam rationem Scoti, ubi loquens de causa inferiori, quæ operatur, ut mota à prima, inquit: *Quod cum dicitur causa inferior mouet in quantum mota, ly in quantum mota, potest denotare causam præcisam, & potest denotare concausam, & si denotet causam præcisam, falsum est, quod causa secunda mouet ob hoc præcise, quia mouetur, sed etià ex virtute propria, si autem denotet concausam sic mouere causæ secundæ prouenit, non ex moueri tantum, sed ex moueri, & modo proprio ipsius causæ secundæ.* Sic ergo dicimus, quod causa secunda principalis, & instrumentum indigent motione superioris ad agendum, sed in causa instrumentali esse motam est causa præcisa agendi, in causa verò principali est concausa, vel conditio requisita. Et hanc conclusionem communiter tenent Thomistæ supra citati, & videri potest Sanctus Thomas 3. par. q. 62. art. 1. ubi inquit: *Quod causa instrumentalis non agit per virtutem suæ formæ sed solum per motum, quo mouetur à principali agente unde effectus non assimilatur instrumento, seu principali agenti.* Et art. 4. inquit: *Quod instrumentum non operatur nisi in quantum mo-*

tum

tum à principali agente, quod per se operatur, & ideo virtus principalis agentis habet permanēs & completum esse in natura, virtus autem instrumentalis habet esse transiens ex uno in aliud & incompletum, sicut & motus est actus imperfectus ab agente in patiens. Et 2. contra Gent. c. 21. inquit: Quod instrumentum nunquam adhibetur ad causandam nisi per viam motus. Est enim ratio instrumenti, quod sit mouens motum. Et idem latè tradit in 4. dist. 1. q. 1. art. 4. & 3. par. q. 19. art. 1.

Fundamentum conclusionis est duplex; alterum quoad id quod negat, alterum quoad id quod affirmat. Negat conclusio instrumentalem virtutem esse innatam, tanquam potentiam obedientialem actiuam, nec esse solum extrinsecus assistentem. Affirmat verò esse receptam in ipso instrumento, & per modum motionis deriuatam à causa principali. Et quoad utrumq; supponit, effectum illum perfectiorem, & excedentem, quem respicit, debere ab ipso instrumento verè, & realiter procedere, alioquin si ab illo non procedit, solum procedit, ab instrumento effectus sibi proportionatus, & non excedens, atque adeò nunquam operatur verè, & realiter, nisi ut causa principalis, id autem quod excedit propriam virtutem verè & realiter non operatur, quod est tollere instrumentum reale, & verum, siquidem verè non operatur nisi principalem effectum suum. Quod si operatur effectum illum perfectiorem, ergo & influxus in illum perfectior etiam est, quam in proprium effectum, ergo & virtus aliqua supponitur in tali instrumento perfectior, & eleuatio ad talem influxum.

xum. Consequentia patet, quia omnis operatio seu influxus, cum sit actus secundus, essentialiter supponit actum primum, qui ordinetur ad talem actum secundum, & consequenter sit illi proportionatus, & positivè ordinatus ad illum, à virtute enim improporcionata quomodo potest exire aliquis actus, siquidem disparatè se habet ad illum. Actus autem primus, & secundus coordinatè se habent.

• *Ex hoc ergo* destruitur tam virtus obedientialis activa, quam virtus solum extrinsecè assistens pro constituendo instrumento sufficienter in actu primo. Virtus quidem obedientialis activa, quia talis virtus si datur in instrumento, oportet quod sit virtus in actu primo, proportionata ipsi effectui, instrumentaliter quidem & obedientialiter, sed tamen tali modo, quod sine alia superaddita actuitate, vel virtute ab illa exire possit effectus, ad quem concurrit causa principalis, ergo oportet, quod habeat positivum ordinem, & proportionem cum tali effectui; ita quod concursus influens in talem effectum non sit indebitus, nec extraneus illi virtuti obedientiali activæ, alioquin si totum hoc non habet illa virtus, non habet id, quod requiritur ad constituendum instrumentum in actu primo, & in tali virtute, quæ sit influxiva in effectum illum excedentem, sed solum habebit capacitatem, & potentiam, ut constituatur in tali virtute, indigebit autem constitui actu in illa per participationem alterius causæ, siquidem non habet illam à se, & sine illa influere non potest etiam instrumentaliter in effectum. Rursus hæc virtus obedientialis activa est congenita ipsi instru-

strumento, & naturaliter illi conueniens, non ab extrinseco superueniens, ergo ex proprijs & naturalibus instrumenti ei conuenit, & sic ex proprijs talis naturæ conueniet aliqua virtus formaliter potens in id, quod excedit talem naturam, quod repugnat, cum ipsa natura à qua dimanat, non sit illi effectui proportionata; ergo neque virtus illa, cuius radix est. Præsertim verò si dari potest instrumentum physicum respectu effectuum supernaturalium quomodo potest ex natura, tanquam ex radice virtus proportionata formaliter effectui supernaturali dimanare, & in visceribus naturæ virtus attingens supernaturalia contineri?

Quod verò non sufficiat virtus solumi extrinsece assistens, & non recepta in ipso instrumento, nec immutans illud, constat, quia per talem extrinsecam subordinationem instrumentum non redditur realiter potentius vel virtuosius quàm antea, ergo non potest aliquem effectum producere, qui excedat propriam virtutem, causa enim non immutata, nec potentior reddita in se, non potest nouum vel maiorem effectum producere ex se, quam antea, cum careat principio à quo exire possit talis effectus. Vnde videmus, quod ex sola extrinseca denominatione, v. g. quod aliquid sit visum vel cognitum, non potest aliquid amplius efficere vel operari realiter quàm sine tali denominatione, eo quod nihil reale ponit in eo, ergo similiter si ex ista extrinseca subordinatione nihil reale additur instrumento, non poterit aliquid amplius operari realiter ex vi illius, quia operatio realiter & verè procedit à virtute intrinseca operantis. Nec obstat quòd
in

in aliquorum opinione concursus speciei cum intellectu ad producendam cognitionem saluatur per extrinsecam assistentiam; nam in tali sententia etiam debet dici, quod species non addit aliquam virtutem potentiae, qua actiue producat ipsam cognitionem, sed solum formationem extrinsecam.

Denique, quod ista virtus instrumentalis solum se habeat per modum transeuntis à causa principali probatur; quia talis virtus non habet radicem in ipso instrumento, quia non oritur ex eius natura, sed ex alterius participatione; ergo non habet permanentiam in instrumento, nisi ex influxu alterius actuali; propterea autem virtus permanens datur causae operanti principaliter, & utenti illa, aut semper; aut quando voluerit.

Solum poterit aliquis hærere, quia character est aliquid permanens in anima, & tamen in sententia Sancti Thomae 3. p. q. 63. art. 2. se habet per modum potestatis, & virtutis instrumentalis, ergo datur virtus instrumentalis per modum permanentis. Sed respondetur, quod character non dicitur virtus instrumentalis etiam in hac sententia D. Thom. quasi per ipsam constituatur instrumentum in actiuitate vltima ad operandum physicè effectum supernaturalem, hæc enim non est virtus characteristica, sed communis omnibus, quæ per modum instrumenti à Deo sumi possunt, ut instrumenta talium effectuum, siue sint animata, siue inanimata, vnde & aqua Baptismi virtutem instrumentalem consequitur ad operandum gratiam, & in verbis consecrationis prolatis à ministro datur virtus ad ponendum corpus Christi.

Christi docet D.Tho.3.p.q.78.ar 4. Ergo præter characterem necessaria est alia virtus per modum transeuntis data ipsis verbis, & Sacramentis. Solum ergo character se habet, vt virtus designatiua ministri, vt possit quando voluerit exercere validè, vel recipere actiones sacramentales, quæ à Deo recipiant virtutem instrumentalem productiuam effectus supernaturalis: & ex hoc ipso quòd character non est potestas solum ad agendum istas actiones, sed etiam recipiendum validè, non potest esse instrumentum virtutis vltimò constituens rationem instrumenti, quia hæc solum est agendum. Quare vt dicit D.Thom.3. p.q.72.art.3. ad 2. instrumentum virtutem instrumentalem acquirit dupliciter, scilicet quando accipit formam instrumenti, vt quando fit aliquid ad hoc, vt instrumentum sit, v. g. securis, & quando mouetur à principali agente ad effectum. Ita ergo character est instrumentalis potestas, quasi dans formam instrumenti, seu ministri, siue ad agendum, siue ad recipiendum, non vt virtus instrumentalis vltimò constituens ad agendum.

Dico vltimò, motio principalis agentis eleuans instrumentum etiam in instrumentis quæ mouentur à Deo, est aliquid præuium in instrumento distinctum à concursu simultaneo. Quid sit concursus præuius, & simultaneus, diximus quæst.præced. Sic ergo instrumentum vt eleuetur ad producendum effectum, requirit concursum præuium, & non sufficit simultaneus, quia oportet instrumentum constitui in actu 1. per modum virtutis proportionatæ, & ordinantis illud ad effectum, vt docet Diu. Tho.

Tho. 3. p. q. 62. art. 4. ad 1. & satis constat per concursum simultaneum non constitui causam in actu primo, sed in actu secundo, siquidem ut præced. quæst. diximus, non distinguitur ab ipsa actione & influxu in effectum: ergo motio constituens instrumentum in actu primo, & ordinans illud ad effectum non est concursus simultaneus, qui effectum facit, & cum instrumento moto & actuato concurrat ad effectum, sed præius qui causam mouet, aut etiam dat ei virtutem per modum actus primi, ut ordinetur ad effectum faciendum, & continuat, & coordinat instrumentum ipsi causæ principali, ut virtus eius quodammodo in instrumentum transfundatur, ut docet D. Tho. in 4. dist. 1. q. 1. art. 4. quæstiunc. 3. An vero ista motio respiciat terminum in ipso instrumento producendum, dicemus solut. ad ult.

Soluantur argumenta.

P*rimò arguitur.* Instrumentum esse motum à causa principali non dat ei totam virtutem agendi, aliquid realiter imprimendo; ergo non consistit tota ratio instrumenti in hoc quòd operetur ut motum. Anteced. probatur, quia multa instrumenta carent tali virtute per motum illum impressa, ut in instrumentis corporeis, quæ operantur effectus spirituales, sicut Sacramenta operantur gratiam, & phantasma speciem intelligibilem media virtute intellectus agentis; hæc enim instrumenta, nec recipiunt virtutem corpoream, quia hæc est improporcionata effectui spirituali, quia huius non est capax res corporea;

rea ; ergo non operantur ex virtute per motionem recepta. Instrumentum etiam coniunctum , vt calor in animali non recipit aliquam virtutem per motionem ad producendam carnem , nec enim apparet quid imprimat anima calori de nouo , vt carnem producat , cum per se ipsam anima non operetur . Denique multa agentia non operantur nisi per impressionem alicuius virtutis , & tamen instrumenta non sunt , vt cælum non operatur , nisi motum ab Angelo , & recipiendo virtutem ab eo , piper , aut vinum non calefacit , nisi prius calefactum : ergo non consistit instrumentum in agendo per impressionem virtutis ex motu causæ superioris .

Conf. quia illa virtus per motionem data instrumento , vel est ipsi effectui omnino proportionata , & sufficiens , vel non ; si hoc secundum ; ergo vt proportionata fiat , indigebit alia motione , & sic in infinitum , vel egredietur actio à virtute non proportionata & ruit totum fundamentum supra traditum . Si primum , iam illa virtus constituet causam principalem , quia cum virtus sit proportionata effectui , & eiusdem ordinis cum illo , assimilatur sibi effectui , & sic constituit causam principalem . Nec refert quòd detur ista virtus per modum transeuntis , vel permanentis , hoc enim non constituit formalissimè rationem instrumentalis , vel principalis , sed quòd assimilet , vel non assimilet effectum sibi . Et instatur in multis , quæ homo operatur per virtutem transeuntem , tamen est causa principalis eorum , quia causa vitalis , vt actus prophetiæ per nodum transeuntis datur , & non

permanentis, ut docet S. Thom. 2. 2. qu. 171. art. 1. & similiter actus charitatis, quando elicitur per auxilium nondum posito habitu in anima, & similia alia exempla multiplicari possunt.

Respond. Ad principale argumentum, negando anteced. Ad probationem quoad primam instantiam dicitur, quod licet aliqui existiment, quod virtus illa impressa instrumento corporeo ad effectum spiritualem sit corporea entitatiuè, & spiritualis intentionaliter, sicut species impressa entitatiuè est accidens, & intentionaliter substantia: tamen euidenter San. Tho. docet illam virtutem esse spiritualement, nec repugnare quod subieceretur in corpore; quia datur modo quodam virtutis incompletæ & transeuntis: Ita docet 3. p. q. 63. art. 4. ad 1. & in 4. dist. 1. q. 1. art. 4. & in q. 27. de verit. art. 4. ubi in solut. ad 3. docet. *Quod illa virtus propriè neque est corporea, neque incorporea; corporeum enim & incorporeum sunt differentie entis completi, sed propriè dicitur virtus ad incorporeum sicut motus magis dicitur ad ens, quam ens.* Itaque virtus illa cum proportionari debeat effectui potius quam subiecto, eò quod subiectum eleuat ad efficiendum ultra se, si esset virtus corporea, restabat difficultas per quid proportionatur effectui supernaturali faciundo. Et similiter licet species intentionalis in entitate non adæquetur obiecto, in virtute adæquari debet, & eiusdem ordinis esse, actum est spirituale, species non potest esse obiectum supernaturale, naturalis esse debet; si species propria debet esse

esse increata in spiritualitate. Et similiter virtus licet accidens sit, eiusdem tamen ordinis & proportionis cum effectu esse debet.

Ad difficultatem ergo attractā, quomodo virtus incorporea in subiecto corporeo esse possit, S. Thom. perpetuo respondet cit. locis, quod virtualis spiritualis incompleta, & per modum motus bene potest subiectari in re corporea, non tamen virtus per modum permanentis, & in esse completo & perfecto. Nec intelligimus nomine virtutis transeun- is, & permanentis, virtutem quæ paruo tempore, vel multo dureret, hoc enim per accidens est, sed intelligitur virtus transiens & permanens, completa, vel incompleta ratione muneris & officij, quod exercet. Quædam enim virtus datur per se primo, & ex natura sua ad constituendum rem in ratione principij operativi, quædam ad continuandum, & subordinandum aliquid alteri principaliter operanti, tanquam illi ministrans in operando, & sic operans non per se primo, sed ministerialiter; sicut etiam in entitatibus quædam dantur, ut principales partes constituentes, quædam ut nexus & colligationes earum. Igitur virtus, quæ non datur ut per se operativa, sed ut continuativa cum alia principaliter operante, dicitur dari per modum motus, quia licet operativa sit, non tamen hoc habet, nisi ex continuatione actuali ad virtutem principalis agentis, cui ministrat & servit, dum actu operatur, & ideo dicitur per modum dari. Et talis virtus licet spiritua- potest subiectari in re corporea, non absed quatenus obediens, & subijcibilis ui, & à fortiori Deo, naturaliter enim

corpus subiicitur spiritui, & eius impressionem ac motum recipit: sicut etiam anima rationalis, licet in se spiritualis sit, potest tamen substantialiter informare corpus, quia non est substantia completa, sicut Angelus, sed incompleta: similiter ergo accidens incompletum, & per modum motus poterit informare corpus, eique inhaerere & actuare. Et hoc ideo, quia corpus non solum est entitas materialis, sed etiam obediens spiritui in ordine ad aliquos effectus spirituales, ut ad mouendum & excitandum intellectum per sensus & alia similia; debet ergo esse capax recipiendi motus spirituales, nec tamen similiter spiritus est capax corporei, quia spiritus non obedit corpori, nec corpus agit in illum, nec per illum causat effectus corporeos. Et per hanc Philosophiam melius intelligitur quomodo Angelus suo spirituali actu moueat cælum, quomodo intellectus agens utatur phantasmate ad speciem intelligibilem producendam, & voluntas moueat appetitum sensitium, ac denique potentia superior vires inferiores imprimendo illis per modum transeuntis motus suos.

Ad difficultatem insinuatam in argumento de instrumentis coniunctis iam sæpè diximus, nos non loqui de illis, quia propriè non sunt instrumenta, sed de virtute ipsarum causarum, quæ hoc ipso quòd sunt coniunctæ, vel ab ipsa substantia profluentes, sine alia noua motione superaddita virtutem agendi habent ab ipsa substantia, eò quòd virtutes illius sunt.

Ad aliam verò difficultatem de quibusdam causis principalibus, quæ non mouent nisi ut mo-

mota, dicitur, quod illæ non mouent vt *mota*, taliter quod *ty mota* sic tota ratio cauſandi, ſed ſolum conditio, vel coadiuuatio requiſita, qua poſita ipſarum virtus vt principalis operatur.

Ad confirm. reſpond. ex dictis, quod virtus illa inſtrumentalis eſt proportionata ad effectum producendum: diſtinguo; proportionem virtutis miniſterialis, & præſupponentis aliam priorem virtutem, à qua deriuatur tanquam à principaliori, concedo: non præſupponente aliam priorem, cuius gerat vices, & cui deſeruiat deriuando ex ipſa effectum, nego. Ad rationem autem cauſæ principalis requiritur virtus, quæ per ſe primo ſit operatiua, non ex miniſterio, & deriuatione actuali alterius. Neque exempla in contrarium allata quidquam obſtant, quia ad actum prophetiæ, vel ad actum amoris, & viſionis, quando ſine habitu charitatis, & luminis producuntur, requiritur aliqua qualitas, ſupplens vicem habitus, & ideò per ſe primò operatiua eſt ex natura ſua, licet ſtatum habitus non habeat; & ideò per modum tranſeuntis dicitur dari ratione ſtatus, quia licet ex natura ſua deberet eſſe firmiter, & perfectè in ſubiecto. vtpote per modum habitus, tamen quia de facto non exiſtit permanenter, ſicut alij habitus, ſed in ſtatu imperfecto, dicitur dari per modum diſpoſitionis tranſeuntis, ſcilicet, quoad ſtatum exiſtendi in ſubiecto. Motio autem inſtrumenti, & qualitas diuini auxilij datæ per modum concuſus, non ad ſupplendum habitum, & virtutem, non ſolum ratione ſtatus imperfecti, ſed etiam ex propria natura non ſunt per ſe primo operatiue, ſed vt

deservientes alteri priori, & principaliori.

Et si inflex. Nam illa Dei motio præbet ipsi instrumento virtutem in actu primo; ergo solum dat sufficientiam, & non efficaciam, quia efficax concursus non dat actum primum operandi, sed applicationem eius ad actum secundum; & sic ultra motionem, quia instrumentum applicatur ab agente per modum elevationis & virtutis, requiretur alia motio efficax ad operandum, sicut in alijs causis principalibus, eritque illa virtus per se operatiua.

Respondetur. Vtrumque effectum dari in instrumento mediante motione Dei elevatiua, quia & constituitur in actu primo ipsa motione, ut elevatiua est, & applicatur ad operandum efficaciter, quatenus actualis usus instrumenti est; non enim repugnat vtrumque convenire eidem motioni, quia ex actuali usu & motione causæ principalis descendit in ipsam causam antecedenter ad exitum operationis, & quia datur ut virtus solum deserviens actuali operationi, & ut ministrans & applicans virtutem causæ principalis ad passum & effectum, circa quæ operatur, non est virtus principalis, sed ministrans coniuncta ipsi actuali operationi. Non tamen poterit similiter concursus simultaneus movere causam, & concurrere ad effectum, quia identificatur cum effectum, & actione, non cum causa.

Ultimo arguitur. Vel illa motio est aliquid impressum instrumento, vel non; si non, ergo per talem motionem non magis redditur instrumentum actuatum ad operandum per ipsam, quam sine ipsa, quod est destruere fundamentum nostrum. Si est aliquid impressum, vel est
mo.

motus physicus, & sic habebit suum terminum, v.g. qualitatem si est alteratio, vel ubi si est latitudo, & tunc ille terminus, & non motus constituet instrumentum in actu primo. Si verò est motus aliquis nobis ignotus ad minus hoc ipso, quod est motus, est aliquid imperfectius ipsa re producta, & sic non poterit sufficienter constituere instrumentum in actu primo respectu rei perfectioris: præterquamquod videmus instrumenta separata qualitate aliqua constitui in actu primo, ut sagitta, vel baculus cum impulsu aliquo mouentur.

Confirmatur. Quia per illam motionem nihil aliud habet instrumentum, quam subijci, & subordinari causæ principali, quod nihil est aliud, quam obedientialiter se habere ad illam, sed in creatura datur potentia obedientialis, ut in ea, vel media ea fiat quidquid Creator disposuerit, ut S. Tho. dicit in 4. dist. 8. q. 2. art. 3. ad 4. igitur ad rationem instrumenti in actu primo superfluit alia motio præter istam potentiam obedientialem.

Respondetur, aliquos, quos refert & impugnatur Catetan. 3. p. q. 62. art. 4. sentire, quod illa motio producat aliquem terminum in ipso instrumento. Caterum falsum hoc est, cum instrumentum non moueatur ad acquirendum sibi sed ad mouendum alia. Est ergo ille motus qualitas aliqua per modum transeuntis & motionis, sicut impulsus in securi, virtus in Sacramento; non autem motus est ad qualitatem, & ita negamus esse alterationem propriè loquendo, quæ qualitatem producat in ipso instrumento ut terminum, sed ipsa motio est qualitas mouens, & producat; sed reductiue potest

est ad alterationem pertinere, sicut quælibet immutatio per qualitatem aliquam facta largo modo loquendo alteratio dicitur; & sicut illa virtus instrumenti est quid incompletum in genere virtutis; ita & in genere alterationis, verè tamen aliquid imprimit in ipsum instrumentum ab actione principalis agentis productum, & derivatum, & in ipso genere virtutis incompletum; nec obstat, quòd producat effectum perfectiorem, quia ut dicit D. Tho. q. 17. de verit. art. 4. ad 6. *Incompletus motus potest esse causa eius, quod completum, & supernaturale est non per modum virtutis principalis, sed instrumentalis.* Et hoc relinquit instrumentum sufficienter proportionatum ad operandum per modum instrumenti deseruientis, non sicut requiritur ad causam principalem: instrumenta verò, quæ operantur per impulsum, non operantur per qualitatem completam, & perfectam, sed per modum motionis datam, ut supra q. 23. de impulsu diximus.

Ad confirmationem dicitur, potentiam obedientialem, de qua loquitur D. Thomas, non importare instrumentalem virtutem, aut positivam habitudinem, seu proportionem ad effectum supernaturalem, sed capacitatem tantum per modum non repugnantiam ad obediendum Deo, siue ut in ipsa creatura aliquid recipiatur, siue ut per eam aliquid fiat, & hæc est congenita cuicumque creaturæ, seu ipsa entitas creaturæ, ut obediens Deo. Sed ultra hanc potentiam obedientialem requiritur aliqua vis impressa instrumento, ut ipse D. Thom. in illo eodem loco citato, & in alijs multis à nobis citatis aperte docet; nam potentia obediencia-

tialis solum potest constituere aliquid vt eleuabile, non vt eleuatum. Requiritur autem ad instrumentum determinata virtus eleuans, tñ quia potentia obedientialis de se est indifferēs ad omnia, quæ Deus velit per illam operari, & sic pro determinatis effectibus oportet determinari; tñ, quia requiritur posituus ordo, & proportio ad effectum producendum in ipso instrumento producente, vt ostensum est.

A R T I C V L V S II.

Verum in omni instrumento requiratur aliqua propria operatio ad effectum principalis agentis?

SVpponimus per illam virtutem, qua instrumentum à causa principali mouetur ad agendum ultra se, attingere ipsum effectum principalis agentis, & non solum aliquid antecedenter se habens ad ipsum, quia vel illud, quod attingit antecedenter ad effectum principalis agentis est ipsi proportionatum, & non excedens propriam virtutem, vel excedit. Si non excedit, non respicit ipsum instrumenta-liter, sed principaliter; si excedit, pari ratione poterit attingere virtute excedente effectum principalem.

Quare tota difficultas est, an vt eleuetur instrumentum ad agendum ultra propriam virtutem, requiratur aliqua actio in ipso instrumento, quæ ab ipso secundum propriam virtutem procedat, & ulterius eleuetur à causa principali. An verò etiam instrumentum nihil omnino agens per propriam virtutem, possit ex

Tho. 3. p. q. 62. art. 4. ad 1. & satis constat per concursum simultaneum non constitui causam in actu primo, sed in actu secundo, siquidem ut præced. quæst. diximus, non distinguitur ab ipsa actione & influxu in effectum: ergo motio constituens instrumentum in actu primo, & ordinans illud ad effectum non est concursus simultaneus, qui effectum facit, & cum instrumento moto & actuato concurrat ad effectum, sed præius qui causam mouet, aut etiam dat ei virtutem per modum actus primi, ut ordinetur ad effectum faciendum, & continuat, & coordinat instrumentum ipsi causæ principali, ut virtus eius quodammodo in instrumentum transfundatur, ut docet D. Tho. in 4. dist. 1. q. 1. art. 4. quæstiunc. 3. An vero ista motio respiciat terminum in ipso instrumento producendum, dicemus solut. ad ult.

Soluantur argumenta.

Primò arguitur. Instrumentum esse motum à causa principali non dat ei totam virtutem agendi, aliquid realiter imprimendo; ergo non consistit tota ratio instrumenti in hoc, quod operetur ut motum. Anteced. probatur, quia multa instrumenta carent tali virtute per motum illum impellæ, ut in instrumentis corporeis, quæ operantur effectus spirituales, sicut Sacramenta operantur gratiam, & phantasma speciem intelligibilem media virtute intellectus agentis; hæc enim instrumenta, nec recipiunt virtutem corpoream, quia hæc est improporcionata effectui spirituali, quia huius non est capax res corporea;

rea ; ergo non operantur ex virtute per motionem recepta. Instrumentum etiam coniunctum , vt calor in animali non recipit aliquam virtutem per motionem ad producendam carnem , nec enim apparet quid imprimat anima calori de nouo , vt carnem producat , cum per se ipsam anima non operetur . Denique multa agentia non operantur nisi per impressionem alicuius virtutis , & tamen instrumenta non sunt , vt cælum non operatur , nisi motum ab Angelo , & recipiendo virtutem ab eo , piper , aut vinum non calefacit , nisi prius calefactum : ergo non consistit instrumentum in agendo per impressionem virtutis ex motu causæ superioris .

Conf. quia illa virtus per motionem data instrumento , vel est ipsi effectui omnino proportionata , & sufficiens , vel non ; si hoc secundum ; ergo vt proportionata fiat , indigebit alia motione , & sic in infinitum , vel egredietur actio à virtute non proportionata & ruit totum fundamentum supra traditum . Si primum , iam illa virtus constituet causam principalem , quia cum virtus sit proportionata effectui , & eiusdem ordinis cum illo , assimilatur sibi effectui , & sic constituit causam principalem . Nec refert quod detur ista virtus per modum transeuntis , vel permanentis , hoc enim non constituit formalissimè rationem instrumentalis , vel principalis , sed quod assimilet , vel non assimilet effectum sibi . Et instatur in multis , quæ homo operatur per virtutem transeuntem , tamen est causa principalis eorum , quia causa vitalis , vt actus prophetiæ per nodum transeuntis datur , & non

permanentis, ut docet S. Thom. 2. 2. qu. 171. art. 1. & similiter actus charitatis, quando elicitur per auxilium nondum posito habitu in anima, & similia alia exempla multiplicari possunt.

Respond. Ad principale argumentum, negando anteced. Ad probationem quoad primam instantiam dicitur, quod licet aliqui existiment, quod virtus illa impressa instrumento corporeo ad effectum spirituales sit corporea entitatiuè, & spiritualis intentionaliter, sicut species impressa entitatiuè est accidens, & intentionaliter substantia: tamen euidenter San. Tho. docet illam virtutem esse spirituales, nec repugnare quod subiecteretur in corpore; quia datur modo quodam virtutis incompletæ & transeuntis: Ita docet 3. p. q. 63. art. 4. ad 1. & in 4. dist. 1. q. 1. art. 4. & in q. 27. de ver. it. art. 4. Vbi in solut. ad 3. docet. *Quod illa virtus propriè neque est corporea, neque incorporea; corporeum enim & incorporeum sunt differentie entis completi, sed propriè dicitur virtus ad incorporeum sicut motus magis dicitur ad ens, quam ens.* Itaque virtus illa cum proportionari debeat effectui potius quam subiecto, eò quod subiectum eleuat ad efficiendum ultra se; si esset virtus corporea, restabat difficultas per quid proportionatur effectui supernaturali faciendo. Et similiter licet species intentionalis in entitate non adæquetur obiecto, in virtute tamen adæquari debet, & eiusdem ordinis esse, ut si obiectum est spirituale, species non potest esse corporea; si obiectum supernaturale, species propria supernaturalis esse debet; si obiectum increatum, species propria debet esse

esse increata in spiritualitate. Et similiter virtus licet accidens sit, eiusdem tamen ordinis & proportionis cum effectu esse debet.

Ad difficultatem ergo attractam, quomodo virtus incorporea in subiecto corporeo esse possit, S. Thom. perpetuo respondet cit. locis, quod virtualis spiritualis incompleta, & per modum motus bene potest subiectari in re corporea, non tamen virtus per modum permanentis, & in esse completo & perfecto. Nec intelligimus nomine virtutis transeun is, & permanentis, virtutem quæ paruo tempore, vel multo dureret, hoc enim per accidens est, sed intelligitur virtus transiens & permanens, completa, vel incompleta ratione muneris & officij, quod exercet. Quædam enim virtus datur per se primo, & ex natura sua ad constituendum rem in ratione principij operativi, quædam ad continuandum, & subordinandum aliquid alteri principaliter operanti, tanquam illi ministrans in operando, & sic operans non per se primo, sed ministerialiter; sicut etiam in entitatibus quædam dantur, ut principales partes constituentes, quædam ut nexus & colligationes earum. Igitur virtus, quæ non datur ut per se operativa, sed ut continuativa cum alia principaliter operante, dicitur dari per modum motus, quia licet operativa sit, non tamen hoc habet, nisi ex continuatione actuali ad virtutem principalis agentis, cui ministrat & servit, dum actu operatur, & ideo dicitur per modum motus dari. Et talis virtus licet spiritualis sit, potest subiectari in re corporea, non absolute, sed quatenus obediens, & subijcibilis est spiritui, & à fortiori Deo, naturaliter enim

corpus subiicitur spiritui, & eius impressionem ac motum recipit: sicut etiam anima rationalis, licet in se spiritualis sit, potest tamen substantialiter informare corpus, quia non est substantia completa, sicut Angelus, sed incompleta: similiter ergo accidens incompletum, & per modum motus poterit informare corpus, eique inhaerere & actuare. Et hoc ideo, quia corpus non solum est entitas materialis, sed etiam obediens spiritui in ordine ad aliquos effectus spirituales, ut ad mouendum & excitandum intellectum per sensus & alia similia; debet ergo esse capax recipiendi motus spirituales, nec tamen similiter spiritus est capax corporei, quia spiritus non obedit corpori, nec corpus agit in illum, nec per illum causat effectus corporeos. Et per hanc Philosophiam melius intelligitur quomodo Angelus suo spirituali actu moueat cælum, quomodo intellectus agens utatur phantasmate ad speciem intelligibilem producendam, & voluntas moueat appetitum sensitium, ac denique potentia superior vires inferiores imprimendo illis per modum transeuntis motus suos.

Ad difficultatem insinuatam in argumento de instrumentis coniunctis iam sæpè diximus, nos non loqui de illis, quia propriè non sunt instrumenta, sed de virtute ipsarum causarum, quæ hoc ipso quòd sunt coniunctæ, vel ab ipsa substantia profluentes, sine alia noua motione superaddita virtutem agendi habent ab ipsa substantia, eò quòd virtutes illius sunt.

Ad aliam verò difficultatem de quibusdam causis principalibus, quæ non mouent nisi ut
mo-

mōtā , dicitur , quòd illæ non mouent vt *mōtā* , taliter quod *ty mōtā* sic tota ratio cauſandi, ſed ſolum conditio, vel coadiuuatio requiſita, qua poſita ipſarum virtus vt principalis operatur .

Ad confirm. reſpond. ex dictis, quòd virtus illa inſtrumentalis eſt proportionata ad effectum producendum: diſtinguo; proportionem virtutis miniſterialis, & præſupponentis aliam priorem virtutem, à qua deriuatur tanquam à principaliori, concedo: non præſupponente aliam priorem, cuius gerat vices, & cui deferuiat deriuando ex ipſa effectum, nego. Ad rationem autem cauſæ principalis requiritur virtus, quæ per ſe primo ſit operatiua, non ex miniſterio, & deriuatione actuali alterius. Neque exempla in contrarium allata quidquam obſtant, quia ad actum prophetiæ, vel ad actum amoris, & viſionis, quando ſine habitu charitatis, & luminis producuntur, requiritur aliqua qualitas, ſupplens vicem habitus, & ideò per ſe primò operatiua eſt ex natura ſua, licet ſtatum habitus non habeat; & ideò per modum tranſeuntis dicitur dari ratione ſtatus, quia licet ex natura ſua deberet eſſe firmiter, & perfectè in ſubiecto, vtpote per modum habitus, tamen quia de facto non exiſtit permanenter, ſicut alij habitus, ſed in ſtatu imperfecto, dicitur dari per modum diſpoſitionis tranſeuntis, ſcilicet, quoad ſtatum exiſtendi in ſubiecto. Motio autem inſtrumenti, & qualitas diuini auxiliij datæ per modum concuſus, non ad ſupplendum habitum, & virtutem, non ſolam ratione ſtatus imperfecti, ſed etiam ex propria natura non ſunt per ſe primo operatiue, ſed vt

deferuientes alteri priori, & principaliori.

Et si infles. Nam illa Dei motio præbet ipsi instrumento virtutem in actu primo; ergo solum dat sufficientiam, & non efficaciam, quia efficax concursus non dat actum primum operandi, sed applicationem eius ad actum secundum; & sic ultra motionem, quia instrumentum applicatur ab agente per modum eleuationis & virtutis, requiretur alia motio efficax ad operandum, sicut in alijs causis principalibus; eritque illa virtus per se operatiua.

Respondetur. Vtrumque effectum dari in instrumento mediante motione Dei eleuatiua, quia & constituitur in actu primo ipsa motione, vt eleuatiua est, & applicatur ad operandum efficaciter, quatenus actualis vsus instrumenti est; non enim repugnat vtrumque conuenire eidem motioni, quia ex actuali vsu & motione causæ principalis descendit in ipsam causam antecedenter ad exitum operationis, & quia datur vt virtus solum deferuiens actuali operationi, & vt ministrans & applicans virtutem causæ principalis ad passum & effectum, circa quæ operatur, non est virtus principalis, sed ministrans coniuncta ipsi actuali operationi. Non tamen poterit similiter concursus simultaneus mouere causam, & concurrere ad effectum, quia identificatur cum effectum, & actione, non cum causa.

Ultimo arguitur. Vel illa motio est aliquid impressum instrumento, vel non; si non, ergo per talem motionem nõ magis redditur instrumentum actuatum ad operandum per ipsam, quàm sine ipsa, quod est destruere fundamentum nostrum. Si est aliquid impressum, vel est
mo.

motus physicus, & sic habebit suum terminum, v.g. qualitatem si est alteratio, vel ubi si est latitudo, & tunc ille terminus, & non motus constituet instrumentum in actu primo. Si verò est motus aliquis nobis ignotus ad minus hoc ipso, quod est motus, est aliquid imperfectius ipsa re producta, & sic non poterit sufficienter constituere instrumentum in actu primo respectu rei perfectioris: præterquamquod videmus instrumenta separata qualitate aliqua constitui in actu primo, ut sagitta, vel baculus cum impulsu aliquo mouentur.

Confirmatur. Quia per illam motionem nihil aliud habet instrumentum, quam subijci, & subordinari causæ principali, quod nihil est aliud, quam obedientialiter se habere ad illam, sed in creatura datur potentia obedientialis, ut in ea, vel media ea fiat quidquid Creator disposuerit, ut S. Tho. dicit in 4. dist. 8. q. 2. art. 3. ad 4. igitur ad rationem instrumenti in actu primo superfluit alia motio præter istam potentiam obedientialem.

Respondetur, aliquos, quos refert & impugnatur Catetan. 3. p. q. 62. art. 4. sentire, quod illa motio producat aliquem terminum in ipso instrumento. Cæterum falsum hoc est, cum instrumentum non moueatur ad acquirendum sibi sed ad mouendum alia. Est ergo ille motus qualitas aliqua per modum transeuntis & motionis, sicut impulsus in securi, virtus in Sacramentis; non autem motus est ad qualitatem, & ita negamus esse alterationem propriè loquendo, quæ qualitatem producat in ipso instrumento ut terminum, sed ipsa motio est qualitas mouens, & producat; sed reductiue potest

rest ad alterationem pertinere , sicut quælibet immutatio per qualitatem aliquam facta largo modo loquendo alteratio dicitur ; & sicut illa virtus instrumenti est quid incompletum in genere virtutis ; ita & in genere alterationis , verè tamen aliquid imprimit in ipsum instrumentum ab actione principalis agentis productum , & derivatum , & in ipso genere virtutis incompletum ; nec obstat , quòd producat effectum perfectiorem , quia vt dicit D. Tho. q. 17. de verit. art. 4. ad 6. *Incompletus motus potest esse causa eius, quod completum , & supernaturale est non per modum virtutis principalis , sed instrumentalis* . Et hoc relinquit instrumentum sufficienter proportionatum ad operandum per modum instrumenti deseruientis , non sicut requiritur ad causam principalem : instrumenta verò , quæ operantur per impulsum , non operantur per qualitatem completam , & perfectam , sed per modum motionis datam , vt supra q. 23. de impulsu diximus .

Ad confirmationem dicitur , potentiam obedientialem , de qua loquitur D. Thomas , non importare instrumentalem virtutem , aut positivam habitudinem , seu proportionem ad effectum supernaturalem , sed capacitatem tantum per modum non repugnantiam ad obediendum Deo , siue vt in ipsa creatura aliquid recipiatur , siue vt per eam aliquid fiat , & hæc est congenita cuicumque creaturæ , seu ipsa entitas creaturæ , vt obediens Deo . Sed ultra hanc potentiam obedientialem requiritur aliqua vis impressa instrumento , vt ipse D. Thom. in illo eodem loco citato , & in alijs multis à nobis citatis aperte docet ; nam potentia obedi-

tia-

tialis solum potest constituere aliquid vt eleuabile, non vt eleuatum. Requiritur autem ad instrumentum determinata virtus eleuans, tñm quia potentia obedientialis de se est indifferēs ad omnia, quæ Deus velit per illam operari, & sic pro determinatis effectibus oportet determinari; tñm, quia requiritur positius ordo, & proportio ad effectum producendum in ipso instrumento producente, vt ostensum est.

A R T I C V L V S II.

Vtrum in omni instrumento requiratur aliqua propria operatio ad effectum principalis agentis?

SVpponimus per illam virtutem, qua instrumentum à causa principali mouetur ad agendum ultra se, attingere ipsum effectum principalis agentis, & non solum aliquid antecedenter se habens ad ipsum, quia vel illud, quod attingit antecedenter ad effectum principalis agentis est ipsi proportionatum, & non excedens propriam virtutem, vel excedit. Si non excedit, non respicit ipsum instrumenta-liter, sed principaliter; si excedit, pari ratione poterit attingere virtute excedente effectum principalem.

Quare tota difficultas est, an vt eleuetur instrumentum ad agendum ultra propriam virtutem, requiratur aliqua actio in ipso instrumento, quæ ab ipso secundum propriam virtutem procedat, & ulterius eleuetur à causa principali. An verò etiam instrumentum nihil omnino agens per propriam virtutem, possit ex

sola impressione principalis agentis instrumentally operari. Et præcipue habet locum ista difficultas in instrumentis Dei, creaturæ enim non utuntur instrumentis, nisi tanquam adminiculis, quibus addiuuantur, sicut artifex utitur acumine ferræ, ut necessaria sibi ad scindendum, & Angelus applicat actiua passiuis, ut indigens actiuitate eorum: Deus autem utitur instrumentis, ut non indigens illis, sed ut communicans eis, ut sibi cooperentur; & ita difficultas est, an ut instrumentum sit eleuabile etiam à Deo requiratur aliqua propria ipsius actio quæ suscipiat eleuationem causæ superioris; an verò etiam sine vlla propria actione possit aliam motionem recipere, & operari.

Circa quam difficultatem P. Suarez tom. 1. 3. p. disp. 31. sect. 9. & alij existimant, non requiri propriam operationem instrumenti, ut à causa principali assumatur, quod ibi probat diffurgendo per omnia genera instrumentorum Dei, naturæ, & artis. Inter Thomistas autem etiam est varietas in hac parte, nam Ferrar. 2. contra Gen. c. 2. circa sextam rationem D. Th. requirit in instrumento propriam actionem distinctam ab ea, quæ sibi communicatur à superiori agente, & sequitur Nazar. 1. p. q. 45. art. 1. Aluarez 3. p. disp. 66. & alij. At verò Caiet. 1. p. q. 45. ar. 5. & Bannez ibidem requirunt quidem actionem propriam in instrumento respectu effectus principalis agentis, non tamen distinctum terminum realiter, sed sufficit quod in eodem effectu, seu termino aliquid correspondeat motioni principalis agentis, & aliquid propriæ virtuti instrumenti, sicut actio collocans tres virgas ex propria virtute, solum
dat

dat illis situm localem, ex ratione verò dirigente faci triangulum. Alij verò vt M. Nunno 3. p. q. 62. art. 1. diffc. 7. tenent, non requiri in instrumento aliquam actionem propriam, & realem, vt eleuetur à Deo, nec dispositionem aliquam propriè dictam, sed solum obedientialem, quæ largo modo dicitur operatio, & est non repugnantia ad suscipiendam motionem principalis agentis. Cui etiam suffragari videtur Lorca 3. p. disp. 63. loquens de instrumentis supernaturalibus.

Sit vnica conclusio, vt instrumentum eleuetur à Deo, requiritur, quod exerceat aliquam propriam actionem, ita quòd si omnino sit mortuum, seu carens omni actione non poterit eleuari. Cæterum non requiritur, quod operetur aliquem terminum, qui sit dispositio ad effectum principalis agentis in subiecto, in quo ponitur talis effectus, ita quòd fiat distincti termini res operata per propriam actionem, & per eleuationem, quarum vna sit dispositio ad aliam, sed sufficit quancumq; rem operari in quoq; subiecto, ita quod ex parte modi operandi modifcet actionem diuinā, & hoc, est dispositiue operari. *Prima pars conclusionis probatur* ex D. Th. in 3. p. q. 62. ar. 1. ad 2. vbi postquā dixit, quòd instrumentum habet duas actiones, vnā instrumentalem secundum quam operatur, non in virtute propria, sed in virtute principalis agentis; aliam propriam quæ sibi competit secundum propriam formam, sicut securi competit scindere secundum propriam facultatem, & facere lectum, vt est instrumentum artis; subdit: *Quòd non perficit instrumentalem actionem, nisi exercendo actionē* &

propriam scindendo enim facis lectum: similiter Sacramenta corporalia per propriam operationem, quam exercent circa corpus, quod tangunt, efficiunt operationem instrumentalem, ex virtute diuina circa animam: vbi S. Thom. eodem modo loquitur de instrumento artificiali, & de supernaturali, quod mouetur à Deo, ergo videtur esse de natura ipsius instrumenti, siquidem etiam in supernaturalibus requiritur: imò ex eo probat D. Tho. non posse dari instrumentum creationis, quia instrumentum non participat actionem principalis agentis, nisi in quantum per aliquid sibi proprium operatur ad effectum principalis agentis, quod esse non potest in creatione, cum creatio sit ex nihilo, circa quod creatura non potest operari, vt patet in 1. p. q. 45. art. 5. ergo etiam de potentia absoluta non potest dari instrumentum, nisi habeat aliquam propriam actionem.

Ratio vero huius sumitur ex his, quæ docet ipse Diu. Thom. q. 3. de poten. art. 4. quia actio alicuius etiam si sit illius vt instrumenti, oportet quod ab eius potentia egrediatur, ergo requiritur aliqua actio talis instrumenti, quæ egreditur ab eius potentia, alioquin si nihil ab ea egreditur, nihil operabitur, & sic non erit instrumentum quia si nihil ab eo egreditur, sed ociosum manet, non magis erit instrumentum Dei id, quod dicitur assumi pro instrumento, quam quod non assumitur. Dices egreditur effectus tantum per virtutem communicatam à superiore agente, sed nihil egreditur à virtute propria instrumenti. Sed contra est. Quia si virtus propria nihil agit, sed tantum virtus communicata à superiori agente,

ēē, ita quod actio tantum exit ab illa virtute communicata, & nullo modo à propria virtute, non potest ex vi illius constitui instrumentum in ratione instrumenti, ut distinguitur à causa principali, quia causam esse instrumentalem non consistit in hoc tantum quod operetur virtute ab alio participata, sed in hoc quod operetur ultra propriam virtutem; nam operari per virtutem participatam, nullo modo concurrente propria virtute, ut ultra illam operetur, etiam in causis principalibus inuenitur, ut patet in aqua ex calore recepto calefaciente, & in Luna ex luce Solis lucente, & in intellectu ex lumine gloriæ vidente, quæ non operantur instrumentaliter, eò quod effectus eis per se primo assimilantur. Si ergo instrumentum nihil operatur propria virtute ut habeat effectum ultra propriam actionem, sed nihilominus agendo ex se, solum recipit virtutem à superiori agente, & illa sola agit; ex hoc præcisè non habemus rationem sufficientem distinguendi illud instrumentum à modo agendi causæ principalis; siquidem hoc quod est recipere virtutem, & agere per illam non est operari ultra propriam virtutem, quia de facto si nihil operatur instrumentum propria virtute, sed tantum recipit virtutem alterius, in nullo ministrat superiori agenti, quia illa virtus ab illo recepta tantum operatur effectum principalis agentis, non illi ministrando, sed præcisè effectum emittendo, licet per virtutem emendicatam ab alia, quæ tamen virtus se habebit, tunc ut primo, & per se operatiua non ut motio eleuatiua alterius actionis sibi ministrantis, & deseruiensis. Ut
ergo

ergo tanquam causa instrumentalis ministerialiter operetur, necesse est, quod habeat aliquam actionem, quæ in quantum propria est, ministret, & in quantum eleuata ultra proprium effectum aliquid attingat.

Secunda verò pars conclusionis constat pluribus exemplis, nam potest Deus assumere actum immanentem, v. g. cogitationem, vel visionem ut aliquid extra se operentur, ut S. Tho. admittit 2.2. q. 178. art. 1. ad 1. & tamen actus immanens secundum sibi propria nihil operatur in subiecto extra ubi fit effectus. Similiter instrumenta corporalia, quæ assumuntur ad producendum aliquid spirituale, ut Sacramenta gratiam in anima, ignis torturam in dæmone, nullam dispositionem producant propria actione in ipsum spiritum quia propria eorum actio corporalis est, ergo non requiritur actio propria instrumenti ad producendam aliquam dispositionem in eo subiecto, in quo effectus principalis ponitur. Et ratio est, quia virtus diuina non assumit instrumentum quasi indigens illo, vel effectum ab ipso productum ad principalem effectum producendum, sed solum ut cum communicatione, & consortio illius operetur, ergo sufficit accommodare se modo operandi instrumenti, ita quod ab ipso instrumento exeat operatio aliqua iuxta modum suum, & attingat effectum aliquem ultra virtutem propriam, & sic ex parte modi operandi dispositiue se habeat non ex parte alicuius rei operata. Quomodo autem illa actio identificetur cum effectum à se distantem? Resp. quod actio illa eleuata à Deo est virtualiter multiplex, & plures effectus quasi par-

tiales

tiales , & inadæquatos respicit , sicut impulsus qui plura projicit , calor qui in plura subiecta agit , & Sol in omnia inferiora , licet continuata , instrumentum verò in distantia supernaturaliter .

Soluntur argumenta .

Primo arguitur aliquibus instantijs ad probandum non requiri aliquam actionem propriam vt instrumentum operetur , sed sufficere passionem , vel motum . Non sufficit contactus vnus corporis cum alio ad faciendum miraculum , sicut corpus mortuum ad contactum corporis Elisei reuixit , & mors Christi , ac resurrectio iam præterita efficienter operantur nostram iustificationem , vt constat ex Diu. Tho. 3. p. q. 50. art. 5. & q. 56. art. 1. constat autem quod mors non est actio , sed solum manet terminus talis actionis , ergo non requiritur ad operationem instrumentalem propria , & vera actio instrumenti . Ex alia parte instatur ad probandum , quod si requiritur actio propria instrumenti præuia ad eleuationem causæ principalis , etiam requiretur aliquid productum tanquam dispositio ad effectum principalis agentis ; ideò enim negat D. Thom. 1. par. q. 45. art. 5. posse dari instrumentum creationis , quia instrumentum debet operari dispositiue ad effectum principalis agentis , quod in instrumento creationis non inuenitur , quia nullum præsupponit subiectum , sed si non requiritur , quod producat aliquid in ipso subiecto , quod de nouo fit , cessat ista ratio , quia instrumentum saluatur operando dispositiue in vno subiecto , & effectum principalis

ciptalem in alio, vbi nihil operatur dispositiue; ergo poterit ad creandum assumi instrumentum, quod operatur aliquid dispositiue circa vnum subiectum, & nihil circa subiectum, quod creatur.

Ad primam instantiam resp. In omnibus illis inueniri aliquam propriam actionem, quæ proximè assumitur ad operandum instrumentaliter, nam ille contactus aliquam actionem adiunctam habuit, vel impulsus, quo proiectum est cadauer, vel grauitatis, qua descendit, vel etiam aliquam infrigidationem, aut alterius qualitatis alterationem, qua fit contactus corporum secundum qualitates sensibiles. Mors autem, & passio Christi, & resurrectio dicuntur operari instrumentaliter nostram resurrectionem, vel iustificationem ratione sui termini, cuius ipsæ sunt conditiones, vt humanitas Christi operetur per suas actiones & imperium tales effectus. Et ita D. Ph. q. 56. citat. art. 1. ad 2. dicit: *Quod resurrectio Christi est causa efficiens nostræ resurrectionis, in quantum humanitas eius secundum quam resurrexit, est quodammodo instrumentum diuinitatis ipsius*. Et aduertit ibi Caietan. quod resurrectio Christi se habuit vt conditio ad hoc vt humanitas Christi esset instrumentum resurrectionis nostræ, & similiter passio, vt esset instrumentum remissionis peccatorum. Quare humanitas passa, & resuscitata est instrumentum diuinitatis, mediantibus tamen actionibus, quas facit, vel in nostra resurrectione faciet, quæ distinctæ sunt à sua resurrectione; nam ipse Dominus in voce Archangeli, & in tuba Dei descendet de cælo, id est in

imperio mouente Angelum ad nostram resurrectionem, quod imperium distincta actio est.

Ad secundam instantiam respondetur, non requiri de necessitate, quod illa actio prauia instrumenti producat terminum realiter distinctum ab effectu principalis agentis, sed sufficit eundem effectum producere, licet modo ipsius instrumenti proprio, sufficit etiam producere aliquid in subiecto distincto ab eo, in quo producit effectus principalis agentis, ut cum assumitur actus immanens ad producendum aliquid extra. Nec D. Tho. dixit requiri ad instrumentum, quod operetur aliquam dispositionem ad effectum principalis agentis, sed quod dispositiue operetur, in quo multi hallucinantur, putantes idem esse operari dispositiue, & operari dispositionem; cum tamen saluetur operari dispositiue, quando ex parte modi operandi modificat actionem principalis agentis, ut operetur modo causæ inferioris, licet non distinctum realiter effectum operetur, vel non in eodem subiecto.

Et cum urgetur, quod secundum hoc non repugnabit dari instrumentum creationis in violationis Diu. Tho. Respondetur, adhuc repugnare tale instrumentum propter modum operandi creatum ipsius instrumenti, quia actio ipsius cum si accidens, operatur dependenter à subiecto, vnde si diuina actio eleuat hanc actionem creatam, & iuxta modum operandi eius se accommodat, non potest ex vi illius creare, quia creatio est ex nihilo, & sic opponitur modo operandi actionis, quæ est ex subiecto, & hoc ipso quod actio est accidens, non potest non esse in subiecto, & ex subie-

subiecto operari. Quam rationem aduertit D.
Tho. q. illa 3. de potent. art. 4.

Quod si instes ex P. Suarez vbi supra, quia ad propriam actionem instrumenti non requiritur, quod sit in eodem subiecto, in quo effectus producitur, sed sufficit, quod sit in alio sicut actus immanens existens in anima operatur instrumentaliter ad extra, ergo sufficit quod actio creatiua instrumentalis existat in vno subiecto vt accidens, & alibi operetur ex nihilo. Quod explicatur exemplo transubstantiationis, quia etiam transubstantiatio caret subiecto, cum ipsum solum habeat pro termino a quo, & tamen potest dari instrumentum respectu ipsius, ergo ex defectu subiecti non debet denegari instrumentum creationis. Item ad diuinam potentiam non requiritur alia dispositio in instrumento, quam obedientialis, vt obediat Deo mouenti, & quod effectus possit ab ipso dependere; ad hoc autem non requiritur quod Deus accomoder se in modo agendi ipsi instrumento, sed sufficit quod nolit fieri effectum sine consortio instrumenti, & dependentia ab illo, ergo propria actio instrumenti non requiritur.

Respondetur, quod benè potest actio esse in vno subiecto inhæsiuè secundum mutationem ipsius, & operari in alio distante à se, tanquam in subiectum inadæquatum per similem mutationem, sed quod eleuetur ad operandum extra se sine vlla prorsus mutatione, sed ex nihilo, omnino repugnat, quia hoc ipso quod actio aliqua est motus, & dependens à subiecto, non potest operari sine motu, nisi destruat ipsa actio, & fiat non immutatiua. Et ita
pote.

poterit Deus intra lineam actionis immanen-
tis, seu motus (& loquimur largè de motu,
prout etiam comprehendit actiones spiritua-
les, & quascunque alias, quæ sunt in subiecto)
subrogare diuersos effectus, vel subiecta, siue
distantia, siue indistantia, quæ per modum
mutationis attingantur, siue contactu reali, si-
ue virtuali; quod verò agat sine vlla mutatio-
ne, sicut requirit creatio, quæ est ex nihilo,
hoc non potest esse nisi destructa specie illius
actionis, quæ ex sua natura est motus, seu mu-
tatio aliqua, si autem creat, creat vt non muta-
tio, atque adeò non operans modo ipsi instru-
mento se accomodando, quod esset non vti illo
vt instrumento.

Nec obstat exemplum de transubstantiatione,
quia est vera mutatio, non formalis, sed totalis,
neque enim Corpus Christi creatur, sed panis
mutatur in ipsum, & ita ex parte subiecti, quod
transmutatur, & conuertitur potest actio in-
strumenti eleuari à Deo, vt intra lineam muta-
tionis operetur transubstantiationem, quod in-
sinuat D. Th. in 4. dist. 8. q. 2. art. 3. ad 3. dicens:
Nihil deperire dignitati Corporis Christi, si ali-
qua creatura accipiat instrumentalem virtutem
operandi in id, quod in Corpus Christi transub-
stantiatur. Sentit ergo D. Thomas instrumen-
tum transubstantiationis attingere subiectum,
quod mutatur, & ideò talis actio non amittit
rationem mutationis licèt eleuetur à Deo ad
operandum mutationem non naturalem, ne-
que formalem, sed totalem, & ita transubstan-
tiationem esse veram mutationem, tanquam
conuersio ab existenti in existens, vt docet la-
tè D. Tho. in 4. dist. 11. q. 1. art. 3. quæstiunc. 3.

Ad

Ad aliam instantiam respond. sufficere ad diuinam virtutem dispositionem obedientialem instrumenti ; sed tamen ista obedientialis dispositio secundum potentiam est non repugnātia , seu capacitas obedientialis , & secundum actum est aliqua actio , quæ eleuatur à Deo , quia nisi ipsum instrumentum verè producat , & agat , instrumentum in actu non erit , non potest autem producere nisi actionem , quæ sit accidens ; & mutatio .

Primo instabis ; in aliquibus instrumentis , in quibus non apparet aliqua actio præuia ipsius instrumenti præter operationem principalis agentis , v.g. sigillum imprimens figuram non apparet , quam actionem habeat præter ipsam impressionem figuræ , similiter in serra non datur virtus actiua , præter virtutem mouentis illam ad scindendum , nam durities non est virtus actiua , sed resistiua , multo minus quantitas , & figura ipsius serræ actiua sunt ; neque grauitas , quia hæc solum mouet deorsum , & sic serra non scinderet nisi deorsum versus . Item etiam phantasma attingit instrumentali-ter speciem spiritualem productam ab intellectu agente , & tamen non apparet , quid præuium operetur in anima , vel intellectu . Denique si illa actio propria instrumenti est præuia ad motionem principalis agentis ergo distinguitur ab illa , alias esset præuia ad se ipsam , si verò distinguitur , ergo non eodem motu fit , v.g. scissio serræ , & productio lecti , quod negat D Tho. 3.p.q.62.art.1.

Respondetur. Ad exemplum de sigillo & serra , atq; similibus instrumentis operari actione propria , ve. gr. duritie aut grauitate , quæ impul-

impulsa comprimit ceram, & imprimi figuram; & duricia non solum est resistiua, sed etiã diuisiua, vel fractiua alterius, sicut & acumen; duricia enim impulsu per se ipsam diuidit, aut frangit; acumen penetrat, seu diuidit: licet verum sit, quod ad sic diuidendum adhuc ut causa principalis dependeat ab impulsu, & motione non quatenus artificiosa, sed quatenus impulsiva præcisè, sicut piper, aut vinum non calefaciunt, nisi prius calefacta à stomacho, ab artificiosa verò motione dependet non ad scindendum, sed ad faciendum lectum, verbi gratia.

*Ad illud exemplum de phantasmate latius dicetur in libris de anima. Nunc breuiter dicitur phantasma non esse propriè instrumentum effectiui intellectus agentis ad producendas species, sed obiectiui, quatenus præbet obiecta habilia, ut intellectus agens producat species, quas non sufficit producere phantasma, quia non est intelligibile in actu, sed determinat ipsum intellectum agentem quasi materiam obiectiuam. Vndè dicit Diu. Tho. 1. p. q. 85. art. 6. in fine corporis: *Quod cognitio sensibilis non est perfecta, & totalis causa intellectiua cognitionis, sed magis quodammodo est materia causæ.* Et Caietan. 1. par. q. 85. artic. 1. in fine, docet quod phantasma propriè non est instrumentum intellectus, sed vocatur largè instrumentum quatenus omnis causa ex se non sufficiens ad aliquem effectum, sed indigens virtute alterius, instrumentum eius dicitur, sicut etiam color potest dici instrumentum lucis, quia color sine luce non sufficit mouere visum. Est tamen differentia, quod*

quòd lux informat superficiem coloratam in-
formatione reali, intellectus autem agens non
informat realiter phantasma, neque illi com-
municat aliquam virtutem, aut lucem, ut ali-
qui putarunt, sed illuminat phantasmata, in-
quit S.Tho. q. illa 84. art. 1. ad 4. *Quia sicut pars
sensitiva redditur virtuosior ex coniunctione ad
intellectum, ita phantasmata ex virtute intel-
lectus agentis redduntur habilia, ut ex eis spe-
cies intelligibiles abstrahantur.* Igitur hæc ha-
bilitas, illuminatio nuncupatur, non verò in se
recipiunt lucem spiritualement informantem illa,
sed lux spiritualis, si qua datur est ipsa species
producta in intellectu possibili, ab intellectu
agente determinato per tale phantasma, quod
ex coniunctione ad intellectum est sic habile,
ut ex illo informari possit talis species.

Ad ultimum dicitur, illam actionem instru-
menti aliquando esse actionem præuiam, & rea-
liter distinctam à motione causæ principalis
sicut ablutio aquæ, & productio gratiæ, quia
sunt termini realiter distincti; aliquando verò
solum est præuia actio virtualiter, & secundum
aliquam formalitatem tantum, quia termini
ipsi solum formaliter sunt distincti, & non
realiter, sicut quando securis scindendo facit
lectum, diuisio quantitatis, & forma producta
per artem non sunt termini realiter distincti,
sed formaliter, secundum aliquos respectus, &
modos, quibus figura illa, aut diuisio perfe-
ctior est, & sic sufficit quod actio sit præuia,
secundum aliquam formalitatem distinctam à
forma artificiosa, non vero realiter sit distin-
cta.

INDEX RERVM

NOTABILIVM.

A

- A**ccidentia in Sacramento Altaris quomodo sustententur à Deo. quæst. 25. art. 1. pag. 426
- A**ctionis definitio q. 14. art. 3. 38
- D**uplex officium actionis. ibid. 37
- Q**uid sit de conceptu essentiali actionis, quid de connotato. 39
- Q**uomodo specificetur actio à principio, & à termino. 41
- D**uplex actionis emanatio. 39
- A**ctionis prædicamentalis & Physicæ distinctio in via Scoti. ibid. ar. 2. 24
- A**ctionis diuisio in creatiuam, & eductiuam explicatur. ibid. art. 3. 43
- A**ctio creatiua an prædicamentalis. ibid. 44
- A**ctio & passio non respiciunt motum tanquam genus & gradum sibi essentialem, sed sunt conditiones intrinsecæ ipsius motus eique quasi subiecto conuenientes. ib. ar. 2. 26
- A**ctio & passio quomodo distinguantur inter se, & à motu. 26
- A**ctio non mutat agens vt motus, sed vt forma. ibid. 35
- A**ctio quomodo subiectetur in motu. ibid. 35
- A**d actionem non est per se motus, quæst. 19. art. 2. 231
- A**d actionem quomodo non detur actio. qu. 23. ar.

Index rerum notabilium.

23. ar. 1. pag. 245. & q. 25. ar. 1.	pag. 420
Actio creaturæ in tempore quomodo identificetur cum actione Dei ab æterno, quæst.	
25. art. 1.	420
Actio causæ secundæ quomodo causata à causa prima. ibid.	426
Actionis immanentis & transeuntis discrimen.	
'q. 14. art. 3.	44
Actio immanens est qualitas formaliter. ib.	47
Actionis immanentis mutatio non comprehenditur in definitione motus. ibid. ar. 1.	20
Actiones immanentes quomodo moueantur ab alio. q. 22. art. 1.	339
Actio transiens an sit in agente, vel in passio. ib.	
art. 4.	47
Æternitas quid sit ? q. 18. art. 1.	182
Æuum quid sit. ibid.	183
Caret omni successione quamuis aliqua virtualis in illo concedi possit. ibid.	184
Quomodo sit vnum Æuum. q. 18. art. 3.	199
Aggeneratio an motus continuus, quæst. 19.	
art. 2.	228
Angeli motus localis non est definitus definitione motus physici. q. 14. art. 1.	22
Motus Angeli quomodo diuisibilis. ibid.	23
Angelus quomodo possit moueri de extremo in extremum sine medio. q. 19. art. 5.	254
Angelus quomodo sit in loco q. 17. art. 2.	172
An possit facere vacuum. ibid. ar. 1.	156
Non potest immutare ordinem elementorum.	159
 Applicatio duplex, q. 25. ar. 2.	415

Index rerum notabilium.

C

- C**asus quomodo sit causa per accidens, qu.
25. art. 4. pag. 461
Vide Causa per se.
- C**ausarum subordinatio ad Deum. q. 25. 416
- C**ausa secunda antecederet ad actionem indi-
get motione prævia Causæ primæ, ibid.
art. 2. 431
- Quid sit ista motio prævia. 435
- An sit qualitas. 441
- Eius effectus formalis. 444
- Hæc præmotio non superfluit, ar. 3. 447
- Non tollit libertatem. 441
- C**ausa per se, & causa per Accidens explica-
tur. ar. 4. 469
- Omnis causa per accidens reducitur ad ali-
quam Causam per se. 463
- Omnes causæ creatæ quæ coordinantur in-
ter se sunt capaces Casus, & Fortunæ. 462
- C**ausa Instrumentalis. Vide Instrumentum.
- C**ausa Principalis. Vide Principalis Causa.
- C**haracter sacramentalis quomodo dicatur vir-
tus Instrumenti, q. 26. ar. 1. 478
- C**hristus apparens Paulo, & alijs in terra an de-
ferat esse in Cœlo. q. 16. ar. 5. 150
- C**hristi Corpus quomodo sit in Cœlo & in Sa-
cramento absque eo quod sit in duplici
loco. 146. & 151
- C**hristi corpus quomodo dicatur totum esse in
puncto. q. 20. ar. 2. 292
- In Christi corpore sacramentato quomodo
detur vbi q. 16. ar. 2. 122
- C**hristus cognoscit infinita simul in actu ex
Phil. Nat. Pars II. Y. par-

Index rerum notabilium.

- parte cognoscentis. q. 15. art. 3. 80
- Christi Mors, Passio, &c. quomodo sint Instru-
mentum nostræ salutis. q. 26. ar. 2. 496
- Coelum Empireum quomodo sit in loco. ar. 3.
pag. 128
- Compositio ex genere, & differentia tollit in-
finitatem in Creatura. q. 15. ar. 1. 64
- Concursus simultaneus causæ primæ est neces-
sarius ad quoscumque effectus causæ se-
cundæ. q. 25. ar. 1. 418
- Quomodo ille concursus identificetur cum
concursu causæ secundæ. 419
- Quomodo causet eius actionem. 426
- An partialis. 393. In quo subiecto sit. 427
- Repugnat causam secundam operari sine
Concursu causæ primæ. 424
- Concursus Dei ad actus liberos & vitales. 425
- Quem concursum habeat ad Peccatum. ibid.
- Non potest Deus concurrere ut causa forma-
lis, vel materialis. 425
- Concursus Physicus inuenitur apud Diu. Tho-
mam. ar. 2. 428
- Quid intelligatur nomine concursus Physi-
ci. 427. Vide Causa Secunda.
- Continuum quomodo in infinitum diuisibile.
q. 20. ar. 2. pag. 261. & ar. 3. 298
- An componatur ex solis indiuisibilibus. ar.
3. pag. 292
- In quo sensu dixerit Aristoteles quod non se
mouet. q. 22. ar. 1. 340
- Contrarietas duplex. q. 19. ar. 3. 239
- Creatio quomodo dicatur mutatio. q. 14. ar. 1.
pag. 22
- An sit actio prædicamentalis. ar. 3. 44
- Quomodo distinguatur ab educatione. 43
- Al

Index rerum notabilium.

An possit aliquid creari in tempore, qu.	21.
ar. 1.	309
Creationis instrumentum quomodo repugnet.	
q. 26. ar. 2.	497
Creatura tripliciter respicit <u>Deum</u> , q. 15. ar. 1.	
pag.	62
Cordis motus quomodo <u>incipiat</u> , q. 23. ar. 1.	376
Iste motus an à Generante, q. 22. ar. 1. pag.	
<u>338. & q. 23. ar. 1.</u>	373
Corruptio excluditur à ratione motus, qu.	19.
art. 1.	208

D

D ensitas quomodo concurret ad gravitatem, q. 23. ar. 1.	364
Desinitio rerum permanentium, q. 21. ar. 1. pag.	
310. & ar. 2.	316
Quomodo annihilentur, ibid.	310
Quomodo desinat motus, ar. 2.	314
Indivisibilia successiva quomodo desinant.	
pag.	319
Quies negativa motus quomodo desinat.	320
Deus quomodo videat creaturas perfectiores quas potest creari in infinitum, q. 15. ar.	
3. pag.	72
Cognoscit infinita simul in actu ex parte cognoscentis.	80
Deum esse probatur ex Motu, q. 22. ar. 1.	333
Respectu eius nihil est distans, ar. 2.	345
Demonstrat Aristoteles de Deo ut primo motore quod est immobilis, q. 24. a. 3.	409
Quod caret omni potentialitate.	413
Quod sit infinitus in essentia & in virtute.	
pag.	413
Quod careat magnitudine.	414
Quod sit intelligens, ibid.	

Y 2

Quod

Index rerum notabilium.

Quod sit ubique sempiternus & vnus.	415
Deus causa prima concurrens cum secundis causis. Vide Concurfus, & Causa secunda.	
Deus non pendet à Creatura in operando.	q. 25.
ar. 2. pag.	439
Deus quomodo concurrat ad actum peccati.	456
Respectu Dei nullus est casus, vel fortuna.	
ar. 4.	463
Dispositio vltima quomodo fiat.	q. 21. ar. 1.
	308
Duratio non est idem quod Quando.	qu. 18.
ar. 1.	174
Quid sit Duratio in communi.	175
Verum res dicantur durare in primo instanti.	ibid.
Duratio an aliquid addat super existentiam.	
pag.	175
Durationes numerantur.	182

E

E manatio quæ est in re iam constituta in esse an fiat per nouam actionem.	q. 23. a. 1.
	380
Vea potentia quomodo emanet mediante alia.	
	378
Quod fluit per emanationem quomodo ab alio moueatur.	q. 22. ar. 1.
	339. & 341.
Existencia quomodo distinguatur à Duratione.	
q. 18. ar. 1.	177
Existencia temporis explicatur.	ar. 2.
	184

F

F atum quid sit.	q. 25. ar. 4.
	464
Forma imperfecta dupliciter sumitur.	q. 14
	ar. 1.

Index rerum naturalium.

art. 1. pag. 12

Formæ substantiales quàm habeant inter se di-
stantiam. q. 19. ar. 2. 227

Fortuna quomodo sit Causa per accidens. q. 25.

ar. 4. 465

Vide Causa per se.

G

Generatio excluditur à motu. q. 19. art. 1.
pag. 217

An omnis generatio excludatur. 218

Generans quomodo moueat graua & leuia. q.
23. ar. 1. 364. & 370

Graua & leuia quod principium habeant in se
motus. 363

Principia motus eorum numerantur. 365

Non mouentur à se. 368

Motus in graui & leui est emanatio quietis.
pag. 371

Grauitas & leuitas an sint principium actuum,
vel paucum motus. 366

Grauitas quomodo sit principium motus. 376

Quare requiratur ad eius emanationem. 17

Quomodo sit principium motus in absentia

Generantis sublato Impedimento. 379

Motus grauium quare velocior in fine. 382

H

Habere non est per se terminus motus. q.
19. ar. 2. 232

- I**mpulsus mouens proiecta quid sit. q. 23. ar. 2. pag. 383
Vbi recipiatur. 385
Ad quam speciem qualitatis reducatur. 387
Quis nam motus detur ad impulsu. 387
Impulsus à quo corrumpatur. 388
Quomodo desinat. 362. A quo conseruetur. pag. 390
Inceptio rerum permanentium. q. 21. ar. 1. pag. 306. & ar. 2. 316
Inceptio motus. ar. 2. 314
Indiuisibilia quot sint. q. 20. ar. 1. 271
Vnde deducatur dari indiuisibilia in continuo. pag. 272
Indiuisibilia an sint entia positiua realiter distincta à partibus. 274
Sunt realitates pertinentes ad Prædicamentum Quantitatis. 275
De indiuisibilibus in genere Qualitatis. 277
Indiuisibilia tam continuatiua quam terminatiua dantur actu in Continuo. 278
Quo sensu dicantur à D. Thoma esse in Continuo in potentia. 280
Quomodo ad diuisionem Continui resultent. 281
Quam habeant unitatem. ibid.
An sint actu Infinita in continuo. ar. 2. 282
Indiuisibile quomodo possit afficere partem. 287
Quomodo subsistat. 291
Indiuisibilis, & Unitatis diuersitas. ar. 3. 295
& 305.
Infiniti variaz acceptiones. q. 15. ar. 1. 59

Index rerum notabilium.

- Infinitum** quomodo reperiatur in omnibus
Prædicamentis. 60.
- Infinitum** aliud in actu, aliud in potentia. 61
- Infinitum** actu relatiuè non repugnat. 62
- Infinitum** in actu in intensiōe, extensiōe, &
multitudine naturaliter dari non potest.
pag. 65
- Utrum** tale infinitum implicet absolutè. ar.
2. pag. 65
- Rationes** D. Thomæ ad probandum infiniti
in actu absolutam repugnantiam defen-
duntur. 67
- Implicationes** circa Infinitum multitudinis.
ibid. 72
- Intellectus** Motus an à Generante. q. 13. ar. 1.
pag. 373
- Instans** quomodo sit existentia Temporis. q. 18.
art. 2. 187
- Instrumentum** quid sit. q. 26. 468
- Instrumentum** morale quid. ar. 1. 469
- Instrumentum** aliud propriè, aliud impropriè
dictum. ibid.
- Aliud** coniunctum, aliud separatum. ib.
~~quo distinguitur à Causa Principali.~~ 470
& 474.
- Instrumentum** quem effectum respiciat. ibid.
- Eleuari** debet motione aliqua præuia. 479
- Quænam** inueniatur potentia obediēcialis
in Instrumentis. 488
- Instrumentum** ut eleuetur, requiritur quod
exerceat aliquam propriam actionem. ar.
2. pag. 491
- Non** requiritur quod operetur aliquem ter-
minum qui sit dispositio ad effectum prin-
cipalis agentis. ibid.

Index rerum notabilium.

L

L Euitas. Vide Grāuitas.	
Loci definitio. q. 16. ar. 1.	103
Quomodo sit intelligenda, & legenda vltima eius particula.	114
Non est per genus & differentiam, sed per subiectum, & accidens 1.4. Quod sit genus loci.	105
Locus quomodo sit immobilis.	107
Loci diuifio in extrinsecum & intrinsecū.	103
Locus naturalis quid addat supra locum communiter dictum.	115
Loci proprietates traduntur.	116
Locus per accidens dupliciter acquiritur. art. 2. pag.	122
Quæ nam sint in loco. ar. 3.	126
An duo Corpora possint simul esse in eodem loco. ar. 4.	133
Implicat vnum Corpus esse simul in duobus locis. art. 5.	141

M

M Ateria prima non est ex se ens in actu. qu. 19. ar. 1.	218
Mensura quomodo debeat esse notior mensurato. q. 18. ar. 2.	197
Motio. Vide Concurfus, & Virtus. Motio Præuia. Vide Causa secunda.	
Motus definitur. q. 14. ar. 1.	14
Definitio explicatur.	15
An in definitione motus includantur omnes mutationes, & motus.	18

Mq.

Index rerum notabilium.

Motus localis Angeli non est definitus in hac definitione .	23
Motus quid addat supra mutationem.	33
Motus & Mutationis differentia, q. 19, ar. 1.	216
An distinguantur inter se essentialiter.	219
Continuitas an de essentia motus, quæst. 14.	
art. 1.	22
Motus diuersitas generica vnde sumatur, q. 19.	
art. 1.	221
Motus quantum ad Terminum : Vide Terminum .	
Motus conditiones, q. 19, ar. 2.	225
Conditiones requisitæ ad mouendum, q. 22.	
pag.	331
Vnde sumatur vnitas numerica motus, ar. 4.	
pag.	245
Motus quomodo indiuiduetur à Tempore.	249
Motus discreti naturalium, & spiritualium diuersitas, q. 14, ar. 1.	22
Motus discretus non constituit diuersam speciẽ à Continuo .	23
Motus quomodo distinguatur ab actione, &	
pag. 12, ar. 2.	24
Quomodo distinguatur à Termine.	31
Et à Tempore, q. 18, ar. 1. pag. 166. & ar. 2.	
pag.	196
Motus est in Prædicamento sui Termini.	31
Quomodo sit Postprædicamentum .	32
Motus est immediatẽ mensurabilis à Tempore.	
q. 23, ar. 3.	209
Ad quæ prædicamenta non detur per se motus, q. 19, ar. 2.	225
Ad quæ detur, ar. 3.	233
Motus alius per accidens, alius in partem, alius per se, ar. 1.	222

Index rerum notabilium.

- Motuum contrarietas vnde sumatur. ar. 5. 250
Contrarietas inter Motum & quietem. 252
An possit quis moueri duobus motibus contrarijs. 253
An possit quis moueri de extremo in extremum sine medio. 253
Motus non potest incipere per aliquid indiuisibile. q. 21. ar. 2. 314
Datur vltimum mutatum esse in motu. 314
Omne quod mouetur ab alio mouetur. q. 22. art. 1. 311
Inter mouens & mobile approximatō duplex. ar. 2. 330
Verum requiratur approximatō mouentis ad mobile. ibid.
Idem esse mouens, & motum quomodo repugnet. q. 23. ar. 1. 380
Quomodo moueantur graua & leuia. 383
Motus ad supplendum vacuum est naturalis. q. 17. ar. 1. 162
Motus an repugnet fieri in vacuo. ar. 2. 163
In vacuo duplex vbi. 167
In vacuo non fieri motus in Instanti. 170
Quomodo fieret talis motus. 171
Motor Primus. Vide Deus.
Mutationes in generatione, & corruptione quando multiplicentur. q. 14. ar. 2. 34
Mutationis diuisiones. q. 19. ar. 1. 216
Mundum incepisse in Tempore est de fide. q. 24. ar. 1. 394
Non potest hoc per ratione demonstrari. 395
Mundus non fuit productus ex necessitate. 394
Potuit habere initium Temporis ante Instans quo creatus est. 395
An quoad res permanentes potuerit esse ab æter-

Index rerum notabilium.

æterno. ibidem.

An etiam quantum ad res successivas. art. 2.
pag. 402

N

Nutritio potest fieri sine augmento quantitatis. q. 19. ar. 3. 241

Nutritio quomodo terminetur ad Substantiam cum noua quantitate. ibid. & pag. 244

P

PArtes aliæ Aliquotæ, aliæ Proportionales. q. 20. ar. 1. 270

Aliquantæ seu Proportionales quomodo sint in aliquotis in Continuo. q. 15. ar. 3. 77

Munus partium proportionalium prout continetur in aliquotis. q. 20. ar. 1. 279

Partes proportionales quomodo dicantur communicantes. ar. 2. pag. 261. Vide Indivisibilia.

Passio non terminat per se motum. q. 19. ar. 2. pag. 231

Permanentia duplex. q. 18. ar. 3. 203

Phantasma quomodo causet Speciem in Intellectu. q. 26. ar. 2. 501

Prædicamenta ad quæ non est per se motus. q. 19. art. 2. 208

Ad quæ sit per se motus. ar. 3. 233

Præmotio. Vide Concurfus, & Causa secunda, & Virtus.

Principalis Causa. Vide Causa Principalis.

Projecta quomodo moueantur. q. 23. ar. 2. 383

Index rerum notabilium.

Q

- Q**ualitas est terminus per se motus sed non
omnis. q. 19. ar. 3. 233
Latitudo & distantia inter qualitates expli-
catur. pag. 217. & q. 21. ar. 2. 316
Quando quid sit. q. 18. ar. 1. 174
Ad quando non est per se motus, q. 19. ar. 2.
pag. 232
Quantitas est ratio constituendi aliquid in lo-
co. q. 16. ar. 3. 125 & 127
An duplex quantitas possit tribui eidem cor-
pori per intrinsecam inhaerentiam. ar. 5.
pag. 149
Ad quantitatem est per se motus. ar. 3. 239
Contrarietas quæ reperitur in quantitate.
pag. 240
Quantitas quomodo materiae coeua. 243
Quomodo sequatur ad substantiam in Nu-
tritione. 244
Quomodo pertineat ad essentiam Quantitatis
resistere penetrationi. q. 20. ar. 2. 290
Quietis contrarietas cum Motu. q. 19. ar. 5. 257

R

- R**eflexus Motus à quo causetur. qu. 23. ar. 2.
pag. 391
Ad refractionem requiritur aliqua disposi-
tio in Corpore resiliente. 393
A quo causetur vehementia motus reflexi.
pag. 394
Relatio quando resultat quam mutationem fa-
cit in subiecto. q. 19. ar. 2. 238
Ad relationem non est per se motus. 229

Seq:

Index rerum notabilium.

S

- S**ensus Compositus, & Diuisus explicatur. q. 25. ar. 3. 453
Situs non terminat per se motum. q. 16. a. 2. 232
Substantia corruptibilis an sit immediate tempore mensurabilis. q. 18. ar. 3. 201
Ad substantiam non est per se motus. q. 19. ar. 2. 226
An sint Indiuisibilia in substantia, quæst. 20. ar. 2. 288
Indiuisibilia quomodo præhabeantur in substantia, 291

T

- T**emporis variae significationes. q. 18. ar. 1. pag. 173
Tempus est continuum, & successuum. ibid.
Constat partibus copulatis per Instantia. 174
Discretum aliud Corporale, aliud Spirituale. ibid.
An sit aliquid reale. 179
Tempus definitur. 173. Definitio explicatur. ibid.
Tempus quomodo distinguatur ab alijs durationibus. 182
Quomodo distinguatur à motu. pag. 166. ar. 2. pag. 196
Realis existentia Temporis explicatur. ar. 2. pag. 186
Temporis subiectum intrinsecum, & extrinsecum traditur. ar. 3. 194
Tempus quomodo mensuret motum, pag. 183. & q.

Index rerum notabilium.

& q. 18. ar. 1.	pag. 173
An sit vnum numero.	198
Quomodo Indiuiduetur à motu. qu. 19. ar. 4. pag.	249
Terminum esse formaliter vnum vel diuersum quid sit. q. 19. ar. 1.	221
Terminus per accidens motus explicantur. qu. 21. ar. 1.	305
Differentia inter terminos rerum permanentium, & successiuarum. ar. 2.	314
Terram moueri, damnatum. q. 23. ar. 2.	389
Transubstantiatio quomodo fiat. q. 26. ar. 2.	499

V

V Acui definitio. q. 17. ar. 1.	136
In Vacuo corpus non est tanquam in loco. q. 16. ar. 3.	126
Extra Coelum est vacuum negatiuum. qu. 17. ar. 1.	136
Vacuum duplex negatiuum & priuatiuum. ibid.	
Vacuum priuatiuum de potentia Dei absoluta dari potest.	155
Non potest dari naturaliter.	161
An detur aliqua virtus in rebus creatis ad faciendum vacuum.	155
In vacuo an repugnet fieri motum. ar. 2.	163
Si fieret motus in vacuo, non fieret in Instanti.	170
Si fieret motus in vacuo, quodnam vbi acquireretur.	167
Vbi quid sit. q. 16. ar. 1. pag. 91. & ar. 2.	117
Vbi circumscriptiuum non potest esse independens ab omni extrinseco ar. 2. 106. dicitur proprie vbi.	125

Vbi

Index rerum notabilium.

Vbi definitium & circumscriptiuum explicatur. 119. & 112. Explicatur vbi Sacramentale. ibid.	
Vbi in quibus rebus sit.	111
Vbi quoduplex sit.	113
Quænam præsentia constituat vbi. ibid.	
Vbi de spiritali & corporali dicitur æquiuocè. pag.	124
Vbi corporis habentis motum in vacuo duplex. q. 17. ar. 2.	167
Vbi non est vnum specie sed vnum genere. q. 19. ar. 1.	206
Ad vbi est per se motus. ar. 3.	233
Virtus instrumentalis explicatur. q. 26. a. 1.	478
Vtrum corporea vel incorporea.	482
Vtrum qualitas.	486
Quomodo subiectetur in aliquo corporeo. pag.	483
Quomodo proportionata sit ad effectum.	485
An in hoc distinguatur à virtute Principali. ibid.	
Effectus huius virtutis quis sit.	486
Virtus transiens quomodo distinguatur à permanente.	483
Viuentia quomodo se moueant. q. 22. ar. 1. pag. 340. & q. 23. ar. 1.	370
Vnitatis & puncti diuersitas. q. 20. ar. 3. 295. & 305.	
Voluntatis motus an à Generante sit. quæ. 23. ar. 1.	373

*Laus Deo, Beataq; Virgini Maria,
& Angelico Præceptori.*



V. D.

V.D. Fulgentius Orighetus Re-
ctor Pœnitentiariæ pro Illu-
stris. & Reuerendis. Domi-
no Iosepho Musotto Vica-
rio Capitulari Bononiæ.

Reimprimatur.

Fr. Vincentius Vbaldinus Vica-
rius Generalis S. Officij Bo-
non. Ordinis Prædicatorum.

